


الرحمة الغانية

غالب الدين












علم و دین





تعلیم و تربیہ ہیئتِ نچہ مظہر معاونت اولشدر

---

# عِلْمُ وَدِينِ


مترجمی :  
مسین باہر

محرری :  
امیل بوزو

---

استانبول

آقشام مطبعہ سی — ۱۹۲۷





مرفل

# علم و دین

قدیم یونانستاندن معاصر دوره یه قدر

- ۱ — قدیم یونانستانده دین و فلسفه
- ۲ — قرون وسطا - خرسیتیانلق ؛ اسقولاستیکلر ؛ صوفیه
- ۳ — رونه سانسدن صوکره علم و دین - رونه سانس - ازمنه  
جدیده : راسیونالیزم ؛ رومانیتیزم - علم ایله دین قطعی  
بر بولمه ایله بر برلرندن آبرلشدر .

هیئت اجتماعی حاضرده موضوع بحث اولدینی شکلده علم  
ایله دینک مناسباتی تدقیقه کیریشمه دن اول بزم مدنیتیزمک  
توارث ایتدیکی اسکی مدنیتلرده بو مناسباتک تاریخی سرعتله  
برکوزدن کچیرمک فائده لی اوله جقدر .

۱

قدیم یونانستانده دین ایله علم

قدیم یونانستانده دین بو کونکی آکلادیغمز معناده علم ایله -  
یعنی بشریتک اکتساب ایتدیکی مثبت بیلکیلرک هیئت مجموعه سی

ایله — حال مجادله ده دکلدر . فقط فلسفه ایله — یعنی کرک دنیا و حیات حادثاتنک کرک انسانلرک عنعنوی اعتقادلرینک عقلی بر صورتده تفسیری ایله — مبارزه ایدر .

فلسفه قسماً بالذات دیندن دو غمشدر .

یونانستانده دینه خدمتله مکلف بر رهبان هیئت یوقدی . بناءً علیه دین ، تقرر ایتمش ، مجبوری بر عقیده شکلنده تظاهر ایتزدی . دین خلقک حیاته کیرمکه یالکز بر طاقم مراسم خارجه ، آیینلر اجراسنه اونلری مجبور طوتاردی . دینده بر چوق منقبه لر ، خرافه لر واردی که مخیله یی جلب و جذب ایلر ، مفکره یی تنویر و تفکر و ملاحظه یی تحریک ایدردی . بومنبه لرک منشائی نه ایدی ؟ شبهه یوق که بونلرک مرور زمان ایله اونوتولمش بر طاقم ربانی و حیلردن چیق دقلرینه اعتقاد ایدیورلردی . فقط مناقب او قدر صیق ، او قدر مختلف ، او قدر سیال و بر چوق احوالده بر برینه او قدر ضد ، او قدر طفلانه ، او قدر بی معنا ایدی که وحی ربانینک یانی صیرا انسانلرک ده بونلرک تأسسنه اشتراک ایتمش اولدقلرینی کورمه مک غیر قابلدی . خرافاتنک ایچنده ابتدائی ایله عارضی اولانلری آیرمه قالدیشمق بیهوده بر تشبث ایدی . ذاتاً ، اساس اعتباریله صنعتکار اولان یونانستان ، معبودلردن بحث ایدرکن بیله موضوع ایله اوینار . نقل ایتدیکی حکایه لرک معنای حقیقیسنی استخفاف ایدر . دیگر طرفدن ، عنعناته نظراً قدمایه او عنعنوی مناقب اساسلرینی او کرتشم اولان



معبودلرده مخطی و محدود ایدیلر . اونلرده انسانلردن فضله  
برشی بيلمیورلردی . بناءً علیه فلسفه بوخلق خرافاتنك ايجنده  
واونك تشويق و مساعدده سیله غایت سربست بر صورتده انكشاف  
ایده بیلردی .

بالطبع فلسفه ابتدا کندی سود ننه سنی رد و انکار ایله  
ایشه باشلادی . قسه نوفان دییورکه : « معبودلری خلق ایدنلر  
انسانلردر . چونکه معبودلرده کندی چهره لرینی ، کندی  
حسیاتلرینی ، کندی لسانلرینی بولورلر . اکر اوکوزلر رسم  
یا پیمه سنی بیلسه لردی معبودلرینه اوکوز شکلنی ویریرلردی .  
هومر ایله هزیود انسانلر ایچون معیوب وجانیانه اولان نه قدر  
شیلر وارسه هپسینی معبودلره اسناد ایتشلردر . « آناقساغورك  
بیاناتنه نظراً ییلدیزلر برر اله دکلدر . بونلر نار بیضا حالنده  
بولونان برر کتله در . دنیاده کی طاشلر ناصل ایسه اونلرده  
اوطبیعتده در . سوفسطائیهدن بعضیلری بالذات معبودلره لطیفه  
ایدرلر . پروتاغوراس دیردی که : « معبودلر وارمیدر یوقمیدر  
دیه مشغول اولغه احتیاجم یوق : برچوق شی نی بوندن منع  
ایدر . از جمله موضوعك قارا کلنی و عمر بشرك قیصه لنی . »

ایشته فلسفه بویله تعریضکار ، معتقدات دینه یه قارشی لاقید  
یا خود عالی ، اخلاق نقطه نظرندن مستقل ، حتی سیاسیات  
اعتبار یلده حر بر صورتده بویودی . واقعا بعض فیلسوفلر  
دوچار فلاکت اولمشلر سده بو ، عمومی دینه مغایر کی کورونن  
بعض تفرعات ایچون ایدی .

فلسفه نك بو انكشافی ذكانك وعقل بشرك انكشافندن  
 باشقه برشی دكلدی . متفكر لر بو عقله او قدر مفتون اولدیلر كه  
 اونی انسانك وكائناتك اساسی ، عمده سی یامغی امل ایدیندیلر .  
 آرتق عقلك كندیسنه تعین ایتدیكى وظیفه ، دنیانك یكانه  
 قانونی كی كورونن اولاقید تصادف یاخود كور مجبوریت  
 قارشیسنده وارلغنی وقوتی كندی كندیسنه قارشى اثبات ایتكدر .  
 بو وظیفه ده صنایع نفیسه ده كی مطالعاتدن ملهم اولدی .  
 صنایع نفیسه ده صنعتكارك مفكره سنك غیر متجانس بر ماده ایله  
 چارپیشدینى واوماده اولمازسه حیز فعله چیقامادینى كورولور .  
 بو ماده نك شكلى ، قانونلری ، تمایلات مخصوصه سی واردر ؛  
 صنعتكارك افاده ایتدیرمك ایسته دیكى افكاره قارشى لاقید  
 حتی معارضدر . بویله اولقله برابر صنعتكار اوكا حاكم اولور .  
 حتی دها ایلری یه واریر . حتی اونی تسخیر ایدر ، ویردیكى  
 شكل مستعار ایچنده اونی نرم و خندان بر حالده كوستیریر .  
 صانكه مرمر ، پاللاسی یاخود آپوللونى تمثیله خواهشكر ایمشده  
 صنعتكار اونك بو قوتی سربست براقش كی كلیر .

عقلده آنانكه نك Ananké نك قارشیسنده بویله بر موقعده  
 دكلیدر ؟ افلاطونه و آرسطویه كوره « آنانكه » یعنی جامد ماده  
 عقله و اولچویه قطعی و اساسلى صورتده معارض دكلدر . عقلك  
 و ماده نك طبیعتلری نه قدر تعمیق اولونورسه بر برلینه یاقلاشد .  
 قلی ، بر برلینی چاغیرد قلی ، برلشدكلی او قدر نمایان



اولور . ظاهرأ الك غير معين كورونن بر ماده ده بيله بر شكل موجود اولديغنى آرسطو اثبات ايدر . ماده اساساً بالقوه برشكلدن باشقه برشى دكلدر . بناءً عليه عقل موجود درو مؤثر در . چونكه او اولمايه جق اولورسه وار اولان شيلردن هيچ برى بولونقلرى حالده پايدار اوله مايه جقدر ، بالعكس هرج و مرج عمومى ايچنه عودت ايده جقدر . بز طالعتك عنف و خوشونتندن ، حياتك سفاتلرندن و حقسز قلرندن شكايترلر ايدر . بو ، دوغرو در . فقط قاريشق اشيا نك آنحق بر منظره سندن عبارت در ، كيم بوكا عقل ايله باقارسه ايچنده عقلى بولور .

يونان فيلسوفلرى طبيعت داخلنده كى رولى بويله فرق ايتدكلرى عقلى كيتدكه ده ايو كسك ، كيتدكه ده ايو قوى بر حاله كتير مكه صرف مقدرت ايلشردر . عقلى اونلر بويله نه قدر چوق تجيل و ثنا ايدر لرسه ، كنديلرنده هم ماده هم عدم وجود بولونان موجوداته نسبتله ، عوام دينك راست كله بر چوق شيلره صرف و ابزال ايتديكى الهى وصفه ده ايو چوق كسب لياقت ايتديكى كور و ليوردى . آرسطو : بوتون طبيعت عقله معلقدر ، فقط بوتون طبيعت عقله مساوى كلكدن عاجزدر ، ديوردى و عقل اكملك ، بذاته تفكر ك موجوديتنى اثبات ايدرك بو عقله الله اسمنى ويريوردى . بناءً عليه عقل ، عنغوى ديندن انحراف ايدىورسه بو ، بالذات طبيعتك بيلنمى اساسنه مستند و ده ايوغرو بر دين تأسيس ايتك ايچوندى .

عقل معبود مجرد برشی ، بر محاکمه دکلدر . طبیعتک  
 رئیسیدر ، بوتون اشیایی اداره ایدن بر حکمداردر . زوس  
 نامی اصل اوکا عاؤدر . رواقه دن قله آنت دیورکه : « سماءه  
 دور ایدن بوتون بوکائات سن اوئی نره یه کوتوریورسه ک  
 کندیلکندن اورایه کیدیور . شمشکی طوتان الک هرشیئی ،  
 الک بویوکلرینی واک کوچوکلرینی ، عقل عمومی یه منقاد قلیور .  
 هیچ بر یرده هیچ برشی سنمز وقوعه کلز . یالکز فنالرك  
 دلیک ایچنده یاپدقلى شیلر مستئادر . فقط سن تک برعددی  
 چیفت یاپه بیلیرسک . بر برینه اویمایان شیلره آهنگ ویره بیلیرسک .  
 سنک نظرك آلتنده غرض دوستلغه تبدل ایدر . ای بولوتلرك  
 آرقه سنده كوك كورولتولرینه حکم ایدن الله ، انسانلری بو  
 مشئوم جهالتلرندن چك ، قورتار ؛ روحلرینی قارارتان  
 بولوتلری ازاله ایت ، ای پدر ! هرشیئی ذکا واسطه سیله عادلانه  
 اداره ایدیورسک . انسانلری بو ذکایه اشتراك ایتدیرکه سنک  
 صنع و آثارکی بزم کبی فانیلره ترتب ایتدیکی وجهله لاینقطع  
 تجیل ایدهرك سکا عرض حرمت ایدلم . چونکه كرك فانیلر  
 كرك معبودلر ایچون قانون عمومی یی مناسب کله لرله ابدیاً تجیل  
 ایتمکدن بویوك برامتیاز یوتدر . »

ایشته فلسفی دین بوایدی . خلفک دینی ایله عجا باریشماز  
 بر دشمن می ایدی ؟ اونک نظرنده زمانک حرمت ایتدیکی ،  
 قدسیت و یردیکی بو خرافات ، هرشی بر خولیادن ، بر قاریشقلقدن ،

بر هرج و مرجدن عبارت می ایدی ؟ خلق، ییلدیزلری الوهیت مرتبه‌سنه چیقارمشدی . فقط ییلدیزلر حرکتلرینک انتظام تامیله قانونک یعنی عقلک، اللهک دوعرودن دوعرویه برتظاهری دکلیدرلر ؟ خلق ژوپیتره معبودلرک وانسانلرک حکمداری دیه پرستش ایدر . بو اعتقاد، کائناتک بوتون اقسامی بر برلرینه ربط ایدن واونلری بر روح مشترکه تابع تک بوجودکی یاپان ارتباط حسنی احتوا ایتیمورمی ؟ دین، قانونلره حرمتی، وظیفه صدیقی، اولولره قارشی احترامی امر ایدر؛ ضعف بشره صیانت معبودلرینک معاونتنی تأمین ایلر . بوایشده عقلک بر یاردمجیسی ، بر ترجانی وظیفه سنی ایفا ایتیمورمی ؟ حقیقی الله اولان عقل ، انسانک یتیشه مهیه جکی برشی دکلدرد . انسان بوکا اشتراک ایدر . بناء علیه دینلر هم بشری ، هم مستحق حرمت اولابیلرلر . عنعنوی مذهبلرک عقل عمومی ایله اولان مناسبت خفیه سنه نفوذ ایتک وبو مذهبلردن بعض روح حقیقی احتوا ایله ین شیلری ادامه ایله مک فلسفه یه عائد بر وظیفه در .

ایشته بو صورتله فلسفه یاواش یاواش دین ایله باریشدی . افلاطون ایله آرسطو سمانک وییلدیزلرک الوهیتنه دائر اولان خلقک عنعنوی اعتقادینی قبول ایده رک ، عمومی صورته ، خرافه لر ایچنده فلسفی دوشونجه لرک ایزلرینی ، پارچه لرینی آرارلر .

رواقیون stoïciens نزدنده عقل ، « کلیت اله » جلیق panthéistique معناسیله ، روحک قسیم غالبی وهرشیدک اساس



وغايه سى اولور. انسانلرك عمومى و ايجلرندن كلن اعتقادلرنده ، فردى احتراصلرندن و اجتهادلرندن كنديلرينى آيرمغى اونلره اوكره تن هر شیده بعض صورتلرله بهمه حال عقل موجوددر . شبهه يوق كه خرافه لر ، منقبه لر و مراسم دينيه ، معبودلرى انسانلرك سويه سنه حتى دها آشاغى به ايندير دكلرى تقديرده ، استخفاف و استحقار ايدلمكه مستحق اولورلر . فقط معنالرينى آكلامق يولى بولونورسه ، معنای حقيقيدن معنای تمثالى به انتقال ايديليرسه بو حكايله لك اعماقده بر طاقم حقيقتلر موجود اولديغى كورولور . كندى وحدتيله و هر يرده موجوديتيله اشيايى بر برينه ربطايدن زوس ، اللهك تمثايلدر . ايكنجى درجه ده كي معبودلر ايسه ، عناصرك ، محصولات ارضك ، بويوك آدملرك ، بشريته خدمت ايدنلرك ، اوچوقلغى و مختلفلكى آراسنده نمايان اولديغى شكلده قواى الهيه نك تمثايلدرلر . هر مهس ، ديونيزوس ، هراقلس هپ وارلغنك مختلف جهتلرندن باقلديغى زمان مختلف سيمالرله كورونمش اولان زوسدن عبارتدر . هراقلس قوتدر ، هر مس علم الهيدر . هراقلسه عبادت ، سعى و غيرته ، عقل سليمه حرمت ، اخلاقسزلقدن و شهوتدن نفرت ديمكددر . رواقيون بويولده توقف ايمه سنى بيلمديلر . تمثالى تفسيرلرينك خيالپرورلكى هر حدك فوقه چيقدى . چونكه خلقك اعتقادات و آينلرندن ممكن اولديغى قدر بويوك قسملرى قورتارمق ايستيورلردى . عقل يالكز بر صنف كزيده نك اوزرنده دكل

بوتون انسانلرک اوستنده اجرای حکم ایده بیللمک ایچون  
ذکالرک تخلفنه کوره مختلف بر طاقم شکلر اکتساب ایتلیدر  
فکرنده ایدیلر .

یونانلیرده فلسفی مفکره نك صو ك اهمیتی تظاهری یکی  
افلاطون مذهبله تجلی ایدر . بو مسلك ، عقلك لی واساسی  
حقنده بر طاقم تفکرات و مطالعات اعانه سیله نامتناهی بر وجود  
احدنظریه سی میدان قویدی و بوضورتله عقلك ده فوقه یو کسلمک  
ایسته دی . فقط اشیا به ، حیات و تفکره قارشى الوهیتی یو کسك  
طوتمق ایچون نه قدر چالیشدیس و ارلنك اشکال سفلیه سی ایله  
اشکال علویه سی آراسنده کی مسافه یی دولدورمق ایچون اورته  
یرده بر سلسله مراتب موجودات یامغده او قدر مجبوریت  
حس ایتدی . ایشته عوام خلقك دین ساحه سی بو آراده کی  
مسافه در . بوراده موجود اولان و بزم ضعف لر مزه پك یقین  
بولونان معبودلر ، معبود علویه دوغرو یو کسلمک ایچون بزه  
الترینی اوزاتیرلر . پلوتن و بالخاصه شا کردی پورفیر یا و اش  
یا و اش ، خرافه ، عنعنات ، عبادت اصنام ، دعا ، قربان ،  
سحر کبی دینك بوتون عناصرینی عقل نقطه نظرندن محق  
کوسترمکه باشلار . حواسك ادراک ایتدیکی ایله ذکالنك بولدیی  
شیلر آراسنده اخذ موقع ایتمش اولان بوتون بو عناصر - انسانلرک  
غیرمادی و کلمات ایله غیر قابل افاده اولان شیئه دوغرو توجیهنده ایفا  
ایتدکلری الزم وظیفه اعتباریله - ایدرلر و حقیقتدن حصه داردرلر .

### قرون وسطا

ایشته یونان فلسفه سنک دینه قارشی وضعیتی بویله اولمشدر. اوکا خلف اولان خرستیان تفکری بوفلسفه یی احتوا ایدن وقوف ومعلوماتک وطبیعی افعال وحرکاتک چرچوه سنی قیردی . دین فکری - یونانیلرده کی واضح دهانک نظرشبهه ایله کوره جکی - نامتناهی بر محبت وقدرت ایله بویویه رک آرتق دنیانک وحدت وحیاتی ، نمونه ااکملی ، اکصوک ایضاحاتی اولقله اکتفا ایتدی. اولا ، تفوق ورجحان مطلق وکمالی حسیله کنیدیسنی هر شینک فوقنده وخارجنده عدا ایتدی . الله واردر . چونکه الله قوتدر ، عظمتدر ، استقلالدر . چونکه وارلقدر . آرتق مفکره دنیا مزک کوستردیکی مکملیت ایزلرینه باقه رق استقراء طریقله ، زحمت چکه چکه - او مکملیتدن برآزدها عالی اولان - بر سبه دوغرو یوکسلمه یه جکدر . خرستیانلغک اللهی کندی کنیدیلکندن معلوم اوازر . بودنیاده کی موجوداتی نظر اعتباره آلمغه حاجت یوقدر . اونلر هیچدن واللهم کیفیه یارادلمشدر . اللهم قوت وقدرتنک برر نمونه لریدر . بناء علیه آرتق دین ، نظری یالکز الله معطوف ، کمال سربستی ایله انکشاف ایده جکدر وممکن اولدیغی قدر صرف دین اوله رق قاله جقدر . چونکه انسانلرک وطبیعتک تماشاسی اوزرینه مؤسس بر دین دایما طبیعت جیلک و انسانه بکزمه جیلک anthropomorphisme ایله قاریشیق بولونور .



بو معناده در که ، عیسا انسانلره شوسوزلری سویله مشدی :  
 « من بر چوق شیلرله مشغول اولیورسکز . حالبوکه لازم  
 اولانی یالکیز بردانه در . » ابتدا اللهم حکومتی آرایکز :  
 بوتون اوته کیلر سزه اوسته ویریه جکدر . »

صانکه بالذات روح ، ماده دن هیچ برشی استعاره ایتمکسزین  
 بودنیاده حیز فعله چیقاجق و مافوق طبیعی بر وجود تشکیل  
 ایده جکدی .

فعلیاتده ایسه ، خرستیان دوشونجهسی تسخیر ایتمک  
 ایسته ریکی عالمک شرائطی ، مؤسسائی ، اخلاق و عاداتی ،  
 معتقداتی ، عنعناتی نظر اعتباره آلمق مجبوریتنده قالدی .  
 بر سوزی آ کلاته بيلمک ایچون بالضروره مخاطبک لسانیه  
 سویله مک ایجاب ایدر .

خرستیانلق عقلی و علمی تفکره یونان فلسفهسی شکلی  
 آلتنده تصادف ایتدی . بو تلاقیده ، برباقیمه ، کندی روحنی  
 دها ایی آ کلامق ، بونی دها ایی انکشاف و تعین ایتدیرمک  
 فرصتی بولدی . یونان فلسفهسنه نظراً ، الله ایله قانون عمومی  
 کائنات بر ایدی . دنیا ، کندیلکندن ، آهنگ و عدالتک  
 جاذبهسنه حساس ایدی . بوکا قارشلی خرستیانلق مافوق طبیعی  
 بروحیه ایمان ایتمکی اورتیه چیقاردی . طبیعی حالده کی انسانلرک  
 اخلاقسزلنی و سفالتی حقنده درین بر حس و یردی . صرف  
 عشق و مرحمتدن عبارت بر اللهم موجودیتنی تأمین ایتدی .

بو الله انسانلری قورتارمق ایچون انسان اولمشدی . فقط دیگر طرفدن مشرک محرر لر بو فکر لرک عقله مغایر اولدیغنی سویله نیجه خرستیانلر معارضلرینک نقطه نظرنی قبول ایدهرک بو اتماماته قارشى مدافعاته قیام ایتدیلر . اریوژن Eriugène ، سلس Celse ه قارشى خرستیان ایمانک عقله توافقنی اثبات ایتدی . ایشته بو صورتله « اسقولاستیک » تسمیه اولونان شکله منتهی اولاجق یول آچلمش اولدی .

خرستیانلق بوتون حیات بشره حاکم اولق ایسته دیکی ایچون اراده نك و قلبك احتیاجاتنی تطمین ایتدیکی قدر ذكانك احتیاجاتنی ده تأمین ایتك مجبوریتنده ایدی . فقط او زمان ذكانك اسمی وضوحك ، منطقك و آهنگك بر شاه اثری اولان یونان فلسفه سی ایدی . ایماندن ذکایه کیتك بو فلسفه یه واصل اولق دیمکدی . حقیقت حقیقتی تکذیب ایده مز . بناء علیه الله ینه نور طبعینك روحی والهامك صانعی اولان او اکمل ودوعرو الله ایدی . دیمك که اصل فلسفه ایله اصل دین اساساً عینی شیدن عبارتدر . مع مافیه سقوت اریوژنك بومطالعہ سی پك اوستون کوری ایدی . فلسفه نك و دینك منابى و بناء علیه دائره شمولی عینی شیر دکلدرد . فلسفه ایله الهیات آراسنده توافق محققدر ، فقط ایکیسنك ده ساحه سی آیریدرد . خلق ایدلمش موجوداتك بیلکیسی ، و خلق ایدلمش موجوداتی تأمل ایله انتقال ایدیله بیله جك ماهیت الهیه نك بر قسمی فلسفه ساحه سنه داخلدر . الوهیتك ماهیتك

وحیات باطنیه سنک بیلکیمی ایسه الهیاته عائددر . عقل ایله ایمان بوصورتله وارلق ساحه سنی پایلا شیرلر . ناصل که هیئت اجتماعیه ایچنده ده پایا وایمپراطور ایمپراطورلنی پایلا شمشلردر . مع مافیه آرالرنده مساوات یوقدر . عقل ایله ایمان ، دره بکلك طرزنده و آرسطویه کوره بر سلسله مراتب تشکیل ایدرلر . مادونده اولانلر مافوقده کیلرینه عرض تعظیما ته مجبوردرلر . مافوقده کیلرده مادونک امنیت و حقوقنی تأمین ایدرلر . فلسفه ایمانک مقدماتنی اثبات ایدر . غفران الهی طبیعتک وعقلک قدرتلرینی محو ایتمز ، اونلری بوتون تمامیتیه تحقق ایتدیرر . فلسفه ایله الهیات آره سنده کی بواثلاف ، بر متقابل توافقی تضمن ایدیوردی .

یونان فلسفه سنک ایچنده بالخاصه خرستیان عقیده سنک انکشافی ایچون قابل استفاده اولان اقسام ایله مشغول اولدیلر . فرضا طبیعی الهیات مذهبی کبی تلقی ایتدکلری علم وجودی *ontologie* آلدیلر؛ آرسطونک منطقندن اثباتک اوریاضیاتی ، ذکا سایه سنده آ کلاسیله بیلیمک نظریه سنی سچدیلر . وبو نقطه نظرندن اوکا اوילה صرف شکلی بر حال ویردیلر که آرسطوده بویله بر شی یوق ایدی .

دیگر طرفدن ، دینی بعض شیلره اویمق طرزینه منقاد بولوندیردیلر . انجیلده اساس اعتباریله روح ، عشق ، اتحاد ارواح ، حیات باطنیه ، کلام و دستور ایله غیرقابل افاده اولان



شیر سقولاستیک ذکا ایله آ کلاشیله بیلیمک شرائطنه توافق  
ایتمک ایچون برطاقم دیک وسرت تعریفله، قالبلرایچنه کیرمکه ،  
اوزون برر قضایا شککنده صیرالانمغه ، مجرد و قطعی برمنظومه  
مفهومات حالنی آلمغه مجبور اولدیلر .

ایشته بوصورتله قرون وسطاده خرسیتیانلق، یونان فلسفه سندن  
استعاره ایدیلن برشکلی اکتساب ایدهرک ذکانک احتیاجاتی  
تطمین ایتدی . فقط بو ترتیب عارضی الی نهایت دوام ایده مزدی .  
ذاتاً ، ده اودورده صوفیه تسمیه ایدیلن آرزوق متجرد  
وبعض کره شبهه لی خرسیتیانلر ، فردی شعورلرک فلسفه یه حتی  
الهیاته عائد متوسط طره حاجت قالمادن الله ایله دوغرودن دوغرویه  
مناسبتده بولونمغه حتی اولدیغنی ادعا ایدیورلردی . علم مناظره  
وجدله : ایمان وعشقی، نظریاته : عملیاتی قارشی قویبورلردی .  
ذاتاً بوتون دینی صرف روچده و چپلاق بر قوه احتمالده  
جمع ایدوب طویلماق فکرنده دکلدیلر . روح ایچون ایکی  
طریق اولدیغنی سویلیورلردی . برنجی یولده انسانلر حیات  
طبیعه نك لوئیاتندن تمیزله نیرلردی . صوکره ، روح ، سینه  
الوهیتده ، الوهیتک نورینه و قدرته اشتراك ایدهرک یکی بر شکل  
آلیردی . بو ، روحک دوغرودن دوغرویه بر خلق وایجاد  
وافاده سی ایدی . اقهارت ، Eckhart روح درجه قدسیته واصل  
اولدیغنی زمان آثار منقطع اولماز دیردی . بالعکس هم حر هم  
ای اولان اصل فعالیت ، بوتون مخلوقاتیه حتی دشمنلره قارشی

بیله محبت ، بوصلح و سکون عمومی ، اوقدسیت ایله باشلاردی .  
 آثار بر واسطه دکلدی ، قدسیتک بر تشعشی ایدی .  
 رسمی مذهبک مجرد و قطعی دستورلری قارشیسنده صوفیه  
 بعضاً مبهم فقط دائماً جانلی و آتشین غلیانلرله خرسیتیانلغک حر  
 روحنی ادامه ایدرکن سقولاستیک یکدیگرینه تقریب ایتدیکی  
 و آهنگدار بر صورتده برلشدرمکه تشبث ایلدیکی ایکی عنصرک  
 برنوع سعی داخلی نتیجه سنده آیرلمقده اولدقلرینی کوریوردی .  
 یونان فلسفه سنک تأسیس ایلدیکی مقولات ، اونلری ایجاد  
 ایدنلرک فکرنبجه ، بزم دنیا مزده کی اشیایی دهایی آ کلامغه  
 و آ کلایه جق حاله کتیرمکه خدمت ایده جکلردی . خرسیتیانلق ،  
 کندی کندیسنی انکار ایتدکجه ، بونلری تمامیه قبول ایده مزدی .  
 دیگر طرفدن فلسفه ده سقولاستیک ایچنده صیقلدیغنی حس  
 ایدیوردی . فلسفه یه شخصیت الهیه یی ، کائناتی خلق ایتک  
 امکانتی ، روحک ابدیتی ، روح بشرک اراده جزئییه سی حر  
 اولدیغنی اثبات ایتک مجبوریتلرینی تحمیل ایدیورلردی . کندی  
 کندیسنه صاحب اولورسه ، هیچ برتأثیر آلتنده قالمازسه فلسفه نک  
 بو نتیجه لره واصل اوله جفی محقق می ایدی ؟ ذاتاً ابتدا اورتیه  
 بر طاقم عقیده لر قویه رق صوکره بونلری تحلیلله و بعض شیلردن  
 استتاجه چالیشمقله اکتفا ایتک فلسفی وقوفک شرائطنه هیچ ده  
 موافق دکلدی .

رونه سانسدن سوکره علم و دین

سقولاستیک کړک بویه داخلي برسېله انفساخذن کړک  
خارجی برطاقم تاثیراتدن ایکی حرکت انبعات ایتشدرد . رونه -  
سانس دورینک وصف مشترکني ایشه بو چیفته حرکت  
تشکیل ایدر .

بر طرفدن تصوفی خرسیتانلق دینک اصل و لینی حیات  
باطنیه ده ، روحک الله ايله دوغروذن دوغرویه مناسبتنده ،  
نجاته و قدسیت مرتبه سنه وارمق ایچون شخصی جهد و تجاریده  
کوره رک غنوی کلیسادن شدتله آیرلدی . و بر تصادف « ره فورمه »  
دنیلن تشبیه مادی بروضوح و قطعیت ویردی . بو اولماسه ایدی  
احتمالکه « ره فورمه » قرون وسطاده نمایان اولدینی اوزره  
صرف روحی بر خواهش و تمایلدن عبارت قالیردی . ره فورمه نک  
اساسنی تشکیل ایدن شخصی بر حیات دینه احتیاجی - تدقیقات  
و تبعات ايله موثوق و خالص بر صورتده تثبیت ایدیلن - اسکی  
متنله اعتبار ایتمک و اهمیت ویرمک فکری ايله برلشدی . قرون  
وسطانک قاتولیکلکی آرسطویی آباء کلیسائییه نک الهیاتنه برلشدردیکی  
کبی لوترده ارازم Erasm ايله صوفیه وجداتی مزج و توحید  
ایتدی . بو صورتله کنجهلشن خرسیتانلق فکرینه یکی بریول  
اچلدی .

دیگر طرفدن فلسفه ده سقولاستیکلرک الله کندیسنی



الهیات ایلہ برلشدرمش اولان رابطہ یی قیردی . کاه افلاطونه کاه اصل آرسطویه کاه رواقیونه یاخود اپیکورجیلکه یاخود قرون قدیمه نک باشقه برمذهبنه استناد ایدهرک الهیاتک وقرون وسطا آرسطوسنک بویوندوروغنی شدتله سیلکدی آتدی ، باشنده کی صاحب وحا کمی دکیشدیره رک استقلاله دوغریورودی . نیقولا دو قوزا Nicolas de Cusa ، برونو Bruno ، قامپانلا Campanella یکی مذهببر تأسیس ایتدیلر .

هپسی بو قدرله قالمادی . اصل علم ، طبیعتک محقق ومثبت علمی اودورده باش کوستیرر ، حر ومستقل اوله رق انکشاف ایتک املنی بسلر . بو ، بالخاصه طبیعتک قوتلیری حصوله کتیرمک ونمسه مک املیه ، خلق وایجاد ایلہ نمایان اولمشدر . وقتیلہ ، اللهک خلق و اداره ایتدیکی شیلرک جریانہ قاریشمق وکنیدلکلرندن یامعادقلرینی اوشیلره یایدیرمق جرأتی بالخاصه شیطان کوسترمشدی . اونک ایچون آلتون اعمالی یولنی آرایان علم سیمیا متخصصلری سحر باز لرله قاریشدریلیردی . فقط آرتق یالکز طبیعتی سیر و تماشایله اکتفا ایتمین فعال بر علم فکری ، انسانک طبیعتہ حاکم اولایله جکنه ایمان ، مقاومتسوز بر شکل آلیوردی .

فاؤست ، سقولا ستیکلرک عقیم تدقیقات و تبحراتندن بیه رق غایه یه واصل اولق ایچون بسله دیکی صبرسنزلق تاثیریلہ سحره کندیسنی ویریر . حادثاتی حصوله کتیرن مجهول قوتلر تسخیر

ایدیلسین ، آرزویه کوره اداره ایدیلسون ده نه واسطه ایله  
اولورسه اولسون ، بونک نه اهمیتی واردی ؟

Drum hab'ich mich der Magie ergeben

( ایشته بونک ایچون سحر بازله قویولدم . - کوته ،

فأؤست )

ایشته اون آلتنجی عصرده علم و فنه بویله علوم مخفیه  
sciences occultes تقدم ایدیوردی . اوزمانک مفکره لرنده ده  
بو علوم مخفیه طبیعت پرست بر کلیت اله panthéisme جیلق ایله  
برله شیوردی . بو کلیت اله نظریه سی موجوداتک صرف طبیعی  
بر صورتده ایضاحی و تجربی اصولک استعمالنی دعوت ایدیوردی .

\*  
\* \*

بوتشوش و تخمر دوره سنک یرینه باقون وده قارت ایله یکی  
بر انضباط ، انتظام و موازنه دوره سی قائم اولدی . اوزمان  
غلبه چالان روحک اک واضح واک تام افاده سنی ده قارتک عقلی  
اصولنده بولورز .

بر طرفدن ، لئونار دووینچی نک واضح صورتده تصور  
و ادراک ایتدیکی طبیعتک علم تجربیسی غایله ایله صورت قطعیده  
تأسس ایتشدی . غایله ۱۶۰۴ تاریخنده رقاص قانونلرینی کشف  
ایتمکله طبیعتک حادثاتی بر برلرینه ربط ایدرک خارجه ده هیچ  
بر قوتک اعانه سنه مراجعت ایتمکسزین ایضاح ایتک قابل اولدیغنی  
اثبات ایله مشدی . بناء علیه قانون طبیعی مفهومی آرتق وجود

بولش ديمكىدى . حالبوكه يالكز رياضياتك وتجربه نك اغانه سنه  
مراجعت ايدن بو علم بالخاصه غاسندى Gassendi طرفندن  
اپيكورك قديم ذره نظريه سنه ربط ايدلدىكى جهته بر چوقلىرى  
بونى خرستيانلغك مافوق طبيعت اعتقاداتيله غير قابل تأليف  
كورديلر . هوائى ياخود جدى بر طاقم جرئتكار متفكرلر  
طبيعتجيك (ناتوراليزم) مسلكنى ولا الهيلكى ايلرى يه سورمك  
وتأيد ايتك ايچون علمدن استفاده ايتديلر .

ديكر طرفدن دينى ايمان ، بو كچيردىكى صدمه لردن قوت  
آله رق هم پروتستانلرده هم قاتوليكلرده يكي بر شدت ايله نمايان  
اوليوردى . هرايكي طرفده دينى ايمان يالكز غغنايه وعصرلردن  
برى دوام ايدن مراسم طاعاته مربوط ساده جه بر اعتياد  
مفكره دن عبارت برشى ديه تلقى ايديله ميوردى . او ، صميمى  
بر قناعت ايدى كه اوغورنده مجادله ايدىورلر ، اضطرابلره  
قاتلانيورلردى .

ظاهراً بر برلرينه ضد بر طاقم اساسلره استناد ايدن  
بو ايكي قوتك يعنى علم ايله دينك اعماق شعور داخلىنده كى  
مناسبتلىرى عجيبانه اوله جقدى ؟ بومسئله يي ده قارت اويله بر صورتده  
حل ايتدى كه ويردىكى ايضاحات اوزون مدت عصرى مفكره نك  
مطالباتى تظمين ايدىيور كى كوروندى .

ده قارت ، دين ايله علمك بر برلردن مستقل اولدقلىرى  
اساسنى وضع ايدر . علمك كنديسنه مخصوص بر مالكانه سى

وارد در : طبیعت . کندیسنه مخصوص برغایه سنی وارد در : قوای  
طبیعیه نك تملکی . کندیسنه مخصوص آلاتی وارد در : ریاضیات  
و تجربه . دین ایسه روحك دنیا فوقنده کی مقدراتی ایله مشغول  
اولور ، برطاقم معتقدات اوزرینه استناد ایدر . مع مافیه  
بومعتقدات غایت ساده در واسقولاستیک الهیاتنك اوانجه لکری  
ایله هیچ حائز مناسبت دکدر . علم ایله دین نه بربرلرینه مشکلات  
ایقاع ایدر لر ، نه بربرلرینی تحت حکمه آلابیلر لر . چونکه  
طبیعی و مشروع بر صورتده انکشاف ایدر لر سه هیچ بربرلرینه  
راست کملر لر . قرون وسطاده الهیات فلسفیه بر طاقم نتایج  
کوستره رك اونلری اثبات ایتمه و برطاقم اساسلر قویه رق اورادن  
حرکت ایله مکّه فلسفیه یی اجبار ایدردی . آرتق بوزمانلر کری  
کلمه ملیدر . علم ایله دین ، هرایکسی ده مختاریت اداره یه مالکدر لر ،  
مستقلدر لر .

فقط بوندن ، مفکره بشریه نك علم ایله دینی بربرلرینه  
یابانجی ایکی صنف حقیقت اوله رق قبول ایتسی لازم کملر .  
فلسفی بر فکر بونلرک بویله بربرلرندن صورت قطعیه ده آیری شیلر  
اولدیغنی قبول ایده مز . ایشته ده قارت مسلکی منطق نقطه  
نظرندن بربرینه غیر قابل ارجاع ، بربرندن فرقلی و مختلف شیلر  
آراسنده بر ارتباط و توافق مسلکیدر . قبول ایتدیکی  
اساس : Cogito ergo sum « دوشونیورم ، بناء علیه وارم »  
بر قضیه نك نتیجه سی دکدر . بالعکس بو قضیه ، نتیجه یاقم ،



استخراج ایتمك ایسته دكلى بر قضیه نك شرطی و دلیلدی .  
 « بناءً علیه » ك افاده ایتدیكى لزوم : « هر كیم كه دوشونور ،  
 واردر » طرزنده عمومی بر قضیه ایله افاده ایدیه بیر . بوقضیه نك  
 وجودی ، « مادام كه بنده دوشونیورم بنده وارم » نتیجه سته  
 منتهی اولان بر قضیه نك تشکیلی دائرة امکانه صوقار . اصل  
 ایلک و حقیقه متمر و قوف بر برینه یابانچی کی کورونن ایکی  
 حد آره سنده کی ارتباطدی .

بویله بر ارتباطی ناصل کشف ایتلی ؟ ده قارت تجربه نك  
 بزه بویله و قوفلر تدارك ایتدیكى سویلر . ابتدا تصادف و احتمال  
 دائرة سنده اولان بوتجربی ارتباط و توافقلردن ، مفکره ، حواسك  
 تجربه سنی - ده قارتك حدس intuition تعبیر ایتدیكى - حس  
 فوقنده بر نوع تجربه ایله تفسیر ایده رك ضروری و عمومی  
 بر طاقم بیلکیلر چیقاریر . بزم ایچمزده بر ضروری ارتباط  
 و توافق اساسی و تملی واردر كه بوكا عقل تسمیه ایده رز .  
 ده قارتك مسلکی ایشته بویله بر « راسیونالیزم - عقل جیلق » ، عقله  
 خصوصی بر قدرت ، خصوصی بر طاقم قوانین ، بر ارتباط  
 ملكه سی و بر محتویات عطف ایدن بر نقطه نظر ایدی .

ده قارت دین ایله علمك مناسباتی بویله بر شكلده تصور  
 ایتشدی .

« دوشونیورم بناءً علیه وارم » دستورنده واراومنی دوشونمكه  
 ربط ایده جك بر حکمك تمنی عقلده بولدیغی کی انسانك الله

واللهك دنيا ايله اولان مناسباتى ده ينه عقلده بولدى . بونك نتيجهسى اوله رق علم ، طبيعت ومعتقدات دينيه قطعى صورتده بربرينه توافق اهديورلردى . ده قارت بوكا عقلك محتوياتى تحليل ايله وبر طاقم استنتاجلرله واصل اولور . بو استنتاجلر يالكز قضييه وى و صرف شكلى دكل اومحتويات اوزرينه مؤسس ورياضيدرلر .

بوراده دينك يالكز الله ونامتناهيليكي، كالى وبزم اوكتابعت ومربوطيتمز كى اصل اساسلرينك موضوع بحث اولدغى آشكاردر . مثبت دينلره كلنجه فلسفهك اونلردن بحث ايتكه هيچ صلاحيتى يوقدر . سقولاستيك الهياتك ميدان ويرديكي افترالر، مناقشه لر، اعتزالر، مذهب لر عقله كتيريلنجه بونلرك كاملاً اورته دن قالقماسى تمنى اولونور . حقيقتده ، بسيط فكرلرلر وجاهلرده عالملر قدر جتته نائل اولورلر . اونلرك صافدلانه اعتقادئرى كلام علماسنك الهياتندن دها اميندر .

ايشته ده قارتك مسلكى بوايدى . بومسلكه كوره هم دينى وعلمى دوغوران نمونه هم بربرينه توافقلرى سايه سنده اونلرك متقابل استقلاللرينى تأمين ايدن خصوصى رابطه هب عقلك ايچنده موجوددر . عصرى راسيوناليزم نامى ويريله بيله جك بومسلك اون يدنجى واون سكرنجى عصرك فلسفى دوشونجه سنه حاكم اولمشدر .

بر صنف فلیسوفلرده بو عقلیه مسلکی دها زیاده عقیدوی  
dogmatique بر شکل المشر ؛ قوته کووه نه رک ، علم طبیعت  
ایله موازی اولمق اوزره ، بدهات و قطعیت جهنده علوم حکمیه  
وریا ضیه دن هیچ بر خصوصده کیری قانایه حق بر الهی اشیا علمی  
تأسیس ایتک ایستر .

سینوزایه کوره عقل ، نامتناهی درجه ده نامتناهی بر جوهرک  
موجودیتنی اثبات ایدر که بو ، اللهدر . بو جوهرک اصل و لبدن  
اسینوزا طبیعتک عمومی قانونلرینک اساسلرینی چیقاریر . بوندن  
دولایی ، خصوصی شیرک ظاهری برقاریشقلق شکلنده کورون  
تعددینی بر طاقم قوانینه ارجاع ایتکه علمک غیرت ایتسی محق  
اولدینی میدانه چیقار . دیگر طرفدن عقل ، تورات کبی  
یهودیلک و خرسیتانلق عالنده مقدس عد ایدیلن بر طاقم متلره  
تصادف ایتدیکی ایچون مذاهبک معنای تاریخیلرینی و پیغمبرلرک  
مقصدلرینی تعیین موضوع بحث اولدینی مدتجه کتب مقدسه نک  
آنحوق کتب مقدسه ایله ایضاح ایدلمسی اساسنی قبول ایدر .  
فقط بو تفسیر ایشی بر کره تمام اولدقن صوکره بو مسلکلی  
قبول ایدوب ایتیه جکمزنی تعیین کیفیت عقله عأددر .

لایبنیچ ، علمک چیفته تملنی تشکیل ایدن محاکمهیه مستند  
حقیقتلره فعلی حقیقتلر آراسنده کی فرقی تعمیق ایدهرک هم  
وجود الزم و ضروری بی هم موجودیت حاضره بی احتوا ایدن  
والله تسمیه ایتدی کمز وجوددن باشقه برشی اولیان محتمل

برنامتناهی لکده بونلرک اساس مشترکنی بولور . لایینیچه کوره علوم ، ظواهر محسوسه یه نظراً بر برینه خارج کبی تلقی اولونان اشیا آراسنده کی مناسباتی تدقیق ایتدیکی حالده دین بو آهنگ داخلی و عمومی یی ، وارلقلرک بر برلرینه متقابل نفوذلرینی وهپسنگ خیر و خط عمومی یه خواهشی ، — که اونلرک حیاتلرینک و هر دورلو سعلرینک کیزلی بر محرکیدر — اوجانلی حقیقلرکری ایچنده ادراک ایتمهک چالیشیر و بوندن دولایی انسانلری وار اولان و وار اولق ایستین هر شینک حقیقی غایه سی و اساسی کبی اللهک شان و شرفنده اشتراک و خدمت ایتمهک قادر قیلار .

سینوزاده ، مالبراننده ، لایینیچده پک اینجه و مابعد الطبیعی اولان بو عقیده وی و او بره قتیف عقلیه جیلک لوقک و بوجود خالقه اعتقاد ایدن متفکرلرک (الهیلرک) انده کیتدکجه ساده لک کسب ایدر . بونلر کبارلره و کبار جمعیتلرینه توجیه خطاب ایدرلر . الهیون نظرنده عقل یالکز عنعنک و سلطه نک مخالفی اولقله قالماز . عقل ، واضح فکرلرمزک و بر جزئی تشکیل ایتدیکمز طبیعتک فوقه چیقان شیلره هر دورلو اعتقادی ده رد ایدر . بناءً علیه دین ، موضوع و مثبت ادیانک نقل ایتدیکی بوتون عقایدی و اسراری صورت قطعی ده رد و ابطال ایلر . عقلک قارشیسنده یالکز طبیعی یا خود فلسفی نامی ویریلن دین پایدار قالیر . بودین ده ایکی اعتقاد ایله تماماً خلاصه و افاده ایدیله بیلیر : بری صانع عالم صفیله اللهک وارلنی ،



دیگری ده تجلی عدالتك بر شرطی صفتیه روحك ابدیتی . بو مذهبی نشر ایتمکه ده ئیستلر déistes - الهیون ( یعنی وجود باری به اعتقاد ایدلر ) کندیلرینی تمامیه علوم طبعیه ساحه سنده اخذ موقع ایتمش عد ایلرلر . مادی حقیقتلره معنوی حقیقتلر اونلرک نظرنده بر برلرینه تمامیه مشاهددر . علمك قبول و اعلان ایتدیکی میخانیکی قانونلره مخالف هیچ بر حرکتی سبب اولین کائناته عطف ایتزلر . بونلر معجزه یی و قوانین طبعیه یه اللهك مداخله سنی رد ایدرلر .

بو عقلیه جیلکک خاصه سی دینی ، بوتون عناصر میزه سندن کیتدکجه تجرید ایده رک غایت قورو ، غایت مجرد ، روح بشرک میلانلرینی تطمین ایتمکدن زیاده عقل و محاکمه یه موضوع تدارک ایتمکه قابلیتلی بر قاچ دستوره ارجاع و تنزیل ایتمکدن عبارت اولدی . دیگر طرفدن اللهك وارلغنی ، روحك ابدیتی کویا عقلی بر صورتده اثبات دیمک اولان بو مطالعات ، بر بیطرف منقد نظرنده ، اوطاقنمق ایسته دکلی بداهت علمیه دن محروم ایدیلر .

بناء علیه عصری عقلیه جیلکک دین ایله علم آراسنده کی مناسباتی تعیین و توصیف ایچون او بره قتیف و عقیدوی نقطه نظرندن باشقه بر نقطه نظر آرامایه باشلامسی شایان حیرت کوروله ملیدر .

پاسقال ، کندی مطالعات و دلائلک عناصرینی وقوف

بشرک ، حیاتک ، افعال و حرکاتک شرائطندہ - یعنی حد ذاتندہ  
 نظر اعتبارہ آلمان وجوددہ دکل دہ ذی شعور بر مخلوقک  
 خواصندہ - آرامشدر . پاسقال کلمہ نک دار معناسیلہ عقلدن  
 قلبی تفریق ایدر . قلبدہ بر عقلدر . یعنی انتظام و رابطہدر .  
 فقط بالنسبہ صوک درجہدہ اینجہ بر عقلدر . بونک خیال میال  
 فرق اولونہ بیلن اساسلری ، اوهندسی مفکرہ نک ساحہ شمولی  
 خارجہ چیقار . بویوکسک عقلک موضوعی بر طاقم تجریدات  
 منطقہ دکلدر ، حقیقی وارلقلدر . بونک طلب و ایجاب  
 ایتدیردیکی اثباتلری نہایتہ واردیرمق بزم قوتمزک فوقندہدر .  
 چوق شکرکہ بومادی عقل بزده حقیقتک دوغروندن دوغرویہ  
 بررؤیتی ایله ، قلمزک ، سوق طبعیمزک ، فطرت و طبیعتمزک متصف  
 اولدیغی برکشف وانتقال خاصہ سیلہ ، حدس ایله نمایان اولور ،  
 کندیسنی بیلدیرر . قلبک حدسلرینی استخفاف ایدوبده یالکزر  
 هندسی مفکرہ نک محاکمہ لرینی قبول ایتک بر تضاد تشکیل ایدر .  
 چونکہ حقیقتدہ بزہ فضا ، زمان ، حرکت ، عدد مفہوملرینی  
 یعنی علملرمزک تمللری ویرن شی قلب یاخود سوق طبعیدر .  
 محاکماتہ استنادکاه خدمتنی کورمک ایچون عقلہ قلب لازمدر .  
 ایشتہ فضا دہ ابعاد ثلثہ بولوندیغنی قلب ناصل حس ایدیورسہ ،  
 ضلالثہ صائمادجہ ، بر اللہک وار اولدیغنی دہ اولیلہ حس ایدر .  
 وسائط وقوفمزک تحلیلندن حرکت ایدن ، فکرلرمزک  
 منشأہ باقہرق شموللرینہ و قیمتلرینہ دائر حکم ویرن ، پاسقال

طرفندن تطبیق اولونان و تنقیدی نامی ویریلن اصولی لوق  
واضح صورتده تعریف ایتشدرد . لوق ، دهقارتک ده اصرار  
ایتمش اولدینی بر فرقی نظر دفته صریح صورتده عرض ایدر:  
اصل وقوف ایله تصویب یاخود اعتقاد ، بربرلندن آیریدرلر .  
ادعا اولونان شئیك حقیقتی غیر قابل رد و جرح صورتده  
اثبات ایدن دلائل نرده وارسه اوراده اصل وقوف  
موجوددر . الدهکی دلائل بو طرزده دکلسه بزم اونلر قبولمز  
آنحقیق بر تصویبدن عبارتدر . حالبوکه شوراسنه دقت لازمدر که  
علم حقیقی بر طاقم وقوفلر آرادینی واکتساب ایتدیکی حالد  
حیات عملیه همان تمامیه عادی بر طاقم اعتقادلر اوزرینه استناد  
ایدر . اعتیاد قوتی ، مسئلهلرک قارا کلقلنی ، بر شی یابه بیلیمک  
ایچون چابق قرازویرمک مجبوری حقیقی وقوفی دکل ساده بر  
تصویب و اعتقادی ، علی العاده ، حکمرمزه براساس یاپار . مع مافیه  
سیبسنر حکم ایتمه یز . احتمالات اوزرینه ، وبالخاصه شایان اعتماد  
شهادتله بنای فکر ایدررز . بناء علیه ، معتقدات دینه یی ، یالکنز  
برر اعتقاددن عبارتدر دیه ناصل رد ایدد بیلیرز ؟ باخصوص  
بونلرک صحتنه بالذات الله تکفل ایتدیکی جهتله مشروعتیلری  
آشکار دیمکدر . معتقدات دینه آراسنده حقیقه وحی ربانییه  
مستند اولان جهتلر تفریق ایدیلیر و بونلرک حقیقی معنایرینه  
واقف اولدیغمزه امنیت کتیریلیرسه ایمان دینی ده اصل وقوف  
قدر امین براساس تصدیق تشکیل ایدد بیلیر .

کبار عالم‌رینه منسوب کیمسه‌لرک بوانجه و حزن فلسفه‌سی  
 قانتک عالمانه و درین مسلک‌نه منشا خدمتی کورمشدر . قانت  
 عقلک تشککنده و ایفای وظیفه ایتمسنده هم علمک هم دینک  
 بوتون شرائط اصلیه و اساسیه‌سی بولور . عقل علمی بنا ایدر .  
 بونی یالکز تجربه‌نک تدارک ایتدیکی عناصر ایله تشکیل ایتز .  
 بوغیر قابلدر . فضا ، زمان ، دوام ، علیت مفهومی‌لری کندی  
 کندیلکلرندن فیشقیریرلر . بونلراولمادن علمک وجود بولماسی  
 محالدر . فقط معلوم عالمه حاکم اولان عقل نه‌دن یالکز بو عالمی  
 طانیمایی دکل اونی دیکشیرمه‌یی و کیتدجه کندی طبیعتک  
 و کندی آرزوسنک برافاده‌سی شکلنه کتیرمه‌یی دوشونمسون ؟  
 عقل یالکز نظری و سیرجی بر موقعده قالمایوب فعال ، عملی  
 و خالق بر موقعه کچه‌مزمی ؟ تأثیرینی یالکز اراده بشر اوزرنده  
 دکل بو اراده‌نک مناسبتده بولوندیغی عالم خارجی و مادی اوزرنده‌ده  
 کوستره‌مزمی ؟ شبهه یوق‌که بویله بر احتمال علمک دکل آنجق  
 بر اعتقادک موضوعنی تشکیل ایده‌بیلیر . فقط بو اویله بر اعتقاددر که  
 عقلک رأیی تماماً آئینرسه اونی محق کوستریر ، امر و ایجاب  
 ایدر . عقل او قدر یوکسک و علویدر که اگر اونک حکمران  
 اولماسنی تأمین قابل ایسه بوکا چالیشمه‌مز ایجاب ایدر . بعض  
 فکرلر بو وظیفه‌نک ایفاسی خصوصنده شاید تشکلاتمز اعتباریله  
 بزم ایچون عملی صورته لازم برر معاون ایسه‌لر او فکرلری  
 قبول ایتلی‌یز . ایشته حریت ، الله ، ابدیت فکرلری نظری



معناده دکل عملی و اخلاقی معناده بویه بر الزم معاوندرلر .  
 دین ، عقلک ایشی قابل اجرا اولدیغنه دائر عملی بر اعتقاددر . بزم  
 طرفزدن بر چوق سعی صرفنی وفدا کارلق اختیارینی ایجاب ایدن بو  
 ایشه بوتون قلبمزله کندیغیزی و یرمه مزایچون بویه بر اعتقاد لازم  
 و ضروریدر . بناء علیه اخلاقی و دینی اعتقادلری قبول ایده جکر  
 دیمکدر . یا اشیایی طانیغنه یا خود حرکاتی تنظیم ایتمهک چالیشان ،  
 بناء علیه گاه نظری گاه عملی اولان عینی عقل ، قانت نظرندهم  
 علمی هم اخلاقی تأسیس ایدر . بونلردن ده دین انبعاث ایلر .  
 هر برینه کندی مالکانه سنده استقلاللرینی تأمین و بر اساس مشترک  
 ایله اولان مناسبتلری دولایسیله هر برینی یکدیگرینه ربط ایلر .  
 قانتک ایده آلیست خلفلری نزدنده بو ارتباط ده تقویه  
 ایدلمش ودها واضحلشدیرلمشدر . فیخته Fichte علمک تدقیق  
 و مشاهد سنه عرض اولونان عالم حقیقینک اخلاقی و عقلیت  
 ایله طبیعی اوله رق مشبوع بولندقلرینی و اساس اعتباریله بودنیانک  
 بالذات مفکره دن عبارت بولوندیغنی ، اونک ، غیر شعوری بر ذکا  
 حرکتی ایله اشیاء خیاله تحول ایلدیکنی و بو خیالی ملاحظه و تفکر ایده  
 ایده کندی کندیسنی بیلیمک مرتبه سنه واصل اولمق ایسته دیکنی  
 اثبات ایتک املنده در . آرتق عقل ، عدالت ، انسانیت کندیلرینه  
 بر طاقم معرفتله یر بولمق و طبیعتک یرینه قائم اولمق ایسته ین  
 یا بانجیلر دکلدرلر . ای و حر اراده ، کندی کندیلمکندن  
 بر طاقم مادی نتایج مالکدر . نامتناهینک بر شعاعی اولان

وجدان ، بودنیاده یا شادیغمز حیاتک اساسیدر . عقلک علیتدن  
بزی حصه دار ایدن دین ایله ، عقلک آثارینی مشاهده ایدن علم  
آراسنده کی مناسبت سماده کی بخار لرله ارضه قوه انباتیه و یرن صولر  
آراسنده کی مناسبت کیدر .

هه غل نظرنده علم ایله دین ، انکشاف مفکره نک منطقی  
صورته بر برینی تعقیب ایدن ضروری بر طاقم « آن » لریدر .  
علم ، اشیا و موجوداتک بر بردن خارج قالمالری ، یعنی شعوردن  
و حریتدن محروم بولونمالری اعتباریله بر وقوفیدر . بو حال  
آنحقی بر مرحله دن عبارتدر . « فکر » ، شخصی اولق و مفکره نک  
ساحه فعله چیقماسنه چالیشق ایچون بو مرحله دن کچمکه محبوردر .  
خارجی و مادی وارلق عضویت بشریه دن عبارت اولان اک  
مغلق و مشوش شکلی آلتنده خصوصی بر انکشافه قابلیت  
کسب ایدر که بوکا تاریخ نامی و یریلیر . ایشه تاریخنک وصف  
میزینی تشکیل ایدن او منفعتلرک و اراده لرک چارپیشه سندن ،  
او اضطرابه و شره قارشی مجادله دن ، او بر چوق وسائط  
اختراعندن ، او دائمی تجربه لردن ، او معنوی بر طاقم قوتلرک  
ایجاد و جمعندن انسانک ایچنده یعنی دنیاده یکی بر طاقم قدرتلر  
اویانیر و انکشاف ایدر که بوندیده شعور ایله حریتدر .  
بناء علیه اولجه ماده دن عبارت اولان شیرلر آرتق روحیه شیرلر .  
شکل ، هیچ قیرلمه دن یا خود زائل اولمادن ، مفکره نک کیتدکجه  
حر و تام بر صورته حیز فعله چیقماسی دیمک اولور .

فردیت ، عائله ، جمعیت بشریه ، دولت بو انکشافك اوان متعاقبه سیدر . جانلی مفكره نك اثری ممکن اولدیغی مرتبه ده صنعتده ، وحی الهییه مستند دینده ، فلسفه ده نمایان اولور . فلسفه عادتاً صنعتك و دینلرك احاطه ایتدیکی تمثالردن قورتولمش حد ذاتنده دیندر .

هه غلك فلسفه سی نهایت تحلیلده ، اللهك دنیا ایچنده و دنیا واسطه سیله وجود بولدیغنی ، و کندی کنیدیسنی بیلدیکنی و بوشعور قصویه بزلك بر استنادکاه و حقیقت تشکیل ایتدی کمزی کورمکدن عبارتدر . حد ذاتنده علمده دینی هیچ برشی یوقدر ، علم دینه بیکانه در . فقط فکرک باطنی و ضروری تکاملنی تعقیب ایدن بر فیلسوف ایچون علم ، وجودک ترقیسنده بر آندن باشقه برشی دکدر . او، فرقه وارمادن ، دها یوکسک بر درجه و قوفه و شعوره متوجهدر . تفکر ، اونک اشارت ایتدیکی استقامتی تعقیب ایده رک منطقاً دین و فلسفه یه واصل اولور . هرایمان بر ذکا اولقاملنده در . علمده موجود بر ماده یه کور کورینه اعتقاددن عبارت اولان شی صنایع نفیسه ده ، دینده و فلسفه ده اساس اشیا نك وقوفی ، حسی و افاده سی اولور .

ایشته ده قارتك عقلیه مسلکی كرك او بركتيف كرك سو بركتيف استقامتدرده بو صورتله انكشاف ایتشددر . بونك اوچنجی بر انكشافی نورلر فلسفه سی la philosophie des

lumières دینلن شیدر . اون سکنزنجی عصرده میدان آلان بوفلسفه ، تظاهراتنده پک فرقلی شکلر عرض ایدر . مع مافیه بونلرک هپسی ده حسیاتدن آیری طوتولان ذکای صرفه یی ، واضح و بارز بیلکی یی ، علمی ، بشریتک سعادتتی و تکملنی تأمینه کافی بولور . بوفلسفه فرانسه ده لامه تری La Mettrie ، محیط المعارفخیر ، هلوئیوس و هولباح Holbach واسطه سیله باقونی ده قارته ربط ایدر . بو برنوع تجربی حتی ماده جی بر عقلیه مسلکی ایدی . معتقدات دینه یه قطعاً معارض بولونیوردی . بومسلک علومک ترقیاتی کمال شوق و تهالك ایله تحیل ایتدی . ترقیات علمیه و فکریه نك طبیعی و ضروری نتیجه لری کبی تلقی اولونان ترقیات معنویه و سیاسیه برنوع دینی اعتقاد نشر ایتدی . نورلرک ( علملرک ) مؤثریتنه قارشى بسله نن بو عالیجنابانه اعتمادی قوندورسه نك : « مفکره بشرک ترقیاتنک تاریخی تابلوسی » Esquisse d'un tableau historique des progrès de l'esprit humain نامنده کی اثری پک کوزل افاده ایدر .

\*  
\* \*

عقلیه مسلکنک مختلف شکلرینه معارض اولارق اون یدنجی عصرک نصف اخیرنده و بالخاصه انکلتزده بر فلسفه اخلاقیه تأسس ایتدی که طبیعت بشریه نك غیرعقلی عنصرینی ، حسیاتی ، سوق طبیعی یی ابتدائی و اصلی وقعه اولمق اوزره قبول



ایدیوردی . شافتسباری Shaftesbury فلسفه تفکر و ملا-  
 حظیه طبیعتک و آهنگک یونانیلرده کی معاسنی قارشی قویه رق  
 خیر اخلاقینک محکمی سوق طبیعییه مستند بلا واسطه بر حس  
 بدیعده بولور . باتلر Butler بو وظیفه یی وجدانه ، هاجسون  
 Hutchson حس اخلاقییه ویریر . هامک Hume ری  
 مابعدالطبیعیاتی ، عادتک والده سی اولان طبیعته اعتماد فعلنه  
 منجر اولور . اونک اخلاقی انسانک انسانه قارشی حس ایتدیکی  
 طبیعی محبته sympathie استناد ایدر . محبت علم اقتصاد  
 متخصصلرندن آدام اسمیتکده اساسی وقاعده سیدر . اسقوجیا  
 مکتبی ، - فن جدله dialectique قارشی هر ساحده حدسک  
 یاخود بلا واسطه تجربه نک رولنی و قیمتنی تأسیس واعاده ایتک  
 ایسته دیکندن - کرک نظری کرک عملی صورته بزه ویردیکی  
 اک صوک معلوماتدن دولایی حس سلیمی مدح واعلا ایدر .  
 روسونک اک باشلی برعاملی اولدینی انقلاب اخلاقی شبهه  
 یوق که سوق طبیعی یی تفکر و ملاحظه نک فوقه چیقاران قدیم  
 طبیعت جیلکک بویکی تولدینه مربوط بولونیور . روسونک  
 ۱۷۵۰ تاریخنده ایراد ایتدیکی نطقک کوردیکی حسن قبول ،  
 مدافعه ایتدیکی فکرلرک هر کسک قلبنده ذاتاً مهم صورته  
 موجود اولدیغنه بر دلیلدر . روسو او قودینی کتابلردن یاخود  
 فلسفی تفکراتدن زیاده ، حیات باطنیه سندن ، سجه سندن ،  
 دهاسندن کندیمی ایچون تجربه ایدلش بر حقیقت درجه سنده

واضح بر درس استخراج ایتدی که اوده شودر : حسیات حد  
 ذاتنده مستقل و مطلق بر اساسدر . هیچ بروجهله وقوف فیکری به  
 تابع دکلدر . بالعکس او وقوفه حسیات حا کمدر . اوصورتده که  
 فکر لر رمز اکثریا حسیاتمزی ایضاح ایتک و معذور کو سترمک  
 ایچون صوکرده دن اویدیردیغمز بر طاقم منطقی بنالردن ، روما-  
 نلردن عبارتدر . بو نقطه نظر دن باقان روسو ترقی و مدنیت  
 دنیلن شیک حقیقتده اخلاقسزلق و خطادن عبارت اولدیغنه  
 حکم ایتدی . چونکه مدنیتک تملی ، انتظام طبیعتک خلافی  
 اولارق ، مفکره نک حسیات اوزرینه ، صنعی وجعلی شیلرک  
 ایچدن کلن شیلر اوزرینه ، علمک اخلاق و عادات اوزرینه  
 تفوقه استناد ایدر . حین نشئتنده بشریته ، اساس حیات اولان  
 طبیعت و سوق طبیعی رهبرلک ایتشدی . بشریت صوکره شجر  
 علمک ، - کندیسینی هر شیئه حکمران ظن ایدن مغرور ذکانک -  
 میوه سنی یمکله کناه ایشله مشدی . تبدیل فکر و مذهب ایدوبده  
 طبیعتک یولنه عودت ایتمزسه آرتق محکوم ممات ایدی . هر شیده  
 حسیاتک ، حدسک ، بلا واسطه حس و ادراکک تقدمنی تأسیس  
 و اعاده ایتک و بواساس اوزرینه ذکانک استعمالنی تنظیم ایلهمک  
 چاره سلامت ایدی ؛ اشیاده بر ترتیب و انتظام تأمین ایتک  
 بو صورتله قابل اولوردی . ذکا ایلهم متصف بر مخلوق آبدال  
 و محدود بر حیوانه نه قدر فائق ایسه بو صورتله تأمین ایدیلن  
 ترتیب اشیاده او ابتدائی جنته او قدر فائق بولونه جقدی .

روسونك دين حقنده كى افكارى بواساسلرك تطيقاتيدر .  
 الهيون كى اونكده همان همان عینی عقیده لری ادامه ایتسی  
 وخارجدن باقیلجه دين طبعیسك فیلسوفلرك دين طبعیسندن  
 عادتاً هیچ فرقسز بولونماسی حائز اهمیت دكلدر . روسوده یكى  
 واساسلى اولان جهت بوافكاره كوسترديكى منابعدر ؛ بوافكاره  
 اینانمەسك واونلری اظهار ایتەسك شكیدر . بوفكرلر  
 روسونك نظرندە آرتق محاکمە ایله ثابت اولان برطاقم مسالك  
 دكلدر ، كندی فردی روحك ایچندن كلن برر تظاهراتدر .  
 اثرندە برراهب دیورکه : سزكله دلالتە مستنداً مباحثه ایتك ،  
 حتی سزی اقناعه تشبث ایله مك فکرنده دكل . قلبك ساده لکیله  
 دوشونديكم شئی سزه ایضاح وارانە ایتك بكا کافیدر . سوزلرمی  
 دیکلرکن سز كندی قلبکزی تدقیق ایدیکنز . ایشته بوتون  
 ایسته دیکم بوندن عبارتدر . وجدانك برطاقم افکار باطله  
 préjugé ایشی اولدیغنی سوبلیورلر . حالبوکه بن كندی  
 تجربه مله بیلورم که وجدان انسانلرك بوتون قانونلرینك خلافتە  
 اولارق ترتیب طبعی تعقیده اصرار ایدیور .

ایشته دين بویله ایلک ومستقل برمنعدن چیقارکى قبلدن ،  
 حیساتدن ، وجداندن ، طبعندن انبعاث ایدر . غایه سی قلبك  
 احتیاجاتنك تطمینی ، حیات اخلاقیه ومغویه مزك تخلیصی ،  
 اداره سی ونجابت کسب ایتسیدر . بواساسك وبوغایه نك  
 خارجنده كى بوتون شیلر یالکیز زائد دكل حتی مضردر .

بوفکرلری ، موجود فکرلرله اولان تضادلرینی قوتله  
 اراؤه ایدهرک وضوح و قطعیت ایله ادعا و درمیان ایتک بيله مهم  
 برایش ایدی . بوایشی برانقلاب حاله کتیره شئ ایشه اونی  
 جانلاندیران شوق و غلیاندر . روسونک لسانی بوکا ترجمان  
 اولشدر . روسونک یازیلری ساحه فعله چیقمش مسلکی ایدی :  
 غیر قابل مقاومت حمله سیله طبیعت ایدی ؛ ایچدن کلن شیلر  
 ایدی ؛ احتراض ، ایمان ، افعال و حرکات ایدی . مفکره نک  
 حکمران اولدینی برادیاتک ایچنه صالديرارق منطق ، افکاری ،  
 وقعه لری ، محاکماتی ، حرث فکرینک بوتون آلاتی طردایدیور  
 یاخود کندی غایه سنه انقیاد ایتدیریوردی .

دینک بو تلقیسندن ایکی مهم نتیجه چیقمشدر .  
 وقوفدن قطعی صورته آیری ، مطلق و ابتدائی براساس  
 صفتیله حسیاته ارجاع و بنا ایدیلن دینک آرتق علم ایله هیچ  
 بر مناسبتی قالمایوردی . علم ایله دین بربرلرندن تاممیله فرقلی  
 برر لسان ایله تکلم ایدیورلردی . بناء علیه بربرلیله هیچ  
 قارشیشمق هله کسی اولمقسنزین الی نهایه انکشاف ایده بیلرلردی .  
 ثانیاً ، مثبت و موضوع دینره قارشی حسیاتک عقلدن  
 بوتون بوتون باشقه دورلو حرکت ایتسی ایجاب ایلردی .  
 عقل ، دینی قوروتمغه ، استنادکاهنی یالکز مخیله ده و حسیاته  
 بولان اقسامندن تجرید ایدهرک تحریات علمیه و فلسفیه نک اک  
 محقق نتیجه لرندن اصول دائره سنده چیقارلمش قلیل المقدار

برطاقم افکاره ایندیرمکه میال ایدی . عقل جی فیلسوفلرک قبول ایتدیکی الهیلک ، یعنی دینلرک یرینه قائم اولان بوضعیف و جیلز شی بوصولته وجود بولمشدی .

فقط حسیاتک باشقه احتیاجاتی ، باشقه منابعی ، باشقه جرئتکارلقلری واردر . اوده عقل کبی حتی بلکه دهها زیاده ابتدائی اولدییی ایچون نه دن افاداتی علمک تصدیق و قبول ایتدیکی دستورلره انحصار ایتدیره جکدی ؟ قلب ، طبیعتی اعتباریه خالقدر : اوندن طاشان حیات تشبیهلر و خیاللرله ، تشارک افکار ایله ، خرافات ایله ، منظومه لرله انتشار ایدر . دینک تا قلبکاهنه وضع ایدیلن و مستقل اولمق اوزره اعلان اولونان حسیات روسونک ، حسیاتک حقیقی افاده سنی کوریپورم ظن ایتدیکی نقطه ده عقلی الهیلک مسالکنک بومتروکاتیه اکتفا ایده مزدی . دهها ، حاضر برطاقم جمله لری تکرار ایتمکه اکتفا ایده مز . ذی حیات مخلوق ایچنده غیرعضوی شیلر یا طرد و اخراج اولونور ، یا تحول ایده رک کنیدی ده ذی حیات اولور . ایشه بوصولته ، روسونک تصور ایتدیکی کبی ، حسیات یالکز فیلسوفلرک او منجمد ، ثابت دستورلرینک یرینه جانلی محصوللر اقامه ایتمکه قالمایه جقدر . حکمران اولمغه باشلار باشلاماز ، فلسفی مفهوملردن پک دهها زنکین اولان عنغوی اشکال و تمثالره قارشى عقلیه مسلکی اربابنک واصل اولدقلری خصومتی بسله - مه یه جکی ده آشکار ایدی . بوشکللر قلبه وخیله یه خطاب ایدر لر .



ذاتاً منشأ لری ده اوراسیدر . قلب ، تأثیر لرینی تجربه ایتهدن .  
 بونلری ناصلرد ایده ییلیر؟ روسونک اثرنده کی راهب دیور که :  
 « اعتراف ایدهرم که انجیلک قدسیتی بنم قلبمه خطاب ایدن  
 بر دلیدر . فیلسوفلرک کتابلرینه او بوتون دبدبه لرله باقکز :  
 انجیلک یاننده نه قدر کوچوک قالیرلر . بکا سقراتی ، علمی  
 ومفکره سنی کوستره جکسکز . سقرات ایله مریمک اوغلی  
 آراسنده نه قدر مسافه وار ! سقراتک حیاتی ومماتی بر حکیمه  
 لایق ایسه عیسانک حیاتی ومماتی ده بر معبوده لایقدر . »

روسونک اثری نه دینده نه سیاستده نه اخلاقده نه ده  
 تربیه ده بر نقطه مواصلت تشکیل ایده مز . او بر نقطه حرکتدر .  
 اوکا ملهم اولان فکرلردن دینک احساسی کیفیتی میدانه  
 چیقا جقدر .

بواحیا کیفیتک اک ایی شاهد ومنادسی شاتو بریاندر .  
 شاتو بریان روسونک حاکمیت حسیات اساسنه استناد ایدهرک  
 حیات فردیه واجتماعیه یالکز طبیعی تسمیه ایدیلن دینک  
 مبهم تجربیداتی دکل قاتولیکلکک عقیده لرینی ، آیینلرینی ،  
 عنغه لرینی ده بوتون اوصریح ومادی شکلرله ادخال ایلر .  
 شاتو بریان بوتفرعات وخصوصیاتی - صرف عقلی اساسلردن  
 استنتاج ایدیله میه جککری مطالعه سیله - زائد وبی لزوم علاوه لر  
 عد ایتمز . دینک محتویات اخلاقیه سی قدر بوتظاهرات خار -  
 جیه سنک بوتون تفرعاتی ده اونک الهی بر منشأه مالک اولدیغنه

دلیل عد ایدر. چونکه بزتون بوتفرعات مخیله و ذکایه چارپارلر، وجدان بشری جذب و متأثر ایدرلر، تسلیه، تسکین، تقویه و تمییز ایلرلر. اونک فکرینه نظراً بوکون تعقیب ایدیله جک یول نتیجه دن سببه کیتمک، خرسیتیانلغک اللهدن کلدیکی ایچون ایی اولدیغنی دکل، ایی اولدیغنی ایچون اللهدن کلش اولدیغنی اثبات ایتمکدر. چاک سسلرینک شعری برقصیه منطقیه دن ده قوتلی بر دلیلدر. چونکه بوقضیه بزى لا قید بر اقدیغنی حالده اونه کنی حس ایدر و یاشارز.

فقط، دنیاه بیلیرکه، تأثیرات لطیفه و خیرکارانه سی بوقدر بلاغته ایضاح ایدیلن بوتون بو اعتقادلر، بوتون بو عادتلر هیچ اولمازسه حقیقی و موجود بر طاقم اشیا به تعلق ایدیورلرمی؟ یوقسه آرزولر مزك و خولیا لرمزك بوش بر تطمینندن می عبارتدرلر؟ آشکارکه شاتو بریان ایچون بوسؤالک اهمیتی یوقدر. اونک ایضاحاتی خرسیتیانلغی عادتک کوزللیکی، واعظلرینک دهاسی، حواریونک و تلمیذلرینک فضائی ایچون سودیریر. دهافضله بر شیئه لزوم وارمی؟ عشق حد ذاتنده بر شأنیت، شأنیتلرک احتمالکه الِدرینی، الِدوغروسى دکلیدر؟ عشقک، حیاتک، وارلغک شرائطیله توافق ایتمکدن عبارت اولان حقیقت، ادراکک تجریداتنده وجود بولان حقیقته نسبتله نه دن ده آزدوغرو اولاجق؟

آز چوق واضح بر صورتده تصور وافاده ایدیلن بوفکرلر

« رومانیتزم » نامی ویریلن حرکتی اداره ایتدی . بوراده  
 یکانه قاعده حیاتدر . انسان علونک کندیسنه تعین  
 ایتدیکی غایه : حیاتدر ، یاشامق و حس ایتک شعوریدر .  
 بویله بر آدم صرف عقل عریانی علاقه‌دار ایدن تجریدادن  
 قاجار . کندیسنی روحی تیزه تن شعره ، احتراصه ، شوق  
 و هیجانه ویرر . انسانک کندی وارلنی شعورینی شایان  
 حیرت بر صورتده تهییج واعلا ایدن اضطرابلری ، آغلامه‌لری  
 سور . مختلف اقوامه عائد ادبیاتلرک ، مختلف زمانلره تعلق  
 ایدن تاریخک عرض ایده‌بیله‌جکی بوتون حیات افاده‌لرینه  
 علاقه‌دار اولور ، مراق ایدر . اورته‌دن قالمش دورلرک طرز  
 تفکر و حسنی تکرار احیا ایتک ، کندییی اونلری یاشامق  
 ایستر . روحنده نامتناهینک اضطرابی اویندیر ارق و بسله‌یه‌رک  
 روحنی بویولتن دین ایچون بر محبت مخصوصه‌سی واردر .  
 مخیله‌سنک سطح مائلی تعقیب ایدرسه ، خصوصی بر میل محبت  
 ایله وحی ربانی‌یه مستند ادیانک مؤسسات مادیه و مثبت‌سنه  
 دوغرو کیدر .

کندیسنی بویله حسیاته ترک ایتکله علمه قارشى مخالف  
 بر وضعیت آلمش اولمق تهله‌ک‌سنده‌میدر ؟ تام رومانیتک بر آدم  
 بو مسئله‌یی بیلمز . ارباب علم تحلیل واستنتاج ایدر . فقط  
 او یاشار ، اینانیر وسور . علم اونک ایچندن بئلکنی ناصل  
 چیقارایلیر ؟

موجودات حقه‌ده کی بو تلقی بالخاصه فرانسه‌ده مکتبلره  
وفلسفیه عائد مطالعاتک کسب ایتدیکی شکل و طرز ایچنده  
نمایان اولدی . « انسانیات » humanités « وعلوم » ناملری  
آلتنده برطرفدن ذوق ، حس و روح تربیه‌سی ، دیگرطرفدن  
ریاضیات و قوانین طبیعت بیلگیلری بربرلرندن آیرلدیلر و متجرد  
قالدیلر . انسان ایله قلب و حیات ، طبیعت و مقانیزمه‌سنه فائق  
عد اولوندیغی مدتجه ادبیات هر شیئه کافی کلد کدن باشقه سائر  
خصوصاته تقدم ادعاسنه بیه قالقایلدی .

دیگر طرفدن ، برافلاطونده ، برده‌قارتده ، برلایینیچده  
علومه اوقدر صیق بر صورتده مربوط اولان فلسفه‌ده تدریساتده  
صرف ادبی وحسی بر شکل آلیور ، شاتو بریانک فکرینه  
توفیقا ، مسالکک قیمتی نتیجه‌لریله ، تأثیرلرینک نجات بخش یا خود  
مضر اولماسیله اولچمکی قبول ایدیوردی . او قلاسیک عقل  
و منطق نقطه نظرینی ادامه ایتمکله مفتخر اولماسی اعتباریله ، دین  
خصوصنده محترزد اورا مقله برابر ، حقیقتده دینه میال بولونیور  
واحتیاطکارانه عقل جیلک شکلی آلتنده صاقلانان اورومانتیزم  
مسلکنک حسیاتپرستکی اساسنی میدانه اوریوردی .

روسودن صوکره غایت قوت بولان فقط اوندن اول  
طبیعتی مجرد ، صرف فکری بر نقطه نظردن تلقی ایتمک مسلکله  
معارض اوله‌رق ، یونانیلر کبی تلقی ایله مک یولنده کی حسک  
جانلانماسی صورتیله تولد ایتمش اولان انقلاب عظیم یالکز

فرانسه‌یه منحصر قالماشدر. مختلف اوصاف ایله بوتون آوروپادهده وقوعه کلدی. بالخاصه آلمان رومان‌تیزمنده پک خصوصی و مشر بر شکل آلدی. نووالیسک شو سوزلری بو حرکتک شعاری اولق اوزره قبول ایديله بیلیر : Die Poesie ist das ächt absolut Reelle ( اصل شائیت حقیقه شعردر )

علم کلام علماسندن مشهور شلایرماخر Schleirmacher اون دو قوزنجی عصرک بدایتده رومان‌تیک اساسی دینک قلبکاهنه قویمشدی. شلایرماخره کوره نه ذکا نه اراده دینک مالکانه‌سنه بزى ادخال ایده‌مز. دین نه بر وقوفدر ، نه بردستورد. دین بر حیاتدر ، بر تجربه‌در. بو حیاتک منبعی‌ده وارلغمزک اک ذرین قسمنده ، حسیاتده‌در. دین بیلکیسندن دینه کیديله‌مز. دین بروقه‌ ابتدائی‌ده‌در.

ذاتاً هیجان دینی حس ایدن آدم ، حالت روحیه‌سنک سببی واهمیتی ذکاسیله ایضاح ایتمکه میالدر. حسیاتنک نتیجه‌ده کائناتک علت نامتناهی‌سنه قارشی بر مخلوقک حس ایتدیکی ارتباط و تبعیت حسندن عبارت اولدیغنی کورور. بو حسیاتک کنیدیلکندن انکشافی ، تشعشی : ایشته حیات دینه. بونک نتیجه‌سی اولارق فردیت غلیان ایدر. حالبوکه بونی نه علم یاپه بیلیر نه اخلاق. بو ، تام و صحیح فکر لرله تمامیه افاده ایديله‌مز ، چونکه غیر قابلدر. افاده ایتک ایچون تمثالر لازمدر. آنجق بو تمثالرله پیش شعوره چیقابیلیر و شعورک هیجانلری بو تمثالر



سایه سنده باشقه لرینه قابل سرایت حاله کلیر . عقیده تعییر اولونان شی بوهی جانلرک موضوعنک و یاسینک فکری صورت ذهنیه لرندن عبارتدر . بعضاً قلب ذکایه ولودیت ویره رک دهانک قوتیله در حال تمثالر خلق ایدر . بعضاً موجود دینلرک اعاره ایتدیکی تمثالری قوللانیر . فقط بونلری او یله مطاو عتکارانه الماز . اونلره بر حیات نفح ایدر و بوصورتله اونلرده بر وصف دینی محافظه ایلر . عنعنات ، عقائد آنجق فردلرک حسیاتیه دائمی صورتده جانلاندیرلوق شرطیله بر معنایی و قیمتی حائر اولورلر . فلان ویا فلان تمثال دینینک خلق و ایجادینه ویا قبولنه علم هیچ بر ممانعت ایقاع ایده مز . علمده بویله بر تمثالرله اراءه اصولندن عبارتدر . مفکره نک اشیا یی آکلامق — یعنی بزم ایچون یتیشلمسی غیر قابل برغایه کمال اولان وجود ایله تفکرک برلکلیرینی حس و ادراک ایله مک — یولنده کی مساعیسنی بر طاقم اشارت لرله افاده ایدر .

شلایر ماخرک فکر نجه وارلق و قوفدن مقدمدر . حقیقت ایله حیات بر در . حیات علویه نک ، حیات روح و حسن فیضان و غلیانی اک یوکسک حقیقتدر . دستور ، عقیده ، حرف ، شی ، ماده آنجق بو ذکا فوقنده کی حقیقتک بر تمثالی اولوق اعتباریله حائر قیمتدرلر .

رومانتیزمه تقابل ایدن دین تلقیسی آلمانیا دهها زیاده الهیاته ، فرانسه دهها زیاده ادبیاته قاحه ررق اون دو قوزنجی عصر آتاسنده احراز غلبه ایتدی . دین اوزمان اساس اعتباریله

ذکایه دکل قلبه استناد ایدیوردی . دینک اساسلری ، دلیللری ، اثرلری واردی که علوی بر قدرت نامنه عقل بونلری قبول ایتمه مجبور دی . واقعا اون یدنجی عصر عقل جلرینک باصلانمش سلا- حلرینی تکرار قوللانا یا خود عقل نامنه میدان چقان معارضلره کندیلری ده عقل نامنه قارشی قویمق اوزره یکیدن سلا حلر اعمال ایدن دین طرفدارلری ده موجود ایدی . فقط حیات مستقل بر علمه و مستقل بر عقله اهمیت ویرمه دن ، فلسفه ایله و جسمانی قوتلرله اتحاد و اشتراکی دوشونمده دن حقیقت دینی پی بوتون کنیشلکی و خصوصیتی ایله بسط و ارائه ایدنلرک طرفنده ایدی . مرغوب اولان ، میدان آلان شی قلب ، ایمان ، غنغه کی نفوذلرینه استناد ایدن و روحی قوتلرک تأمین انکشاف و غلیاننه چالیشان حر دین ایدی .

دیگر طرفندن ده علم ، دینی هیچ قاله آلامغه آلیشمشدی . علم کیتدجکه ده ا واضح بر صورتده کندیسنی صرف اوثره قتیف تجربه یه استناد ایدر و یالکز حادثاتک ارتباط مکنوزلرینی کشفه اوغرا شیر کی تلقی ایلوردی . باشقه بر اساس اوزرینه تأسیس ایدیلن و بوتون بوتون باشقه غایه لره معطوف اولان بر طاقم مسلک لرک اوکا نه تعلقی واردی ؟ بو ایکی نقطه نظر بر آدمک مضکره سنده عینی زمانده برلکده موجود اولابیلرلردی . بر برلرینه هیچ قاریشمازلردی . عالم ، لابوراتوارینه کیررکن قناعت دینه سنی قاپیده براقیر ، دیشاری چیقارکن صوکره اولنلری تکرار طاقینیردی .

حاصلی ، اون دو قوزنجی عصر اشناسنده دین ایله علم آراسنده تأسس ایدن مناسبت قطعی برآیریلق ، برآیکیلک ایدی . علم ایله دین آرتق ، وقتیه یونان فلسفه سنده اولدینی کبی ، عینی شینک ، یعنی عقل الهینک ، غیر مساوی قیمتترینه رغماً بربرینه مشابه ایکی افاده سندن عبارت دکلدی . اسقولاستیکلرده اولدینی کبی بربرلینه توافق و بربرلیله ائتلافی اثبات ایدیه بیله جک ایکی حقیقت معلومه *vérités données* ده دکلایلر . عصری عقل جیلرک قبول ایتدکلری کبی آرتق علم ایله دین آراسنده مشترک برکفیل ، عقل ، یوقدی . ایکسی ده ، کندیلرینه کوره ، مطلق ایدیلر ؛ هر نقطه ده بربرلرندن آیری ایدیلر . اوزمان قبول ایدیلن پسقولوجی علمنه نظراً روحک ایکی ملکه سی اولان ذکا ایله حسیات ده بویله بربرلرندن هر خصوصده فرقلی ایدیلر . ایشه علم ایله دین بو آیری ملکه لره تعلق ایدیورلردی . بوقارشیلقلی استقلال سایه سنده درکه عینی بر شعورده دین ایله علم اجتماع ایده بیلوردی . بربرینک ایچنه نفوذ ایده مین ایکی ذره . فضا ده ناصل یان یانه دوریورلر سه علم ایله دین ده وجدان بشرده یان یانه موجود بولونیورلردی . علم ایله دین بربرلرینک اساسلرینی تعمیق و تدقیق ایتمه مک ایچون صریح یا خود ضمنی صورتده آکلاشیورلردی . بربرلرینک مکتسب موقعلرینه قارشیلقلی رعایت ایدیورلردی . بو صورتله هر ایکسی ده امنیت و حریت بولیوردی . ایشه زمانک شعاری بوایدی .

## برنجی قسم

طبیعت جیلك تمایلی

### برنجی باب

اوکوست قونت و دین بشریت

آرتق غیر قابل اجتناب بر مواجهه

- ۱ — علم و دین حقنده اوکوست قونتک مسلکی - علم فکرینک تعمیمی و علومک تشکیلاتی: علم و فلسفه - فلسفه و دین : دین بشریت.
- ۲ — اوکوست قونت مسلکنک تفسیری - سوسیولوژی و دین: دین سوسیولوژی به نه علاوه ایتدی - قونتک مسلکنده فلسفه ایله دینک مناسبت منطقیه سی : دین فلسفه یی تکذیب ایدرمی ؟
- ۳ — اوکوست قونت مسکنک قیمتی - دینک علمه ، علمک دینه ایقاع مشکلاتی - بشریت مبهم بر مفهومدر - انسانک کندی فوقه چیقمه میلی : بو ، دیندر - پوزیتیویزمک داخلی تضادلی .

فکرلری دماغمزده ترتیب ایتک، مجرد بر مباحثه یوروتمک ایچون صریح و قطعی تعریفلر و تجاوز ایدیله سی غیر قابل تحدید حدود اشارتلی قدر موافق بر شی یوقدر . علم ایله دین ذکا ایله قلبه بر برندن قطعی حائل ایله آیرلمش ایکی بولمه ایچنده کبی حبس ایدیله نجه نزاع ایتلری ایچون هیچ احتمال قالمایوردی . هرایکی طرفک کندی مستفید اولدیغی و ایستدیگی حریت و استقلال

دیگر طرف ایچون ده عینی صورتده قبول ایتسی کافی ایدی .  
ایشته مفهومات عالمده دین ایله علمک مناسباتی بو صورتله  
غایت قولایجه حل ایدیلوردی . فقط حقیقت عالمده ایش باشقه  
دورلو اولدی .

حقیقته ، نه علم نه ده دین ، مالکانه لری نه قدر کنیش  
اولورسه اولسون ، صلاحیت و حرکاتلرینی اورایه حبس ایتک  
فکرنده دکدیلر . اوزمان مرعی و معتبر اولان : « قیصره عائد  
اولانی قیصره ، اللهه عائد اولانی اللهه و یریکز » حکمتک  
مصدره سی ، اوکا و یریلن معنایه کوره ، یالکز ، انسانده کی ملکات  
دینیه نک ملکات علمیه ایله هیچ مناسبتی اولمادیغنی قبول خصوصنه  
انحصار ایتموردی . اشیاده ده ایکی دنیا ، روح و ماده ، جسمانی  
و روحی برر ساحه بولوندیغنی و بونلرک هیچ برطرفده بربرلرینه  
قاریشمادیغنی قبول ایدیلوردی . بوفر ضیه ک راحت برائتلافنامه  
اولا بیلردی . فقط بو موجود شأنت دکلدی ، بو شأنتک همان  
همان ضدی ایدی . انسانده قاب ایله ذکایی ؛ طبیعتده بدنلر  
ایله روحلری تفریق ایدن خط فاصلی نرده بولمالی ؟ بوندن  
دولاییدر که ، مستقل قبول و اعلان ایدلدیکی ایچون انبساط  
وانکشافه دها زیاده حریص اولان دین ، حریم قدسی شعوری  
کندیسنه دار بولدی ، عالم مرئی بی ده تسخیره قالدیشدی . دیگر  
طرفدن ، هر کون کیتدکجه دها پارلاقلاشان موفقیاتندن  
و موضوعنی ، غایه سنی دها صریح صورتده فرق و حس ایتمکدن



قوت آلان علم ، بوتون شأیتلر دنیا سنك كافه اقسامی آرتق  
کندی تدقیقات و تفحصاتنه کشاده اولدیغنی اعلان ایتدی .  
یالکز بوتفحصاتك ، ده قارتك قاعده سنه توفیقاً ، بسیطدن مرکه ،  
قولایدن زوره ، بزجه بلا واسطه بیلنه بیله جك شیردن بالواسطه  
ایریشه بیله جکمز شیرده دوغرو صیرا ایله یورومه سی شرطنی  
قبول ایتدی .

بونك اوزرینه ، نظریه ده او قدر ماهرانه بر صورتده  
بر طرف ایدلش اولان نزاع تطبیقاتده غیر قابل اجتناب اولمشدی .  
دین مفکره لره و روحلره حاکم اولدیغنی کبی بدنلرده حکم ایتمه  
قیام ایلمه علمده بدنلر اوزرنده کی حکم و نفوذنی مفکره لر و روحلر  
اوزرنده اجرایه تشبث ایدر سه بالضروره بر بر لریله قارشیلایر لر .  
بو اختلافك ناصل نتیجه نه جکنی بیلیمك مسئله سی حاصل اولور .  
بر چوققلری ، شبهه یوق که ، ماهرانه بر حسن اداره ایله ،  
صلح و سکون تأمین ایدن بر ائتلاف تأسیسی اك ساده چاره  
اولدیغنی ظنده در لر . کندیلرینك عدم مراق یاصدیغنی اوزرنده  
راحتجه او یودقلرینه باقهرق اطرافلرنده یاپیلان و کندیلرینی  
اویاندر مق تهلمکه سنی عرض ایدن کورولتودن شکایت ایدر لر .  
هله بر چوققلری بر سن توماسك ، برده قارتك ، بر مالبرانشك ،  
بر لایبنیچك غایت یوکسك ذکالر اولدیغنی سویله یه رك بوم تفکر لر ك  
اكتفا ایتدکلری دلائل ایله باشقه لرینك نه دن ممنون اولما دقلرینی  
صورو شدیر لر و اوقلاسیك ائتلاف لر ك دوشدیکی عدم رغبتدن

دولایی، هیچ بر مانعه ایله ضبط ای دیله مین فکر تنقیدک ترقیسنه قباحه بولورلر، قزارلر . فقط شعور بشرک متعاقب ادوار آراسنده دائمی بر صورتده پایدار قالدینی نظر تأمله آلتنجه کورولورکه بو، فلان فلان کیمسه لرك - حتی مقدارلری نه قدر چوق ، اقتدار ومعلوماتلری ایله نه قدر شایان دقت اولورسه اولسون ، - اعتیادات فکریه لر یله قاریشماز . شعور ، تجربه نك کتیردیکی مختلف فکرلرک تنظیمی، بناء علیه بر برلریله مواجهه سی دیمکدر . شعور بو فکرلر آراسنده بر ائتلاف ، بر آهنگ تأسیس ایتک ایچون صرف اولونان غیرتدر . بو مقصدله یا او فکرلری بر برینه اویدورور یا خود بعضیلرینی قبول ایله دیکرلرینی طرد و اخراج ایدر . بونک ایچوندرکه علم ایله دین قارشى قارشى یه اخذ موقع ایدرلرسه شعور ، کندی کندیسنى انکار ایتمه دن بونلرک ایکیسنى ده هر هانکی بر صورتله برلکده ادامه ایدوب ایده . میه جکنی بيلمک ایچون ارکچ بونلری بر برلریله مقایسه ایده جکدر . ضرورت کسب ایدن بوتفکر وملاحظه ایچنده ، آشکاردرکه ، شعور وقتيله بویوک بر آدم طرفندن سرد ایدیلن فلان ویا فلان مسلکدن ملهم اولابیلیر . فقط یاپه جنی شی یالکز ملهم اولمقدر . یوقسه اومسلکلى ساده جه احیا و قبول ایتک دکدر . چونکه اوندن صوکره حادث اولان بویوک بویوک انقلابلرک میدانه یکی بر عنصر چیقارماش اولماسى وبوغضرك وضعیتده بر تبدل ایجاب ایتمه سى پك احتمال خارجنده در .

اون دوقونجی عصرک اورتہ لرینہ دوغرو علم و دین ایلہ  
 اوغراشمغه باشلامش اولان متفکر نردہ عمومیتلہ علم ایلہ دینک  
 بویلہ ضروری بر مواجہہ سی حسی نمایان اولور . بو متفکر لر  
 دہا زیادہ طبیعت جی یاخود دہا زیادہ روح جی بر تمایل  
 ارأہ *tendance spiritualiste* ایتدکلرینہ کورہ ایکی قسمہ  
 آریلابیلر لر . طبیعتہ تمایل ایدنلرک اکباشندہ اوکوست قونت کلیر .

---

علم و دین حقنده او کوست قونتك مسلکی

او کوست قونتك مسلکی علمدن دینه دوغرو، فلسفه دن کچهرک، بر اصول داخلنده یورو مکدن عبارتدر. بوترقی بر اصولی تعقیب ایدهرک وقوعه کلشدر. استحصال ایدیلن نتیجه لره قیمتی، معناسنی او اصول تعیین ایتمشدر. ایشته او کوست قونت بو اصوله « مثبت » نامنی ویریر. بوتون مسلکه وبالخاصه اونک نتوج دینیسنه او کوست قونت پوزیتیویزم Positivisme نامنی ویرمشدر. بو تعبیرک معناسی شودر: اولاً، قونت مفکره بشرک آنحق حقیقی احتیاجلرینی تطمین ایتک املنده در. ثانیاً، بو احتیاجلری تطمین ایچون چاره و وسائط اولمق اوزره کذلک حقیقی یعنی هم صحیح هم مفکره بشرله قابل ادراک و قایعه تعلق ایدن بر طاقم وقوف قبول ایدر که بونلرکده بزم حقیقی احتیاجلر مزه توافق ایتلری لازمدر. مفیدک utilité و حقیقیک réalité: ایشته بوایکی تعبیر « پوزیتیف - مثبت » کله سنک محتویاتی تماماً افاده ایدر لر. بوایکی وصفدن بر او چنجی ده انبعاث ایدر که اوده متعضو بر حالده بولنمقدرد. چونکه انسانلرک بیلکیلری و حسلری حقیقی قاعده لرینه تابع اولمادجه تعضو ایتمه قابلیتلی دکلدر لر. اونک ایچون بونلر نه زمان هم غیر قابل مناقشه هم تک برغایه توجیه ایدیلر لره اوزمان قطعی بر مستک و اصول وجوده کتیر لر.

مثبت بر مفهومك ايكي عنصرى اولان «حقيقى» ايله «مفيد» دن  
برنجيسى علمده موجوددر و يالكز اونده موجوددر . الهيات  
وما بعد الطبعه ده بزه طبيعت اشياي بيلديرمك ادعا سنده ايسه لرده  
اورته يه خيالى بر بنا چيقار ير لر . بناء عليه پوزيتيويزمك اساسنى  
علم تشكيل ايدە جكدر . دائره اقتدار واطلاعمز داخلنده اولان  
بوتون شيلرى منتظم بر اصول ايله ترتيب و بونلردن استفاده  
ايدە بيلمك ايچون پوزيتيويزم بزه ويريلن بوتون شيلرك اصل  
علومك چرچوه لرينه كيره بيله جك صورتده پيش ملاحظه  
آلما لر ينى شرط قويه جقدر .

حقيقتده ، انسانلرك بوتون بيلكيلرى شيمديكى حالده بو  
شكل علمى يى حائز اولمقدن چوق اوزا قدر لر . رياضيات ،  
علم هيت ، حكمت طبعيه ، كيميا حقيقه برر علم ايسه لرده  
بيولوژى [ علم حيات ] الهياتك ساردينى قونداقدن كنديسنى  
آنچق يكي صيرمغه باشلايور . بالخاصه انسانى اولان حادثاتك  
تدقيقى حالا علم فكرينه بيكانه اولان ادبايه ومورخلره متروكدر .  
بناء عليه هر شيدن اول علم فكرينى تعيين ايتك وبوفكر ك  
معلومات بشريه نك بوتون شعباتنه ناصل تطبيق اولونه جغنى  
كورمك اقتضا ايلر .

او كوست قونتك بوراده تعقيب ايتديكى اصول پك شايان  
دقدر . اول امرده ، بوجه پيشين a priori مجرد براساس  
وضع ايدوبده منطق سايه سنده بونك نتايجه دوغرو يورومز .



مادی شیلردن ینه مادی شیلره دوغرو ایلریلر . مفهومات علمی اولان منطقدن حرکت ایتمز . دها شیمدیدن صورت قطیعه ده تأسس ایتمش حقیقی برعلم اولان ریاضیاتدن حرکت ایلر .

ابتدا ، ریاضیاتی برعلم عدایتدیرن اوصافی تعیین ایله ایشه باشلار . صوکره بو اوصافی معلومات بشریه نك سائر اقسامنه علی حاله زورله تشمیل ایتمکه قالماز . موافق برطاقم تعدیلات ایله ، اصل دلیلرینی هیچ بوزمادن ، بیلینه جك شیلرك تعدد وتخلفنه اونلری اویدورمغه چالیشیر . ایشته بو اویدورمه کیفیتنه «تعمیم» généralisation ، «توسیع» extension نامنی ویریر . بناءً علیه بوتون بیلکیلر مزده عینی شکل فکری ایجاب حاله کوره دیکشمش اوله رق بولونه جقدر وبوصورتله علم ده هم بر هم مختلف اوله جقدر .

او کوست قونته نظراً ، ریاضیات ، شکل علمیسینی مثبت قوانینك یعنی ایکی معلوم حد آراسنده کی صریح وغیر متحول مناسباتك تحریسنه مدیوندر . بناءً علیه مناسب صورتله تعیین ایدلمش اولان بوغایه بوتون صنوف وقوف ومعلوماته تشمیل ایدلمك اقتضا ایدر . بو تعیین کیفیتنی اجرا ایچون اولاً : بیلنمسی مطلوب اولان شیده کندیسنی علمك قوانینی آلتنه ادخاله مساعد اوله جق بر جهت آرامالیدر . ثانیاً : بو قانونلری بیلنمسی مطلوب اولان شینك طبیعت خصوصیه سنه او یاجق بر صورتده تصور وتخیل ایتملیدر .

بواساسلره کوره قونت هر صنف علمه خاص اولان شکلی، تعیین ایدر و «سوسیولوژی» دینلن یکی بر علمک نظریه سنه واصل اولور. غیر عضوی طبیعتک حادثاتی حکمت طبعیه و کیمیا ایچون نه ایسه معنوی و اجتماعی وقایع ده بو یکی علمه قارشی او موقعده بولونه جقدر .

اساساً موجود اولان علملر حقنده ده او کوست قونت مهم بر معنای فلسفی بی حائز بر طاقم دستورلر کوستیر .

حکمت طبعیه ، چوق زمان یابدینی وجهله ، تدقیق و مشاهده سی غیر قابل بر طاقم مؤثراته استناد ایدره ک خولیا پرورانه ایضاحات ویرمکدن اجتناب ایتلیدر . حکمت طبعیه جدأ بر علم اولابیلیمک ایچون حادثاتک نه کبی شرائط داخلنده نمایان اولدقلرخی کوسترمسی لازمدر و بو کافیدر .

بیولوژی ، حکمت و کیمیا به متعلق علملره نسبتاً اساسلی بر فرق عرض ایدر. بیولوژینک تدقیق ایتدیکی قانونلر وظائفک و اعضالک مناسبات متقابله لریدر . بو قانونلری کشف ایتک ایچون شبهه یوت که حیاتک کندی کندیلکندن نشئت ایتدیکی یولنده کی مابعد الطبعیه به عائد فرضیه بی بر طرف ایدره ک حادثات حیاتیه بی ماده نک قوانین عمومیه سنه تابع دیبه تلقی ایتک اقتضا ایلر . چونکه بو حادثات حیاتیه ماده نک ساده جه دوچار تعدیل اولمش برر صورتلرندن عبارتدرلر . فقط ، دیگر طرفدن ، بیولوژی بی غیر عضوی علملره تابع بولوندر مقندن ده اجتناب

ایتمک اقتضا ایدر. غیر عضوی علملرده مفکره بسیطدن مرکبه  
 دوغرو یورور. بوقاعدنک سببی هر علمک بهمه حال بوصورتله  
 حرکت ایتسی لازم کلدیکندن متولد دکلدر؛ او علملره تعلق  
 ایدن صنف حادثاتده بسیط شینک بزجه دهاقولای قابل ادراک  
 اولماسی، مرکبدن اول بزجه معلوم بولونماسیدر. حالبوکه  
 ذی حیات وجودلر موضوع بحث اولونجه بونک عکسی واقعدر.  
 بوذی حیات مخلوقاتده هیئت مجموعه اقسامه نسبتله بزم ایچون  
 دهاقولای قابل تدقیق، دهامعلومدر. کائنات دایما بزم  
 وسائط تدقیق و مشاهده مزک فوقنده قالهجنی جهته کائنات  
 فکری هیچ برزمان « مثبت » وصفه کسب لیاقت ایدهمیهجکی  
 حالده بیولوژیده بالعکس تفرعات وتفصیلات بزم وسائط تدقیق  
 و مشاهده مزک خارجندهدر. موجودات نه قدر مرکب ومغلق،  
 درجه مکملیتده نه قدر یوکسک اولورلرسه بزجه اوقدر چوق  
 قابل ادراکدرلر. حیوان فکری نبات فیکرندن دهاصریحدر.  
 انسان فکریده دیکر حیوانلر فیکرندن دها واضحدر.  
 اوصورتده که بوتون بیولوژینک ضروری نقطه حرکتی بزجه  
 یکانه بلاواسطه پیدا ایدیلش بر مفهوم اولان بوانسان مفهومیدر.  
 ایشته، علوم حکمیه اقسامدن هیئت مجموعه یه دوغروکیدرکن  
 بیولوژی، فیزیک علملر کبی تدقیق و مشاهده یه مستند بر علم  
 قاله بیلیمک ایچون، هیئت مجموعه دن تفرعات وتفصیلاته دوغرو  
 یورومک مجبوریتندهدر.

بیولوژی به عائد علملرک شرائطه توافق ایتک ایچون مثبت اصولک بویله بر تحوله اوغراماسی ایجاب ایتدیکی کورولونجه معنوی واجتماعی وقایعک تدقیقه تطبیق ایدیه بیلیمک ایچون ده بویوک تحولاته اوغراماسنه حیرت ایدیه مز . بواصول ، اجتماعی وبشری عالمک ظاهرآ کندی کندیلمکندن اولورکی کورون حادثاتی و ظاهری انتظامسزلغی ایچنده قانون طبیعی فکرینه موافق بر طاقم مناسبات تمیز و تفریق ایتکه حقیقه قابلیت کوستیرسه اوغرا دینی تحولاته رغماًینه مثبت عد اولونه بیلیر . ابتدا ، ذی حیات بر بدن کی جمعیت بشریه ده بر موافقت consensus دن ، بر تساندن عبارت اولدینی ایچون مثبت اصول بوراده بیولوژیده کی عینی تحولاتی اکتساب ایده جک ، حادثات معنویه واجتماعیه ده هیئت مجموعه دن اقسامه دوغرو یورویه جکدر . فقط سوسیولوژیده هیئت مجموعه فرد دکلدر . فرد بوراده بالعکس بر اعضا یا خود بر قسمندر . بوراده هیئت مجموعه جمعیت بشریه و ، برنجی درجه ده ، انسانیت در . علم صفتیه انسانی وقعه لر تدقیقاتک ماده ابتدائییه سی ایسه جماعتجه مشترک collectif وقعه لر در .

فقط بو قدرله بیتمز . هر علمده یا پلماسی ایجاب ایدن ، فقط آشاغی درجه ده بولونان علملرده بویوک بر اهمیتی حائز اولمیان برفرق بوراده غایت اساسلی بر مسئله در . اوده ستاتیک statique و دینامیک dynamique تفریقدر . ستاتیک ،

عضویت اجتماعی بی ، شرائط موجودیتی ایله اولان مناسباتنده  
تدقیق ایدر وانتظام نظریه سنی یاپار . دینامیک اذخالص برحادثه  
بشریه اولان ترقی بی قانون شکلنه کتیریر .

جمعیت بشریه تطبیق ایدیلن دینامیک هیئت مجموعه دن  
تفرعاته واقسامه دوغرو یورویره رك اولانسانیتك ترقی عمومیسنی  
تعین ایده جکدر . بونك ایچون ، بومقصدہ اوینون بر طرز  
تدقیق و مشاهده استعمال ایدیلہ جکدر کہ اوده تاریخ عمومی  
تدقیقاتیدر . بوتدقیقاتك موضوعی جماعتجه مشترك حادثات  
بشریه در . خارجدن تدقیق و مشاهده سی قابل بولونانلر ،  
کله نك صریح و قطعی معناسیله یکانه وقعہ عدا ایدیلہ بیلہ جك اولانلر  
بونلردر . بووقایعك تدقیق و ملاحظہ سندن مختلف ادوار تاریخیه  
اوصاف ممیزه لرینی ویرن اوصاف عمومیہ بی استخراج ایلر .  
مع مافیہ عمومی تاریخ یالکز باشنه سوسیولوژی بی تأسیسه کافی  
دکدر . طبیعت بشریه ده فطری اولان اساسلی ودائی تمایلاتك  
وقوفی ایله برله شیرسه ایجاب ایدن دینامیک قانونلرینی بزہ تدارك  
ایده بیلیر .

اوکوست قونت بو جهته ده یالکز بر نظریه جی کی محاکات  
یوروتمز . بو اصوله توفیقاً ترقیات بشریه نك قانون اصلیسنی  
کشف ایتدم فکرنده در . بوکا « اوچ حال قانونی » La loi  
des trois états نامنی ویریر . انسانلر ، اوکوست قونته نظراً ،  
ابتدا الهیات فکرلرینه تابع بر حالده درلر . صوکره بو حالدن



مابعد الطبیعه فکر لرینه تابع برحاله کچر لر ، اوندن صوکرده مثبت فکر لره تابع حاله انتقال ایدر لر .

ایشته بوصورتله علم مفهومک هم اساسی تعیین اولونور ، هم بیلنه جک شیلرک تعدد و تخالفنه به مفهوم توفیق ایدیلیرسه بزجه قابل ادراک اولان ، بزم ایچون وار اولان هر شی موضوع علم اولابیلیر .

\*  
\* \*

فقط پوزیتیویزم ، « حقیقی » اولان شیئی آنحق « مفید » واصل اولق ایچون آرار . علومک تدارک ایتدیکی حقیقی وقوفلردن جداً مثبت اولان بیلکیلره ناصل یوکسلملی ؟

فلسفهک اصل رولی ایشته بوراده باشلار . « حقیقی » یی آرامه کیفیتی « مفید » ایله توأم اولابیلیمک ایچون فلسفهک « مفید » نه اولدیغنی تعریف و علمی بواستقامته توجه ایله مسی لازمدر . چونکه علم ایجاب ایدن ضابطه آلتنه کندی کنیدیلکندن کیره مز .

عمومی صورته ، انسانیتک آرادینغی شی تلقیاتک واراده لرک وحدتی ، آهنگی ، ارتباط و انسجامیدر . او وقته قدر کلیسا طرفندن تأمین ایدیلن بو آهنگ ، او کوست قونتک فکرینه نظراً ، انقلاب کیر طرفندن کسر اولوندیغی ایچون تعقیب ایدیله جک غایه لایتزلزل ، قطعی یکی بر منظومه ترتیب و تنظیم تأسیسی صورتیله جمعیت بشریه یی یکیدن احیا ایتک اولمالیدر . بزى

تجهه سه دوشور مك اوزره فرصت بکله ين بر خطا واردر که اوده  
 يو آهنگي بر طاقم مؤسسات سياسيه و دينيه ايله همان تأسيس  
 ايدمه بيله جکمزى ظن ايلکدر . واقعا بر طاقم مؤسساته لزوم  
 واردر . فقط بومؤسساتك بر تملى اولمق ايجاب ايدر . يتيشيله جک  
 غايه فکرى ، ساده جه صرف عملی بر فکر ، غير کافی بر تم اولور .  
 فعلیات و عملیات ، کندی کنديسنه کافی دکدر . هيچ آليشمه دن ،  
 قوللانييله جق و سائطی اولجه تدقيق ايتمه دن ، بردن بره بونک  
 تعقينه آتلق ايسته نيرسه غايه يه واريله ماز . صنعت ايچون صنعت  
 بر خيال خام اولديغی کبی نظريه ايچون نظريه ده بر نخوتدن  
 عبارتدر . انتظامده و صيراده اولان شی نظريه واسطه سيله صنعتدر .  
 ايسته بوندن دولايی فلسفه نك ايشه مداخله سی ضرورت  
 کسب ايدر . ساده « عملی » کافی کلسه ایدی هیئت اجتماعیه یی  
 یکیدن احيا ايتمک ایشی هپ سياسیونه ترتب ایدردی . اگر  
 علم کندیلکندن هپ عینی نقطه يه توجه ایتسه ایدی جمعیت  
 بشریه یی اداره ايتمک وظیفه سی علمایه تودیع اولونه بیلیردی .  
 فقط بواحتماللرک ايکيسی ده عینی درجه ده ياکاش اولديغی جهته  
 علمدن عمله کچمه نك شرائطی تعین ايتمک ايچون خصوصی  
 بر تحریات تأسيس ايتمه که لزوم واردر . بر تحریات ، فلسفه نك  
 ایشیدر . اوکوست قوننده بويک اساسلی بر نظريه در . بوسايه ده ،  
 بشریتک سلامتی ايچون ازمنه قدیمه ده کی حکمتک هم نظری هم  
 عملی اولان چيفته وصفی احيا ايتمک فکرنده ایدی .

او کوست قونته نظراً فلسفه‌نک بوراده کتیردیکي فکر ،  
 اول امرده دوشونجه‌لرده ومفکره‌لرده منطقی بر انسجام تأمین  
 ایدلمزسه حسیات ، افعال وحرکات بشریه‌نک معنوی وسیاسی  
 هپ بر نقطه‌یه توجه ایده‌جکني امید ایتک بیهوده اولدیغیدر .  
 وحدت فکریه ، وحدت معنویه و اخلاقیه‌نک شرطیدر .  
 بناءً علیه « مفید » اول امرده وحدت فکریه‌نک کسب  
 حقیقت ایتسیدر . بو وحدتی تأسیس ایتک فلسفه‌نک اصل  
 غایه‌سیدر .

علملر هپ قانون طبیعی حقنده کی مثبت فکره کوره تأسس  
 ایتمش اولدقلرندن کنیدیلرنده اویله تجانس واردر که بالذات  
 علم ساحه‌سنده توحیدلری قابل اوله‌جغنه دایر بر قناعت  
 ویره‌بیلیر . فقط بو تهله‌کلی بر ذه‌ابدر . علملر ، تطبیق  
 ایده‌جکلری اصوللرده مشابه اولمقله برابر بزم ایچون غایه‌لری  
 اعتباریله بر برلرندن صورت قطعیه‌ده آیریدرلر . تعقیب ایده‌جکلری  
 اصولی هپ بر انتخاب ایتیموده بررینه بکزه‌ین اصوللرله  
 اکتفا مجبوریتده بولونمالری موضوع لک غیر قابل ازاله اولان  
 تخالفندن وفرقلیلغندن ایلری کلکده‌در . علم ، مفکره بشرک  
 احتیاجی صفتیله برایسه‌ده ساحه فعل و حقیقه چیقارکن بالضروره  
 تعدد وتخلف ایدر . « علم » نامی ویریه‌بیه‌جک تک برشی نه‌واردر ،  
 نه وار اولابیلیر . آنجق برطاقم علملر وار وهپ بویله برطاقم  
 علملر موجود اولاجقدر . او کوست قونت « فلسفه مثبته

درس‌لری «Cours de philosophie positive» نده آلتی‌دانه  
اساسلی علم تفریق ایدر .

انسانیتک وحدت فکریه‌سنی تأمین‌ایچون علمایه بل‌باغلامق  
دیمک که غیر قابلدر. اونلر برر عالم اولمق صفیله بوغایه علوی‌یه  
مغایر برطاقم تمایلاته مالکدرلر. بو عالملا اختصاص طرفنده درلر .  
حقیقتی پارچه‌لارلر، بربرلرینی بیلمز لر یاخود استخفاف ایدرلر.  
یاخود، کندی تدقیقاتلرینک ادااعلا علم اولدیغنه ذاهب اوله‌رق  
کندی اصوللرینی علی‌حاله دیکر علملرک کافه‌سنه قبول ایتدیرمکه  
قالقارلر . فرضا ریاضیون ، کندی ساحه‌لرنده اقسامدن هیئت  
مجموعه‌یه دوغرو یورومک صورتیله استحصال ایتدکلی موفقیته  
مغروراوله‌رق ماده‌جیلکه مستند نقطه‌نظرلرینی بیولوژی‌یه وسو-  
سیولوژی‌یه ادخال ایتمک ایستیورلر . حالبوکه بو علملر بالعکس  
هیئت مجموعه‌دن تفرعاته دوغرو یورومک مجبوریتنده درلر .  
ریاضیونک هم دار ، هم مستبد واستیلا جویانه هم آنارشیزست  
اولان روحلری انسانیت ایچون اک بویوک مصیبتدر .

بوکا شونی‌ده علاوه ایتمک ایسترکه ، عالملر علمی علم‌ایچون  
ایلرلیتمکه ، کشفیاتلری هیچ برشیئه یاراماسه‌ده اونلره قارشلی  
حیران اولمغه ، هیچ معاسز شیلرده طفلانه برقطعیتم آرامغه ،  
صنعتکارانه هنرلرینی کوسترمک ایچون بر سورو جعلی مسئله‌لر  
چیقارمغه میالدرلر .

بوتون بوسیلردن دولایی علم یاخود ده‌ها دوغروسو علوم ،

کندی کندیلکلرندن تعضوایده مزلر. تفکر بونلری دیشاریدن ترتیب وتنظیم ایتلیدر .

علملرک بلا واسطه و اوثر قیثف صورتده توحید و ترکیبی غیر ممکن اولدیغی ایچون سو بڑه کتیف بر توحید و ترکیب وجوده کتیرمهک چالیشمالیدر . بو توحید و ترکیب عملیه سی اشیا نقطه نظرندن دکل ، علوم واسطه سیله کندی خصوصی غایه لرینی تعقیب ایدن انسان نقطه نظرندن یالمش اولمالیدر . ایشته اوکوست قونت کندیسنک ایجاد وتأسیس ایتدیکی علمک ( سوسیولوژینک ) ، علملرک اک صوکنجیسنک ، بو توحید و ترکیبک عناصرینی احتوا ایتدیکی فکرنده در .

بووظیفه یی ایفا ایتمک ایچون سوسیولوژینک کوزی اوکنده اسکی دورلرک الهیاتی بر نمونه خدمتی کورور . اوزمان الهیات سو بڑه کتیف بر اساس سایه سنده بوتون ذکالری توحید ایدردی . فقط الهیات او اساسی مخیله دن آلیردی . شیمدی یاپیله حق ایش الهیات منتسبلرینک اثرینی یالکز وقعه لره وعقله استناد ایدهرک تکرار اله آلمقدن عبارتدر .

ترتیب وتشکیل ایچون اساس : غایت اعلا بر اجتماعی مفهوم اولان انسانیت مفهومیدر . انسانیت ، فضا نقطه نظرندن باقیله حق اولورسه آنجق اقسامی ایله یعنی فردلرله موجوددر . فقط زمان ایچنده پایدار اولان برکل کبی تلقی اولونورسه تظاهراتی فضالک ایچنده داغیتیر .



علم فکری بالضروره البسيط علملردن الكمغلقله دوعرو  
کيديلهرك تعميم اولونديغی حالده علملرك تشکيلاتی وجوده  
کتيرمک اچون سوسیولوژیدن باشلايرهق دهآشاعیده کی علملره  
دوعرو اینمک ایجاب ایدر .

انسانیت مفهوميله الك ابتدا اجتماعی وقایع برترتیب و اصول  
دائرة سنه کیرر . فضا داخلنده داغینیق اولان بو وقعه لر ماضی  
ایله حال واستقبال آراسنده کی تساند یاخود بربرندن انبعاث  
مناسبتی سایه سنده بربرلرینه ارتباط پیدا ایدر لر . حادثات بشریه نك  
بربرندن انبعاث و ارتباطی ایکی سیدین نشئت ایدر . بونك  
بری خارجیدر : عنعنه در ، یعنی مکتسبات بشریه نك نسلدن  
نسله انتقالیدر . دیکری داخلیدر که اوده تکمل اچون موجود  
اولان مشترک سوق طبعیدر . بقا وانتظام واسطه سیله ترقی  
فکری حادثات اجتماعیه نك بر اصول آتنده جمع وتوحیدی  
اچون اساس در .

بوفکر دهآشاعی طبقه ده کی علملری ، صیرا ایله برندن  
دیکرینه کچه رک ، تحت انضباطه آلمق اچون قوللانیله بیلیر .

او علملرکده غایه سی وقاعده سی سعادت بشریه دن عبارت  
اولمق اقتضا ایدر . بوعلملر کندیلرینی انسانلرک انسانلر اچون  
یابدقلمرینی هیچ برزمان اونوتما مالیدر لر . بناء علیه شرائط انسانیه یی  
اصلاحه خدمت ایده مه یه جک ، غایه سنده بشری اولمایه جق  
بوتون تصورات وتفکراتی برطرف ایتلیدر لر . قوانین طبیعی

يالكز سائقه مراق ايله تدقيق ائتمه جه جكلردر . شعارلری :  
 « برشيئه يارامق ايچون اولدن كورمك » دن عبارت اولاجقدر .  
 بو علملر يالكز هيئت اجتماعيه نك خيري غايه سنه معطوف  
 اولمقله قالمائه جقلردر . آرالرنده غايه يي واسطه يه ربط ايدن  
 مناسبات خصوصيه ده بولونه جقدر . يوقاری طبقه ده بولونان  
 هر علم آشاغي طبقه ده كي علملر ك بحث و تدقيق ايدمه جكلری  
 مسئله لری تعين ايدمه جك و تحرياتك نه نسبت داخلنده ایلری  
 كوتورولسی لازم كه جكنی ده كوستره جكلدر . بوكا مقابل آشاغي  
 طبقه ده بولونان علملر ك تأسيس ايتدكاری قانونلرده بلا تحديد  
 يوقاری طبقه ده كي علملره قابل تطبيق اوله جقدر . بر علم كنديسندن  
 آشاغيكي علملر ك بولدقلى بوتون قانونلره تابع اوله جق واوكا  
 كنديسی باشقه قانونلر علاوه ايدمه جكلدر .

ايسته بوصورتله ، قوانين طبيعه تماميله مثبت بر استقامتده  
 تعين اولونه جقلر ، يعنى حقيقتك نقطه نظرندن اولديغی قدر  
 مفيد اولمق نقطه نظرينه ده تابع بولونه جقلردر . تنقيد فلسفينك  
 وقوف بشری محكوم ايتديكي نسبيك كيفيتی دوام ايدمه جكلدر .  
 فقط بر حادته نك شرط ظهوری ديكر بر حادته اولديغی يولنده  
 يالكز منفی و بی فائده بر معناده آكلاشلمايه جقدر . بوندن هر  
 وقوفك انسانه نسبت ايديلديكي ، آنجق انسانك تكملنه دوغروندن  
 دوغرويه ياخود اوزاقدن اوزاغه خدمت ايدن بر آلت اولمق  
 اعتباريله بر معنایي حائز اولديغی آكلاشيله جقدر . بو مسلكدن

عظیم نتیجه لر چیقار : شاهانه بر علم عد ایدیلک ایسته نیلن ریاضیات بونظریه کوره وقوفزک سلسله مراتبده اک آشاغی درجهیه دوشر .

ایسته سوسیولوژی علمنک وجود بولماسنی دائرة امکانه چیقاره حق ترتیبات و تشکیلات بودر . بوتشکیلات انسجام ذهنی بی ، وحدت فکریه بی تأمین ایدرکه بولمازسه جمعیات بشریه نك احیاسی غیر قابلدر .

فلسفه نك دائرة شمولی بورایه قدرکیدر . وحدت اخلاقیه و معنویه ایله وحدت سیاسیه نك کندی کندی کلرندن وجود بولمالری ایچون یالکز بووحدت فکریه یه ایریشمک عجا کفایت ایدرمی ؟ یوقسه بووحدت قصوایی تأمین ایتک ایچون انسانه یکی بر طاقم منابع ویرمک ، باشقه ماهیتده بر طاقم قوتلرک یاردیمه مراجعت ایله مک لازمی در ؟

\*

\*\*

فلسفه بو ترکیب و توحید ایشی ایله مشغول اولورکن علومک تدارک و احضار ایتدیکی بر طاقم معلوماتی قوللانمش و بومعلوماتک شرائطی نه اولدیغنی دوشونمه مشدر . سوسیولوژیده انسانلر آراسنده وحدت فکریه بی تأمین ایده جک بر تشکیلات علوم اساسنی بولدی . فلسفه کندی غایه سنی تأمین ایچون اوغرا شیرکن بو اساس ایله اکتفا ایدرک ، جمعیت بشریه نك نه دن دولایی موجود و پایدار بولندیغنی ، اونک قوای محرکه سنک

طبیعتی و اساسی نه اولدیغی تحری ایده جك دکلدی . مع مافیه جمعیت بشریه یی یالکز نظری اوله رق دکل فعلاً احیا ایتک ایسته ین انسانلر ایچون بو تحری الزمدر . علوم بر طاقم مواد ابتدائیه احضار و تدارك ایدر . فلسفه اولنری ترتیب و تنظیم ایلر . فقط بوتون بو ایش مجرد و شرطه معلق بر حالده قالیر . چونکه هیئت اجتماعیة نك علمك ترقیاتی دائره سنده موجود و پایدار قاله جغنی بزه کیم تأمین ایده بیلیر ؟

تاریخ بزه بر طاقم تشکل ایتمس هیئات اجتماعیة دن بحث ایدر . بو هیأت اجتماعیة لری کیم وجوده کتیردی ؟ علم می ، فلسفه می ؟ تدقیق و مشاهده بزه کوستریور که بونلری وجوده کتیرن شی دیندر . سوسیولوژی موضوعی و حکمت وجودینی دینک تأثیرات متمدیه سته مدیوندر . دین اورته دن قالقارسه بو موضوع پایدار اولاجقمیدر ؟ سبب قالقنجه نتیجه موجود اولابیلیر می ؟

طبیعت بشریه یی پیش ملاحظه یه آلام . ذکا ، فطرت بشریه ده اجتماعی بر رابطه یاراتمغه یاخود بو رابطه یی محافظه ایتکه قادر دکلدر . اک عالمانه ترتیبات فکریه آنجق خودکاملنی و مجرد و انزوایی تشکیلات آلتنه آلابیلیر . عمومیتله ، ذکا ، بر شی دوغورماز ، یالکز ترتیب و تنظیم ایدر ، اصول آلتنه قویار . یاراتان ، دوغوران شی قلبدر . عضویت اجتماعیة دنیلن بو خلق و ایجاد قصوانك منشأنده قلبك اجرای تأثیر ایتمه سی لابددر .

قلب ، سوق طبیعی ایله ، طبیعت ایله ، صرف ساده وقعه ایله قاریش دیر یلاماز . چونکه بزجه بلا واسطه معلوم اولدینی شکلده طبیعت بشریه ده اک آشانی درجه ده واک خودکامانه اولان سوائق طبیعیه ، محبت وحب غیر کبی دها نجیانه اولان میلانلره حاکمدرلر . شبهه یوق که خودکامانه سوائق طبیعیه کبی بونجیانه میلانلرده انسانلرده ابتداءً موجوددرلر . فقط اوسوائق طبیعیه نك نه شدت وقوته نه ثبات ودوامه مالک دکلدرلر . حالبوکه فردلرده کی سوائق طبیعیه نك مختلف استقامتلره معطوف اولان تاثیراته حاکم اوله رق حال اجتماعی بی تولید وادامه ایده بیله جک اولان شیر یالکز بومحبت حسیاتیدر .

بناءً علیه ، هیأت اجتماعیه نك موجودیتی نه سوق طبیعی نك نه ده ذکانتک یاهه مایه جنی بر حاله مربوط دیمکدر . انسانده کی میلان محبت پرورانه ایچون بریار دیمجی بولمق واومیلانی خودکامانه سوق طبیعیه تفوق ایده جک صورتده تقویه ایتمک ایجاب ایدر .

ایشته ادیان بومعاوتی ماضیده تأمین ایلشلردر . ذکالک اتحادی ایچون لازم اولان قلبلر اتحادینی دینلر ، کندیلرینه کوره ، وجوده کتیردیلر . دینلری افاده وتلخیص ایدن دستورلردن عبارت بولونان اسکی عقیده لر اورته دن قالقمغه محکوم اولسه لر بیله بوقدیم مؤسساتده کی اساس انسانی بی چیقارمق ومحافظه ایتمک الزمدر . جمعیات بشریه نك احیاسی ایچون ایجاب ایدن ایلک اساسی کذلک اصلاح واحیا ایدمش اولان دین تأمین ایده جکدر .



بواحیا کیفیتنی اجرا ایچون تعقیب ایدیله جک اصول اسکی  
عنعنوی دینلرده بولونان منفی وعقیم عناصرک ایچندن بر ظرف  
خدمتنی کوردکلری مثبت ، بشری ، غیرقابل احما اولان عنصری  
بولوب چیقارمقدن عبارتدر . ایشته پوزیتیویزم بو صورته تمام  
اوله حق واک یوکسک ذروه سنی مثبت دین تشکیل ایله یه جکدر .

دینلرک بوتون اوکرتدکلری شیرلری ایکی عقیده ده خلاصه  
ایدیله بیلیر : بری الله ، دیکری لایموتلق . بو ایکی عقیده نك  
ایچنده کی مثبت محتویات نهلردن عبارتدر ؟

الله فکری ، انسانک حقیقی بر احتیاجنی افاده ایتمک  
اعتباریله ، عمومی ، بویوک ، ابدی بروجود فکریدر . انسانلرک  
روحي بوجود عمومی وابدی ایله مناسبتده بولونور . اوجود  
عمومی وابدی انسانلره کنديسیله برلشمک ، کنديسیله هم  
آهنک اولمق ایچون خودکامانه میلانلرینی ینمک اوزره لازم کلن  
قوتی نفح ایدر .

لایموتلق حقنده کی مثبت فکر ، ایلره یعنی بو دنیاده اللهی  
وسائر انسانلری حقیقه و جدأ سونلره وجود الهینک حیات  
ابدیه سنده بر حصه ویرمک فکریدر .

حالبوکه پوزیتیویزم بوشرائطی حائر اوله حق حقیقی وقابل  
ادراک بر موضوع بولمقده مشکلات چکمز . بو ، بزدن اوزاقده  
دکلدر ، یانمزده در ، کنديمزده در : انسانیت .

انسانیت اکثریا صرف عمومی بر مفهوم اولق اوزره تلقی ایدلمشدر . بویله اولورسه اسقولاستیکلرک تجریداتندن بری اولور ، بوش و جامد بر شکلدن عبارت قالیر . حالبوکه انسانیت کله سیله الیوم موجود اولان انسانلرک هیئت مجموعه سی ده آکلاشیله بیلیر . بو معناجه انسانیت بر شأنیت اولور . فقط الیوم موجود انسانلره ایسته دکلری الله ولایموتلق فکرلرینی انسانیتده بولدی ره حق صورتده ناصل حاکم اولمالی ؟

انسانیت بزجه معلوم بو کنیش شکلیله اسقولاستیکلرک تجریداتندن ، فضا داخلنده موجود بر هیئت مجموعه دن ، بر انسان قولکسیونندن باشقه برشیدر . انسانیت زمان داخلنده برتمادی واتصالدن ، بر تساندن عبارتدر . انسانلرک ایی ، عالیجذابانه وابدی اوله رق بوتون یاپدقلری ، دوشوندکلری وحس ایتدکلری شیلردن ترکب ایدر . انسانیت فضا فوقنده بر وجوددر . فردلرک مبهم وموقت سعیلری صفوت ونزاهت کسب ایده رک ، عضو وتشکل ایله یه رک بو وجودده طویلانوب قالیرلر ، لایموت بر حیات ، صیانتکار بر تأثیر ونفوذ اولورلر .

بو صورتله آکلاشیلان انسانیت انسانلرک ایسته دکلری الله در : حقیقی ، عظیم وابدی بر وجوددر . اونکله بلا واسطه مناسبتده درلر ؛ اونده وارلق ، حرکت وحیات بولورلر . عصرلردن بری بو وجودده طویلانمش اولان قوای معنویه مخزنندن قبلرینه بویوک دوشونجه لر ونجیب حسیاتلر دو کولور . انسانیت وجود

اعظمدر که بزی کندی کنديمرك فوقه قالدير ، تمايلات  
محبته و رانه مزه تمايلات خود كامانه مزي نمك ايجون محتاج اولدقلى  
فضله قوتى ويرير . انسانلر انسانيت ايجنده بربرلرينى سورلر  
و بربرلريله برلشيرلر .

كذلك ، انسانلر آرزو ايتدكلرى لايتموتلغى ده انسانيت ايجنده  
حقيقه بولابيلرلر . چونكه انسانيت كندى اصل و لنه موافق  
اولان ، كنديسى دها بويوك ، دها كوزل ، دها ذى قدرت  
يا مغه خدمت ايدن هرشي قبول و حفظ ايدر ، ايجنه آلير .  
انسانيت حقيقه وار اولان انسانلر ك تفكر لرندن و حسلرندن  
وجوده كلشدر ؛ ديرلردن زياده اولولردن تركب ايدر . بواولولر  
شيمديكى نسللر ك متأثر ، فعال و مؤثر خاطره لرنده يشارلر .  
ديرلرده تحريك ايتمكدن خالى قالمادقلى نجيب بر حس رقابت  
و غبطه ايله تأثيرلرينى كوستيرلر . بو حس غبطه تأثيريله انسانلر  
اواسكى بويوك آدم لرله برلشمكه لياقت كسب ايتمكه چالشيرلر .  
واقعا ، بوالله شخصى بر الله اولامايه جغى كى بولايتموتلق ده  
او بركتيف بر لايتموتلق دكلدر . پوزيتيويزم ، وحى الهى به  
مستند دنيلن اديانده موجود او عقيده لرى خيالى عد ايدرك  
رد و جرح ايلر . فقط اصل دين بوندن نه درجه به قدر متأثر  
اولور ؟ او وجهه مستند دينلن دينلر ك تصور ايتدكلرى كى  
محدود ، خود كام ، ايريشيله مه به جك قدر يو كسكلرده ، كيف  
وهوسنه تابع بر الله بو تصوير ايتديكمز شكلده انسانيت ايله

قارشىلاشديريليرسه نه قيمتى حائز اولور كه بو انسانيت بوتون  
 تماميتيله هر كسكدر ، هر كسك وارلغنده مكنوزدر وبوتون  
 اوعلويتيله اك حقير بر آدميله بيله عيني شيدر . فضا ايچنده مادي  
 صورته پايدار اولق ، زمان ايچنده وجدانلرده پايدار اولغه  
 نسبتله دهامهم بر شيميدر ؟ قلب بشر ك اك عزيز آرزوسى  
 اولان روحلرك ابديت ايچنده اتحادى املنى تحقق ايتديره بيله جك  
 شى اصل بو زمان ايچنده وجدانلرده پايدار اولق كيفيتيدر .  
 طبيعت بشريه ده كي غير قابل ازاله والزم سوق طبعى يه محقق  
 وقطعى صورته تقابل ايدن بر دين وارسه اوده پوزيتيويزم  
 ياخود دين انسانيتدر .

بو دين مجرد بر مفهوم دكلدر ، حياتدر . حب غيرك  
 وعشق حقيقى بر انكشافيدر . فقط بو دينى حقيقه اجرا  
 ايچون تعقيب اولونه جق اصول صوك درجه ده حائز اهميتدر .  
 دينلرك ده موضوعى عشق ومحبت ايدى . معافيه او دينلر  
 كورديكمز او عنعنوى شكللر آلتنده آرتق محكوم زوالدر .  
 چونكه شرائط موجوديت قانونه تبعيت ورعايت ايتمين هيچ  
 بر مؤسسه بر حيات قاله ماز . فلسفه ناصل مثبت ومؤسس  
 اولابيلمك ايچون علمك آرقه سى صيرا كيتمك ايجاب ايدر  
 وترتيب وتشكيل ايده جكي موضوع وماده يي ناصل اوندن  
 آليرسه دين ده ناقابل احما بر حاله كلمك ايچون علمه وفلسفه يه  
 استناد ايتمليدر . دين ، حقيقى وعقلى عالم ايچنده اجراى تأثير  
 ايتلى وحركاتنك شرائطنى بو عالم ايچنده آرامايدر .

اوده عبا و فلسفه کبی مرکب concret دن مرکه کیدر،  
مجرددن مرکه دکل . پوزیتیویزمک بزى قورتاردینی اوبوش  
براسقولاستیک جوهر مجردی اولان اویله نوع بشر فکری  
کبی مبهم و مجرد بر فکره استناد ایدن عامیانه ایملک و محبت  
بودینده یر بولاماز . بوجه پیشین، برانسانیت ایلری یه سورمک،  
مابعدالطبیعی ، خودکامانه و انقلابکارانه براساس وضع ایتک  
اولورکه بوتطبیق ایدیلیرسه الهیات دورینک ساحه فعله ایصال  
ایتک مزیتنی کوستردیکی قسمی فقط هر حالده مرکب انسانیت  
افاده لرینی محوه میال بولونه جقدر .

عشق بر فکر واسطه سیله قارشیسنده کنه و یريله مز . او،  
اشخاص بیننده کی مناسباتدن وبالخاصه ارکک ایله قادین آراسنده کی  
مناسباتدن دوغار . اکر روحده یالکز منطق یونک تجریداتندن  
عبارت عاجز بر عشق مفهومی دوغماسی آرزو ایدلمزده جانلی  
ومؤثر برعشق اویانماسی وانکشاف ایتسی ایسته نیرسه اومناسباتی  
اساس طوتمالیدر . ناصل علم فکرینک تعمیمی ، تشکل ایتمش  
علملرک اوصافی ، تشکل ایده جک علملره بعض تصحیحات  
ایله تشمیل صورتیله وقوعه کلیورسه ، ناصل علملرک فلسفی  
صورتده ترتیب وتشکیلی کیفیتی درحال مفیداولان سوسیولوژیدن  
حرکت ایدیلهرک غایه اجتماعیه یه نسبتله برر واسطه کبی تلقی  
اولونان علومک درجاتنده صیرا ایله آشاغی یه اینک صورتیله  
یاپیلورسه قادین وارکک جنسلری آراسنده کی مناسبتدن طبیعتک



قانونه توفیقاً دوغان عشقده اکر ایلک موضوعدن کائناتک  
کیتدکجه دها کنیش و مشوش اولق اوزره عرض ایده جکی  
مختلف موضوعلره تدریجاً و منتظم بر اصول دائره سنده انتقال  
ایدرسه یاواش یاواش کنیشله یه جک و حقیقی وصفی محافظه  
ایتمکله برابر عمومیه شه جکدر . عشق بوتون وسعی و بوتون  
قدرتی ایله کسب حقیقت ایده بیلیمک ایچون درت مرحله دن  
متعاقباً کچمک ایجاب ایدر که بونلرده ایکی فرد آراسنده کی مناسبت،  
عائله ، وطن و انسانیتدر .

ایلک آلیشمه درجه لرینی کچهرک بو صورتله انسانیتی هم  
یوکسک هم حقیقی بر عشق ایله سوه جک اولورسه ق ایشته  
اوزمان و یالکز او زمان وجود اعظم بزم ایچمزرده یاشار ،  
وارلغمزه حاکم اولور و بزی اداره ایدر . بو قدرت حاکمه نک  
مقاومتسوز تأثیری آلتنده طبیعتمز تحول ایدر ، حب غیر  
خودکاملغه غلبه چالار . هم جنسر مزه قارشلی اولان عشقمز،  
اللهدن کچمکله ، نظری ایکن عملی اولور ، جبری ایکن فوری  
اولور . الله قیلبرک رابطه سیدر .

\*

\* \*

عشقدن بحث اولوندینی زمان ، هرشی شأنیتدن عبارت  
اولدینی ، صرف نظریه ایسه اهمیتسز بولوندینی ایچون شأنی  
تولید و انکشاف ایتدیره بیلرک هیچ برشی اهل ایتمه مک  
لازمدر . غنغوی دینلرک روح بشرده حسیاته وخیلیه مراجعت

ایتملری بهوده دکلدی . حسیات وخیله روحك تحريك ماكنه .  
 لریدر . فکرلر روحمزه آنجق خفیفجه تماس ایده بیلدکلری حالده  
 حسیات ایله خخیله روحمزی اهتزازه کتیررلر ، اونی یاشاتیرلر .  
 الهیات منتسبلرینك خطاسی ، شأنیت نظریه سنك فقدانی  
 خخیله نك ایجادلریله تلافییه واونلری برر شأنیت دیه قبوله قیام  
 ایتمه لرنده در . فقط حقیقی علمك و حقیقی فلسفه نك متین قلعه سنه  
 صاعلاجه یرلشمش اولان انسان ایچون آرتق خخیله دن قورقه جق  
 بر جهت قالماشدر . متردد وانیشناك مابعد الطبیعه نك آچقندن  
 آچیغه خخیله یه ویره مدیکی رولی اوکا تحمیل ایده بیلیر . برخیالك  
 خیال اولدیغی بیلینرسه ، حقیقتك یرینه قائم اولمغه قیام ایتدیکی زمان  
 اونی لایق اولدیغی موقعه ایندیرمك ایچون مجهز بولونیلیرسه  
 انسان اوکا آلداناماز . حالبوکه انسانلر اوله یاپلشلردر که خیالی  
 اولدیغی بیلینن شیلرده حقیقت عد اولونان شیرکی اوزرلرنده  
 اجرای تأثیر ایدر . خخیله حقیقت ایسته مز . اشای خارجییه  
 بزم وارلغمزك انعکاسنی آرار . کندیسنه خوش کلن صور ذهنیه  
 ایله خخیله برکره صارصیله جق اولورسه بو حمله سنی قلمزدهده ،  
 اراده مزدهده کچیریر .

اونك ایچون ، پوزیتیویزم ، عقیده لرك برر حقیقت اولمالری  
 ادعاسنی ردایتد کدن صوکره ، خیاله مستند اولان اوصنمپرستلکی  
 دینك اساس عقلیسنه تابع بریاردیمجی اولمق اوزره اعاده وتأسیس  
 ایتمکدن قورقماز . حسیاتك مرکب وفعلی بر ترتیب وتنظیمنی

تامین ایچون طبیعت بشریه یه اویغون بر واسطه اولمق اوزره  
فی الحقیقه بونلری یکیدن تأسیس ایده جکدر . چونکه ترتیب  
وتنظیم کیفیتی بوصورتله یاپیلما یاجق اولورسه جمعیات بشریه نك  
احیاسنك شرط اساسیسی اولان عمومی توحید و ترکیب کیفیتی  
synthèse ساده جه بر فکردن عبارت قالیر .

او کوست قونتك تأسیس ایتدیکی صنمپرستك حقیقتده صرف  
شاعرانه بر شی اوله جقدر . معلوم موجودات طبیعته فرضیه  
شکلنده بزده کی کبی فعال و خیرکار برر اراده عطف واسناد  
ایدر . اکر طبیعت بر طاقم مقدر و کور قانونلرک افاده سندن  
عبارت قالیرسه انسانلر کندیلرینی سینئه طبیعتده پک یالکز و منزوی  
حس ایدر لر . شوق و غیرت ایله ، نشئه ایله حرکاتده بولونه بیلیمک  
ایچون انسانلر کندیلرینی آکلایان و تأیید ایدن دوستلرله محاط  
اولدق لرینی کورمک ایستر لر . بناء علیه قوای طبیعتک آلتنده  
کندیلرینه مشابه و کندیلرینه محب بر طاقم موجوداتک بولوندیغنی  
تحیل ایتک اونلر ایچون فائده لی اولور . قانونلری اتمام ایتک ایچون  
اراده لر لازمدر .

بونک ایچوندر که پوزیتیویست عبادتی یالکز قهرمانلرینک  
خاطره سنه مراجعت ایتمز . باشلیجه موضوعلری شونلردر :  
وجود اعظم یا خود انسانیت ؛ صنم اعظم یا خود ارض ، یا خود  
فضا . بو اوچ شخصیت پوزیتیویزم دینک اقانیم ثلثه سیدر . قوانین  
طبیعیه نك کافه سی ده بویله ، مخیله یی علاقه دار ایده جک صورتده ،  
بر نوع مشرکک دوری معبودی ایله تمثالی اوله رق ارائه ایدیله بیلیر .

او کوست قونت مسلکنک تفسیری

ایشته دین ایله علمک مناسباتنه دائر او کوست قونتک مسلکی . مع مافیه بو مسلکک معناسی حقهده اتفاق موجود دکدر .

بر چوق مفسر لر بونک ایچندن اصل مسلک دکلدده او کوست قونته بر طاقم صیمی و تصادفی حسیاتک افاده سی عد ایدیه بیه جک اولان قسمک چیقارلمسی لازم کلدیکی و بو قسم چیقاریلیرسه او کوست قونتک دیندن یالکز - ذاتاً سوسیولوژیسنده موجود اولان - وقوف بشرک قاعده سی و اولچوسی اولق اوزره انسانک و بالخاصه انسان اجتماعینک قاله جغنی سویر لر . بر طاقملری ایسه قونتک اثرنده دینی مؤسسنه لرک و مسلکلرک فعلیاتده بویوک بریر طوتدیغنه و بونلرک اصل فلسفی دینلن نظریه لر دن قطعی صورته آیری بولونقلرینه باقه رق دینه عطف ایتدیکی معنای خصوصی بی تسلیم ایدر لر . یالکز، مسلک دینسی ایله مسلک فلسفیی آراسنده بر رابطه منطقیه بولوندیغنی قبول ایلر لر .

\*

\*\*

او کوست قونتک اثرنده کی قسم دینی ، سوسیولوژی ایله مقایسه ایدیه جک اولورسه عجبا حقیقه کی بر طاقم اساسلر اورتیه قویورمی ؟

کله لرله یولمزی شاشیرمایه لم ، دیورلر . او کوست قونت  
 سوثرکتیف حالردن ، حسیاتدن ، قلدن ، اخلاقدن ،  
 ابدیتدن ، دیندن بحث ایدیوراما حقیقه ظاهرأ تصوفه قاجار  
 کبی کورونن بو نظریه لرده موضوع بحث اولان نقطه تحریات  
 علمیه ده و حیاته اجتماعی و انسانی نقطه نظرک مطلقاً غلبه ایتسی  
 لازم کلدیکی کیفیتدر . او کوست قونت اشیا نقطه نظریدن  
 یعنی اوثرکتیف اوله رق وقوع بوله حق ترتیب و تنظیم علوم ایشک  
 محال اولدیغنه حکم ایده رک توجه ایتدیکی نقطه نظره سوثرکتیف  
 نامنی ویرمشدر که بوده علملری صرف انسانک نقطه نظرندن  
 انسانک فائده سی ایچون ترتیب و تنظیم ایتکدن عبارتدر .  
 کذلک ، او کوست قونتک قلب دیدیکی شی حب نفسه  
 مقابل حب غیری ، حس اجتماعی بی افاده ایتک ایچون عنغوی  
 بر کله در . او کوست قونته نظرأ مابعد الطبیعه عالملری عقلی ،  
 تصورات و ملاحظات شخصیه ایله عینی شی حاله کتیره رک قیمتنی  
 تنزیل ایتمشدر . او کوست قونت عمومیتله عقله مقابل وضد  
 بر کله اولمق اوزره قوللانیلان « قلب » ی مابعد الطبیعی نقطه  
 نظرک یرینه اقامه ایدیلن اجتماعی نقطه نظری افاده ایتک ایچون  
 استعمال ایلر . مفکره نک قلبه تابع اولماسی سوزی او کوست  
 قونت نزدنده تحریات علمیه یی ، حس اجتماعینک تحت تأثیرنده  
 اجتماعی بر فائده استحصالنه خادم ایتک و بو یولده تنظیم ایلک  
 معناسنی افاده ایدر .



اگر بویله ایسه او کوست قونتک فلسفه دن اخلاقه و دینه  
 چمکله یاپور کبی کوروندیکی صیچرامه هیچ موجود دکدر .  
 حقیقته ، اخلاقده و دینده سوسیولوژیسنده کندن فضله برشی  
 یوق دیمکدر .

بو تفسیر ، فیلسوفک دوشونجه سنه موافقمیدر ؟  
 قونتک بالذات وقوع بولان بعض بیاناتنه قیمت عطف  
 اولونیورسه بومسئله پک چابق حل اولونور . چونکه قونت ۱۸۴۵  
 تاریخندن سوکره اشیایی باشقه برمنظره آلتنده تلقی و آرتق اولکنه  
 تمامیه مغایر بر اصول تعقیب ایلمکده اولدیغنی غایت قوتله و اصرار  
 ایله تأمین ایله مشدر . برچوق یرده حسیاتنک تکاملندن ، اخلاقی  
 بر انکشافندن ، ایکنجی بر وارلغندن بحث ایدر . اولیادن  
 و مقدماتدن عبارت اولان فلسفه مثبتة Philosophie positive  
 ایله پوزیتیویزمی یا خود دین انسانیتی بر برندن آیریر . هبت  
 اجتماعیه یی احیانک تکمیل عناصرینی یالکز بودین انسانیت احتوا  
 ایتدیکنی سویلر .

فقط احتمالکه بالذات او کوست قونتک بو شهادتی شبهه ایله  
 تلقی اولونا بیلیر . او کوست قونت ۱۸۴۴ - ۱۸۴۵ تاریخنده  
 قلو تید دو رویه راست کلمشدی . او وقت قلبنده حصوله کلن  
 انفلاق شدید محاکمه سنی بلکه بر آز تشویش ایتمشدر . بوندن  
 باشقه ، او کوست قونت دلی اولمشدی . بودلیلک آراصیرا نکس  
 ایدیوردی . خسته لغی ایسه حسیاتنک درین بر صورتده تشوش

ایتمسندن عبارت ایدی . اونك ایچون ، فلسفی دوشونجه لرینك  
انكشافده حسیاتك تأثیر حقیقسینی تعینده شاشیرمش اولابیلیر .  
بناءً علیه ، اوکوست قونتك مسلکنك کندیسنی تدقیق ایتمك  
و مختلف دوره لرینی مقایسه ایله مك دهها مناسب اولور .

فلسفه مثبتہ درس لرینك نتیجه سی نظر ملاحظه یه آلیرسه ،  
اوراده مثبت اصولك اساساً هیئت مجموعه فکرینی تفرعات  
و تفصیلات فکرینه غلبه ایتدیرمکه ساعی اولق اوزره اراءه  
ایدلدیکی کورولور [۱] . ینه بواساسه توفیقاً ، فردانسانی صرف  
عادی برتجریدن عبارت اولق اوزره تلقی اولونمقده در . فردی  
برشأیت اولق اوزره قبول ایدن و بوصورتله حال طبعیده کی  
انسانك خودکاملغنی تصدیق و تشویق ایدن شی ، فردیتك اوج  
اعلایه حیقارماسندن عبارت اولان مابعد الطبعه ایدی . فلسفه  
مثبتہ نظرند هله فکری و اخلاقی ساحه ده موجود حقیقی یالکزر  
انسانیتدر [۲] .

ایشته فلسفه مثبتہ درس لری بویله سویلیور . فقط « مثبت  
سیاست اصولی Systeme de politique positive » نك لسانی  
بوندن بوتون بوتون فرقلیدر .

قونت اوراده انسانیته خدمت ایدن بویوک آداملرك دائمی  
تأثیر لرینی محافظه و تأمین ایتمك یول لرینی آزار . بو آدملر عالم

[۱] الی یدنجی درس

[۲] الی سکرنجی درس

فضادن زائل اولمله برابر زمان ایچنده بر موجودیت صاحبدرلر .  
 بو معناه بر وجود حقیقی تشکیل ایدرلر . بو وجود یکی  
 قهرمانلر کلدکجه متصل بویومکده دوام ایدر . فقط بوراده  
 بویوک بر خطایه دوشمکدن اجتناب ایتک لازم کلیر . زمان  
 ایچنده یاخود بزم سوثرکتیف تلقیمزجه وارلق کافی دکلدر .  
 وجود اعظمک هرعضوی بالطبع اوثرکتیف وفضا داخلنده  
 بر وارلق تضمن ایدر . بناءً علیه انسان صاغ ایکن انسانیته  
 بر استنادگاه صفیله خدمت ایدر ، اولدکن صوکرده برعضو  
 اولق اوزره خدمت ایفا ایلر . اولولرمزله یاشایه رق اونلری  
 پایدار ایدن بز . اونلرک عالی موقعلری ، مادی بر صورتده  
 موجود اولق ایچون بزم عبادتمزه احتیاجدن کندیلمزینی مستغنی  
 قیلماز . شبهه یوق که بر فردک قیمتی کندیسنده وجود اعظم  
 طرفندن قابل تمثیل شیئک اهمیتته تابعدر . فقط اوآنده وارلقک  
 حاملی فرددر . بواعتبار ایله فرد ابدیتک الزم برپارچه سیدر .  
 حتی سوثرکتیف موجودیتنده بیله ، وجوداعظم ساده جه عمومی  
 وشخصلردن مستقل اولق اوزره دوشونیه مز . چونکه حقیقته  
 وجود اعظم اوثرکتیف بر طاقم عضولر یعنی فردلر واسطه سیله  
 اجرای تأثیر ایتدیکندن بو عضولر آراسنده دنیا مزده اوکالک  
 ای خدمت ایدنلر فضا دروننده کی موجودیتلری نهایت بولدقن  
 صوکره اونک مشروع برر ممثلی اولورلر . بعض فردلره ،  
 قهرمانلره قارشی کوستریلن عبادت بو صورتله دین انسانیت  
 عبادتنک بر قسم اساسینی تشکیل ایدر .

دها بو حیات فانیده ایکن بیله بو بویوک آداملر وجود اعظمی بر نوع تشخص ایتدیردکلرندن حرمت و تعظیمه حال حیاتلرندهده مستحقدرلر . یالکز ، بودنیاده الک ای طبیعتلری بیله بوزان بر طاقم قصورلری ، عدم مکملیتلری ذهناً اونلردن آیرمق ایجاب ایدر [۱] .

دینی مسلکک بورایه کتیردیکی یکی عنصر پک آشکاردر . مثبت فلسه نك یقیدینی فرد، پوزیتیویزم یاخود مثبت دین ایله تکرار اعلا ایدیور . سوسیولوژی وجود اعظم حقنده یالکز مجرد بر فکر پیداسی ایله اکتفا ایدیوردی . بو وجود اعظمک او بر قتیف بر شرط موجودیتی ، شرط تأثیر و انکشافی اولمق اوزره فرد شیمدی الزم و لابد بر وظیفه ایفا ایدیور .

بناءً علیه سو بره کتیف ، اخلاق ، قلب ، عشق ، دین تعبرلری شیمدی دینی تلقیلرنده ، سوسیولوژینک احتوا ایتدیکی بر طاقم مفهوملری احتوا ایدیورلر دیمکدر .

سوسیولوژی ، ملکات حسیه ملکات فکریه یه تفوق ایتیه جک اولورسه عضویت اجتماعیه مفهومک آکلاشیله مایه جغنی مشاهده ایله اکتفا ایدیوردی . بو تفوق نه یه وابسته ایدی ؟ حقیقه قابل اجرامی ایدی ؟ و بر کره وجود بولورسه محقق صورته دوام ایده بیلیرمیدی ؟ سوسیولوژی بورالینی بیلیمیوردی .

شیمدی او کره نیورز که قلبد دینی سوق طبیعی دینلن  
بر سوق طبیعی واردر. بوسایه ده انسان اولولرله برابر یاشایه بیلیر،  
اونلرک فضیلتلرینی تمثیل ایده بیلیر و بوسورتله خودکاملغنه غلبه  
چالغنه و، فعال صورتده، حس اجتماعی بی دویمغه قادر اولور.  
سوسیولوژی رابطه اجتماعی نك مجرد صورتده بر تصورندن  
عبارتدی. دین بونک حقیقت کسب ایتمی اولور. آنجق  
دیندر که فردلرده یالکز کندیلرنده و یالکز کندیلری واسطه سیله  
موجود اولان برهیئت اجتماعی نك مؤثر و حقیقی استنادگاهلری  
اولملری ایچون ایجاب ایدن تحولی، اهدای حصوله کتیریور.

\* \*

بناء علیه، او کوست قونتک دین نظریه سنک، اصل فلسفه سی  
دینلن قسمه نسبتله اورته یه یکی و باشقه بر شی قویمش اولدیغنی  
تسلیم ایتک موافق حقیقت کورونور. فقط بوراده باشقه  
بر مشکلات نمایان اولور. مطالعاتنده مذهب دینسنک خصوص-  
صیتی و یکیلکنی پک افراط و مبالغه ایله تلقی ایتیمش اولان  
قونت عجبا پک فضله حق قازانمش دکلیدر؟ مذهب دینسی  
فلسفه سندن او قدر فرقلیدر که حقیقت حالده اونکله هیچ رابطه سی  
قالماشدر. بالعکس مذهب دینسی مسلك فلسفینک ضدیدر  
ونهایت مثبت فلسفه نك صورت قطعی ده محکوم ایتدیکی اوالهیات  
مذهبیرینه، انسانه بکزمه مسلکیرینه رجوعدن عبارت بولونیور.  
عجبا بویله برادعا وارد اولامازی؟



او کوست قونتک ایلک و صوک یازیلرنده کی مسلکمر، اساسلر  
 و دوشونجه نك عمومی استقامتلری بر برلریله مقایسه ایدیلر جک  
 اولورسه او کوست قونته فلسفه ایله دین آراسنده کی مناسبتک  
 ساده جه بر تخلفدن عبارت اولمایوب صورت قطعیده بر تضاد  
 تشکیل ایتدیکی حسی قولایجه پیدا اولور. بر طرفده مفکره نك  
 اصولی، دیگر طرفده قلبک اصولی. بر طرفده علم فکرینک  
 غایت موشکافانه براعتنا ایله اثباتی و تأمینی، بوراده ایسه الهام،  
 حدس و صوفیه نك بلا واسطه وقوفی. اوراده حیاته، فعل  
 و حرکت، اجتماعی فائدهیه قارشی حرمت و عبادت؛ بوراده  
 ایسه حادثات بشریه نك اساس مدیری مرتبه سنه چیقارلمش قلب  
 و عشق. همده یالکزمفکره دن و فعل حرکتدن آیری بر عشق  
 دکل، اونلرک فوقنده بر عشق.

ذاتاً، دنیلورکه، بوتون بوفرقلر او کوست قونته وقوعه  
 کلن حقیقی بر تحول و انقلاب علامتیدر. چونکه او کوست  
 قونت قلویتلد دووویه راست کلدی. کندیسی ده اعتراف  
 ایتدیکی وجهله بواویله بر حادثه حسیه اولدی که اونی آلتاوست  
 ایتدی. ایشته کوزه چاربان بوتضاد، بویله بر حادثه حسیه ایله  
 قونتک تحول ایتسی زمانه مصادفدر. بومغناسز قادینه قارشی  
 او کوست قونتک بوتون حیاتنده حس ایتدیکی مرضی عشق  
 فیلسوفک سوزلرینک نه دن دولایی دکیشدیکنی ایضاح ایتدیکی  
 کی دکیشکلکک اهمیتنی ده کوستریر. مثبت فلسفه مؤسسی ایله

قلوتیلدو و پرسیشکارینک حیاتی ، اورتیه چیقاردیغی اصوللر  
ومسلکله بربرلرندن تامامله آیریدر ، منطقاً غیر قابل تألیفدر .  
واقعا قونت متصل بونک عکسنی تأمین ایدر دورور .  
کندی عصرینه قالان بویوک ترتیب وتنظیم کیفیتک افکارک  
هیئت مجموعه سی کبی حسیات بشریه ده شامل اولماسی ایجاب  
ایده جکنی ، افکارک ترتیب وتنظیمی بوکا تقدم ایتسی و صرف  
ذکا اوزرینه استناد ایتسی لازم کله جکنی ، فقط حسیاتک  
ترتیب وتنظیمی ایچون یالکزر تفکرده دکل بوتون روحده باشقه  
براستقامت تعقیب اولنسی اقتضا ایلدیکنی ادعا ایدر . بونی ده آنجق  
حقیقه دویولان حس یاپه بیلیر . اوکوست قونت « مثبت سیاست  
اصولی » اثرینه آفرده دووینینک : « بویوک برحیات نه در ؟  
سن کمال طرفندن تطبیق واجرا ایدلش برکنجک دوشونجه سی »  
سوزلرینی سرنامه اوله رق قیدایله اثرلرینه عطف ایتدیکی وحدت  
اصلیه یی غایت صریح صورتده ادعا ایتشدیر .

فقط بوراده ده فیلسوفک کندی حکمیه اکتفا ایده میز .  
چونکه بویوک متفکرلر ، موجودیت فکریه لرینک مختلف  
صفحه لرینی ، بربرلرینه نه قدر ضداولورسه اولسون ، صوکره دن  
ترتیب وتنظیم ایتکده ، هم آهنگ برحاله کتیرمکده پک ماہر درلر .  
اوکوست قونتک ایلک سویله دکلرینی صوکره تکذیب ،  
فلسفه سنک اساسلرینی اتمام دکل انکار ایدوب ایتمه مش اولدیغی  
آکلامق ایچون شخصی و اثرینی هیئت عمومیه سیله نظر ملاظه یه  
آلق ایجاب ایدر .

کوربیورزکه او کوست قونت یکر می یاشنی هنوز کچمش  
 بر حالده انکن ، زماننک آدمیری کبی ، هیئت اجتماعیه نك  
 یکیدن تنظیم واحیاسی ایله مشغول ایدی . بو ایشه دوغروندن  
 دوغرویه کیریشیه جك اولورسه بویوك بر خطا ارتکاب ایدلمش  
 اوله جغنی تقدیر ایدیوردی . چونکه بو مسئله باشقه بر طاقم  
 مسائله تابع ایدی که اول امرده اونلری حل ایتك ایجاب  
 ایدردی . ۱۸۲۲ تاریخنده ، یکر می درت یاشنده ایکن « هیئت  
 اجتماعیه یی اصلاح واحیا ایچون لازم اولان مساعی علمیه پلانی »  
 نامیه کوچوك بر اثر نشر ایتشدی . سوسیولوژیسی بوراده  
 تخم حالنده موجوددر . اون سکننجی عصرک « اخلاق وعاداتی  
 قانونلر یاپار » دستورینه مخالف اوله رق ، مؤسسات اخلاق  
 وعاداته ، بونلرده معتقداته تابعدر دیمك لازم کلدیکنی واضح  
 صورتده کوربیوردی .

تثبت ایده جکی مساعی علمیه ونظریه او کوست قونت  
 ایچون بر غایه دکلدی . اونك حقیقی ویکانه غایه سی اجتماعی  
 اصلاحات وتشکیلات ایدی . او مساعیده بونی حاضرلامه نك  
 ظاهرآ دولامبا جلی فقط حقیقتده لابد واسطه سی ایدی .

بو نظری مساعینك کندیسنی آنجق بر قاچ سنه مشغول  
 ایده بیله جکنه شبهه یوق که قانع ایدی . قانت مابعدالطبیعه یه  
 تنقیدکارانه کوچوك بر مدخل یازمق ایسترن کندیسنی قایدیرمش ،  
 اون بر سنه چالیشه رق عقل صرفك تنقیدی Critique de la

Raison pure نی یازمشی . قونتك ده باشنه بونك كې بر حال  
كلدی . ابتدائی قسمت تصور ، تحریر ونشری ایچون اون آلتی  
سنه ( ۱۸۲۶ - ۱۸۴۲ ) صرف ایتدی .

بو اوزون تحریات اثناسنده فیلسوفك مفكره سی هیچ  
دكشمه مش دكلدر . كرك كندیسنده كرك بشریتده تفكرك  
وحدتی تأمین ایتك ایستیوردی . فقط بونك مادی بر پرنسیپ  
اعانه سیله مختلف وقوفلری او بژه قتیف بر صورتده ترتیب وتنظیم  
ایتك سایه سنده قابل اولامایه جغنی احتمالكه حیرتله كور مشدر .  
سلسله علومده ، تفرعات و اقسامدن هیئت مجموعه یه دوغرو  
یورون علوم حکمیہ و کیمیویہ ایله هیئت مجموعه دن اقسامه  
دوغرو یورون بیولوژی آراسنده آشکار بر بوشلق ، بر عدم  
اتصال واردر . صوكره ، بیولوژی فضا دروننده ترتیب وتنظیم  
ایله اشتغال ایتدیکی حالد سوسیولوژینك قانون اصلی واساسیسی  
زمان داخلنده تمادیدر . بناء علیه بونلر آراسنده ده بر بوشلق  
وار دیمكدر . هر علم ، مقدمکی علملرك اساساتنه حقیقه یکی  
برشی علاوه ایدیور . بونك ایچوندركه علملرك بر اصول  
داخلنده توحید وجهی مفكره طرفندن کنديسنه خاص بر نقطه  
نظردن صرف سو بژه کتیف بر توحید و ترکیب عملیه سی اولق  
اوزره یاپیلیرسه قابل اجرادر . فلسفه بو ترتیب وتنظیمك  
علمیدر . بو ، تفكرك خصوصی بر فعالیتدركه حد ذاتنده  
بر برلینه قابل ارجاع اولمیان بر طاقم بیلکیلری غایه نك وحدتی

ایله ، غایه و واسطه علاقہ سی ایله یکدیگرینه ربط ایلر . فلسفه ، بصورتله ، علومه قارشی غیر متجانس ، غیر قابل ارجاع و احما برشیدر .

اوکوست قونت علامدن فلسفه یه کچمک ایچون ناصل صیچرامغه مجبور قالدیغنی بیلدیکی ، وحدت فکریه نك آنجق بر توحید و ترکیب و بوتوحید و ترکیک ده موجود برشی دکل بر فعالیت تفکر دن عبارت اولاییله جکنی آکلادیغنی حالدده ایلریده ناصل اولورده عملیاتی نظریاتدن ، اوثره قتیف ، تحلیلی و بلا واسطه بر صورتده چیقاراییلیر ؟ اصل فکری عملی وظیفه یه ، سیاسی اصلاحاته آنجق تکمیل شرائطی تدقیق و اکمال ایتدکدن صوکره باشلامقدر . آکلامشدرکه هیئت اجتماعیه نك سیاسی اصلاح و احیاسنه چالیشه بیلمک ایچون مفکره بشرک عالمکدن فیلسوفلغه کچمسی لازمدر . عجبا دهها باشقه شرائطه احتیاج یوقی ؟ اورته یه یکی بر حدک ادخالنی ایجاب ایده جک یاخود بوکا مانع اوله جق بر سببک موجودیت و یا عدم موجودیتی حقنده قبل التدقیق هیچ برشی سویله نه مز .

حقیقته ، فلسفه مثبته درسلی اصلاحات اجتماعیه نك شرائط اجتماعیه سنه دائر خصوصی تدقیقاتده بولونمقده اولدیغنی ، بونک نتیجه سی اولدن کسدریله میه جکنی حس ایتدیرر .

اوکوست قونت ملکات حسیه نك ملکات فکریه اوزرینه غلبه سی ، سوسیولوژینک ایجاب ایتدیکی عضویت اجتماعیه نك



تحقیق ایچون الزم اولدیغنی صریح صورتده کورمکده در .  
 بوغلبه وتفوقی ناصیل تأمین ایتلی ؟ مثبت فلسفه بو مسئله نك  
 حلنی دینه عودتده می بولیور ؟ حالبوکه اوچ حال قانوننه نظراً  
 بوشکل فکری آرتق آرقده بر اقلمش اولمق ایجاب ایدردی .  
 شوراسی محتاج بیاندر که اوچ حال قانوننده الهیات ایله  
 مابعد الطبیعه منحصرأ وقوف نقطه نظرندن پیش ملاحظه  
 آلمشدر . بونلرک بزه قوانین طبیعی بیلدیرمکه غیرقادر اولدقلری  
 اثبات ایدلمشدر . فقط شبهه یوق که الهیاتده دکل اصل دینده  
 وقوفه دکل عملیاته تعلق ایدن مافوق ذکا بر عنصر وار ایسه  
 بو عنصر ، اوچ حال قانونی قبول اولونسه ده هیچ بوزولمه دن  
 پایدار اولابیلردی .

دها فضله سی وار : سوسیولوژی انسال بشرک ادوار مختلفه  
 آراسنده تساندی فکری اوزرینه تأسس ایتمشدر . سوسیولوژی  
 ترقی ایله انتظامک مناسبتنی کوسترمش ، ماضیدن آنجق مثبت  
 مفکره و روحه قطعی صورتده مغایر اولان شیئی محو ایتک  
 و دیکشیدیرمک ، ماضینک دها یوکسک برحاله دوغروتوجهدن  
 عبارت اولان هر شیئی دیندارانه محافظه ایتک لزومنی وضع  
 ایتلمشدر .

بناء علیه علم ایله سیاسیات آراسنه فلسفه یی وضع ایتدکدن  
 صوکره اوکوست قونتک شیمدی ده فلسفه ایله سیاسیات آراسنه  
 دینی قویماسنه هیچ برمانع یوقدی .

فلسفه ایله سیاسیات آراسنه دینک وضع ایدلمسی ناصل اولدی؟  
 بونده او کوست قونتک قلو تیلد دووویه قارشی حس ایتدیکی  
 رابطه اجرای تأثیر ایتدی . بوراسی غیر قابل انکاردر . فقط  
 برچوقلرینک بوکا عطف ایتدیکی معنا پک وارد دکلدر .

سویلن قادینک اهمیتسزلکی ، او کوست قونتک پک حسی  
 اولان مزاجی . بو حادثه یی ایکنجی درجه ده اسباب آراسنه  
 ایندیرمشدر . اون آلتی سنه دوام ایدن بر سعی فکری ایله  
 تضیق ایدیلن حساسیتی ۱۸۴۵ ده عادی برسپک تحت تأثیرنده  
 تهیج ایتدی . مسئله ، حدذاتنده پک آز فلسفی اولان بو حادثه دن  
 قونتک ناصل برمعنای فلسفی چیقاردهجغنی کورمکدر . برطاقم  
 فکرلرک منشأ تاریخیلرینی کورمک متبحرلرک مراق و تجسسی  
 دعوت ایدر . فقط فکرلرک منشائی قیمتلرینی تعیین خصوصنده  
 عمومیتله پک آز حائر اهمیتدر . برهندسه مسئله سنی بردی اثبات  
 ایدرسنه حقیقته خلل می کلیر ؟

او کوست قونتک فکریه دن intellectualiste یاخود  
 علمک حواریونندن اولمادیغنی اونو تماغ اقتضا ایدر . او ،  
 پوزیتیویستدر . بو اعتبار ایله آنجق هم حقیقی هم مفید اولان  
 شیلری قبول ایدر ، بوایکی وصفی حائر اولان هیچ برشیئی رد  
 ایتمز . حادثه دینه یی ایشته بومعنا ایله مثبت برشی اولق اوزره  
 تلقی ایتمشدر . حس وادراک ایتمک ، دوشونمک ملکه سی کی  
 انسانده دینی بر سوق طبیعی واردر . عشق بو سوق طبیعی یی

اظهاره کفایت ایدر . چونکه کندی کندیلکندن عبادته  
و پرستشه میالدر .

بودینی حس ، پوزیتیویزمک فکر عمومیسنک لزوم کوستر-  
دیکی وجهله ، وقوفلرک فکری بر صورتده توحید و ترکیبی  
کیفیته ربط ایدیه بیلیرمی ؟

شوراسنه دقت لازمدرکه فکری توحید و ترکیب بر کره  
اتمام ایدیلنجه ، یالکز سوسیولوژینک علم اولمق اعتباریله نظری  
بر صورتده تأسیسی امکانی دکل ده طبعی هیئت اجتماعیةک فعلاً  
تأمین آرزو اولونورسه بر نقصان ، بر بوشلق میدان چیقار .  
هیئت اجتماعیه موجود اولابیلیمک ایچون فردلرده حب غیر  
حب نفسه غلبه چالمق اقتضا ایدر . فقط ذکا کندی باشنه بواشی  
تأمین ایدمیز . مع مافیه حس ، اوطبعی حالیه انتظامه قارشی  
یالکز لاقید دکل بلکه دشمندر بیه . فکرلری منتظم بر اصول  
داخلنده جمع و ترتیب ایچون اونلری یکیدن دوشونمک ناصل  
لازمسه حسیاتی ده جمع و ترتیب ایچون اونلری حس ایتمک  
ایجاب ایدر .

ایشته فلسفهک بوراده براقدینی بوشلنی پوزیتیویست نقطه  
نظرینه کوره آکلاشیلان دین دولدوریر .

پوزیتیویزم مجرداتدن حرکت ایتمز . بناء علیه انسان معین  
بر حسدن ایشه باشلایه جقدر . پوزیتیویزم نسبتله ساده اولان  
حقیقتلردن دها مغلق حقیقتلره دوغرو یوکسله رک توسع

و توافق صورتیه تعمیلمریا پار . یو کس دیکي حقیقتلرده مجردات دکدرلر . بناء علیه انسان ارکک ايله قادين آراسنده هم طبیعی هم معنوی صورتده بر کره جانلانا عشی ، حقیقلکندن برشی آزالتمادن نجیلشدیره رک ، عائلهیه ، وطنه ، انسانیه تشمیل ایده جکدر . غایه نقطه نظرندن ، پوزیتیویزم واسطه لری ترتیب و توفیق ایدر . بونک ایچوندر که دین انسانیت فکری حسیاتی انضباط آلتنه آلاچق و اولمادیفی حالده ، هیئت اجتماعیهیه اسکی دینلردن اوبوش علم کلاملرله برابر موقه اورتهدن قالمش اولان بعضی حقیقی و مفید قسملری تکرار آلمغه مساعدده ویره جکدر . حالبوکه عنعوی دینلرده ایی ايله فنایی تفریق ایچون بر قاعده موجود دکلدی .

ایشته فلسفی جمع و ترتیب sistématisation کبی ، بو صورتله ، دینی بر جمع و ترتیبده یاواش یاواش وجوده کلیر . قونت بونی قلو تیلد دو وویه قارشی بسله دیکي حس عبادته ربط ایتمکدن خالی قالماز . « قلو تیلد جکم ، هیچ منلی بولونمایان برسنه ظرفنده اک طاتلی بر طاقم حسیاتک بر آز کیچ فقط قطعی انکشافنی سکا مدیونم . هر بریمزک محق مطالعات اخلاقیه مزله قابل تألیف هم پدرانه هم برادرانه برصمیمیت قدسیه ، سنده بوتون شخصی جاذبه لر آراسنده احتمالکه هیچ بر قلبک بودرجهده مکملیتله ساحه فعله چیقارامادیفی اوشایان حیرت امتزاج شفقت و اصالتی بکا نفوذ ایتدیردی . بویله بر مکملیتک تکلیفسزجه

تماشایی ، بن فرقنده اولمادن بیه ، حیات بشرک ایکیمنظرنده  
 کرک خصوصی کرک رسمی غایه عمومیسنی تشکیل ایدن او  
 جهانشمول مکملیه قارشی بنم منتظم بر اصول داخلنده کی شوق  
 و غلیانمی تزید ایتک ایجاب ایلردی . بر برلریله متساند ، فقط  
 یکدیگرندن مستقل وظیفه لر Fonctions آراسنده کی او کوزل  
 آهنگی ایکیمزده پک جدی و وقور بر صورتده تصور ایده بیلور .  
 دق . بریمز ، علم طریقی ایله ارککلرده فعال بر طاقم قناعتلر  
 وجوده کتیرمک ایسته یوردی . دیگریمز ، بدیعیات طریقیله ،  
 درین قادین حساری انکشاف ایتدیرمکه چالیشیوردی . عینی  
 وجهله الزم ایکی وظیفه که برینک دیکرینه هیچ حق تقدیمی  
 یوقدر . [۱] محدود فکری بر منقد اورته یه چیقوب ده  
 بو استثنائی حرمت و تعظیمک اوزونلغندن دولایی مؤاخذه ده  
 بولونماسون . « محبت حسیاتنک عکس العمانی تقدیر ایتمه سنی  
 بیلن بوتون متفکرلر بوقدر صاف هیجانلری تصویره واحیایه  
 صرف اولونان زمانه حرمت ایده جکلردر » .

ایشته او کوست قونتک قلو تیلد دووویه قارشی محبتی بویله  
 ایدی ؛ اونی کندی ترکیب و توحیدی synthèse ایچنه سوقدی .  
 صنمپرستلکک احیاسنه کلنجه ، بو او کوست قوننده  
 کیتدکجه زیاده لاشن میدانه فعلی بر شی چیقارمق آرزوسیه قابل  
 ایضاحدر . مخیه ده برشأنیتدر ، همده قوی ومؤثر برشأنیتدر .



هرشيء ايجاب حاله توفيق ايتمك صورتيله محافظه ايدن پوزيتيويزم  
مخيله يي ده بر طرف ايتمز، بوندن استفاده چاره سني آرار . عقلك  
ياپديغى ايشى مخيله نك بوزماسى ايچون اورته يه قويدىغى شيلرك  
برر حقيقت ديه قبول ايدلمه مسى كافيدر . افلاطونك عقليه  
مسلكى ده عملياته فلسفه نك يارديمجيسى اولمق اوزره خرافه يي  
قبول ايدىوردى .

مع مافيه قونتك بوراده بر سطح مائه كنديسى ترك ايتمش  
اولديغى قابل انكار دكلدر . پوزيتيويزم چيفته بر اساسه استناد  
ايدىوردى : حقيقى و مفيد . مسلكك مكملتي بو ايكي حد  
آراسنده دوغرو بر موازنه ادامه سيله قابل ايدى . حالبوكه  
او كوست قونت ابتدا مفيدى حقيقى يه تابع طوتديغى حالده  
ياواش ياواش، حقيقى يي مفيدى متقاد بولوندير مغه باشلار . اونك  
بو تكامل ذهينسى قضا وتصادف اثرى دكلدر . چونكه دها  
بدايته حقيقى شيلرى آنجق بر فائده استحصالى ايچون تدقيق  
ايتمكه اولديغى اعتراف ايتمشدى . فقط شبهه يوق كه كرك  
كرك مفيدى كرك حقيقى يي وآارالرنده كي مناسبترى كوزجله تعين  
وتعريف ايتمكه بر طاقم مهم مشكلات واردركه قونت بونلرى  
كافى درجه ده پيش ملاحظه يه آلاماشدر .

### اوکوست قونتک مسلکنک قیمتی

بومسلکک قیمتی نه در؟ بوندن ناصل بردرس چقارابیلیرز؟  
اوکوست قونتک پوزیتیویزمی « انسانیت مفهومی اغانه سیله  
دین ایله علمک توحید و ترکیبی » صورتنده تعریف اولو ابیلیر.  
علم ، انسانک احتیاجاتنه تطبیق وهپ بوغایه توجیه ایدیه جک  
اولورسه دینه منتهی اولور . یالکزدین ، علمک واسطه لرینی  
تدارک ایتدیکی غایه لره وصولی تأمین ایده بیلیر . دیگر طرفدن  
دین ، موضوع عبادتی انسانیتده بولدینی ایچون علمک دولاشدینی  
عالم حقیقیدن خارجه چیمه دن کندی ایشنی اجرا ایدر .

توحید و ترکیب ، عقلی نمون و تطمین ایده بیلیرمی ؟

بومسلکده علمک غایت مشکل بر موقعده قالدینی پک چوق  
دفعه نظر دقته وضع ایدلمشدر . چونکه علم ، اجتماعی نقطه  
نظردن فائده سی آشکار اولمایان تحریاته قویولمقدن یاخود عملی  
حیات ایچون کافی اولان حدودک خارجه چیممقدن منع اولوندینی  
کبی کندی کندیلکندن پوزیتیویزمه دوغرو یورویه مدیکی  
زمانلرده ده بر طاقم کیفی فرضیه لره ، خیال ملعه لرینه منقاد  
طوتولیور . قونت علمک منطقی شو صورتله تعین و تعریف  
ایدیور : « اخلاقی ، فکری و مادی احتیاجاتمزه اویه جق  
تلقیاتی بزه تلقین والهام ایچون حسیاتک ، اشاراتک و خیال لک  
طبیعی صورتده اشتراکی . » حر و مستقل بر علم کیتدکجه عادتاً

نظر شبهه ایله کورولور ، بر دشمن عد اولونیور . مادام که علم اختصاصه ، داغیتمغه ساعیدر ، دیمک که اساس اعتباریله آنارشی طرفداریدر دنیلیور . علمک اوییهوده مراق و تجبسی ، او غیر قابل تحمل کبر و غروری قیر یلق ایستر . علم حسیاته تابع و منقاد اولمالیدر . بو غریب بر افراطدر . فقط علمک وظیفه سی اوتهدن بری اشایی بزم کورمک ایسته دیکمز شکلده دکل کندی اولدقلری حال اوزره طانیقندن و بناء علیه قونتک ویرمک ایستدیکی انسانیلک صقتندن اونلری ممکن اولدیغی قدر تجرید ایتمکدن عبارت اولدیغی دوشونولورسه نه دن دولایی بوافراطه دوشولدیکی آکلاشیلیر .

او کوست قونتک مسلکنده دین ده علم کبی مشکلات ایچنده در . واقعا اسقولاستیکده اولدیغی کبی بو مسلکده ده دین فلسفه نک حاکمی اولورسه ده بونک قیمتی یوقدر . چونکه ایچنه اویله کیزی بر تمایل قونیلیور که بونی نه ازه بیلیور نه تطمین ایده بیلیور . دین ، قلب بشر ایچون معزز اولان عشق الهی — که انسانلر آراسنده کی محبتک تملیدر — ایله لایموتلغه ایمان — که اولولرله اشتراک و مناسبتمزک ضمانیدر — حسلرینی بوتون تمامیتلریله محافظه ایتک املنده در . قونت طبیعتمزک ذکا فوقنده کی یا خود سوثره کتیف عناصرینک حقیقلکی و قیمتی حقنده پک زیاده اصرار ایدر . حسیات بر « وقعه » دکلیدر . مخیله حواس و عقل کبی روح بشرک بر قسمی دکلیدر؟ سوق طبعیدن وبالخاصه

وارلغمزك غير قابل احما برتملى تشكيل ايدن دىنى سوق طييعيدن  
دها حقيقى نه واردر ؟

فقط ينه طييعتمزك بيلديرديكى بر حقيقت اولان عقل ،  
قلبك بوغليانلرينى دورديرر . اكر اصل انسانيت يعنى فضا  
وزمان ايچنده معلوم وموجود اولان شكلده انسانيت وارلغك  
ووقوفك اولچوسى ايسه وجود اعظمك ابدى يالكز برلاقيريدن  
عبارت قالير . الملهك بوتون شائيتى اليوم بعض فردلرده برطاقم  
انسانى وقعه لرك برقوللقسىونى حقنده موجود اولان بردوشونجهيه  
انحصار ايدر . لايموتلق حافظهيه ارجاع ايدلمش اولور .

او كوست قونتك سوېزه كتيّف كله سنه ويرديكى قيمتى تعين  
ايچون بر چوق مناقشه ايدلمسى سببسز دكلدر . چونكه  
او كوست قونت بونى كاه حقيقى بر شائيت عد ايتك ايسته مش  
كاه ايسته مه مشدر .

دوچار اولديغى مشكلات قبول ايتديكى پرنسيپ دن نشئت ايدر .  
« انسانيت » ايكي معنالى برمفهومدر . بر اساس اولين تشكيل ايده-  
بيلمكدن اوزاقدردر . خارجدن تدقيق ومشاهده اولونه بيلن مرئى  
بر آدم ، يعنى سائر بوتون وقايعه مشابه برهيئت مجموعه وقايع واردر .  
كذلك دوشونن ، آرزوايدن ، سون وآرايان باطنى برانسانده  
واردر . پسيقولوژى يي برطرف ايتمه سنه رغماً او كوست قونت  
بوباطنى آدمك وارلغى پك كوزل ادراك ايتديكى ايچون اونك انظار  
آمالى او كنه برعالم وقايع براقير . ديكر طرفدن بو عالمك هر طرفنى

کوزلجه سد و تقویه ایدهرک دیشاری چیقمامسنی تحت تأمینه  
آلیر . بومحدود عالم ایچنده حکمران اولمنی و اوراده سعادتتی  
بولمنی اوکا امر ایدر . فقط وقعهلرله فکرلر آراسنده ، معلوم  
حقیقتلرله خیالی احتماللر آراسنده تأسیس ایتدیکی مانعه حقیقی  
وجدی برشی دکلدیر . روح بشر دیمک دها ای برشی یایمق ،  
باشقه برشیئه تشبث ایتمک ، بومعلوم وموجود شیک اوتهسنه  
کچمک ، کندی کندیسنک فوقه چیقمق ایچون یاپیلان غیرت  
دیمکدر . پاسقال ، انسان کندی کندیسنی نامتناهی صورتده  
کچر ، دیوردی .

انسانی اشیانک اولچوسی یایمق مابعدالطبیعهیه و دینه عائد  
تحریات و تدقیقات دورهسنی ابدیاً قاپامق دکل آچق اولور .  
چونکه ، انسان نهدر ؟ انسان کندیسنک برجموعه وقایعدن ،  
برشی دن ، بر معلومدن باشقه بر مخلوق اولدیغنه امینمیدر ؟

کوته ، فیلسوفلر بولوتلرک اوزرنده حکمران اولان مادی  
وخارجی معبودلری پارچه لادیلر دیوردی . حالوکه هیچ برشی  
یایمادیلر . انسان کندی کندیسنک ایچنه قاپانسون ، اوراده  
وارلغک خارجنده دکل داخلنده اولان حقیقی الهی بوله جقدر  
و بو بر حادثه معلومه دکل ، بر قدرت خالقهدر .

Weh ! Weh !

Du hast sie zerstört

Die schöne Welt

Mit mächtiger Faust

Sie stürzt, sie zerfällt !

. . . . .



Machtiger  
Der Erdensöhne  
Prächtiger  
Baue sie wieder

in deinem Busen baue sie auf ! (\*)

واقعا ، او کوست قونت سوق طبیعی بشری بی حیوانلرک  
سوق طبیعی کبی صورت قطعیده ثابت عد ایدیوردی . فقط  
علم ، سوق طبیعی حیوانینک هیچ دیکشمز بر شی اولمادیغنی  
اثبات ایتدی . انسانده الیوم موجود اولان سوق طبیعی  
اوتنه طرفه کچیلرسی ممنوع برحد دیه دکل ، بلکه دهاییو کسکلره  
حیقمق ایچون بر نقطه استناد دیه تلقی ایتمرسه حقیقه انسان اولماز .  
ایشته او کوست قونتک فلسفه سنک شایان اعتراض نقطه سی  
بوراده در . اکر طبیعت بشریه صورت قطعیده تقرر ایتمش  
یتمش برشی اولسه ایدی قونتک اوقابالی ومطلق پوزیتیویزمی  
مشروع اولایلیردی . فقط اکر انسان کندی کندیسنی تدقیق  
ایدن ، آراشدیران ، تعدیلاته اوغرایان ، لاینقطع یکیدن وجود  
بولان بر مخلوق ایسه قونتک پوزیتیویزمی حیات بشرینک موقت  
بر صفحه سنی صنعی بر صورتده تثبیت ایتمکدن عبارت قالیر .

انسانک بویله کندی کندیسنی وجوده کتیررسی ، خلق

(\*) کونه ، فاتوست : فلاکت ! فلاکت ! او محتشم سمایی مخرب  
یومروغسکه پارچه لادک . ییقلیر ، پارچه پارچه سقوط ایدیور . ای  
ارضک ذی قدرت اولادی . بو الهی دنیایی دهها محتشم بر صورتده بنا  
ایت ، قلبکک اعماقنده بنا ایت !

ایتمی کیفی بر شیمیدر ؟ بونی انسانلره اثبات ایتسه لردی کبر  
وغرورلری قیریلیردی . چونکه اوزمان دهایی برشی یایمق ایچون  
اپیکورک ذره سی کبی راست کله حرکت ایدیورلردیمک اولوردی .  
فقط انسانلر ظن ایدرلرکه اوکلرنده هیچ تام بر نمونه اولمادیغی  
حالده یاپدقلری شیر هیچ دکلسه بر قاعده یه تابعدر . بوقاعده  
ضروریدر ، موجوددر و بر قیمت علویه یی حائردر . هم  
کندیلرنده هم کندیلرینک فوقنده موجود اولان بوقاعده یه  
ایشته انسانلر الله نامنی ویررلر .

بو صورته ، انسانیتده موضوعی انسانیتی تجاوز ایدن  
بردینک تخملری موجوددر . انسانک انسانی ممنون ایده بیلیمسی  
ایچون ازمئه قدیمه حکمتنده کی « کندیکی بیل » توصیه سنی  
اونوتماسی لازمدر . انسان کندی کندیسنک اعماق موجودیتنه  
اینوبده اوراده انسانیتک مکملیتنی ، قیمتنی ، وارلغنی آرتیرمغه  
چالیشمق احتیاجنی حس ایتهمسی ، قوتی بولماماسی قابل  
دکلدر . شبهه سزدرکه انسانه موافق اولان غایه کمالده کچمش  
انسانیتک میراثلری وانسانیتک شرائطی بویوک بر تأثیری حائردر .  
بو غایه کمال عملی اولابیلیمک ایچون معلوم وموجود شأنیته یقین  
بر موقعده دورمالیدر . فقط وقعه ، فکری قاعده آلتنه آلمغه  
کفایت ایده مز . چونکه اصل لازم اولان شی وقعه عالمنک فوقه  
حیقمقدر . یالکز فکرده موجود ، معلوم برشیه غیرقابل ارجاع ،  
مع مافیه معلوم شی اوزرینه انطباع ایده بیلیمکه قابلیتلی بر شینک

علوی بر وارلغنه ایمان کیفیتی او کوست قونتك تجیل ایتدیکی  
قهرمانلری میدانه چیقارمشدر . بونلر او کوست قونت دینك  
اولیالریدر . چونکه اودینه اینانما مشلردر !

ایشته بوتون پوزیتویزم غیر ثابت بر موازنت حالده دورور  
کبی کورونیور . پوزیتویزم آنجق حقیقی ومفید اولان شیئی  
طایر . فقط كرك « حقیقی » كرك « مفید » اویله مفهوم ملردر که  
ضروری اوله رق دها باشقه ودها یوکسك فکر لری ده دعوت  
ایدر لر .

حقیقی شیئی آزامغه سوق اولونان عالم چوق کچمه دن  
کورور که بوتون فردلرک بوتون انطباعاتی عینی صورته  
حقیقیدر لر ؛ کندیسك وظیفه سی ده بو حقیقی شیلر ایچنده دها  
ثابت ، دها درین ، فردی وانسانی حس واذرا کلرک شرائطنه  
دها آز منسوب اولان بر شیئی آرامقندن عبارتدر . واضح  
وصریح صورته نه آکلامغه نه تعریف ایتکه موفق اولامادیغی  
بو شیئه « حقیقی » نامنی ویریر . اونک تحریاتنه بو مبهم شی  
فکری رهبر اولور ، فقط تحریاتك تأثیری آلتنده یاواش یاواش  
مبهملکی آزامغه باشلار . بر کره بو فکری الده ایدنجه آرتق  
اونی نه قدر یوکسك اولور سه اولسون بر فائده ملاحظه سنه  
تابع بولوندر امایه جغنی آکلار . چونکه بر عالمك نظرنده حقیقی  
شینك حد ذاتنده یوکسك بر فائده سی واردر . علم ، حقیقت  
عشقی ایچون تحریاتده بولونور . اونک شرفی ، غروری ،

ذوقی بودر . هیچ بر مسلك فلسفی و یا سیاسی بونی اونك الندن  
آلاماز . نظریه جیلرك یالكز نظریه ایچون چالیشدقارینه کند-  
یلرینی قانع بر اراق عملی علم ایچون فائده لمیدر ، دکلیدر ؟ بوراسی  
موضوع بحث دکلدر . حد ذاتنده علم ، مشروع و قطعياً نجیب  
بر فعالیتدر . غایه کمال محافظی اولان فلسفیه بو علمی بر غایه  
منقاد طوتمق دکل بالعکس آزاده و حر بولوندیرمق و اوکا  
کندی کندیسینی حس ایتدیرمک وظیفه سی ترتب ایدر .

کذلك ، حقیقی وارلق دائره سی داخلنده « مفید » اولان  
شیئی تعقیب و تحری وظیفه سیله مکلف طوتولان قلب و اراده  
صاحبی بر انسان ده بونکله اکتفا ایدمز . مفید نهدر ؟ حقیقی  
نهدر ؟ انسانلر مفیدی کندیلری تعریف و تعیین ایتک ،  
حقیقی بی ده بر درجه یه قدر کندیلری یاراتمق املنده درلر . « مفید »  
بیم تصور ایتدیکم و عقلک ده صرف مساعی یه لایق دییه حکم  
ایتدیکی شیئی ساحه فعل و وجوده حیقارمق ایچون قوللانیله جق  
واسطه لردن عبارت اوله جقدر . « حقیقی » ده کندی کندیمه تعیین  
ایتدیکم وظیفه فکرندن آلا جقم قوتله نیم یاپه جقم ، میدان کتیره حکم  
شی اولاجقدر . تعبیر دیگرله ، انسان مفیدک فوقه بو مفید  
اولان شیئک منبعی و اولچوسی اولمق اوزره « خیر » ی و « کوزل » ی  
وضع ایدر . « خیر » ایله « کوزل » ده « دوغرو » کبی برر  
فائده ، اک اعلا برر فائده اولمق اوزره تلقی ایدمک ایسترلر .  
ایشته بویله او کوست قونتک پرنسپی موقع تطبیقه قونولنجه

« حقیقی » ایله « مفید » ك اتحادندن تركب ایدن « مثبت » مفهومی، انسانی قونتك بر طرف ایتك ایسته دیکی شأیت موجوده فوقنده کی شیلره سوق ایدر. حقیقی ایله مفید بزم ایچون دوغرویی، کوزلی، خیری آرامق اوزره برر مشوق اولور لر .

روح بشردن انسانك فوقه چیقان شیء کسوب آتمق ایچون بو آرزونك بر ذهاب باطلدن عبارت اولدیغنی، وظیفه سز قالمش بر عضو کی یاواش یاواش سونوب اورته دن قالقه جغنی بیهوده یره اثبات ایتكکه اوغراشدیلر. حقیقی انسان، کندیسنه تعریف ایتدکلی حال ایچنده کندی شرط موجودیتنی کوره مز. قونت، ایچنده یا شادیغمز عالمدن اوتوده برشی، کور مکدن، برشی آرامقن بزی منع ایدر. بو عالم اونك فکر نجه بزم ایچون برکل اولق ایجاب ایدر. فقط لیتره بو « کل » ك اطرافنی عمان ایله محدود بر آطه اولدیغنی، بوده کیزه آچیلق بزم ایچون ممنوع ومحال اولسه بیله اوزاقدن تماشاسی معظم ونجات بخش اولدیغنی سویلر .

نامتناهی بی قاپاق و دوشونمه یه دوشونمه یه نامتناهی فکرینك اورته دن قالقه جغنی امید ایتك قابلیدر؟ علم ایله دین هرا یکسی ده حادثات بشریه نك متناهی دنیاسی ایچنه قونولدق لی زمان برر لرینه قارشیلقلی ایقاع مشکلات ایدر لر. فقط علمك بنمسه مك ایسته دیکی بو موجود عالمك اوته سنده آرزو لر مزه، اعتقاد لر مزه، خولیا لر مزه. آچیق باشقه بر عالمك موجودیتی قبول اولونه جق اولور سه كرك



علم كرك دين حريتلىرىنى ، مختاريت اداره لىرىنى تكررارا كىتساب  
ايتىمىزلىرىمى ؟ بويىله بر مىسلك علم حاضر كى بيانات و تأمىناتنه مغاير مى  
اولور يوقسه علم بويىله بر مىسلكك تأسىنى مى استلزام ايدىر ؟  
زمانمىزده كى افكار كى باشلىجه شاهد لىرىدن برى اولان مشهور  
انكلىز فىلسوفى هر برت سىنسىر ايشته مىسئله يى بو شكل آلتىده  
تدقيقه قويولدى .

---

## ایکنجی باب

هربرت سپنسر و « ناقابل ادراك »

- ۱ — علم ، دين و مناسبترى حقنده هربرت سپنسر ك مسلكى -  
« ناقابل ادراك » ، علم و دين - تكاملجيك ، تكامل دينى .
- ۲ — هربرت سپنسر مسلكنك تفسيرى - سپنسر رهبر اولان اسباب - تكامل دينى نظريه سى ايله ناقابل ادراك نظريه سنك مناسبتى -  
منفى ناقابل ادراك و مثبت ناقابل ادراك - هربرت سپنسر و پاسقال .
- ۳ — هربرت سپنسر مسلكنك قيمتى - هربرت سپنسر ك ناقابل ادراكى دينلر ك بر طور توسى دكليدر ؟ سپنسر كوره حسياتك قيمتى - مسلكك عقلى بر تملیده واردر . - مسلكك ضعيف نقطه سى :  
صرف او بر قتييف بر نقطه نظر دن تلق ايدلش اولان « ناقابل ادراك » .  
هربرت سپنسر بوكا يا پك فضله يا پك آز بر قيمت عطف ايدر .

دين حقنده كى مطالعات و محاكات هربرت سپنسر ك فلسفه سنده اك مهم ، اك نادیده قسملردن برى دكلدر . بو مطالعات اونك اثرنده ماده پك كوچوك بر یر اشغال ايدر . فقط بو مسئله ده بويوك بر متفكر ك فكرينى آكلامق هر زمان حائز اهميت اولمقله برابر هربرت سپنسر ك بوباده يازديغنى آراشدير مق ايچون بالخاصه بر طاقم اسباب واردر .

هربرت سپنسر بر واعظ و معلم عالمه سنه منسوب ايدى . بو عالمه ايچون دين برنجى درجه ده حائز اهميت بر مسئله عد اولونوردى . والده سى طرفدن بره تل Brettel نامنده اسكى بر

پروtestان فرانسز عائله سنه منسوبدر . جدی جون بره تل «مه تودیزم»  
 مذهبك مؤسسی اولان جون وه سهی ك John Wesley  
 شخصی بر دوستی ایدی و او ده بومسلکی نشره چالیشمشدی .  
 والده سی هر یهت هولمس غایت دیندار بر قادیندی . «مه تودیست»  
 اولمله برابر آنغلیقان کلیسانك آیینی حرفی حرفه تعقیب  
 ایلردی . پدری جورج سپنسر دینی شیلرله بك چوق مشغول  
 اولوردی . ابتدا «مه تودیست» مسلکته منسوب ایکن احتیاجنی  
 حس ایتدیکی دین باطنی بی اونده بولامادیغی ایچون آیرلمش ،  
 «قوه یقر» quaker مذهبه دونمشدی . حس دینیسی کلیسانك  
 مراسمه و اوامرینه قارشى حقیقی بر نفرت صورتنده تجلی  
 ایدیوردی .

هربرت سپنسر بو تأثیراته بی حس قلمادی . Facts and  
 Comments اثرنده و Autobiography سنده دینی شیلره کیتدجه  
 ده امتزاید بر اهمیت ویرمکده اولدیغنی سویلر . او توبیو غرافی بر طاقم  
 ملاحظات دینه ایله نهایت بولور . تدقیقات و تتبعات عظیمه سی  
 ساینه سنده علومى توحید و ترکیب تشبث مهمنه کندنده قدرت  
 کسب ایدن و نامی بویله بر تشبث ایله مشهور اولان بو عالم کرک  
 حیاتی ، کرک تفکرات و ملاحظاتی اعتباریله دین و علمك  
 مناسباتی تدقیقه ده بك حائر صلاحیت ایدی .

هربرت سپنسر ك دین حقنده کی افکارینك شایان اهمیت اولماسی  
 یالکیز فیلسوفك مفکره سنك بارز بر قسمنی افاده ایتمندن ایلری

کلیور. بومسلاک دینی، هو قسله ی Huxley ک « آغوستیسیزم » [\*]  
 agnosticisme تعیرایتدیکی شیده طوپلانیر. آغوستیسیزم ایسه  
 زمانمزه کی فلسفی دوشونجه نك ا ک مهم شکلرندن بریدر.  
 آغوستیسیزم نه در؟ بعضیلرینه نظراً بوا ایله برتصوفدر که اللهی  
 بزم دائره ادرا کمزه ادخال اتمکله الوهیتک قدرینی تنزیل اتمکدن  
 قورقار. بعضیلرینه نظراً عالمانه برتعبیردر که آرقه سنده لاهیلک  
 کیزلیدر. آغوستیسیزم، دین ایله علمک مناسباتی مسئله سنک  
 بر طرز حلیدر که تدقیقه محتاجدر. بونی ایجه تدقیق ایچون  
 هربرت سپنسرک آثارنده نظر ملاحظه یه آلق ا کوزل چاره در.

---

[\*] « مطلق » ک ناقابل ادراک اولماسی .

علم ، دين و مناسبتلری حقنده هربرت سپنسرک مسلکی  
 دینه و علم ایله مناسباتنه دائر اولان بحثلره هربرت سپنسرده  
 اساسات اولین Premiers principes اثرینک « ناقابل ادراک »  
 سرلوحه لی برنجی قسمنده و سوسیولوژی اساسلری Principes  
 de Sociologie نك كرك سوسیولوژینك روحی تمللرندن كرك  
 مؤسسات رهبانیه نك تكاملندن بحث ایدن قسملرنده تصادف  
 اولونور .

\*  
 \*\*

هربرت سپنسرک فلسفه نك صوك كلمه سی هر شیدك اعماقنده  
 و منشأنده بزم ایچون بهمه حال « ناقابل ادراک » برشی بولوندیغی  
 قناعتیدر : براساس وارکه نه بونی برطرف ایده بیلیرز ، نه بوکا  
 واصل اولابیلیرز . ایشه بومسلک ، دين ایله علمی بربرلرینه  
 ربط ایدر .

چوق کره دين ایله علم بربرلرینه ضد و مخالف کورونور .  
 بر چوق کیمسه بونلرک اساسلری صورت قطعه ده غیر قابل  
 تألیفدر قناعتنی بسرلر . مع مافیه شو نقطه یه دقت لازمدرکه  
 كرك دين كرك علم بزه تجربه طرفندن برر طبعی شأیت اولمق  
 اوزره اراؤه ایدلمکده درلر .

دینك مفکره طرفندن مخیله نك کیف وهوسنه تبعاً اعمال  
 ایدلمش صنعی برشی اولدیغی ظن ایتك خطادر . دين انسانه



بالذات اشیا طرفندن تلقین اولونمشدر . دین ، عالم خارجینک  
 انسان اوزرنده یاپدینی تأثیره انسانک دوشونجه سنک ، قلبنک ،  
 روحنک - کندی کندیلکندن حصوله کله - برعکس العملیدر .  
 دیگر طرفدن ، علم ده - بونی عامیانه وعادی بر بیلکی به  
 مخالف برشی کبی تلقی ایدنلرک احتمالک فرقه وارمهدن تخیل  
 ایتدکلی وجهله - صنعی بر اختراع ، عادتا طبیعت فوقنده  
 برشی دکلددر . علم ، طبیعی بر تکامل نتیجه سنده دها واضح  
 و صریح ، دها مربوط ، دها معلومات بخش بر شکل آتش  
 عادی ، هر کونکی بر تجربه در . چیقاردینی نتیجه لرله حس  
 و ادراک حاضرک حدودینی کچه بیلکه او تجربه عادی دن زیاده  
 حائر قابلیتدر .

دیمک که علم ایله دینک منشألی بر در : ایکسی ده مفکره  
 بشرده مفکره نک دنیا ایله اولان مناسبتی نتیجه سنده طبیعی  
 صورته حصوله کلشدر در . ایکسی ده عینی درجه ده بر  
 شأنیتدر ، طبیعتک کندی کندیلکندن بر تظاهریدر لر . بناء علیه  
 برینک موجودیتی دیگر ایله قابل تألیفمیدر دکلیدردیه آرامق  
 معناسز برشی اولور . مادام که برابر ، عینی زمانده موجوددر لر ،  
 دیمک که برلکده موجود اولایلر لر . یکانه مسئله بوهم وجودلنک  
 حکمتی و معناسی آرامقدر .

کرك علمك كرك دينك خصوصى ايجابات واحوالنك  
 تدقيقى ايله اكتفا ايديليرسه واقعا آراالرنده پك بارز اختلافلر

مشاهده اولونور و بر چوق ذواتك تشبث ايتدكلری تأليف تجربه لری عقيم تلقی اولونه بيلير . فقط عارضی حال ، اصل و لي اونوتدير ماملیدر . علم ايله دين حقنده سليم بر صورتده حکم ويره بيلمک ايچون بونلرك خصوصى وعينى غايه يه متوجه افاده لرينى دكل اك عمومى و اك مجرد حکم لرينى پيش تأمله آلق ايجاب ايدر . احتمالكه بو اعتبار ايله علم و دين پك قابل تأليف كبي كورونه جكلردر .

دينلرك عرض ايتديكى خصوصى عقيده لر — كه اكثريا علم ايله حال نزاعه كيرمه لرينى ايجاب ايدر — حقيقتده مافوق طبعى و حيلرى دكل ، ضرورى بر صورتده حس ايتديكى نامتناهيليكى و مطلقيتى كندى مقولاتنه و اعتيادلرينه موافق بر صورتده تصور و تخيل ايچون مفكره بشرى ياپديغى بر سعي افاده ايدر لر . حالوكه بوتون بو دستور لر ، نه قدر عالمانه ، ماهرانه ، نه قدر اينجه و هنرلى اولورسه اولسونلر تحليل قارشيسنده دا يانه مازلر . شاعرانه و حسياتپرستانه بر نقطه نظر دن ملاحظه ايديلدجه ، كله لرك معنالى و فكر لرك مناسبتلرى قطعيتله تعيين و تعريف اولونمادجه ، ممنونيت بخش كورونور لر . فقط واضح و صريح صورتده دوشونولمك ، اثبات ايدلمك ايسته نلدكلرى زمان بويله دكلدر .

فرضا ، عموميتله دينلرك حله اوغراشدقلى مسئله لردن برينى ، منشاء عالمى اله آلام . بو مسئله نك مختلف صور حلى

واضح و صریح صورتده تعیین ایدرسهك اوج شكلده طوبلاند-  
 قلیخی کوریرز. دنیانك یا ازلدن بری موجود اولدینی یا کندی  
 کندینه وجود بولدینی، یا خارجی بر قوت طرفدن خلق  
 اولوندینی فرض ایدیله بیلیر. حالبوکه بر تنقید فلسفی به تابع  
 طوتوله حق اولورسه بو اوج فرضیه دن هیچ برینك حقیقه  
 قابل فهم و ادراك اولمادینی کورولور. هپسنگ ایچنده منطقاً  
 غیر قابل تألیف بر طاقم قسملر واردر. هپسیده حد ذاتنده  
 تضادلرله دولودر. بوفرضیه لری ذهنده واضح صورتده تصور  
 ایتمک غیر قابلدر. هربرت سنسره کوره هامیلتونك Hamilton  
 و مانسل Mansel ك تنقیدلری بونی صورت قطعی ده اثبات ایتمشدر.  
 الهیاتك وجود اوله عطف ایتمک ایسته دیکی وحدت، حریت،  
 شخصیت کی تعیینلرده تدقیق ایدیلنجه ینه بزی مشابه نتیجه لره  
 ایصال ایدر.

بونك ایچون، دینك موضوعی، «مطلق»، واربرشی کی  
 ذهنده تصور ایدلمك ایسته نلدیکی تقدیرده، ادراك اولونه ماز،  
 دوشونوله مز بر شیدر.

یا علم؟ علم بالعکس پرنسیپلرنده، محاکمه لرنده، نتیجه لرنده  
 باشند نهایت قدر آچیق و بدیهی دکلیدر؟ هربرت سنسره کوره  
 هیچده بویله دکلدر. علمك یابدینی شی نتیجه ده کیفیتی کیمته  
 ارجاعدن عبارتدر. علم: فضا، زمان، ماده، حرکت، قوت  
 کی برطاقم مفهوملردن وازکچه مز. چونکه بونلر کمیت ایچون

ضروری بر استناد کا هدر . فقط بوتون بو مفهوم ملرده دهند  
تصور اید ملک ایسته نیلیرسه بزى بر طاقم تضاد لره ایصال ایدر لر .  
فرضا ، یا فضایی یا زمانی حقیقی صورتده یعنی موجودیتك  
تضمن ایتدیكى صریح و تام بر تعین ایله دهند دوشونمكى بر تجربه  
ایدیكز . اكر قضا ایله زمان حقیقه موجود ایسه لر بونلرك  
طبیعی حقده آنجق اوچ فرضیه ممکندر . بونلر یا برر « جوهر  
مجرد » entité درلر ، یا خود برر جوهر مجردك وصفیدر لر ،  
یا خود سو بره کتیف برر شأیت درلر . حالوکه بو اوچ فرضیه دن  
هیچ برى تضاد لره دوشولمکسزین بسط و تمهید ایدیه مز .  
سپنسر بوراده ده اسقوچیا مکتبك وقانتك تنقیدندن چیقان  
نتیجه لری قبول ایدر .

فضا و زمان حقده دو غرو اولان بو مطالعه علمك سائر  
معطیات اولیه سی حقده ده وارددر . تکامل عمومینك جریاننى  
یوقاری دو غرو تعقیب ایدره ك ماده یی ایلك اول موجود اولدیغى  
انتشار تام حالده دوشونم . کورورز که بو حاله ناصل کلدیكنی  
ذهن مزه صیغیدر مقدن عاجرز . کوزلر مزى استقباله چویره لم .  
کوزمرك اوکنده وقوعه کلن حادثاتك توالیسنه هیچ بر حد  
چیزه میز . دیگر طرفدن انسان کندی کندیسنه باقه جق اولورسه  
شعورك ایكى تلنك اوچلری کندی دائرة نفوذ و اقتدارندن  
خارجده اولدیغى کورور . بر حالت شعورك حصولنى آنجق  
او حالت زائل اولدقدن ضوکره درك ایده بیلیرز . مشعورك عدم

شعور ایچنده غائب اولماسی ده کذلک انسان آ کلایه ماز. هر شینک لب و اصلی ، تولدی ، صوکی بزم نظر مزدن نهاندر . بوتون علممز بر سره منتهی اولور .

بناء علیه دین ایله علم آراسنده بر مشابته ، بر رابطه واردر . ایکسی ده ، اساسلری تعمیق ایدیله جک اولور سه ناقابل ادراک ، ناقابل تفکر بر شینک موجودیتی تضمن ایدر لر . ایسته دین بو « ناقابل ادراک » ایچندن نبعان ایدر واونی تصویر و تعریف ایچون یهوده یه بر چوق اوغرا شیر . علمده قابل ادراک و قابل تصویر و تعریف حدود ایچنده قالمق ایچون یهوده یه اوغرا شیر دورور . فقط نه قدر چوق ترقی ایدر سه ، بر طرف ایتک ایسته دیکی بو ناقابل ادراکی او قدر چوق قبول ایتش اولور . دینک باشلادیغی یرده علم نهایت بولور . بر لرینه آرقه لرینی دوزر لر و کسب اتصال ایدر لر .

فقط علم ایله دینک بویله ائتلاف ایتدکلری « مطلق » فکری عجباً صرف بر نفی و انکاردن عبارت دکلیدر ؟ بو « ناقابل ادراک » بو « ناقابل تفکر » بر تجریده ، بر هیچه منجر اولمایور می ؟ اکر بویله ایسه تأمین ایتدیکی ائتلاف بوش بر لا قیردن عبارت قالیر .

« ناقابل ادراک » ی شأیت حاله کتیر مک هر برت سپنسرک اثریدر . اونک خصوصیتی تشکیل ایدن ده بودر . کنديسندن اول هامیتون و مانسل نظر نده « ناقابل ادراک » بر نفی و انکاردن



عبارتدی . هربرت سپنسر « مطلق » ك ناقابل ادراك اولديغنى قبول و محافظه ايتدى ، اعلان ايتدى . فقط بونك حقتده هيچ برشى سويله يه ميه جكمز نتيجه سنى چيقارمادى . بر شى بوتون خطوطيله قاوريايان حقيقى بيلكى ايله بر شى بوش بر كله دن عبارت حالده كورن قطعى جهل آراسنده هربرت سپنسر اورته برشى احداث ايتدى كه بوده غايت عمومى اوصافى ايله كورولن برشى فكرى ايدى .

« مطلق » ك ناقابل ادراك اولمقله برابر ينه مثبت برشى اولالاييله جكنى اثبات ايچون هربرت سپنسر مثبت شعور Conscience positive ايله معين شعور Conscience définie ديه اورته يه بر فرق قويار . مثبت شعورك همه حال معين شعورى ايجاب ايده جكى فكرى ياكلكشدر . بوفكر بر خطاى منطقيدن ايلرى كلمكده در . چونكه برشى حقيقتده هم مثبت هم غير معين اولابيلير . علم ايله دينك مشترك بر مصدره postulat سى اولان بونا قابل ادراكك تدقيقى ايسته بويله هم غير معين هم مثبت بر شعورك موجوديتنى تأمين وتصديقه منتهى اولور .

« مطلق » ناقابل ادراكدر ، ناقابل تفكردر ديديكيم زمان مقصدم ذهنده تحقق ايتديريله مز ، مادى برشكل آلتنده معلوم اولاماز ، معين بر موضوع شعور اولاماز ديمكدر . بو عدم امكانك معناسى نهدر ؟

فرض ايديلم كه مفكره « مطلق » ي دوشونمكه تشبث

ایتنسون . بالطبع بونی بردرجه قدرت تعیین ایتمه کالقه جقدر .  
مثلا یا محدود یا غیر محدود اولمق اوزره تلقی ایده جکدر . بوایکی  
وصف بربرلینه ضددر . بناء علیه مفکره بوایکیسندن بریسنی  
اختیار و قبول ایتمه مجبوریتنددر . حالبوکه تحلیل ، قطعی صورته  
اثبات ایدیورکه « مطلق » ی « محدود » اولمق اوزره تلقی  
ایتمه لی یم ، چونکه قابل دکل غیر محدود اولاماز . دیگر طرفدن  
تحلیل ینه قطعی صورته اثبات ایدیورکه « مطلق » ی « غیر  
محدود » اولمق اوزره تلقی ایتمه لی یم . چونکه قابل دکل « محدود »  
اولاماز . بناء علیه « مطلق » ی دوشونمک ایسترسه م بری  
محدود دیگری غیر محدود اولمق اوزره ضد ایکی مطلق قارشیسند  
قاله جغم . فقط تحلیل یالکز بونیجه بی چیقارمقله قالماز .

محدود ایله غیر محدودک بربرینه معارض اولماسی ، آرقه لرند  
بونلری بربرینه تقریب ایدن ، بربریه مقایسه ایدن و غیر قابل تألیف  
اولدقلرینه حکم ایله ین برشینک موجودیتدن دولاییدر . تعبیر  
دیگرله ، بونلرک آرقه سنده برشعور موجود اولماسی اعتباریله در .  
اونک ایچون ، محدود ایله غیر محدود کنیدیله بربرلرندن  
تجربید ایدن کله لر ایچنده دکل ده هر مفهومک تضمن و ایجاب  
ایتدیکی مفکره فعلنده کورولورلرسه قطعی صورته متضاد  
اولمادقلری آکلاشیلیر . محدود ایله غیر محدود ، معین برشعور  
موضوعی اولمق اعتباریله بربرلرینی ازاله ایتدکن صوکره ،  
بومناسبته تضمن ایتدیکی برشعور قالیرکه اوده غیر معین فقط

مثبتدر . « مطلق » ی معین صورته دائره شعوره ادخال غیر قابل اولدیغی بیان ایتک عینی زمانده بومطلق حقنده غیر معین مثبت بر شعور موجود اولدیغی تصدیق ایلکدر .

هربرت سنسرك اصولی شکلی واسقولاستیک بر مناظره وجدلن عبارت دکدر ؛ مشخص concret بر تنزیل وارجاع اصولیدر . او، علی العاده تجربه ایله معلوم اولان شیدن حرکت ایدر ، اونک حقیقه موجود کبی دوشونولسی غیر قابل اولان بوتون اقسامی بر طرف ایلر . اوزمان آرتق باشقه بر شیئه غیر قابل ارجاع بر طورطو قارشینده قالان بر کیمیا کر کبی توقف ایدر . ایشته مطلقک اعماقده بوصورته غیر معین شعوری میدانه چیقاریر . بو شعور طرفندن وضع ایدیلن « مطلق » ناقابل ادراک اولقله برابر حقیقی و مثبت برشیدر .

بوصورته ، دین ایله علمک ائتلافی یالکز بر کله اعانه سیله دکل بر شأنت سایه سنده تأمین اولونور . بو ائتلاف منفی دکل مثبت برشیدر . دین ایله علمک مناسبتاری حدذاتنده نه ماهیتده اولورسه اولسون بزم ایچون ذی حیات بر وحدت و شعور واردر که او ائتلافک حقیقی اولدیغی تأمین ایدر .

دین ، مطلقک موجودیتنی تصدیقندن حرکت ایدر . بونده حقیقتدن خارجه چیقمش دکدر . چونکه او مطلق حقنده بز مثبت بر شعوره مالکز . علم هر جهتن کندیسنی احاطه ایدن اسراری ازالهیه قادر اولاماز . بو قدر تسزلکه ایسه بر چاره

یوقدر . چونکه مطلق حقنده آنجق غیر معین بر شعوره مالکز  
وباشقه دورلوده بر شعوره مالک اولامایز .

\*  
\* \*

مع مافیه دین ایله علمک مناسباتی حقنده کی بوفکر هر برت  
سپنسرک مسلکنک مابعد الطبیعی به عائد برمدخلی دیمکدر . اصل  
مسلک علم فکری اطرافنده دوران ایدر . غایه سی « قابل ادراک »  
مفهومندن استنتاج ایدیلن پرنسیپلر واسطه سیله علومک توحید  
وترکیبی *synthèse* اجرا ایتمکدر .

علملر اشیایی مشابهترینه کوره تصنیف ایدرلر . مبهم ،  
نا تمام یا خود کیفی « *qualitatif* » مشابهتری ریاضیاتک مساوات  
وعینیت تعبیر ایتدیکی تام ، صحیح مشابهتله ارجاع وتنزیل غایه سنی  
تعقیب ایلرلر . علملر کندی باشترینه یالکز قسماً توحید ایدلمش  
بر بیلکی به واصل اولابیلرلر . فلسفه بیلکی کی تام بر صورتده  
توحید ایتمکه تشبث ایلر . قوللاندیغی آلت ، قانون تکاملدر .  
علوم بو قانون تکاملک وجودینی حس ایدرلر . فقط بونی  
« قابل ادراک » مفهومک تحلیلی اثبات وتأسيس ایلر .

علملر وقایعی ، بوتون وقایعی تدقیق ایدرلر . نهایت فلسفه  
ایله برلشن علملر تدقیق ایتدکلری او وقعه لرك هر ساحده ،  
— وارلغک وبیلکینک اساس مشترکی اولان — قانون تکامل  
آلتنه داخل اولدقلرینی کورورلر . اک کنیش معناسیله تلقی  
ایدیلن بو قانونه نظراً هر شی بی انسجام بر عدم تجانس حالندن

معین و ذی انسجام بر تجانس حالت بهمه حال و تدریجاً کچر .  
تکامل قانونه دینلرده سائر بوتون حادثه لر کبی تابعدرلر .  
صوک غایه سنی تحری ایجاب ایتدیکی زمان علم نظرند « اساسات  
اولین میاننه » قونولان دین شیمدی ، زمانده وفضاده موجود  
بر حادثه اولمق اعتباریله ، علمک و فلسفه نک تدقیق ایتدیکی اوهپ  
بر برلینه مشابه بر طاقم شیلر آراسنه کیرر .

شیمدی بوراده مسئله تکاملجی فلسفه نک پرنسیپلرینه کوره  
کلیسا مؤسساتنک بر حادثه صفتیله تولدینی تحری ایتمکدر .  
تاریخ صیراسنه کوره دینلرک نقطه حرکتی ، ایلریده تنوع  
ایده ایده او نامتناهی انواعی حصوله کترین وقعه ابتدائی ،  
هر برت سپنسره کوره « اش » Double فکرندن باشقه برشی  
دکدر . انسان صوده کندی خیالی یاخود اشنی کورور .  
کذلک ، کندی کندیسنی رؤیاده کوردیکی کبی باشقه آدملرک  
خیاللرینی ده کورور . بو « اش » اصله بکزه مکله برابر اونک بالضروره  
عینی دکدر . انسانک ایلک حرکتی بونلری آیری آیری  
مخلوقلر کبی تلقی ایتمکدر . حالبوکه اویقو کچنجه اش نه اولویور ؟  
انسان اونک محو اولمادیغنه ، ساده جه اوزاقلاشدیغنه ، احتمالکه  
کله جک رؤیاده ینه کوزوکه جکنه اینانغنه طبیعی بر تمایل بسلر .  
صوکره اولوم کلدیکی زمان انسان او اسرار آلود « أنا » نک  
پایدار اولدیغنه ، کندی کندیسنه آز چوق مشابه بر حالده  
قالدیغنه ، بناء علیه اش اولدیغنی مخلوق مرئی به آز چوق بکزه دیکنه

قولایجه اینانیر . بوندن پریرله ، ارواحه ، طبیعت فوقنده مخلوقلره ، اونلرك قدرتلرینه ، حیات بشره تأثیرلرینه اعتقاد حاصل اولور . ایشته بونقطهده اپیکورجیلرله برلشن هربرت سنسره کوره دینك تاریخی منشائی بودر .

بواعقadden اینلر ، عقیده لر ، کلیسا مؤسسائی چیقمشدر . هر موجود حقیقینك بر روح کبی تلقی ایدیله بيلمکه قابیلی بر اشی واردر . ارواح سفلیه ، زمان ایله ، معبودلر تسمیه ایدیلن ارواح علویه نك تحت حکمنده طولانمشلردر . بو ارواح علویه ده نهایت بر الله احدك تحت حکمنه کیرمشلردر . انسان بو طبیعت فوقنده کی قدرتلری ذهنده تصور اتمکه ، کنديسی ایچون قابل وصول و مساعد بر حاله کتیرمکه چالیشمشدر . بو آرزودن اساطیرلر ، سحر و بویودستورلری ، بر طاقم عبادتلر وتشکیلاتلر چیقمشدر . بونلره صوکره تکامل قانونه توفیقاً بر نقطه یه قدر انکشاف ایتشلر ومنشألرندن بعضاً آنجق اوفاق تفك بعض اقسامی محافظه ایلشلردر .

انسانلرك اعتقادلری پك زیاده تکامل ایتدیکی ایچون ایلک مقصد و غایه لری بعضاً زائل اولمشدر . بناء علیه آرتق کنديلرینه استنادکاه بولامایان مؤسسات بر رابطه اجتماعیه صفیله پایدار اولورلر . تکاملک کنديلرینه ویردیکی بو وصف پك زیاده حائز اهمیتدر . دینلر آرتق جمعیات بشریه نك اتصال و تمادیسنی تمثیل و ارائه ایدرلر . اونك ایچون بونلره حرمت و رعایت ایتمکه فردلرك مهم منافی واردر .



تکامل دینیک وصف عمومیی عنصر اخلاقینک عبادت  
عنصرینه یعنی الوهیتک جلب توجه و عنایتی عنصرینه کیتدکجه  
غلبه سی و تابدایتده سبب اولین کائناته عطف اولونان انسانی  
اوصافک کیتدکجه آزاماسیدر ؛ عقیده لری صرف برر تمثال  
دیبه تلقی ایتمکه ویرلرینه « مطلق » حقنده هم غیر معین هم  
مثبت بر شعور اقامه ایله مکه تمایل کوسترلمسیدر .

هربرت سېنسر مسلكنك تفسیری

علم ايله دينك مناسباتی حقنده هربرت سېنسر ك مسلكلرينك خلاصه سی ايسته بوندن عبارتدر. بونلرك معناسی نه در؟ هربرت سېنسر ك اثرينك هيئت مجموعه سی ايچنده بويوك بر اهمیتی اولمايان تفرعات قیيلندن بر قسم میدر لر یوقسه سېنسر ك مسلك اصليسنندن آیرلماز بر پارچه حالنده درین فكر لر ك افاده سیمیدر لر ؟

هربرت سېنسر ك اصل بويوك اثری اولان توحید و ترکیب علوم قارشيسنده بونظریه لر ك اهمیتسز برشی کبی تلقی اولونه بیلیر وبالحاصله ، منفی بر معنای حائز اولدقلری سويله نه بیلیر .

واقعا « اساسات اولین » ده بر « ناقابل ادراك » نظریه سی ایچون کافی مالز مه واردر . فقط شونقطه یه دقت ایتك ایجاب ایدر که سېنسر ابتدا « اساسات اولین » نك باشنه ناقابل ادراك حقنده بر فصل قویمق فکرنده دکلدی . مسلك عمومیسنك دینه مغایر بر معناده تفسیر ایدلمسی قورقوسيله ، لا الهیلك مؤاخذه سنی بر طرف ایتك ایچون صوکره دن بو برنجی قسمی علاوه ایتشدرد .

بوناقابل ادراك نظریه سی ، اسمندن ده آکلاشيله جفی اوزره ، بزه ، سبب اولین اولان اللهك ودينك اصل موضوعلرينك بزم ادرا کمزدن تماميله خارج اولدقلرینی اوکره تیر . شبهه سزدر که تدقیق و مشاهده ایتدیکمز حادثات بونلرك شأیتلرینی تضمن ایدر . فقط هر دورلو طرز وجوددن عاری اولان بر وارلق

نەدیمکدر؟ صورت قطعیه ده ناقابل ادراک بر «مطلق» ک نه معناسی واردر؟ بونده، فیلسوفک بوتون انکارلرینه رغماً مجرد بر تعیردن، بر عدم امکانک تمامیلہ منفی بر افاده سندن برشی کوروله بیلیرمی؟ دینلرک تولد تاریخسی حقنده کی مسلکه کلنجہ شہہ یوقدر کہ بو، صریحدر، مثبتدر وای بسط و تمهید ایدلشدرد. فقط، بو کون پک مشکوک اولان قیمت علمیه سندن صرف نظر، بومسلک دینک خصوصی براوثره قتیف تمله مالک اولدیغنی انکار دکلیدر؟ بونده دینلری تشکیل ایدن بوتون شیلرک طفلانہ ویا کلش بر اعتقادہ، رؤیالرک بزہ بیلدیردیکی بر طاقم خیالتلرک حقیقلکنہ وپایدار اولمالری اعتقادینہ ارجاع ایدلدیکنی کورم یورمی یز؟ بو نقطه نظره کوره دین انسانک تاریخ طبعیسنک ساده جہ بر فصلندن عبارت قالما یورمی؟

بو مختلف نقطه لر حقنده هربرت سپنسرک دوشونجه سنی ایجہ آکلامق ایچون، مسلکنک تفسیرینه سپینوزانک کرک توراته کرک طبیعتہ تطبیق ایتک ایسته دیکی اصول تنقیدی، اثرک ینہ اثر ایله ایضاحی اصولنی تطبیق ایتک ایجاب ایدر.

\* \*

\*

هربرت سپنسرک دین حقنده کی نظریه لرینہ باعث اولان اسباب نه لدر؟ مسلکلرک اسبابی نظر ملاحظیه آلیرسه اونلرک حقیقی معنالرینی آکلامق احتماللری زیاده ل شیر.

فیلسوفک کندی ترجمه حالی حقنده ویردیکی معلوماته

باقیبرسه — که بونلر غایت دوغرو ، فوری ، جانلیدر ، مفکره-  
سنگ سعی داخلیمی حقنده بر چوق تفصیلاتی حاویدر — بواسبابک  
شونلردن عبارت اولدینی کورولور :

اول امرده ، تورات و بومتن مقدسی شرح ایدن واعظلرک  
موعظه لرینک یادیغنی تأثیر . کویا وحی الهییه مستند اولان  
بر چوق شیئی سپنسر بر رزالت اولمق اوزره تلقی ایتشدیر .  
آدمک عدم اطاعتدن دولایی بوتون معصوم نسل آدمی محکوم  
عذاب ایتمک نه بویوک حقسرلقدیر ! نیچون انسانلر ایچنده  
یالکز پک محدود بر قسمه بر امتیاز مخصوص بخش اولونیور  
و کندیلرینه نجات یولی وحی اولونیورده باشقه لرینک بوندن  
خبرلری اولمایور ؟ هله شوادعانک غرابته باقکز : کندیسندن  
بر چوق سیاراتیله برابر اوتوز میلیون کونش صادر اولان سبب  
اولین کائنات بر کون انسان قیافته کیریور ، ابراهیمک قارشیسنه  
چیقور ، اونکله بازارلغه کیریشه رک صادقانه خدمت ایده جک  
اولورسه اوکا اراضی ویرمکی تعهد ایلور ! کلیسالر مزده  
مدحیه لرینی ترنم ایتدی کمزری دویمقده الله نه ذوق بولا بیلیر ؟  
یارا تدینی بزلر کی اصغر نامتناهی مخلوقات متصل کندیسنک  
عظمت و جلالتدن بحث ایتیمورز دییه ناصل اولورده حدت  
ایده بیلیر ؟

هربرت سپنسرک کتابنده بر چوق یرده بویله ملاحظاته  
تصادف اولونور . بوملاحظاتی الهام ایدن اسباب نه در ؟ بوبابده

هیچ شبهه‌ی محل یوقدر. الله حقنده کی عنغوی اعتقاد لرله کندی  
عقلنک سبب اولین کائناته عطف ایتدیکی نامتناهیلک وصفی  
آراسنده کی عدم تناسب هربرت سپنسره فنا بر تأثیر یاپار . بو  
بردینسزلک حسیمیدر ؟ دین خصوصنده لاقیدلق علامتیمیدر ؟  
لسانک شدتی ، طرزی دلالت ایدر که دینه قارشی بو هجوملری  
اوکا تلقین ایدن شی جدی ودرین بر تمایل دیندر .

بو نوع تنقید آنحق خصوصی بر دینه عائد بعض حکایه لره  
وعقیده لره تعلق ایده بیلیر . سپنسرک کندی ترجمه حانه دائر  
یازدیغی کتابده اصرار ایله بحث ایتدیکی باشقه نوعدن بر تنقید  
دها واردر . هربرت سپنسر دیور که : مفکره مده فطری اوله رق  
« طبیعی علیت » فکری واردی . سبب ایله نتیجه نک بر برینه  
معادل اولماسی ضرورتی ، عادتاً بر حدس ایله ، تقدیر ایدیوردم .  
کافی درجه ده بر سبب اولمازسه بر نتیجه حاصل اولمایه جغنی بکا  
او کرتمکه حاجت اولمادن بن حس ایلوردم . بر سبب موجود  
اولدجه اونک تأثیرینک ده ضروری اوله رق کرک کمی کرک  
کیفی احوالتک هیئت مجموعه سیله بر لکده حصوله کله جکنه دائر  
ایچمده کندیلکندن بر قناعت واردی . بو استعداد فکری بنی  
ما فوق طبیعت فکرینی رد ایتکه سوق ایتدی . معجزه تسمینه  
ایدیلن یعنی طبیعتک علितه مغایر دیه تلقی اولونان شیلرک کافه سنی  
غیر ممکن عد ایتکه باشلادم .

برنجی سبب ، رسمی صورته دینی اولق اوزره تدریس

ایدیلن خصوصی مذاهبدن استخراج ایدلمشدی . بو ایکنجی سبک منشائی علمک طبیعتنده در . علم هرشیدن اول ، مافوق طبیعی فکرینی بروجه پیشین برطرف ایدر .

هربرت سپنسرک بحث ایتدیکی طبیعی علیت اساسنده دینی معتقداته قارشی غیر قابل ازاله بر مانعه موجودمیدر ؟ بو پک احتمال دائره سنده دکلدرد . چونکه بر چوق فیلسوفلر کورو - لمکده درکه حادثاتک طبیعی صورتده بر برینه مربوط اولدیغنی صریح صورتده بیلیمکه برابر غایت درین بر حس دینی به ده مالکدرلر . قرون قدیمده رواقیه بویله ایدیلر . یکی زمانلرده ده سپینوزا ، لایبنیچ ، قانت بوکا بر مثال تشکیل ایدرلر . حالبوکه دیگر طرفدن نسج حادثاتده بر فیصل قبول ایدن اپیکورجیلر ، بودنیانک حادثاتنده معبودلرک هر دورلو مداخله سنی انکار ایدرلردی .

او حالده ، دینی نقطه نظر دن طبیعی علیت مسلکنک نتیجه سی نه در ؟ بو مسلک بزی الله ایله طبیعتی بر برینی احما ایچون قاپالی بر یرده بوغوشان ایکی معارض کی تصور ایتمکدن منع ایلر . تأثیر الهی بی قوای طبیعیه نک محو و تخریبندن عبارت عد ایتمکه ، تأثیر مخلوقاتی ده قدرت خالقیه قارشی عصیانده کورمکه بزی بر اقاماز . الله ایله طبیعتی بر برلریله مبارز ایکی آدمه تشبیه ایدن بر طبیعی و مافوق طبیعی تلقیسی پک طفلانه بر شیدر . بویله فکرلری بر طرف ایتمکه اوغراشمقله انسان دینسر وصفنه



لیاقت کسب ایتمش اولماز . طبیعی علیت مسلکی ، سبب نتیجه یه ، نسخه اصلییه قوییه ناصل حاکم ایسه قوانین طبیعتیه اوصورتله حاکم اولان عمومی برانتظام ، وحدت ، حیات و توافق اساسنه مانع دکلدر . حتی بر چوقلری نظرنده بویله بر اساسی ایجاب وتضمن بیله ایدر . بر اثبات ریاضینک مختلف آنلری آراسنده موجود اولان ارتباط وتسلسل بو اثباتک صاحبی اولان بر ریاضینک وجودینه بر مانعه می تشکیل ایدر ؟

مع مافیه ، طبیعی علیت فکرینک بویله بر تفسیره مساعد اولابیلرسی ایچون بر شرط لازمدر . کله نک معنای علمیمی ایله طبیعت ، « مطلق » دن عبارت کبی تلقی ایدیلملیدر .

ایشته هر برت سپنسرک اخذایتدیکی وضعیت بودر . او کندیمی سویلرکه بزم قوانین طبیعیه مز ، بزم او کمزده کی دنیا ، وجود حقیقینک برر تمثاللرندن عبارتدر . بونلری « مطلق » مرتبه سنه چیقارمق هر دورلو فلسفه یه مغایردر . بناء علیه اونده طبیعی علیت اساسنه اینانمک یانی صیرا بو علته فائق بر اساسه ایمان ایچونده یر واردر که او اساسده ایشته دینک موضوعیدر .

ذاتاً ، دقت ایتلیدر که سپنسر بر قرار ویرمز . « هر دورلو مافوق طبیعی فکرینی رد ایتمکه مجبور اولدم » دیمز . ساده جه : « علی العاده ، مافوق طبیعی حقنده بسله نن فکری رد ایتدم » دیر . قوانین طبیعتیه بر تجاوز معناسیله معجزه فکرینی رد ایتمکه برابر دینک حقیقه مافوق طبیعی اولان اساسلرینی قبول ایتمکه

باس کورمه ينلرك و بورد وانكارلريله، اللهی دائمی صورتده کندی  
اثرینی اصلاح و تصحیح ایله مشغول فنا بر عمله موقعه ایندیر.  
تلدن دها دیندار اولدقلری فکرینی بسله ينلرك آراسنه قاتیلیر .

\*  
\* \*

فقط هر برست سپنسرک يالکز نیتی نه اولدیغنی تدقیق ایله  
اکتفا ایده مه یز . « ناقابل ادراك » و « تکامل دینی » نظریه لرینی  
حد ذاتلر نده ده پیش ملاحظه یه آملغمز ایجاب ایدر . سپنسرک  
مسلكلرینی تفسیر ایدن ذواتدن بر چوغی تکامل دینی نظریه سی - که  
حقیقته مسلكك مثبت و علمی قسمی بودر - دین فکرینك  
او بزه قتیف قیمتنی صفره ایندیردیکنی و بوصورتله بدایتده ناقابل  
ادراك اولقله برابر حقیقه موجود بر مطلق بولوندیغنی نظریه سنی  
صرف خیالی و لفظی بر حاله قویدیغنی ادعا ایدر لر .

فلسفه علمییه نقطه نظرندن هر برت سپنسره کوره دین نه در ؟  
« اش » ذهابی کبی اهمیتسز حتی عادی ، ابتدائی و طبیعی  
بروقعه نك عمومی قانون تکامله توفیقاً طبیعی صورتده انکشافی .  
بوادعانك نتایج حقیقه سنی اولچمك ایچون اونی هر برت  
سپنسرک نقطه نظرندن پیش تأمله آلق لازم کلیر .

هر برت سپنسرک آکلادیغنه کوره تکامل طبیعی ساده جه  
بر میخانیک حادثه سی دکدر . شبهه یوق که مالزیه سی ، ذره لر  
کبی بر برلرندن آیری بر طاقم وقعه لدر . تکامل ، بو خارجی  
مالزیه ی محیطك تدارك ایتدیکی وقایع مرتبطه نك ابتدائی بروقعه سی

اطرافنده طویلار . فقط او یله راست کله بر طاقم مرکبات وجوده کتیرمز . نرم ، قابل تعدیل بر طاقم موجودات تولید ایدر که بونلر تدریجاً بر برلرینه توافق ایدرلر . حقیقته طبیعتک هر عنصرنده موازنه یه و توافق عمومی کائناته دوغرو بر تمایل شکلنده بوتکامل مکنوزدر .

بونک نتیجه سی اوله رق ، تکاملک بوتون معین و بالنسبه ثابت اولان محصوللری حد ذاتلرنده برقیمته و حیثیت و اعتباره مالکدرلر . چونکه هپسی طبیعتک قانون قصواسی اولان بو عمومی توافق متقابلک ، معین بر نقطه فضا و زمان داخلنده کی برشکلنی ، بر آنی ارئه ایدرلر . اونقطه ده ، اوزمانده یالکز او شکل قابل ایدی واک ایسی او ایدی . بو ، آنغلو — ساقسون عالمی ایچون آلیشقین اولدقلری پک معززاسادر : وارلق یالکزیباشنه ، اکر محقق و ذی قوت ایسه ، کندیسنی شدتله مدافعه و ادامه ایده بیلیرسه برحق دیمکدر ، برحق بخش ایتمکده در . ایشته بو صورته ، حادثات دینه ده یالکز موجودیتلری ، دوام ایده بیلملری ، قوه حیاتیه و عمومیت وصفی حائز اولملری اعتباریله ، — هربرت سپنسرک اساسلرینه نظراً ، — ایچنده پایدار اولدقلری محیطه توافقلرینی ، مشروعتلرینی ، قیمتلرینی اثبات ایتمش اولورلر . حادثات دینه ده وارا اولدقلری و پایدار قالدقلری ایچون برر موجوددر ، برر شرائطدر . دیگر طرز وجودلر بونلره توافق ایتکه مجبوردرلر . « اساسات اولین » ک برنجی قسمی

یالکز دینک علمه اویمغه نه صورتله مجبور اولدیغنی ایضاح ایتمز .  
عینی زمانده علمک ، دین ایچنده اساسلی اولان قسمه ناصل  
حرمت ورعایت ایتسی ایجاب ایلدیکنی ده کوسترر . سپنسر قوانین  
طبیعته اهمیت ویرمه یین الهیاتک علیهنده بولوندیغنی کبی «مطلق» ک  
ضمانی اولان اسرار کائناتی انکار ایتک جرئتکارلغنی کوسترن  
علمک ده کبریخی قیرار .

موجود ادیانک بوقدر زمان پایدار اولابیلمش اولمالری  
هربرت سپنسر کوره قیمتلرینک برتأمیناتیدر . فقط بو حادثات  
دینی هانکی نقطه نظر دن بر قیمتی حاضردرلر ؟ زمانمزده کی شعور  
دینی بی علاقه دار ایدمیله جک قابلیتده میدرلر یوقسه بونلر طبیعتک  
تمللری اولان میخانیکی قوتلر یاخود کور سوق طبیعیلر کبی  
پایدار اولمش بی معنا بر اعتقاد باطلدن می عبارتدرلر ؟

هربرت سپنسر کوره انکشاف دینینک نقطه حرکتی شعور  
دینی نقطه نظر دن هیچ بر قیمتی یوق کبی کورونن بر حادثه در ،  
یعنی انسان ابتدائینک رؤیاده کوردیکی خیاللرک شائیتلرینه  
اعتقادیدر . بو طفلانه منشأ ناصل اولورده بوتون سلسله  
تکامل اوزرنده تأثیرینی حسب ایتدیرمز ؟ بویله قبا بر اعتقاد  
باطلک انکشافندن و اطرافه اویماسندن باشقه برشی اولمایان  
بر طاقم اعتقادلر و مؤسسه لر بر فائده عملیه تأمین ایتسه لر بیله عقلک  
هیچ دخلی اولمایان بر طاقم خیالاتدن باشقه برشی اولابیلرلرمی ؟  
بو استتاج احتمالک یکنظرده کوروندیگی قدر قطعی دکدر .

عجبا تکامل نہایت اساسی ده د کبش دیره مزمی ، برخطایی حقیقتہ  
 قلب ایدہ مزمی ؟ مع مافیہ ہربرت سپنسرک بواعتراضہ  
 ویردیکی جواب بودکلدر . سوسیولوژی اساسلری *Principes*  
*de Sociologie* نامندہ کی اثرینک « دینک ماضیسی واستقبالی »  
 سرلوحہ سی فصلندہ واون دو قوزنجی عصر مجموعہ سندہ کی مقا-  
 لہ لرنده (۱۸۸۴) بواعتراضی شو صورتلہ جرح ایدیور :

اگر مقدمات دوغرو اولسہ ایدی ، نتیجہ دوغرو عد  
 اولونہ بیلیردی . فقط قارئلرمدن بر چوغنک احتمالکہ ظننہ مغایر  
 اولہرق ، دینلرک نشئت ایتدیکی مفہوم ابتدائیہ حقیقی  
 بر وقوف تخمی واردر . او ایلک تلکیدہ ولو کہ غایت خفیف  
 صورتدہ اولسون اوزاقدن اوزاغہ ادراک اولونان حقیقت شودر :  
 شعور دہ تجلی ایدن قدرت شعور خارجنده موجود اولان قدرتک  
 خصوصی شرائط آلتندہ مشاہدہ ایدلمش بر شکلندن عبارتدر .  
 ایلک حرکتمز بو قدرتی بعض حادثات طبیعیہنک بزہ اراہ  
 ایتدیکی کندی کندیمزک خیال مزایلہ قاریش دیر مقاولر . حالبو کہ  
 قاریش دیر مہ بر خطای مطلق دکلدر . چونکہ بزده بر قوت بولون دینی  
 وبونک کائناتدہ کی عمومی قوت ایلہ بر اولدینی دوغرو در . ابتدائی  
 فرضیہ مزک بر قضیہ فلسفیہ اولق ایچون کچیر مکہ مجبور اولدینی  
 تکامل اوفرضیہنک تمامیلہ وقطعی صورتدہ تحولنہ محتاج دکلدر .  
 اوفرضیہنک ایچندن الہی انسانہ بکڑہ تہجک صورتدہ کی اعتقادات  
 ابتدائیہ عائد قسمک چیقارلمسی کافیدر . بویلہ تصفیہ ایدلدکن

صوکره تسلیم ایده‌رز که شعورك خارجنده موجود اولان قوت شعور ایله طانیدیغمز قوته بکزه‌یه مز . مع مافیه بو ایکی قوتك عینی برشأیتك مختلف برطرزندن عبارت اولدیغنی ده تسلیم ایلرزه . ایشه « ناقابل ادراك » مسلکی هربرت سپنسرک کندیسی طرفندن بو صورتله تکامل نظریه‌سنه صریح صورتده ربط ایدلمشدر . آرتق فیلسوفك « اساسات اولین » نك تملی اولمق اوزره « ناقابل ادراك » حقنده ابتدا بر فصل یازمغه نیت ایتمه‌مش اولماسنك اهمیتی قالماز . « ناقابل ادراك » تکاملک روحیدر . چونکه وجود اساساً بر اولدیغنی ایچوندر که موجودات طبیعتك متقابلاً بر برلرینه توافق ایتسی اولنرك غایه‌سیدر و بو غایه قابل تأمیدر .

فقط ، هربرت سپنسرک ، دین حقنده معلوماته حریص اولان روحلره ویردیکی یکانه شیدن عبارت اولان بو ناقابل ادراك مسلکی بزدن مثبت ، حقیقی ، مؤثر و قابل ادراك بر دین امیدینی رفع و نزع ایتمه‌ک منتهی اولمایورمی ؟ ایکی مخالف اساس فلسفی آراسنده کی مناقشه‌دن آرتمش مجرد برطورطودن ، بوش بردستوردن عبارت قالمایورمی ؟

یقیندن باقیله‌حق اولورسه بو مسلک یکنظرده کوروندیکی قدر مجرد و بوش دکلدیر .

هربرت سپنسرک کوره بزى « ناقابل ادراك » ك ایچنه



ادخال ایدن شی - بوتون تصورات و تلقیاتمزك ، بوتون محاکمه لرمزك، بوتون تحلیل لرمزك، حتی الك قطعی رد وانكار لرمزك دوامی و ضروری تملی اولمق اوزره - شعوردر. اگر بویله ایسه هربرت سپنسرک مسلکنده بعض مثبت بر الهیات تخمیری بولونمق ایجاب ایده جکدر . فی الحقیقه ده بویله تخمیره تصادف اولونور .

ابتدا، سپنسرک رد وانكار لری آراسنده بارز بر ایده آلیم کندیسنی کوستیرر. «اساسات اولین» ك «قابل ادراك» ه تخصیص ایدلمش اولان ایکنجی قسمك باشلانغجی بر کوزدن کچیریلسون . اوراده کورولور که بزم بوتون فکر لرمزك - کرک عالم خارجی به یعنی غیرأنا به کرک عالم باطنی به عائد اولان فکر لرمزك - نقطه حرکتی منحصرأ بزم حالات شعور مزده در. بز ایکی دور لو حالت شعوره مالکز: بر قسمی قوتلی حالاتدر - که بونلره حس و ادراك perception دیرز - بر قسمی ضعیف حالاتدر: ملاحظه ، حافظه ، مخیله ، تفکر کبی . برنجی حالات آراسنده غیر قابل ازاله ارتباطلر واردر. بونلرک اظهار ایتدکلری مجهول قدرته غیرأنا non - ego نامنی ویریرز . ایکنجی حالات آراسنده قابل ازاله ارتباطلر واردر . بونلرک افاده ایتدکلری قدرته أنا ego قسمیه ایده رز. کورولیور که شعور ایکی طرفدن ده بیلکینك یکانه منشأیدر . شعور اوילה بر قانالدر که «نا قابل ادراك» ك تأثیری بزه نمایان اولابیلمك ایچون همه حال اورادن کچمکه

مجبور در. هربرت سپنسر غیر آنانک حادثاتی آنانک حادثاتی تعدیل  
ایده بیه جگرینی و بونک عکسی غیر ممکن اولدیغنی ایضاح ایتدیکی  
زمان بوندن مقصدی ایکی طرز شعوردن برینک دیکری اوزرنده  
بر تأثیر اجرا ایده بیه جگنی بیانن عبارتدر .

بوتون بیلکیلر مزی شعوردن چیقارماسی اعتباریله بومسلک،  
فکر جیدر (ایده آلیستدر) . «أنا» نك «مطلق» ایله اولان مناسبتنی بو  
طرز تعیننه کوره مسلک، کلیت اله panthéisme تمایلاتی کوستریر .  
« پسیقولوژی اساساتی » Principes de Psychologie نك  
مقدمه سنده او قودیغمزه کوره حالات شعوره مالک اولان برفردده  
دائمی صورتده پایدار اولان أنا ، ناقابل ادراکک بر قسمیدر .  
هربرت سپنسر باشقه بر طرفده بوتون اشیایه مصدر اولان ابدی  
قوتدن بحث ایتدیکی صیراده دییور که : « بزده شعور شکننده  
فیثقیران شی ده بو عینی قوتدر » . دیمک که أنا حد ذاتنده  
« مطلق » دکلسه بیه بزم ایچون « مطلق » در . بزم نظر مزده  
مطلقک اک بدیهی ، اک بلا واسطه افاده سیدر .

هربرت سپنسر ده ایلری کیدیور . دائره شعورک اوته  
طرفنده بولونان ، بزجه ایریشیله مین و « ناقابل ادراک »  
دنیلن اوحد ذاتنده « مطلق » ی عجبا سپنسر سادهجه ناقابل  
ادراک اولمق اوزرهمی تلقی ایدیور ؟ بونک روح می یاخود  
ماده می ، بر شخصیته مالک می یاخود غیر مالک می اولدیغنی  
هیچ بر وجهله بیه میز دیرمی عجبا ؟ هربرت سپنسر بوسؤالی

ایراد ایتیش و « اساسات اولین » ده شو جوابی ویرمشر :  
 « آغوستیسیزم [ یعنی « مطلق » ی ناقابل ادراک عد  
 ایتمه ] مفکره بشر ایچون اصل طور دیندارانه اولدینی حالد  
 بونی دینسزک ایله مترادف عد ایدنلر بوراده مسئلهی بر  
 شخصیت ایله اوشخصیتک دوننده برشکل موجودیت آراسنده  
 موضوع کی ظن ایتدکلرندن دولایی بو خطایه دوشیورلر .  
 مطلقک برشخص صفتیه ناقابل ادراک اولدینی سویله مک اونلرک  
 فکرنبه مطلق موجود ایسه بیله برشخصدن آشاغیدر دیمک  
 اولور . فقط بویله بر مسئله بر شخصیت ایله اوشخصیته فائق  
 دیگر برشی آراسنده موضوع بحث اولابیلیر . فی الحقیقه ، ذکا  
 ایله اراده میخانیکی حرکته نسبتله ناصل عالی ایسه لر ذکا ایله  
 ارادهیه نسبتله او قدر عالی عد اولونه بیله جک باشقه بر طرز  
 وجود اولامازی ؟ »

هربرت سپنسرک بو فکری پاسقالک شو مشهور حکمتنده  
 تصویر ایدلدیکی وجهله اجسام ، ارواح و عشق دیه ارائه ایتدیکی  
 اوچ ترتیبی تخطر ایتدیرمیورمی : « اجسام ایله ارواح  
 آراسنده کی نامتناهی مسافه ارواحک رحم و شفقت اولان نامتناهی  
 کره نامتناهی مسافه سنی ارائه ایدر » . ناقابل ادراک فیلسوفنک  
 مسلکی بونقطه ده تصوفه وروحیجیلکه برتمایل ارائه ایتمیورمی ؟

بو فکرلرک هربرت سپنسر نظرنده حقیقی بر اهمیت حائز

اولدینی واونجه پك معزز عد ایدلدیکی بوتون حیاتیله ثابتدر .  
 دینك نمایان اولدینی عنعنات ، عقائد ، آیین ، مؤسسات  
 کبی شکللدن هر برت سپنسر متفر اولمقه برابر شکلی اساس  
 ایله قاریشدرمقدن هر وقت توقی ایتشدردر . ایچنده دین روحك  
 بولونمادینی اوباطل فکرلری ، عبادتلری سپنسر هپ حقیقت  
 دینیه نامنه رد ایتشدردر .

بوتون حیاتیجه ، هرشیدن اول حسیات اوزرینه مؤسس  
 اولسهلرده ، بعض اعتقاداتك — بونلرك الهیاتدن زیاده اخلاقی  
 و عملی بر وصفلری اومالاری اعتباریله — مشروعتلرینی قبول  
 ایتشدردر . لایموتلغه واجر عقبایه اعتقاددن هر وقت کمال حرمتله  
 بحث ایلوردی . دیوردی که : « شوراسی دائماً محتاج اخطار  
 بر حقیقتدر که بوقدر چوق مصائبك بزه هجوم ایتدیکی ، بزی  
 مضطرب ایتدیکی شودنیاده باشقه ودها ای برعالمده نائل مکافات  
 اولق اعتقادی انسانلره بعض مصائبه قاتلانمق قوتی ویریر .  
 حالبوکه انسانلر یالکز مثبت بیلکیلرله قالسهلر ایدی بونلره  
 تحمل ایده مزلردی . »

تفکر و ملاحظاتی انکشاف ایتدکجه هر برت سپنسر ده  
 لاقید اولق شویله دورسون ، دینی شیلره قارشى دها دقتکار  
 اولدی ، اونلرك بویوکلکلرینی و حیات بشرده ایفا ایتدکلری  
 وظیفه یی دها تقدیر ایله تسلیم ایتدی . تفکرات فلسفیهك ترقیسنی  
 تصویر ایتدیکی صیراده نامتناهی فضا مفهومنی شوتعبیر ایله بیلدیرر :

« صوکره ، بوعومی ظرف Matrice فکری کلیر . بو ، هر دورلو تکاملدن ، هر دورلو خلق و ایجاددن مقدم ایدی ، وسعت و دوام اعتباریله تکاملی ده ، خلق و ایجاددی ده نامتناهی درجه ده کچوردی . چونکه کرک تکامل کرک خلق و ایجاد قابل ادراک اولایلیمک ایچون برمبداءه مالک اولمق اوزره دوشونلک ایجاب ایدر . حالبوکه فضا ایچون مبداء یوقدر . فضا اوילה چیلاق بروارلقدیر که هانکی استقامتده قطع ایدیلیر سه ایدیلسون مفکره نك واصل اولدینی حدوددن اوتده داءماً قطع اولونان قسمه نسبتله اعظم نامتناهی درجه ده بویوک دها قطع ایدلمه مش قسملر قالیر . شو بزم بوتون کائئاتمزک ، ایچنده آنجق برنقطه کبی دوردینی بوفضا فکری مفکره بشری عادتا ازدیکی ایچون اوزرنده پک اصرار ایدیله مز . سم ترقی ایتدکجه فضای نامتناهینک هیچ برمبداء ، هیچ برسبب اولمقسزین داءماً موجود اولدینی و داءماً موجود اوله جنی شعوری بکا اوילה هیجان ویریور که دهشتدن تیتیره یورم . »

بو صحیفه لری اوقوینجه پاسقالک شو دوشونجه لری خاطره کلیور : « رؤیتمز اوراده توقف ایدیور سه مخیله مز دها ایلری یه دوغرو کیتسون . اوتصور و تلقیدن یورولور ، فقط طبیعت اونک اوکنه کنیش ساحه لر آچقدن خالی قالماز . بوتون بو عالم مرئی طبیعتک سینئه وسعتنده غیر محسوس درجه ده کوچوک برنقطه دن عبارتدر . »

هربرت سپنسرده کیتدکجه نمایان اولان شی یالکز مجرد  
 و فلسفی شکلی آلتنده بر فکر دینی دکلدر . عقاید و مؤسسانه  
 یعنی دینک مادی شکلرینه قارشی کوستر دیک شتدن بر قسمنک  
 مرور زمان ایله اورته دن قالمش اولدیغنی ده صاقلاماز . تقدیر  
 و مطالعاندکی بوتحول اونک حیاتنده اوقدر موقع طوتمشدر که  
 کندی ترجمه حاله عائد کتابک خاتمه سنی تشکیل ایدن ملاحظاته  
 اونی موضوع اتخاذ ایدر . واصل اولدیغنی نتیجه نک خلاصه سی  
 شودر :

دینی مؤسسeler حقنده کی افکار مده حصوله کلن مهم  
 تعدیلاتک اوج سببی واردر .

برنجی سبب سوسیولوژی حقنده کی تدقیقاتمدن حیقدی .  
 بوتدقیقات نتیجه سنده قبوله مجبور اولدم که هر یرده و هر زمان ،  
 حیات حقیقه ده انسانلرک خط حرکتلی اوزرینه الهیاته  
 عائد تمثاللرک و پاپاسلرک تأثیراتی غایت الزم ایدی . بوندن صرف  
 نظر اولونا مازدی . فعلیاتده فردلرک هیئت اجتماعییه قارشی  
 کوستر مه لری الزم اولان انقیاد آنجق یکلیسا مؤسساتی سایه سنده  
 ادامه و تأمین ایدیله بيلمشدر .

ثانیاً ، کوردم که انسانلرک لفظی و اعتباری اعتقادلریله  
 حقیقی اعتقادلرینی بر برندن آییرمق ایجاب ایدیور . اعتباری  
 اعتقادلر آزچوق هیچد کیشمه دن قاله بیلیرلر . فقط حقیقی اعتقادلر  
 فعلیاتده جمعیات بشریه نک و فردلرک یکی احتیاجلرینه و مطالبه لرینه



غير محسوس صورتده توافق ايديورلر ، دكيشورلر . حالبوكه اصل مهم اولانلر اعتباري اعتقادلردن زياده بو حقيقي اعتقادلردر . بونك ايجوندركه شيمدي انسانلرك اعتقادلرينه صورت عموميه ده حرمت ايتمك ، دوقونماق عاقلانه اوله جغني و كرك مؤسسات سياسيەنك كرك مؤسسات دينيهنك تبدل ناكهانيسي بالضروره برعكس عمل توليد ايدە جگني دوشونبورم .

فقط بلكه فكرمك دكيشمه سنك اك باشلي سبي روحده اعتقادات دينيهنك اشغال ايتديكي ساحەنك بوش قالامايه جغنه و كرك كنديمزە كرك كائناته دائر دائما برطاقم سؤاللرك ايجمزدە جانلانه جغنه دائر بنده كيتدكجه دها درينلشمك اوزره پيدا اولان قناعتدر .

منور وغير منور مفكرەلرك همان عمومندە بوجهتلره دائر بر دوشونجه موجود اولماديغني كورييورز . بر چوق كيمسه لر منافع ماديەي و اشيا نك جهت خارجيه سني تجاوز ايدن شيلره قارشى غايت لاقيد داورانيورلر . بيكلرجه آدم وار كه هر كون كونشك طلوع و غروب ايتديكني كوردكلري حالده كونشك نه اولديغني مراق بيله ايتيورلر . دارالفنون مدرسلري وار كه اونلرك نظرندە فرضاً علم السنه يه عائد تنقيدات صوك درجەده حائز اهميت اولديغني حالده ذي حيات موجوداتك منشاء و طبيعتلري حقندە كي تحريات غايت عادى برشيدر . حتى ارباب علم آراسندە بيله كهكشانلرك طيفلريني كمال دقتله مطالعه ايتدكلري و چيفت بيلديزلرك كتله و حركتلريني حساب ايلدكلري حالده كوزلري

اوکنده کی وقایع عظیمه یی حکمت طبعیه نقطه نظرندن باشقه  
 بر نقطه نظرندن بر دفعه بیله دوشونمه نلر کورولمکده در .  
 مع مافیه انسانلر بو خط حرکتدن باشقه بر خط حرکت تعقیب  
 ایده مز دکلدرلر . کرک منور کرک غیر منور مفکره لرده  
 آرا صیرا تفکر و ملاحظه دوره لری ده واردر . هیچ اولمازسه  
 بر قاج کشی مفکره لرده حس ایتدکلری بوشلنی دولدر مق  
 ایچون باصمه قالب دستورلره مراجعت ایدیورلر ، جوابدن  
 عاجز قالدکلری صوک درجه ده مهم بعض مسائلک موجودیتنی  
 آکلایورلر . بومسائلی تنویر احتیاجنی آزشی بیلنلردن زیاده  
 چوق شی بیلنلر ده افضله حس ایدیورلر . »

هربرت سپنسر حیاته ده ، تکامل موجوداته ده ، شعورده ،  
 مقدرات بشرده مکنوزاولان اسراری اشارت ایتدکن و ترقی  
 علم ایله بو اسرارک ده ا کوزه چارپه جق بر حاله کلدیکنی ده  
 درین ، ده ا قابل نفوذ بر حاله کوروندیکنی سویلدکن صوکره  
 مطالعاتنی شو سوزلرله نتیجه لندیریور :

« روحک عقلی صورته ده تفسیر موجودات ایله بوشلنی  
 دولدیر یلامیه جق اولان ساحه سنی ناصل اولسه اشغال ایدن  
 اعتقادات دینه بکا مشترک بر احتیاج حسی اوزرینه مؤسس  
 بر محبت الهام ایتدی . آکلادم که بو اعتقادلردن بنی اوزاقلاشدیران  
 شی اوعرض اولونان چاره حللری قبول ایتمه نک عدم امکانیه  
 برابر عین زمانده حقیقی چاره حللر اله ایتک ایچون ناقابل  
 مقاومت بر آرزودن عبارت ایدی . »

هربرت سېنسرك مسلكنك قيمتي

هربرت سېنسرك مسلكنك معناسي بو ايسه عجا قيمتي  
نه دن عبارتدر ؟

قطعي پوزيتيويست مكتبه منسوب اولان معاصر فيلسوفلردن  
برچوغلنك فكرينه كوره هربرت سېنسرك فلسفه سنك دينه  
دوغرو توجه ايتديكي محققدرد . اونك « ناقابل ادراك » نده  
موجود دينلرك خالق و غفور اللهني كورمك حقيقت تاريخيه  
تماميله موافقدرد . فقط مسلكك ضعيف و چوروك جهتي ده اصل  
بوراسيدرد . تنقيدك وظيفه سي بوني تميز و برطرف ايتكدرد .  
بوفيلسوفلرك فكرنجه ، حقيقتده هربرت سېنسرك « ناقابل  
ادراك » ي براساس علمي دكلدرد . من القديم الله ياخود سبب  
اولين نامي آلتده دينلرك و مابعد الطبيعه بك تمنني تشكيل ايدن  
او خيالي جوهر مجردك صوك بقاياسندن ، طورطوسندن عبارتدرد .  
فقط قابل اهمال بر بقيه دكلدرد . چونكه ظاهر آيك ضعيف و خفيف  
كورونمكله برابر ، مابعد الطبيعه ده و دينلرده موجود اولانك اساسلي  
نقطه يي احتوا ايدركه بوده انسان ايچون موضوع تملك و تصورات  
اولق اوزره « ناقابل وصول » دن عبارتدرد . هربرت سېنسرك  
قيود احتياطييه سي ورد و انكارلري حقيقتده خيالي شيلردرد .  
او خطاي ابتدائي بردوام اولدجه بوتون فلسفه چوروكدر .  
سرايت منبعي دوردجه خسته لق اويانلق ايچون يالكز بر فرصت

بکھر وفرستی بولونجه یکیدن بدنی قاپلار . هربرت سڤنسرک برالهیات منتسبی اوله رق قالدیغی پک دوغرودر . بو اعتبار ایله ماضیه عائد برمتفکردد . اونک « ناقابل ادراک » ی عقل بشرک دفع و طرد ایتدیکی خیالتلرک یانه ، عدم آباءه کیتملیدر . مجهولدن یعنی بوکون بیلمه دیکمز فقط احتمالکه یارین واقف اولابیله جکمز شیدن باشقه بر « ناقابل ادراک » یوقدر .

منبعی تکامل نظریه سنک ایچنده بولونان بواعتراض هربرت سڤنسرجه بالطبع مجهول دکلدی . احتمالکه اونک قدر هیچ کیمسه دونکی حقیقتک بوکون خطا موقعه دوشدیکنی کورمکه آلیشمامشدی . فقط انسانلرک اعتقادلرینک احتمال دائره سنده اولان تحوللری ایچون برحد قبول ایدردی . هربرت سڤنسره کوره بعض قضایانک ضدینی دوشونمکده کی عدم امکان ، مفکره یه اوقضایای قبول ایتک مجبوریتنی تحمیل ایدردی . « برقضیه نک اک یوکسک درجه قطعی حائز اولدیغی اونک انکاری ذهنه صیغما مقله آکلارز » دیردی . ایشته هربرت سڤنسر ناقابل ادراک قارشیسنده بویه برموقعده قالیور ، اونی انکار ایتیه یی ذهن آلاماز عد ایلوردی . بناء علیه ، اونک نظرنده « ناقابل ادراک » بزم بالذات تشکلات دماغیه مز طرفدن بیلدیرلمش برحقیقتدر .

هربرت سڤنسرک حس ایتدیکی عدم امکان عجبا مخیله سنک برذهاب باطلندن ، مفکره سنک برعطالتندن ، فردی مزاجنک

بر تأثیرندن می عبارتدر ؟ شایان دقتدر که یالکز لوترده ، قاننده  
دکل برچوق معاصر متفکرلرده ده عینی حالی ، نفی و انکاره  
قارشی عینی ناقابل اقتحام مقاومتی کوریرز . فرضا معلم ویلیام  
جهیمس « تجربه دینهك انواعی » The varieties of religious experiences  
عنوانیه مشهور اثرینی شو صورتله  
نهایتندیریور :

« شبه یوق که بنده متعصب بر علم طرفداری کبی وضعیت  
آلیر ، عالم احتیاسدن ، علمی موضوعلردن و قوانیدن باشقه  
بروارلق اولمادیغنه اینانیر کورونه بیلیرم . فقط نه وقت بوخولیا به  
دوشه جك اولورسم ایچمدن برسسك قولانغه بوش ! دیه  
هایقیردیغنی دویارم . برصاچه یه علم نامی ویریلسه ده یه صاحبه در .  
حالبو که تجربه بشریهك صوك یکوننی او ذی حیات شائیتیه پیش  
ملاحظه یه آلیرسم بنی اصل علمك دار دائره سی خارجه  
چیقمنه مقاومتسوز بر صورتده سوق ایدر . هیچ شبه یوقدر که  
عالم حقیقی علمك قبول ایتدیکنك غیری رطرزده ، غایت مغلق  
ومشوش بر صورتده تشکل ایتشددر . ایشته بو صورتله هم  
سوثره کتیف هم اوثرقتیف بر طاقم اسباب شوراده افاده ایتدیکم  
اعتقاده مربوط طوتیور . هیمزك کندی زواللی کوچوک  
اعتقادلرسزه صداقتمزك بویوک وظیفه لرینی دها مؤثر صورتده  
ایفا ایچون اللهه یاردم ایتدیکنی کیم بیلیر ؟ »

علمك كندی كندیسنه و بزه کافی كله جكنی قبول ایدمه مه مك  
مجبوریتنی شبهه یوق كه یالكز هر برت سپنسر حس ایتمه مشدر .  
فقط دنیه بیلیر كه بو، پسیقو لوزی نقطه نظرندن قابل ایضاح  
بر حادته در واو كا بر اهمیت عطف ایتك غیر قابلدر . عقل ایله  
مخیله نك مناسبتلرینی بر قانون اداره ایدر . مشهور انكلیز اخلاق یونندن  
لسلی سته فن Leslie Stephen بو قانونی شو صورتله افاده ایدر :  
«مخیله عقلدن the imagination lags behind the reason  
کری قالیر . «عقل بر فکرک ساخته لکنی اثبات ایتدیکی حالد  
بو فکره مربوط اولان مخیله ایله قلب آزچوق اوزون بر مدت  
دها او فکرده ثبات ایدر لر . فی الحقیقه بونلرک تکامللری داخلی  
بر سیه مربوطدر که بو بردن بره وقوعه كله مزسه ده هر حالد  
بهمه حال وقوعه کلیر . چونکه شعورک کندی کندیسیله هم  
آهنک بر حاله کله سی اک یوکسک بر قانوندر . قارشی قارشی به  
بولونان ایکی قوتدن دیکشمه به جک اولانی ایسه عقلدر .

قوت یا خود هر برت سپنسر طرفندن غیر ممکن دینلن شیک  
سته فن طرفندن در میان ایدیلن قانوندن باشقه برسبی اولمادیغی ،  
واقعا اونلرک بو غیر ممکن دیه حکم ویرمه لری پک صمیمی ، پک  
حقیقی ایسه ده عقل بشرک ترقیسی قارشیسنده اورته دن قالقه جنی  
شهر سزدر ، دنیلور .

بو حکم دوغرو میدر ؟

اولا دوشونوله جک نقطه بو طرز محاکمه بدائرة فاسده بی



تضمن ایدیورمی، هربرت سپنسرک اورتیه قویدیغی مسئله نك  
انکاری صورتده حلنی بدیهی، محقق دیه تلقی ایدیورمی ایتیمورمی؟  
جهتیدر. هربرت سپنسر دینلرده کی غنغوی بعض عناصرک  
ردی دینلرک اساسنکده ردینی ایجاب ایدرمی دیه دوشونور.  
کندیسنه ویریلن جواب ایسه شودر: دینلر ذروه دن قاعده یه  
قدر، حتی اساسات اولینلرینه وارنجه یه قدر خراب برطاقم  
مبایندن عبارت اولدقلری ایچون باشند آشاغی اونلری تخریب  
ایتمک، حتی خرابه لرینی بیله اورتیه دن قالدیرمق لازمدر.  
هر اعتقاد دینی ایسه هر جهتجه بوش و برذهاب باطله مستند  
اولدیغندن اونلرده ای و دوغرو برشی آرا مقده کی اصرارخیله نك  
وحسیاتک ترقیات عقلیه یی تعقیبه کی بطائتدن باشقه رسیدن  
نشئت ایتمز. حالوکه بویله بر جواب بر دلیل دکلدر. بر ادعانک، بر  
نظریه نك قارشیدنه باشقه بر ادعا، باشقه بر نقطه نظر چیقارمق دیمکدر.  
برده، سپنسرک ادعا ایتدیکی عدم امکانک یالکز حسیاتدن  
انبعاث ایتدیکی، هیچ عقل اوزرینه استناد ایتدیکی دوغرو میدر؟  
واقعا شبهه یوقدرکه سپنسر فلسفی مسلک لرنده وبالخاصه عملی  
مسلک لرنده حسیاته بویوک بر حصه آیرمشددر. بر چوق انکلز  
کبی اوده عقلی، فعل و حرکت ایچون بر پرنسپ اولمقدن زیاده  
بر آلت اولارق تلقی ایتمش و روحی حرکت کتیره بیلیمک قوتی  
حسیاته ویرمشددر. فقط بوندن « ناقابل ادراک » حقه ده کی  
نظریه سنک منحصرأ حسیات اوزرینه ابتنا ایتسی لازم کلز.

سپنسرک سرد ايتديكى وقوف نظريه سنك تملى اك صاف  
 وخالص بيلكى ايله اك عادى وعاميانه مفهوم لك قطعياً بربرلرينك  
 عىنى اولماسى كيفيتدر . عادى و عاميانه مفهوم لك حسيات  
 ايله عقلك برخليطه سندن عبارت اولدينى ايچون هر برت سپنسر  
 نظر نده هر دور لو وقوفك بالضروره بوايكى عصرى احتوا ايتسى  
 لازم كلديكى محققدر . اوايكى عنصر آنجق منطقى برتجريد ايله  
 بربرندن آيرىلا بيلير . قطعيتك صوك تملى نه اولدينى مسئله سى  
 اورته يه قونلدينى زمان هر برت سپنسر ايچون بوكا ويريله جك  
 آنجق بر جواب واردر . اوده قطعيتك كرك علمده كرك  
 مافوق الطبيعه ده هپ حسيات ، حقيقه طبعى وغير قابل ضبط  
 حسيات اوزرينه استناد ايتمكده اولديغيدر .

عقلى يالكز منطقى بر محاكمه وجدل مرتبه سنه ايندير مدجكه  
 و عصرى پسيقولوژينك ييقمق ايچون اوقدر زحمت چكديكى  
 روح بشرده كى بوله يى تكرار تأسيس و بنا ايتمه دجكه عقل ايله  
 حسك قطعى صورته بربرلرندن آيرىلامايه جغنى هر برت سپنسر  
 ايله برابر ادعا ايتك دوغرو كى كورونور . جانلى ، مؤثر ،  
 معين عقل روح بشرك غير متحول ، ابدى بر وصف منفردى  
 دكلدر . عقل وجود بولور ، كماله كلير ، تشكىل ايدر ، يوكسه لير .  
 ده قارتك تقدير ايتديكى وجهله ، عقل بر طاقم حقيقتلرله بسله نهرك  
 تنور ايدر . علم ايله حيات اونك ايچون چيفته مكبتدر . عقل ،  
 انسانك تجربه ، حس ، مخيله ، آرزو ، اراده كى بوتون

قدرت‌ترینک انکشافیه تولد ایدن اک متین ، اک مفید ، اک انسانی ، اک یوکسک شیئی تنظیم ، ترتیب و بر درجه به قدر تثبیت ایدر . بوندن دولایی نظریه ده اولدیغی کبی عملیاتده بزم اک یوکسک رهبرمز اولمغه لیاقت کسب ایلر .

هیچ شبهه یوق که هربرت سپنسر « ناقابل ادراک » ی انسانک انکار ایتمی قابل اولوب اولمادیغی دوشونورکن بومعناده آکلاشیلان عقله مراجعت ایتشدیر ، یوقسه مجرد بر عقلیه مسلکی طرفدن تحیل ایدیلن جامد ، کور ، آیری بر حسه دکل . هربرت سپنسرک فکر نجه ، حادثه نك کندی کندیسنه کفایت ایتدیکنی ، علمک بوتون اسراری ازاله ایده بیله جکنی و ایتمی لازم کلدیکنی ادعا ایتک تام معناسیله غیر منطقی اولماسه بیله عقله مغایر ، غیر قابل تفکر برشیدر . انسان بیلدبکی یاخود بیله بیله جکی شیرله تکمیل وجود و مکملیتی او کره نوب ختم ایتمش اولدیغی قبوله راضی اولابیلیمسی ایچون اک یوکسک ملکاتندن ، هپسندن زیاده کندیسنی انسان مرتبه سنه چیقاران ملکاتندن مجرد ایتلیدر . بناء علیه هربرت سپنسری ، علمک موضوعی اولان معلوم دنیا قارشیسنده دینک موضوعی اولان مافوق حسی بر شأنت ادعا و قبول ایدرک متناقض سوز سویله مش اولدیغندن دولایی مؤاخذه ایله مک و سوزده بوتضادی ایضاح ایتک ایچون بقایا حالنده بعض عضول و بیولوژی نقطه نظرندن آرته قالمه لر *Survival of the fittest* نظریه سنه مراجعت ایتک بهوده در . بوتضادک اورته دن

قالقماسی ایچون هربرت سپنسرک ساده و خالص علم اوزرینه  
دکل عقلک تفسیر ایتدیکی علم اوزرینه استناد ایتمش اولسی  
کافیدر . چونکه تماس اشیا ایله وجوده کلدیکی طرزده عقل بشرک  
کندنده ، تجربه نك بزه بیلدیره بيله جکی بوتون شیلره فائق ،  
غیر مرئی برشأیت قناعتی محکوکدر .

\*  
\*\*

فقط هربرت سپنسرک بو « مافوق حسی » شیئی غایت  
علویدر و ایریشلمسی غیر قابلدر . ایشته بوکا « ناقابل ادراک »  
اسمنی ویریر . بونی معین بر صورتده ذهنزده تصور ایتمکدن  
بزی منع ایلر . سبب اولینک غیر قابل ادراک اولدینی سوبله نمک  
و موجودیتی یالکز ساده جه بیان اولمق ایله اکتفا ایدلیوبده  
دها ایلری به واريله حق اولورسه غیر قابل حل بر طاقم تضادله  
دوشواه جکنی ، انسانک نه سوبله دیکنی کنديسنکده فرق ایتمه .  
یه جکنی بزه تأمین ایدر . مسلکینک قابل اعتراض نقطه سی ایشته  
بلکه بوراده در .

استنتاج صورتيله هربرت سپنسر اساس اولینک ناقابل ادراک  
اولدیغنه و غایت یوکسک و علوی بولوندیغنه و اصل اولدینی حالد  
حقیقتده کنديسنک بوفکری صورت مطلقده محافظه ایده مدیکی  
دفعات ایله کوزه چارپار . اونک « مطلق » ی قوتدر ، قدرتدر ،  
فعالیتدر ، نامتاهیدر ، منشأ شعوردر ، انا ایله غیر امانک زمین  
مشرکیدر ، ذکانک ، شخصیتک فوقنده در . بو قدر تأییدادن

صوکره اونک آرتق تماميله ناقابل ادراك اولديغی ادعا ایديله -  
 بیلیرمی ؟ هربرت سپنسرک « ناقابل ادراك » ه عطف ایتکدن  
 قورقادیغی اوصاف صحیح ايسه بو وقوف مقدماتك بر ترقیه  
 وانكشافه قابیلی اولمادقلری محقמידر ؟

هربرت سپنسرک ناقابل ادراك ادعاسنك قیمتی تقدیر ایده -  
 بيلمك ایچون ، استناد ایتدیکی اساسی تدقیق ایتك لازم کلیر .  
 بو اساس ايسه او بثره قیفلکدر . هربرت سپنسر هر علمك ،  
 هر دورلو فعلی و حقیقی وقوفك شرطی منحصرأ او بثره کتیف  
 بر اصولك استعمالندن عبارت اولماسنی ایستر . بر طاقم وقعه لر :  
 ایشته یکانه منبع وقوف . بزدن خارج برشی اولمق اوزره حس  
 وادراك اولونان یاخود اولونه بیلن ، شخص واقفك قارشيسنه  
 خارجی برشی کی وضع ایديله بیلن ؛ تام ، ثابت ، آیری بر جوهر  
 مجرد کی معلوم اوله بیلن ؛ بر مفهوم و بر کله ايله دوغرو  
 صورتده قابل افاده اولان شیئه « وقعه » دینیر .

وقوف نظریه سی بر کره قبول اولونورسه بوندن بالضروره  
 استنتاج اولونه جق شی اکر « مافوق حس » برشی وارسه بونک  
 ناقابل ادراك اوله جنی کیفیتدر . چونکه بدیهیدر که باشقه بر طاقم  
 پارچه لرک یاننده بر وجود پارچه سی او بثره قیفجیلک قبول  
 ایتدیکی معناده ، بر « شی » دکلدر . اونکله بو صورتله تصور  
 ایدیلن عالم علم آراسنده هیچ بر اتصال و رابطه یوقدر . اکر  
 مافوق حس برشی وار ايسه بوشلق ایچنده ، بزم وسائط

وقوفزك يتيشه ميه جكي نامتناهي بر مسافه ده اولماسي ايجاب ايدر .  
 بويله او بژه قتي ف علم طرفدارلري كندی فكر لريله تضاده  
 دوشمه مك ايچون شوني قبول ايتمك مجبور يتنده در لر كه « مطلق »  
 يا يوقدر يا خود وارسه دنيا نك خار جنده در . عالم علويه در .

شيمدی مسئله بويله مطلق بر او بژه قتي ف جيلكك قابل و مشروع  
 بر نقطه نظر اولوب اولمايه جفني بيلمكده در . شبهه سز كه او بژه -  
 قتي ف جيلك نقطه نظرينك امكاني علمك مصدره سيدر . بو نقطه  
 نظردن علم ، طبيعتدن بر برلرينك ياننه ديزه بيله جك ، مقايسه  
 ايده بيله جك ، اوست اوسته قوي اچق ، بر برلريله قارشيلاشدير اچق ،  
 بر برلرينه بکزه ته جك صورته بر طاقم صريح و کوز لجه حدودی  
 معين خيال لر کسر . واصل اولق ايسته ديكي تام او بژه قتي فلك  
 علم ايچون قابل تأمين ميدر ؟ ذاتاً علمك كنديسي ، بوتون انساني  
 شيلركي ، ممكن ايله مفكوره آراسنده براوزلاشمه دن عبارت  
 دكليدر ؟ علم هيچ بر زمان سو بژه كتي ف عناصر دن تمايله تطهير  
 ايدلمش معلومات ، مادی صورته افاده لري حسياتدن بعض  
 شيلر استعاره ايدلديكني تضمن ايمه ين نتايج اله ايده بيلمشميدر ؟  
 رياضيه و حکمت طبيعيه تعلق ايدن علملرده مفكره بشر  
 بعض كره مكمل بر او بژه كتي فلكه واصل اولدم ذهاني ويره جك  
 درجه ده بوكا تقرب ايتشمسه بر صنف معلومات ايچنده موفقيت  
 تأمين ايدن شينك ديكر لري ايچنده ده قابل و موافق اولاجفنه  
 حكم ايتمك مي لازم كلير ؟ نه دن بوتون علملر عيني نمونه اوزرينه



انشا ایدیه جکلی و نه دن بو نمونه ضرورت حکمیه و ماده دن عبارت اوله حق ؟ بر استقرايه اساس تشکیل ایتک ایچون یالکز بر حال ، یالکز بروقه کافیمیدر ؟ مفکره بشر کندی تلقیرینی حقیقت اشیایه اویدور مق مجبوریتنده در ، یوقسه شائیتلری کندی تلقیرینه اویدور مغه قالماز . علم نه دن بوقاعده یه استنا تشکیل ایده جک ؟ نه دن علمده اصول موضوعه توافق ایتیه جک ؟

علوم حکمیه ده سو بره کتیف اصولک استعمالی حقیقه بر طرف ایدلمش اولدینی یا خود تمامیه بر طرف ایدیه بیله جکی بدیهی بر کیفیت دکدر . فقط معنوی شیره تعلق ایدن علملرک صرف او بر قتیف بر اصوله تبعیه مجبور قالدقیری تقدیرده نه قدر فقیر لسه جکلی و دیکشه جکلی پک واضح صورتده کورولور . حادثات دینه نک کندی لرینه خاص اوصافی بو اصول ایله ناصل آ کلاشیله بیلیر ؟ یالکز خارجدن باقینجه حادثات دینه فردلرده بر طاقم عصبی حادثه لره ، هیئت اجتماعیه ده ایسه بر طاقم عقاید ، آیین و مؤسسات مجموعه سنه ارجاع و تنزیل اولونه بیلیر . بونلری ایضاح ایچون حیات روزمره دن استعاره ایدلمش ابتدائی بر حادثیه ، فرضا « اش » ک دوامی و بقاسی حقنده کی صافدلانه بر اعتقاده مراجعته انسان پک میال بولونور . فقط حقیقی دینلرده ، بو قدر دوره لر ایچنده انکشاف ایدن سلسله ادیانده ، شیمدی آرامزده موجود اولدینی شکلده کی دینده یالکز بوقیل غصهرلر ، خارجی ،

قابل تجرید، قابل اراده و مساحه حادثه لرمی وارد در؟ بر بودینک ،  
بر خرستیانک اوقدر شدید ، درین وزنکین حیات باطنیه سی  
بر هیچ می عد اولونه جقدر ؟ تصوف حیات دینه نك بر شکلی  
دکلیدر؟ پروتستانلغك هیچ قیمتی یوقیدر؟ شکسپیه رك شومشهور  
یتنی بوراده تکرار ایتك پك یرنده صایله مازمی :

There are more things in heaven and earth, Horatis,  
Than are dreamt of in your philosophy

( هاملت : هوراتیو، کوکده ویریوزنده سزك فلسفه کزده  
خولیا ایتدی ککزدن دها چوق فضله شیلر واردر )

دبن ، هربرت سپنسر ك نسبی ایله مطلق ، نامتناهی ایله تام  
آراسنده تصور ایتدی کی اك اعلا رابطه اتصال کبی کورونور .  
بوعینی زمانده سوثر کتیف حیاتی ووقوفی مکملیه دوغروسوق  
ایتمك وانکشاف ایتدی رمك اولدینی کبی عینی زمانده خارجی ،  
محدود ، غیر محقق وجودك بوتون وجودلرك منبع مشترکی ایله  
برلشمه سی حسیدرکه ، هربرت سپنسر ك دیدیکی کبی ، دوغرودن  
دوغرویه فیشقیریر وشعور دیدیکمزشی بدرجه یه قدر کندیسنی  
بزّه بللی ایدر .

حقیقته شخص sujet ایله شی objet جدا آیرلماش اولد-  
قلری ایچون اوثر قتیفجیلک ایله اکتفا ایده میز . برشی آیری  
بر صورتده ، یالکزباشنه قاو رایه بیلیمك ایچون بر مسئله نك شرائطنده  
ریاضیونك یابد قلری کبی اونلری صنعی صورتده آیرمق لازمدر .

طبیعتك بزه کوستردیکی شکله . وار اولدقلری شکله شی ایله  
 شخص هپ بردر . مفکره بشر اشیا ایله مناسبتده بولونه بيلمك  
 ایچون برچوق تجریدات یاپار . موجوداتی برطاقم مفهوملره تزیل  
 و بونلرده خلاصه ایدر و بونلرك قسم اعظمه عقل اُردیرمز .  
 ایشته دین حیاتك ، روحك وارلغك و بزم ادر ا کمرده ده موقریتك  
 ذره لری کبی یکدیگری میخانیکی بر صورتده ایتورلر مش کبی  
 کورون برطاقم موجودات ایله اولان مناسبتك کیزی بر  
 شعورندن عبارتدر .

بونك ایچوندر که دین ساده جه علوی بر « ناقابل ادراك » ك  
 وجودینی تصدیق ایله اوکا صافیانه بر پرستشدن عبارت قاله ماز .  
 مفرط طبیعیونك بحق مؤاخذه ایتدکلری وجهه هر برت سپنسر  
 بزه یا پك چوق یا پك آز ویریور . اکر او کوست قونتك  
 « انسانیت » ی - انسان اصل ولی اعتباریله کندی کندیسنی  
 تجاوز ایدن بر مخلوق اولدینی جهته - ناتمام و غیر ثابت بر تلق ایسه  
 هر برت سپنسر ك یابدینی کبی انسانلری هر شیئه مصدر اولان وجودك  
 قارشینه قویوبده صوکره اونلره او وجوددن هیچ برشی  
 بیله میه جکلرینی ، هیچ برشی بکله میه جکلرینی سویله مك ده  
 اولویتله هیچ دوغرو اولماز .

یوقاریده هر برت سپنسر دن نقل ایتدی کمز شوجه تخطر  
 ایدیلسون : « ذکا ایله اراده ، میخانیکی حرکته نسبتله ناصل  
 عالی ایسه لر ذکا ایله اراده یه نسبتله او قدر عالی عد اولونه بیله جك  
 باشقه بر طرز وجود اولامازی ؟ »

بوسؤالی وضع ایتمک او حدی تجاوز ایدهرک ایلری به کیتمک  
دیمکدر . بویله بر طرز وجودک امکانی دوشونوله بیلورسه  
بونک یالکیز قابل دکل بلکه حقیقه وار اولماسنی ایسته مه مک  
ناصل الدن کلیر ؟ بو احتمالک ساحه حقیقه ایضالی چاره لری  
ناصل اولورده آرانماز ؟ عقل بشر ، اراده بشر غایه کماله برسیا  
ویرمک واونی دنیا مزه و حیات مزه ایندیرمک ایچون صرف  
ایتدی کمز غیرتدن وسعیدن باشقه نه در ؟ هر برت سپنسرک بوسوزلرینک  
متمم طبیعی و ضروری شی شوروچه جمله دکلیدر : « سنک دورک  
و حکمک کلسون ! آرزوک سماء اولدیغی کبی دنیا ده کسب  
حقیقت ایتسون ! » . یعنی عقل بشرک نیم کوردیکی حقیقتک ،  
حسنک ، ایلیکک ساده جه بر مفکوره دن عبارت قالماسی ، ایچمز  
کله سی ، و یالکیز مطلقک علوی عوالمده و ناقابل ادرا کده دکل  
ایچنده یا شادیغمز ، سودیکمز ، اضطراب چکدیکمز ، چالیشدیغمز  
عالمده ، سماء دکل یر یوزنده ده کسب حقیقت ایتسی ایچون دعا  
ایده لم و چالیشه لم .

---

## اوچنجی باب

### هه قل و مونیزم

۱ — دینک علم ایله اولان مناسباتنه داتر هه قلک مسلکی - دین ایله علمک نزاعی - دینلرک حکمت وجودینی تشکیل ایدن معمارلرک هم علمی هم عقلی چاره حلی اولق اوزره تکاملجی مونیزم - احتیاج دینی . موجود دینلرک قابل استفاده اولان اقسامندن بر دین اولق اوزره تکاملجی مونیزمه تدریجاً انتقال :

۲ — هه قل مسلکنک قیمتی - اولا بر علمی فلسفه فکری : هه قل علمدن فلسفه یه ناصل کچر ؟ - ثاتیاً ، فلسفه علمییه دینلری رد ایدر ویرلرینه قائم اولور : هه قل بر فلسفه اولان مونیزمدن بر دین اولان مونیزمه ناصل کچر ؟

۳ — زمانزده علمی فلسفه و اخلاق - فلسفه علمییه ؛ بومفهومک معقدلکی یا خودمبهملکی - تساند اخلاق : بوتعبیرک مشوشلکی - انسان ایله اشیانک مناسباتنه عائد ابکیسکک دوامی .

نه اوکوست قونتک نه هربرت سپنسرک مسلککری مفکره بشره ثابت بر موازنت تأمین ایدیور کبی تلقی اولونه ماز . اوکوست قونتک مسلکنه کوره حکمدار طبیعت اولان ، وجود اعظمه بر عضو و بر استنادگاه تشکیل ایدن انسان او صرف انسانی کائنات ایچنده کندیسینی پک دار بر یرده قاپالی حس ایدر . هربرت سپنسرک ناقابل ادراکی ده فیلسوفک ضبط ایتک ایسته دیکی حدود ایچنده قاله ماز . اگر ناقابل ادراک وارسه

انبساط ایتک و عالم حقیقتک اوزرینه تمغاسنی باصمق ایستر .  
 بومسلکک هر ایکسی ده طبیعت ایله انسان آراسنده کی ایکیلی  
 شدتله محافظه ایتشدرد . او کوست قوننده انسان طبیعتدن کیتدکجه  
 آیرلشدرد . هر برت سپشرنه ایسه مطلق نسبی نک قارشینه  
 قونولشدرد . بوایکلیک نهایت اقتحام ایدیلوبده بوتون موجوداتک  
 وحدت اصلیه سی غیر قابل تزلزل تمللر اوزرینه استناد ایتدیر یله -  
 بیلیرسه بو وجودت سایه سنده دین ایله علمک مناسباتی مسئله سی  
 صورت قطعی ده عجا حل اولونه مازمی ؟

ایشته ارنست هه قل بوفکری مدافعه ایتشدرد .

ایه نا دارالفنونک مشهور علم حیوانات مدرسی یالکز  
 Generelle Morphologie der Organismus اثرینک  
 محرری (۱۸۶۶) وفیلورهنی (عضویاتک شجره سنک تحریسی )  
 مؤسسی دکلدرد . اون ایکی لسانه ترجمه ایدلش اولان  
 Schöpfungsgeschichte (۱۸۶۸) ایله Der Monismus als  
 Band zwischen Religion und Wissenschaft (۱۸۹۳)  
 و Die Weltsrätsel (۱۸۹۹) و Religion und Evolution  
 (۱۹۰۶) کی آثار ایچنده برطاقم مطالعات فلسفیه بیان ایلشدرد که  
 بونلرده محررک شخصیتدن کلن اهمیتدن باشقه ، بو کون بالخاصه  
 علم عالنده پک منتشر اولان بر حالت روحیه کمال وضوح ایله  
 کوزه چارپمقده در .



دينك علم ايله اولان مناسباتنه دائر هه قلك مسلكي

هه قله كوره علم و دين مفهوم لريني يالكز لفظاً شويله بويله  
يرتاليفه منجر اولان اوهر ايكي طرفي كوزتمه اصولندن، مجرد  
و مابعد الطبعي صورتده مناقشه دن واز كچمك اقتضا ايدر . علم  
ايله ديني اويله بوش برر جوهر مجرد حالنده ، حد ذاتلرنده  
دكل ، حقيقتده موجود اولدقلى شكلده بررلرينك قارشيسنه  
قويمايلى ، بونلك واصل اولدقلى نتيجه لرى ، استناد ايتديكي  
اساسلى حقيقي شكل و صورتلريله ملاحظه و تدقيقه آماليدر .  
در ابر نزاع علم و دين Conflict of Science and Religion  
( ۱۸۷۵ ) اثر مشهورنده ايشته بو صورتله حركت ايتمشدر .  
هه قلده نزاعك شرائطين و بوني حل ايتمك ايچون تعقيب ايديله جك  
اصولى كمال وضوح و صراحت ايله تعيين ايدرك بوايشي ايفايه  
چاليشمشدر .

كائناتك معمالي Die Welträtsel عنوانلى اثرينك باشنده  
ايتالياده كي پاپانك مذهبنى ، جهالت و اعتقادات باطله خصوصنده  
بوندن هيچ كرى قالمايان پروتستان اورتودوكس مذهب لريني بر طرفه  
براقلم دير . حريته رور بر پروتستان پاستورينك كليسا سنه كنديمزي  
قويه لم . بو پاستور وسطى ، ابي بر تربيه آلمشدر . منور وجداننده  
عقلك حقوقى ايچون برير آيرمشدر . بويله اولديغى حالده  
بو پاستورك آغزندن بيله بزم افكار منزله تماميله هم آهنگ بر طاقم

تدریسات اخلاقیه وحسیات انسانیت پرورانه آراسنده اللهه، دنیایه،  
انسانه دائر تجربه علمیه ایله طبان طبانه ضد برطاقم مطالعه لر،  
حکملر چیقدیغنی کوره جکزر .

ایشته شو تضادلردن برقاج نمونه :

بوپاستور نظرنده انسان بوتون حیات دنیویه نك ونهایت  
بوتون کائناتك مرکزى وغایه سیدر .

دنیانك موجودیتی ودوامی ، خلق وایجاد وعنایت ربانیه  
تسمیه ایدیلن اسباب ایله ایضاح اولونابیلیر . دنیانك خلق  
ایدلمه سی، کندی اقتدارینه واقف اولان مهندسك بواقدارینی  
نه صورتله استعمال ایده جکنی دوشونه رك آزچوق گرفت برما کنه  
تصور ایتسنه ، بونك پلاتنی طاسارلامه سنه و مناسب برطاقم  
مالزومه قوللانهرق بوتصورینی ساحه فعله چیقارماسنه مشابه  
برعملیاتدر . صوکره بوما کنه نك ایشله مسنه اومهندس نظارت  
ایدیور ، اوئی آشینمه دن ، قضالردن وقایه ایلیر .

بوالله انسانك شکل ورسمه کوره یاپلدیغنی ایچون اونك ده  
انسانی کندیسنه مشابه برصورتده خلق ایتش اولماسنی دوشونمك  
بك طبیعیدر . ایشته بوندن شویله اوچنجی برعقیده تولدایدیور:  
انسانك طبیعتی چیفته در . برمادی بدنن وبرمعنوی روحدن  
مرکبدروبوروح، نفحه الهی محصولیدر . انسانك لایموت اولان  
روحو بودنیاده فانی بدنك موقت برمسافریدر .

ایشته بو عقیده لر دینك خلقت کائناته عائد تمللرینی تشکیل

ایدر. بوعقیده لرك، عناصر اساسیه سی سائر دینلرده ده کورولور. بوعقیده لرك خلاصه سی: طبیعتی، اقسامنده موجوداوصافی آلتنده تصور ایتمکدن عبارتدر. طبیعت، مافوق طبیعت بر قدرتک اثر صنعی حاله ایندیرلشددر. طبیعتده موجود اولان شیلرک هیچ بری طبیعتک کندیسنک دکلددر. الله طبیعتی خلق وادامه ایتدیکی کبی اوکا حاکم ده بولونور. طبیعتی اداره ایدن قانونلرله جانی ایسته دیکی کبی اوینار. قوانین طبیعت اساساً خالقک کیفی اراده لرندن عبارتدر.

بوعقیده لرك تملی غنغیه یاخود وقتیلہ وقوعه کلن مافوق طبیعی بروحیه عطف اولونان بر طاقم مفهوم لرك دوردن دوره انتقاله استناد ایدر.

ایشته دینلرک بزه تأمین ایتدک لری حقایق. عینی موضوعه دائر عجبا علم نه دیور؟  
بومسئله یه جواب ویرمک ایچون عالمک آله جنی وضعیتی کوزلجه تعین ایتمک لازمدر.

مابعد الطبیعه منتسبلری بوراده موضوع بحث اولان شیلرک علمه تعلق ایتمه دک لری، علمک وسائط وقوفک ساخه می خارجه چیق دقلرینی سویلرلر. برچوق عالملرده، لابوراتوار داخنده کی مساعیریلہ ممنون اوله رق، آتار و حسابلر واسطه سیله حل اولونه میان مسائله قارشی لاقید داورانیرلر. بز یالکز وقعه لری طانیرز دیرلر. آغاچلر اونلرک نظر لرندن اورمانی ستر ایدر.

ایشته مفکره لرده دوام ایدن سؤ تفهیمک منعی بوراده در. علمانک  
محرزانه ، استخفافکارانه یا خود لاقیدانه اجتنابلرندن استفاده  
ایده رك الهیات و مابعد الطبیعه متخصصلری بی پروا بر طاقم عقاید  
نشرنده دوام ایدیورلر . دین ایله علم صانکه عینی دنیاده حرکت  
ایتمور ، چیقاردقلری نتیجه لرده هیچ بر لرینه تماس ایله میور کیدر .  
علم ، تجربی تحریات ایچنده محصور قالوبده مسائل فلسفیه یی تدقیق  
جهتنی اهل ایتدکجه بو ظاهری حال بر دوام اوله جقدر . علم  
تفرعات و تفصیلاتک تدقیقله باشلامشدر . بویله اولماسی لازمدی .  
علمک استحصال ایتدیکی نتیجه لرك قطعی اولماسی ده بوندن ایلری  
کمشدر . فقط علمک ده استحصال ایتدیکی نتیجه لردن عمومی  
فکرلر چیقارمه سی و انسانلرك مفکره لرینی اشغال ایدن بونشت .  
و خلقت مسئله لری حقنده تجربه نك وعقلک دلائلی حسیاتک  
و غیله نك عقیده لرینه قارشی قویماسی زمانی کمشدر . آرتق علمی  
بر فلسفه تأسیسی یعنی علمک نتیجه لرینی عقلی صورتده تفسیر ایتمک  
و شیمدی یه قدر علم کلام علماسنه و مابعد الطبیعه جلره براقیلان  
مسئله لری ده اوراده تدقیق ایلک دوره سی حلول ایتمشدر .

لامارقلر ، کوله لر ، داروینلر طرفندن تأسیس ایدیلن  
عصری علمک حالت عمومیه سندن ایشته بوفکر چیقادیغنی هه قل  
بیان ایدیور . بو بویوک آدملرك کشفیاتی و تفکراتی سایه سنده  
طبیعتک قوانین حاکمه سی نه اولدیغنی و ناصل بر معنا افاده ایتدکلرینی  
آرتق کوریورز .

علمدن چيقان فلسفه ايکي کلمه ده خلاصه ايديله بيلير: مونيزم (وحدت وجود) و تکاملچيلک Evolutionisme . بر طرفدن ، وجود بر در ، بوتون موجودات عيني ماهيت و طبيعته در . آرالرنده ي فرق آنجق درجه فرقيدر ، کمي بر فرقدر . ديکر طرفدن وجود غير متحول دکدر . موجوداتده بر تحول اساسي واردر . حد ذاتنده صرف ميخانيکي اولان وهيچ د کيشمز قوانينه تابع بولونان بوتحول ، موجوداتده کوردیکمز تنوعك منشأيدر . موجوداتده صرف طبيعي بر خلق و ايجادك محصوليدر .

ايشته دينك مشغول اولديني مسئله لري بوندن بويله علم بوفلسفه دائره سنده پيش تأمله آماليدر . حالبوکه بونقطه نظر دن ، علم عقايد دنبيه طبان طبانه ضد بر طاقم نتايج عرض ايدر .

فلسفه علميه کوره انسان کائناتك مرکزي و غايه سي اولاماز . انسان موجودات زنجيري ايچنده بر خلقه دن عبارتدر . ديکر مخلوقات ناصل بر برلرينه مربوط ايسه لر انسانده اويله جه اونلره مربوطدر . انسانك تفوق حيوانات فقرينه ك ، تکامل عمومي اثناسنده ديکر حيوانلره نسبتله فوق العاده صورته ايلري ايلري کيتمش اولالرندن نشئت ايدر .

ديانك صوکره دن ، يوقدن يارادلديني ادعاسنه قارشى ده علم ، طبيعي بر صورته وجود بولش اولديني حکمني ايلري سورر . طبيعته کوردیکمز بوتون اشکال موجوديتك ميدانه کلسي

ایچون لازم اولان قوتلرک هپسی طبیعتک کنديسنده موجوددر .  
 انواع، هپ تحول صورتیه بر برندن دوغمشددر . بوبابده برطاقم  
 قانونلره تابع اولمش واولیه برصیرا تعقیب ایتشددر که بونلری  
 تعیین ایتک بزم ایچون آرتق دائره امکانه کیرمشددر . ایشته  
 بوصورتله، خلق وایجاد کائنات خرافه سنک یرینه علم، دنیانک  
 تاریخ طبیعینسی اقامه ایتشددر .

روحک لایموت اولدینی عقیده سنی ده علم تکذیب ایدر .  
 علمک نظرنده فرد انسانی سائر مخلوقات کبی برطاقم مادی جزء  
 فردلرک موقت بر زمان ایچون بر آرایه کلش اولماسندن عبارتدر .  
 عقاید دینیه نک اساس عمومیسسی انسانه تشبیه ، انسانجیلق  
 anthropomorphisme ، یوقدن خلق وایجاد، طبیعت فوقنده  
 قوت در . علم بو مفهوملره قارشى طبیعتجیلک ( ناتورالیزم ) ،  
 تِمادی continuité ، وخلق وایجاد طبیعی مفهوملرینی ایلری یه  
 سورر . طبیعتک ایچنده ینه طبیعت واسطه سیله ایضاح ایدیله مه یه جک  
 هیچ برشى یوقدر . طبیعتدن اول وارا اولان ، طبیعتک فوقه چیقان  
 هیچ برشى یوقدر . طبیعتک قانونلرینک وبالخاصه اصطفاى طبیعی  
 وتکامل قانونلرینک معناسی حقیقه تقدیر ایدنلر ایچون طبیعت  
 کندی خلقتنک وترقیاتنک صانعیدر . داروین موسی یه قارشى  
 نه ایسه علم ده دینه قارشى اودر .

علم ایله دینک مذهب ومسلكلری آراسنده بویله اختلاف  
 وتضاد اولدینی کبی هرایکی سنک تمللری بیننده ده تضاد وارددر .



دینلر وحیه استناد ایدرلر. علم ایسه تجربه دن باشقه برشی طانیماز. علمک نظرنده ، هیچ بر فکر وقعه لرك بلا واسطه بر افاده سی یا خود تشارک افکار قوانین طبیعیه سنک ایجاب ایتدیکی بر نتیجه دکلسه جائز قیمت دکلدر .

دین ذهاب باطلی آرتق ممکن الوجود دکلدر . مکر که حقیقی کورمه مک ایچون کوزلری کورایتمکده اصرار ایدیله . لامارقلرك ، داروینلرك تأسیس ایتدکلری شکلده علم حاضر پیش ملاحظه یه آله جق اولورسه کورولور که وجودک ووقوفک مسائل اصلیه سنه تعلق ایدن خصوصاتده دین ایله علمک ادعای آراسنده غیر قابل ازاله بر تضاد قطعی ومطلق واردر . بناءً علیه منطقی ومنور بر مفکره ایچون هم دینی هم علمی قبول ایتک غیر قابلدر . ایکسندن برینی اختیار ایتک ضرورتنده در .

تکاملچی و وحدت وجود طرفداری فلسفه یعنی فلسفه علمیه بونزاعی بویله بارز صورتده میدانه حیقار مقله برابر عینی زمانده اونی حل ایتک چاره لرینی ده کوستیرر .

بوفلسفه یه نظراً ، بونزاعک تحدث ایتدیکی بوتون نقطه لرده علومک اصولی دائره سنده تربیه کورمش بر مفکره هیچ تردده اوغرایه ماز . وحی ربانیده ، ایمانده یعنی ، تحلیل اولونجه ، هیجان وحسیاتده بزم ایچون یالکز سوئز کتیف بر طاقم حالات شعور بولونمایوب بر طاقم وقوف منبع لری ده بولوندیغنه اعتقاد ایتک ذکأنک بر مرحله سفلیه سیدر که انسانلر آرتق بو مرحله یی

تجاوز ایتمشلردر. انسانلر الیوم واصل اولدقلری درجه انکشافده شونی بیلیرلر که وقوفیزی بزیا لکز تجربه دن و محاکمه دن استحصال ایدهرز. تجربه ایله محاکمه نك برلتمه سنه ده عقل دیرز. عقل بوتون انسانلره مساوی صورته ده داغیلمش دکلدر. مفکره بشرده حرثک ترقیاتیه انکشاف ایتمشدر. بوکون بیه عصری حرثه بیکانه اولان بر آدمده آنجق یقین اقرارلرمز مایمونلر ، کویکلر ، فیللر قدر بر عقل واردر .

بواساسلر بر کره قبول اولونجه ، انسان آرتق فلسفه علمیه نك چیقاردیغی نتایجی قبول اتمه مزك ایده مز. چونکه لامارق ایله داروینه کلنجه یه قدر یالکز بر مطالعه دن عبارت بولونان بونتایج او عالمک مساعیسندن صوکره حکمت طبعیه قوانینی درجه سنده برر حقیقت تجربه حالنه کچمشدر . اون دو قوزنجی عصرک اک بویوک ترقیسی- که نیوتونک ۱۷نجی عصرده تأمین ایتدیکی ترقیه مشاهددر - حادثات حیاتیه یی جامد طبیعتک قانونلرینه مشابه بر طاقم میخانیککی وطبعی قانونلره ارجاع ایتک اولمشدر. بوکون تدقیق و مشاهده و تجربه سایه سنده صورت قطعیده بیلورز که کرک حیواناتک و نباتاتک تظاهرات حیاتیه سنده کرک بلوراتک نشوونماسنده کرک بخارک قوه انبساطیه سنده عینی لایتغیر وابدی قانونلر اجرای تأثیر ایتکده در .

دینرده کی طبیعت فوقنده بر صنع و ایجاد یرینه علمک اقامه ایتدیکی عمومی طبیعتجیلک بوکون آرتق فکر علمی یه او یغون تر فرضیه دکل ، بر حقیقت فعلیه در .

بو حکم احتمالکه بعضیلرینه پک جرئتکارانه کورونه جکدره .  
 وقتيله طبیعت فوقنده بر طاقم مؤثراته مراجعت صورتيله آنجق  
 ایضاح ایده بیلدیکمز بر طاقم حادثاتی شیمدی میخانیکی یعنی  
 علمی بر صورتده ایضاحه موفق اولایلیمکه آرتق هر شینک  
 بو صورتله ایضاح ایدیله سی یا خود قابل ایضاح اولماسی می لازم  
 کلیر ؟ علمک سرائر کائناتی تماميله ازاله ایتدیکی یا خود بر کون  
 کلوب ازاله ایده بیله جکی دوغرومیدر ؟ اکر طبیعتده سرائر  
 وارسه و کائناتک بعض نقطه سنده بوسرائرک ابدیاً پایدار قالماسی  
 محتمل ایسه دین ایچون ، دینک هیجانلری و وحیلری ایچونده  
 بریر قالمایه جقمیدر ؟ دینک نقطه حرکتی مفکرة بشرک غیر قابل  
 نفوذ بر طاقم سرائر ایله محاط اولدینی فکری دکلیدر ؟ انسان  
 وحی ربانی یه ، عقل ایله حل ایده مدیکی بعض مسئله لره آنجق  
 اوسایه ده بر جواب بولدینی ایچون مراجعت ایتیمورمی ؟  
 هه قل ۱۸۸۰ تاریخنده برلینده علوم آقاده میسنده لایبنیچک  
 شرفه عقد ایدیلن بر جلسهی خاطر لاتیور . بو جلسه ده معلم امیل  
 دوبواره مون Emile Dubios Reymond کائناتک یدی معمای  
 احتوا ایتدیکنی ، بونلردن لاقل در دینک بزم ایچون قطعاً غیر قابل  
 حل اولدینی سویله مشدر . بو نقطه لر حقنده علمک اک صوک  
 سوزی « بیله میورم ! » اوله جقمش . دوبوا ره مونه کوره بودرت  
 علوی معما شونلردر : ماده نک و قوتک اصل ولبی ، حرکتک  
 منشائی ، احتساس بسیطک منشائی و اراده جزئی ( مکرکه

سوېژكتيف حريتك بر ذهاب باطلدن عبارت اولديغنه حكم ايديله ) . حياتك منشائندن ، طبيعتك ظاهري غايه خلقتندن ، تفكر ولسانك منشائندن عبارت اولان ديكر اوچ معما پك بويوك مشكلات ايله علمي ميخانيكيت اساسنه ارجاع اولونابيليردي .

هه قل بويله برادعانه قدر شدتله جرح ايديلسه آزا اولديغني چونكه هرشي تكرر موضوع بحث ايتديكني سويليور . اكر كائنانده بر نقطه ده بر سر ك موجوديتي قبول ايديله جك اولورسه باشقه نقطه لرده سرائر موجوديتني منع ايديله جك هيچ بر شي يوقدر . علمك اليوم : « دنيا ده آرتق انسان ايچون هيچ بر سر يوقدر » دستوريني كمال قوتله مدافعه ايتسي لازمدر .

بوراده چيقاريلان مشكلات ابتدا طبيعت نامي آلتنده بيلم ناصل بي شكل و جامد بر شي دوشونوب صوكره بو هيچلكك ايچندن قوت ، حركت ، احساس كي قدر تترك ناصل چيقد قلريني آراشدير مقدن ايلري كليور . فقط نقطه عزيمت تشكيل ايدن بوفرضيه خيالي وكيبي برشيدر . بويله بر حال ابتدائينك موجوديتي نه معلومدر ، نه ده ذهنه صيغابيله جك برشيدر .

وقعه دن باشقه بر شي طائيمان علم بويله بر مبداء قبول ايدمه مز . باشقه بر شينه قابل ارجاع اولامايه جق بر حالده يعني مبداء اوله رق علمك بيلديكي شي غير معين ، حال مطاوعته ده ، خارجدن تحريك و احيا ايدلمزسه حركته گيره بيلمكدن عاجز بر ماده دكلدر .

اساس اعتباريله جانلي ، هم حيزه صاحب يعني ماده هم قوت يعني روح espritدر .

هه قل دیور که : « بنده کوته ایله برابر او فکرده یم که نه ماده روحسز موجود اولایلیر و اجرای تأثیر ایده بیلیر ، نه روح مادهسز . سپینوزانک او کنیش وحدت وجود جیلغنی قبول ایدیورز : ماده یعنی نامتناهی صورته انبساط ایتش جوهر ایله روح یعنی حس ایدن و دوشونن جوهر ، هرشی احاطه ایدن اصل و لب الهینک یاخود جوهر عمومی کائناتک ایکی وصف اصلسی یاخود خاصه اساسیه سیدر . »

بو تلقیلرده تصوفه قاچان هیچ برشی یوقدر . اول : بری لاووازیه دیکری مایروهلهمولچ طرفدن اثبات ایدیلن مادهنک دوامی و قوتک دوامی قانونلرینه ؛ ثانیاً : بویکی قانونک وحدتی اساسنه استناد ایدرلر . علم بو وحدتی قبول ایتشدیر ، صو ک حد تحلیلده بو وحدت ، علیت اساسنک بر نتیجه ضروریه سی کورولور . کوته *Wahlverwandtschaften* اثرنده انسانلرک دویدقلری روابط حسیه نک اجسامده کی جزء فردلرده نمایان اولان حالک دهها گرفت برشکلندن عبارت بولوندیغنی ، «پاریس» ی کوزل آلنه جذب ایدن و کندیسنه هر درلو عقل و منطقی و اخلاقی اونو تدیران ناقابل مقاومت احتراصک حوینات منویه بی تلقیح فعالی اجرا ایتک اوزره کچه جک بریول آرامق ایچون صالدرتان عینی بی شعور قوه جاذبه اولدیغنی ، بر صو ذره سی وجوده کتیرمک ایچون ایکی مولدالما جزء فردینی بر مولدالموضه جزء فردینه برلشدیرن عینی شدتلی حرکتن عبارت بولندیغنی کوسترمشدر . بناء علیه

اختیار اُمپدوکل Empédocle ایله برلکده عناصری عشق و نفرتک اداره ایتدکلرینی سوبله مکدن قورقایلم . برداهی نک بوفکر و مطالعه سی بوکون بر تجربه وقعه سی اولمشر .

ایشته بوصورتله ذره نک بیله برحس و تمایل اثرلرینه یعنی بروح مقدمه سنه مالک اولدینی ثابت اولمشر ظن ایده رزه برقاچ ذره دن مرکب اولان جزء فردلر ایله کیتدکجه ده قاریشیق بر صورتده وجود بولان بر جزء فردلر مرکباتی حقنده ده عینی مطالعه وارددر .

بو ترکیب و امتزاجلرک طرزی صرف میخانیکدر . فقط ینه بو میخانیکیت تأثیر یله اشیاده کی عنصر روحی گرفت بر شکل آلیز ، عناصر ماده لرندن فرقلی برحاله کیرر .

ایشته بواساسلره صاحب اولان علم بوتون مسئله لری حل ایدر یا خود حل ایده بیله جکنی بیلیر .

علم ، منشأده جامد و ثقیل بر ماده یرینه اثری قبول ایدر . بو بر ماده لطیفه در ، ابدی صورتده حال حرکته در ، ثقیل ماده ایله آراسنده ابدی بر عمل وعکس العمل مناسبتی وارددر . جوهر عمومی کائناتک ایکی یه تفریق دیملک اولان بو ایکی عنصر ، طبیعتک اک عمومی حادثاتی ایضاحه کافیدر .

مع مافیله علم ، اشیانک منشائی وانکشافی کی مفکره بشری اک چوق مشغول ایدن اک کنیش و مشکل مسئله ایله اشتغال ایتمرسه هیچ برشی پامش اولماز . حالوکه بومسئله یی حل ایچون



علمده لامارق ایله داروینک اوکره تدیکی طلسملی برکله واردرد:  
تکامل . تکامل قانونلری موجبجه موجودات طبیعی صورتده  
بربرلرندن کلیرلر . انکشافلری ، خلق وایجادلری یکنسق  
ومطرد بر مقانیزمه نك تأثیر یله ایضاح ایدیلیر . الآن حل ایدلمه مش  
بیك دورلو مسئله موجود اولمقله برابر حل اولونه بیلنلر شونی  
ارائهیه کافیدر که خلق وایجاده تعلق ایدن بوتون مسائل قسمیه  
غیر قابل تفریق صورتده بربرلرینه مربوطدرلر ، هپسی بوتون  
اشیایه شامل بر تك مسئله کائناتی مشعردرلر . بناءً علیه بر  
مسئله نك حلی بالضروره دیگر لرینک ده حلی دیمک اولور .

فقط بالذات تکاملک ده منشائی نهدر ؟ بونی طبیعت فوقده  
بر اساسک تأثیرینه عطف ایتک وتفرع ایدن طرد ایدیلن معجزه یی  
هیئت عمومیه ده ابقا ایتک می لازم ؟

مبداء اوله رق قوتدن و بناءً علیه کندی کنديسنه تکاملدن  
محروم بر ماده قبول ایدیله جک اولسه ایدی بویله بر معجزه یه  
مراجعت مجبوری اوله جقدی . فقط مبداء وضع ایتدیکمز  
جانلی ماده حد ذاتنده بر تحول وخلق وایجاد اساسنه مالکدر .  
بو اساس الهی ازاله ایتمز ، کنديسی بالذات اللهدر . کائناتدن  
خارج بر الله دکل ، داخلی بر اللهدر ، طبیعتک عینیدر . شوراسنی  
بیلمیدر که ارباب علم الهی کی رد ایتدکاری قدر لا الهی کی ده  
قبول ایتزلر . اونلرک نظر نده دنیا ایله الله بردر . کلیت اله  
( پانته ئیزم ) مسلکی کائناتک تلقی علمیسیدر .

ایشته علم حاضرک قارشیسنده ماده و قوتک ، حرکت  
 و احتساستک او ظاهری معمالقیری بو صورتله زائل اولور .  
 ایکی بیک سنه دن بری دنیایی مشغول ایدن و کتبخانه لرمزی  
 دولدیرمش بر چوق توزلی کتابک یازماسنی انتاج ایدن اراده  
 جزئیة بحثه کلنجه بوده آرتق یالکز بر خاطره دن عبارت  
 قالمشدر . علمک استتاجلری قارشیسنده حسیاتک اومبهم تلقیناتی  
 نه اهمیتی حائز اولور ؟ اراده شبهه یوق که عاطل و جامد بر قوت  
 دکلدیر . بو هم ذی شعور ، هم ماکنه کبی بر عکس العمل  
 قدرتیدر که بر استقامتی وارد و بر تاثیر اجرا ایدر . فقط حیاتدن  
 غیر قابل تفریق اولان میلان ، اراده نک بو وصفی ایضاحه کافیدر .  
 اراده یه خاص اولان طرز تاثیر کلنجه بوملکه نک حر و سربست  
 ظن ایدلمه سی مابعد الطبیعه جیلرک او مجرد وایکیملک اوزرینه مؤسس  
 اصولرینه توفیقاً شرائط موجودیتدن آیری اوله رق دوشونلمسندن  
 ایلری کلکده در . بر طرفده اراده ، دیگر طرفده ده اوزرلرنده  
 اجرای تاثیر ایتدیکی بر طاقم احوال و شرائط موجود دکلدیر .  
 هر هانکی بر اراده کندیسنه وراثتک تحمیل ایتدیکی بیکلرجه  
 ایجابات و مجبوریت ایله محمولدر . شیمدی عزملرینک هر بری  
 احوال و شرائط موجوده دن مقدم کندیسنده بولونان میلانک  
 بو شرائطه اویماسندن عبارتدر . اک قوتلی سبب ، هیجانک ستاتیکنی  
 اداره ایدن قانونلره توفیقاً بوراده میخانیککی صورتده غلبه  
 چالار . بناء علیه مجرد ولفظی بر اراده حر کور و نورسده

اصل مادی و فعلی ازاده دنیاده کی بوتون شیر کبی بر ایجاب  
تحتنده ضروری اوله رق وجوده کلیر .

دیمک که دوبواره مونک بوتون معمارلی قابل حلدرد ،  
یاخود دها دوغروسی شیمیدین حل ایدلمشدر . ناقابل ادراک  
هیچ برشی یوقدر . ناقابل ادراک دیمک مجهول دیمکدن باشقه  
بر معنا افاده ایتمز . آرتق بزم بیلمدیکمز شیر موجوداتک  
اساسلری دکل ، تفرعات و تفصیلاتیدر . بوفیلسوف ایچون  
بوجهلک ساحه سی پک بویوک بولونماسی وشبهه سز دائما بویوک  
قاله جق اولماسی پک آز حائر اهمیتدر .

مع مافیة ساده جه : آرتق هیچ معما قالماشدر ، حکمنی  
ویرمک برخطا اولور . بر معما موجوددر و ضروری اوله رق  
موجوددر که بوده جوهر مسئله سیدر . عالمک طبیعت یاخود  
کائنات ، ایده آلیستلرک جوهر substance یاخود عالم cosmos ،  
معتقدلرک خالق یاخود الله نامنی ویردکلری بو خارقه نما قوت  
نهدر ؟ عصری علم عالمک حیرت بخش ترقیاتی جوهر مسئله سنی  
حل ایتمشدر یاخود حلنه تقرب ایتمشدر دنیله بیلیرمی ؟

حقیقتده طبیعتک صوک اعماقی آناقسیماندر ، امپه دوقل ،  
سپینوزا ، نیوتون ، قانت و کوته ایچون نه قدر مجهول ایسه  
بوکون بزم ایچون ده دها زیاده معلوم دکلدر . حتی اونک  
اوصافی و تکاملی حقنده کی معلوما تمز ترقی ایتدجکه بو جوهرک  
اصل ولپی بزم نظر مزده دها اسرار آلود ومعما انکیز بر شکل

کسب ایتدیکنی اعتراف ایتمک لازم کلیر . قابل وقوف حادثات  
آلنده کی اصل شیئی بز بیلیمورز .

فقط مادام که بوشینک حد ذاتنده نه اولدیغنی تدقیق و تتبع  
ایچون واسطه مز یوقدر ، مادام که وجودینی بیله قطعیت ایله  
بیلیمورز ، نه دن بونک ایچون ذهنزی یورالم ؟ بواله کچمز  
خیالت اوزرینه بنای خیال اتمه بی مابعد الطبیعه منتسبلرینه براقهلم ،  
بز علممزک و فلسفه مزک ترقیات عظیمه سندن بر عالم و بر حقیقتپرست  
صفتیله متلذذ و مستفید اولالم .

\*  
\* \*

حاصلی ، علم ایله دینی بر بر لر یله مواجهه ایدنجه ، ویرد کلری  
حکملرک بر برینه ضد اولدیغنی کورورز . علم ایله دینک مسئلکلرینک  
تدقیق فلسفیی ، علمک نتایجی قارشیشنده دینک عقیده لرندن  
هیچ برینی پایدار براقماز . فقط آرتق دینلری یالکزر تاریخنجه  
ایزلری قالمش ، زمان طرفندن کسیلوب آتلمش شیرلر ایچنه ،  
ماضیه دفن ایتمک می ایجاب ایدر ؟

علم ایله دین ایکی مجرد مسلک کبی نظر ملاحظه آلنیر  
و کندیلرینه استنادکاه خدمتی کورن روح بشردن تفریق  
اولونورسه انسان بوفکری قبوله میل ایدر . فقط دین یالکزر  
علم کلام منتسبلرینه اهمیتسز شان و شرف تأمین ایچون ایجاد  
ایدلمه مشدر : اونک غایه سی انسانده کی بعض احتیاجات اساسیه بی  
تطمین ایتمکدر . بو احتیاجاتک باشقه صورته تمامیه تطمین

ایدلدیکی اثبات اولونمادجه دین محو ایدلسه ده حیات بشریه نك ضروری بر عاملی صفتیه بالضروره بر صورت مشروعه ده تکرار تولد ایده جکدر .

مفکره بشرک بر طرف ایدلمسی غیر قابل اولان بواحتیاجلرندن بری موجوداتک منشاء وطبیعتنی ایضاح نقطه سیدر . شبهه یوق که علم یالکز حادثاتی قید و اشارت و تفرعات قانونلرینی تدقیقه حصر اشتغال ایتدیکی زمان بومسئله یه جواب ویرمکی اونوتیوردی . فقط بوندن بویله فلسفه علمیه علمه بوتون وسعت و شمولنی ویریور ، اونک تجربی کشفیاتندن کائناتک بویوک معمالرینک حلنی استتاج ایدیور . نظری جهتدن ، دینک بر طرف ایدلمسی کیفیتی آرتق بر امر واقع حالده در .

فقط انسانلرده یالکز نظری احتیاجلر موجود دکدر . عملی احتیاجلرده واردر . انسان عقل اولدیغی قدر قلب وحسد رده . طبیعتک بو عصری ده عینی صورتله حقیقی واساسی اولدیغی ایچون بونی ده تطمین ایتمک ایجاب ایدر . علم نه وقت انسانک ذکاسی کبی قلبنی ده رقبندن دها ایی ، دها محقق بر صورتده تطمین ایدر سه اوزمان دینه یول ویرمک حقنی قازانه بیلیر .

تفکر وملاحظاتنی نتیجه سنده بر فیلسوف موقعنه کچن وعلم طرفندن باشلانیلان استقراءلری عقل واسطه سیله نهایته قدر تمید ایتک یولنی بیلن عالم بوجهتده هیچ اندیشه ایتمز . اونک نظرنده علمک عملی ساحه شمولی نظری ساحه سندن دها

محدود دکلدر . علمک ، کائنات و حیات حقندہ کی مسلکری  
ایلہ قلب بشری تطمین ایدہ بیلہ جکنی و بونی یالکز علمک  
تطمین ایدہ بیلہ جکنی او اثبات ایدہ بیلہ جک بر حالہ در .

فقط بوملاحظاتک باشلیجہ ہنوز نظری اولدیغنی دہ انکار  
ایدہ مز . علمک تاثیر عملیسی بر کون ایچندہ بوتون تفرعاتیلہ  
ساحۂ فعلہ وضع اولونمق قابل دکلدر . بو نقطہ دہ دہا اوزون  
بر زمان ایچون بر طاقم بوشلقر قالہ جقدر کہ اورالینی دینلر  
دولدور مقصدہ دوام ایدہ جکلدر . دینلرک ایفا ایتدکلری وظیفہ لری  
علم ایفا ایدہ بیلہ جک حالہ کلنجہ یہ قدر دینلر فعلاً بردوام  
اولہ جقلری کبی بومدت ظرفندہ اونلرک موجودیتلرینی بعض  
خصوصلردہ مفید وایی عد ایتک بیلہ ایجاب ایدہ جکلدر .

بناءً علیہ ، دینلری اساس اعتباریلہ ملغا عد و اعلان ایتک  
کافی کلز . اونلر فعلاً الآن موجوددرلر . دہا بر مدت ایفا ایدہ جک  
روللری واردر . اونک ایچون علم ، دینلرلہ حال صلح و سکون  
ایچندہ یاشامالی ، دین ایلہ علم آراسندہ بر رابطہ بومالیدر .

استقبال ایچون یالکز علمک یعنی تکاملجی وحدت وجود  
مسلکینک غلبہ سنی تأمین ایدن فلسفہ ایشته بورابطہ یی دہ تدارک ایدر .  
بوفلسفہ عملی نتیجہ لرینہ ایصال ایدیلنجہ ، حقیقت ایلہ خیر  
وحسنک عبادتنہ منتهی اولور . کلام علماسنک خیالی تشلیلری  
یرینہ قائم اولمش ایشته حقیقی بر تثلیث .

بوتثلیث مسئلہ سندہ ، علی العادہ موجود دینلرک الیو کسکی



عد ایدیلن خرستیانلق دینی حقنده وحدت وجود مسلکک  
آله جفی وضعیت نه اوله جق ؟

وحدت وجود مسلکنه کوره ، « حقیقت » مسئله سنده ادیانک  
وحی ربانی ادعاسنده شایان محافظه بر نقطه بیله موجود دکدر .  
چونکه وحی بزم بر ماورای حیات خبر ویریر که نظر مزده هیچ  
بر معناسی یوقدر و بزم ایچون یکانه وارلق اولان شی اصلسر  
بر حادنه در که سنه ایندیرر .

« حسن » کلنجه ، بونقطه ده وحدت وجود مسلکی ایله  
خرستیانلق آراسنده بالخاصه شدتلی بر تضاد واردر . خرستیانلق  
طبیعی استخفاف اتمه یی ، طبیعتک جاذبه ولطافتلرینه قارشی  
محقرانه داورانمهی ، میلانلرینه قارشی مجادله ایتک لزومنی بزم  
او کره تیر . زهد و تقوایی ، ضعیفلامه یی وجودی چر کینلشدیرمه یی  
توصیه ایلر . صنایع نفیسه یه نظر شبهه ایله باقار . چونکه صنایع  
نفیسه نک یاراندیغی آثارک انسان نظرنده الله یرینه قائم اولمالری  
تهلکه سی واردر . حقیقتده خرستیان صنعت نفیسه سی دنیلن شی  
خرستیانلغک اوقطعی روحیجیلکنه قارشی مخیله نک و حواسک  
بر عصیان و اعتراضدن باشقه برشی دکدر . او واسع و محتشم  
غوتیک کلیسالریله دنیایی بر کوز یاشی وادیسندن عبارت دیه  
تلقی ایدن خرستیانلق دینی آراسنده نه مناسبت واردر ؟ خرستیان  
صنعتی معناسر بر تعبیردر . بالعکس وحدت وجود مسلکی اساساً  
طبیعتجیدر ، کوزللکک دوستیدر . کوزللکده حد ذاتنده

بر غایه کورور . بناءً علیه علم ساحه سندن اولدینی کبی صنایع  
نفیسه ساحه سندن ده خرستیانلقی طرد ایده جکدر .

شیمدی یالکز خیره عبادت جهتی قالیور . بوراده وحدت  
وجود مذهبی بر چوق اقسامنده خرستیانلق دینی ایله توافق  
ایتمکده در . طبعی بوراده خرستیانلق دنیلدیکی زمان انجیللرده  
و پولک مکتوبلرنده کورولدیکی وجهله ابتدائی وصاف خرستیانلق  
قصد اولونیور دیمکدر . بوخرستیانلق تدریساتنک قسم اعظمی  
شفقت و مرحمه ، مساعده کارلغه ، معاونته تعلق ایدن احکامدن  
عبارتدر که بونلری بزده قوتله قبول ایده رز . ذاتاً بو احکام  
خرستیانلق محصول کشفی دکدر . خرستیانلقن پک چوق  
مقدمدر لر . بو احکامی بر چوق مؤمنلر آیاقلر آلتنه آدقلری  
حاله بر چوق غیر مؤمنلر تطبیق ایتشلردی . فضله اوله رق ،  
وحیه مستند دین سالکمرندن بر چوقلری نزدنده بو احکام افراطه  
واردیر یلیور ، اکثر یا حب غیر حسی حب نفس حسنک ضررینه  
اوله رق غلیانه کتیر یلیور . وحدت وجود فلسفه سی بالعکس  
بو ایکی تمایل آراسنده دوغرو بر میزان قبول ایدر . چونکه  
بونلرک ایکسی ده انسان ایچون عینی صورتده طبعیدر . فقط  
خرستیانلق دینی یالکز اساسات اصلیه سنی معتد لانه ترویج ایله  
اکتفا ایده جک اولور سه وحدت وجود فلسفه سنک یاردیمجیسی  
اولور و ترقی اخلاقیه خدمت ایده بیلیر . بناءً علیه خرستیانلق دینی  
شیمدیلک بومعناجه وحدت وجود فلسفه سی آمنه ادامه ایدلملیدر .

ایشته دین ایله علم آراسنده آرانیلان رابطه اتصالی وحدت وجود فلسفه سی بوضورتله تشکیل ایدر .

تعقیب ایدیله جك خط حرکت دینلردن عاقلانه استفاده ایدر ك یاواش یاواش معاونت لرینی بی لزوم برحاله کتیره جك صورتده اونلری قوللانمقدن عبارت قالیور دیمکدر . ناصل که برنهری کچمک ایچون موقت، دار بر کو پرودن استفاده ایدیلیر، اوته کی ساحله کچلد کدن صوکرده او کو پرونک هیچ بروظیفه سی قالماز . بومقصده اتخاذا ایدیله جك ایلک تدبیر کلیسا ایله حکومتی قطعاً بربرندن آیرارق کلیسادن حکومتک معاونتنی چکمک، اونی یالکز کندی منابعیله یاشامغه براقمقدر .

بومنی برتدیردر . بونی اتمام ایچون الزم برتدیر مثبتده واردر که اوده تربیه نك اصلاحتدیر . تربیه ، دینلردن قورتولوق ایسته یین برهیئت اجتماعی نك الهمم مسئله سیدر . تربیه نك غایه سی انسانی یتشدیرمك اولمالیدر . فقط بوتون صفحاتیله ، هم انسان حساسی هم انسان متفکری ؛ هم روح دینداری هم روح علمی یی . تربیه عمومی ، مذاهب دینی دن هیچ برینك دستورلرینه توفیق ایدیله مز . بودستورلری مکتبه صوقاز ، اونلری عائله تربیه سنه براقیر . تربیه عمومی یالکز علمی اخلاقک یعنی تکاملچی وحدت وجود فلسفه سندن نشئت ایدن عملی مسلکک اساسلرینی تدریس وتطبیق ایدر . ادیان موجوده یی بیلمه مزلك ایتمز . فقط بونی « مقایسه لی ادیان » نامیله یکی برعلمه موضوع یاپار . بوعلم ،

خرستیانلغك خرافه لرینی ومنقبه لرینی برر حقیقت دییه دكل یونان ولاتین خرافه لرینه مشابه برر شاعرانه ماصال اولمق اوزره تاقی ایلر . خرافه لرك احتوا ایدیه بیله جككیری اخلاق یاخود بدیی قیمت بو خرافه لر منبع اصلیلری اولان مخیله بشریه ارجاع ایدنكله آزالماز ، بالعكس آرتار .

استقبالده یتیشه جك انسانلر علم ایله صنایع نفیسه یه صاحب اولونجه بوسایه ده دینه ده مالك اوله جقلردر . بناءً علیه فضانك درت دیوار ایله تفریق ایدلمش وكلیسا نامی ویرلمش بر قسمنه قاپانمق مجبوریتدن آزاده قاله جقلردر . بو کینش دنیانك هر طرفنده ، بومدهش موجودیت مبارزه سنك یاننده خیرك ، حقیقتك وحسنك نشانه لرینی بوله جقلردر . بو صورتله اونلرك معبدلری بوتون کائنات اوله جقدر . فقط هر زمان آیینلرینی مشترکاً اجرا ایتك اوزره زنکین بر صورتده تزیین ایدلمش معبدلره چکیلیمکی سوه جك انسانلر بولونه جنی ایچون اون آلتنجی عصرده بر چوق قاتولیک کلیسایی پروتستانلر اله دوشدییکی زمان کورولن حادثیه مشابه بر حادثه یه مشاهده ایدیه جك ، بر چوق کلیسا خرستیانلردن وحدت وجود مسلکی جمعیتلرینه انتقال ایله یه جکدر .

### هه قل مسلكنك قيمتي

هه قلك دين ايله علمك مناسباني حقنده كي مسلكي غايت صريحدر . اوكا كوره بوكون بيله بو مسئله حقنده موجود اولان عدم قطعيتك سببي عالمك كندي تحريات خصوصيه و حاله لري خارجه چيقان تصورات و ملاحظات دن خوشلانما لريدر . علم بر كره فلسفه شكلنده تشكل و تأسس ايدرسه — كه بوكا قدرتي واردر — يالكر دينلري رد اينده بيله جك بر حاله دكل اونرك يرينه قائم اوله جق بر موقعه ده كله جكدرد .

بو مسلكدن ايكي اساسلي فكر چيقار : اولاً ، فلسفه علميه فكري ؛ ثانياً ، دينرك رد و انكارى و قائم مقامى اولق اوزره بر فلسفه علميه فكري .

\*  
\* \*

قديم يونانستانده فلسفه ايله علمك مزج و تركيبي فكري غايت ساده ايدى . اوراده علم ، عقلك و موجوداتك اساس مشتركى اولان انتظام ، آهنگ ، وحدت و غايت finalité اساسلري ايله مشبوع ايدى . بو صورتله اصل و لينده مابعدالطبيعي ايدى . فلسفه ، كندي بديعى و عقلى اساسلرينى طبيعتك و حيات بشرك بديعى و عقلى اساسلرنده كوروب تسليم ايدن مفكره ايدى . حالبوكه معاصر ين نژدنده بويله دكلدر . علم ، مابعدالطبيعه ايله اولان مناسبندن كيتدجه صيريلشدر . علم ، شيمدى قطعياً

مثبتدر یاخود بویله مثبت اولمق املندهدر . یعنی وقعهلردن باشقه  
و منحصرآ وقعهلرك تعین ایتدیكى استقراءلردن باشقه بر شی  
احتوا ایتمهك ایستر . بناء علیه بر فلسفه علمیه دیمك هر دورلو  
مابعد الطبیعه خارجنده قالان و ضروری و کافی تملنی وقعهلرده  
بولان بر فلسفه دیمك اوله جقدر . بویله بر فلسفه قابلیدر ؟

هه قله کوره فلسفه اساساً موجوداتك ماهیت و منشاء لرینك  
تحریر سیدر . فلسفه فلان و یا فلان جسمك اصل ماهیتنی یاخود  
فلان و یا فلان صنف حادثاتك یقین سببی آرامقله اکتفا ایتمه مسی  
اعتبار یله تام معناسیله علمدن آریلیر . او ، مسئله لر ی عمومیلشدیرهرك  
قوانین طبیعتك هیئت مجموعه سنی و بوتون موجوداتك منشائی  
ایضاح ایده بیلیمكه قابلیتلی اساسات مشتركه و عمومییه موجود  
اولوب اولمادیغنی آراشدیرر . علم ، اوزون مدت ، بومسائلی  
حله کیریشمك ایچون فیلسوفلره کافی درجه ده معلومات تدارك  
ایده مه مشهده هه قل نظر نده ، لاپلاسك ، مایرك ، هلمهولچك ،  
لاماركل و داروینك مساعیسندن و اثرلرندن صوکره ایش  
دکیشمشدر . بو کون اصل علم ، وقعهلرك بیلکیسی ، اصل  
ولب و منشاء مسئله لرینك تدقیقاتنده کافی درجه ده ایلری کیتمش  
اولدیغنی ایچون فیلسوفلر بونلره استناد ایدهرك وظیفه لرینی  
کوره بیلیرلر . آرتق یاپه جق شی عصری عالملرك بویوك کشفیاتی  
عقل اعانه سیله تفسیر ایتمکدن عبارتدر . ذاتاً لامارق ، کوته ،  
داروین بالذات بونك مثالی عرض ایتشلردر .



بشریتک، مابعدالطبیعه یی اورته دن قالدیرمقله برابر فلسفه یی.  
محافظه ایتسنه مساعد اوله جق بوتفسیر عجا نه دن عبارتدر ؟  
هه قلك نیتی، کورولبورکه، تجربه علمیه ایله تفسیر فلسفی یی.  
اساساً ذكانك عینی ایشندن عبارت کبی تلقی ایتمکدر. شیلرک،  
عالمیره وفیلسوفلره مساعیلرینی آیری آیری یوروته جک یرده  
توحید ایتلرینی توصیه یولنده سویلیدیکی شعرلری کتابنه آلیوز  
واون دوقوزنجی عصر ابتداسنده او بویوک حقیقتپرست شاعر.  
کوتنه نك یکانه مشر وطیعی بر مسلک اولق اوزره سویلیدیکی  
وحدت وجود فکرینه اون دوقوزنجی عصر نهایتنده تکرار  
عودت ایدلیدیکی تأمین ایلور .  
بومقصدینی هه قلك ساحه فعله حقیقه ایصال ایدوب ایتمه مش.  
اولدینی جای سؤالدر .

هه قل معمای کائنات اثرینک برنجی بابنده دنیانك معمالرینی  
حله خدمت ایده جک فلسفی اصوللردن بحث ایده رک بونلرک  
صرف علمی اولان اصوللردن فرقلی اولمادیغنی سویلور .  
بونلرده، علمده اولدینی کبی، تجربه وخصوصی برشیدن خصوصی  
برشیته دوغرو محاکمه inference دن عبارتدر .

تجربه حواس واسطه سیله یاپیلیر . محاکمه ایسه عقل ایشیدر .  
بوایکی طرز وقوفی بر برینه قاریشیدر ماملیدر . حواس ایله عقل  
جمله عصیه نك تمامیه فرقلی ایکی پارچه سنك محصول وظائفیدر .  
بووظائفك ایکسی ده انسان ایچون عینی صورته طبعی اولدیغندن

عقلك ايشله مى حواسك ايشله مسنه نسبتله دهآ آز مشروع عد ايديله مزسه ده بونك طبيعتك سوقى دائره سنده اولماسى ايجاب ايدر . مابعدالطبيعه منتسبلرى عقلى حواسدن تفريق ايتمكه خطا ايتدكلرى كې عالمردده عقل برطرف ايتك ادعاسنه قالدقلرى زمان دهآ آز خطا ايتمش اولمازلر . فلسفه دوره سى كچمش ، يرينه علم قائم اولمش ديمك خطادر . حجره نظريه سى ، حرارتك ديناميك نظريه سى ، تكامل نظريه سى وجوهر قانونى عقلى يعنى فلسفى مسلكلر دكلده نه در ؟

هه قله كوره علمدن فلسفه يه بو انتقال بوتون مسئله لرى حل ايدم بيله جك ايسه ده ويردىكى ايضاحات بو انتقالك ناصل اوله جغنى پك تنوير ايتيور كيدر . بو انتقالى ايضاح اچون هه قل انسانك مادوننده كى حيوانانده حواسك يانى صيرا عقلك ده موجوديتنى ايلرى يه سورييور . عقلك مقرى جمله عصبية نك باشقه قسمنده اولق اعتباريله حواسدن فرقى اولديغنى سويليور وطبيعه موافق صورتده عقلك استعمالى نه دن حواس واسطه سنه مراجعت قدر مشروع اولمايه جغنى سورييور . فقط بونك ايله ناصل اوليورده عقلده اصل علمى دنيلن طرز محاكمه دن باشقه بر محاكمه وتفسير اساسى بولونمادىغى و موجوداتى عالمك نك نقطه نظرندن باشقه بر نقطه نظرندن پيش ملاحظه المقله مفكره نك همه حال خطايه دوشه جكي اثبات ايدمش اوليور ؟ بويله بر نتیجه يى محق كوسترمك اچون بزه عقلك محتوياتى - قنده برطاقم معلومات

ویرمک ایجاب ایدردی . حالبوکه ههقلده بونی بهوده یره  
آرایوب دورییورز .

احتمالکه عقل حقنده واضح وصریح هرهانکی بر نظریه  
بوراده مشکلات بخش اولابیلردی . فلسفه علمیه ههقلک تصویرینه  
کوره بر درجهیه قدر علمدن باشقه برشی اولق ایجاب ایدیور-  
دی . بوفلسفه نك نتایج ومقرراتی اصل علمك نتایج ومقرراتنه  
متصل ومربوط اولقله برابر اونلری کچمک ، اونلردن ایلرییه  
وارمق لازمدی . حالبوکه عقلده عالمك قوللاندقلرندن واستفاده  
ایتدکلرندن باشقه هیچ برشی بولونمادیغی اساسی وضع ایدیله جک  
اولورسه فیلسوف بوتون مساعیسنه رغماً هیچ بر جهته علمی  
بردرجه بیله تجاوز ایده مز ، مکرکه دوغرو و حقیقی علمك  
اوزرینه غیر صحیح ویا کلش بر علم وضع ایده . بوفرضیهیه کوره  
یالکز علم مشروعدر . بوتون فایسفه ایسه اسمی دیکشدرلمش  
علمدن یاخود بر ادبیات تمرینندن باشقه برشی دکلددر . دیگر  
طرفدن ، عقل طبیعیده علمك قوللاندیغی واستفاده ایتدیکی  
اساسلردن باشقه برشی وارسه علم ایله فلسفه آره سنده برتمادی  
واتصال تأسیسندن واز کچمک اقتضا ایدر . ایکیسنک آراسنده  
یرفرق ، همده درجه دکل برماهیت فرقی قبول ایتمک لازم کلیر .

فقط شبهه یوق که ههقلک بنا ایتدیکی مسلک کنیدیسی ،  
اجرا ایتدیکی تأثیر ایله ، صرف علمی بر فلسفه تأسیسی امکاتی

اظهار ایدر . علمدن ناصل بر فلسفه چیقار یلا بیله جکی نظریاتده .  
واضح صورتده آکلاشیله مایورمش ، بوفلسفه علم ایش یاخود  
دکئش ، بوتون بونلر او فلسفه فعلاً موجود ایسه و کندی  
کندیسی صرف مساعی علمیه ایله ایضاح ایدمه مملکه برابر  
علمک قطعیتنه مالک اولدیغنی اوصافیه فعلاً اثبات ایدر سه نه اهمیتی  
حائز اولور ؟

هه قلك بومسلکی تکاملچی وحدت وجود مسلکیدر .  
نیوتونک ، لاووازیه نك ، مایرك ، داروینك کشف ایتدکلری  
قانونلری قبول ، مدافعه ، تصریح ویکی وقعه لره ، خصوصی  
بر صورتده ، درینلکه ، جسارت و جرئتله تشمیل ایتکه انحصار  
ایتمز . چونکه بو ، ینه صرف بر علم ایشی اولوردی . علمک بوتون  
نظریه لری کبی قونتروله ، تصحیحه و تعدیله تابعدر . بومسلک  
استخراج ایتدیکی دستورلری بر عقیده حاله افراغ ایدرو میدانه  
قویدیغنی دنیا حقنده کی تلقینک طبیعت حقنده کی وقوفک ترقیات  
جدیده سی طرفندن بر ضرورت منطقیه ایله صورت قطعیده  
الی الابد قبولی بزجه ضروری اولمش اولدیغنی اعلان ایلر . علمدن  
چیقاریلان بو حکملرک علمک فوقنده بر قطعیتی ، تام مابعد الطبیعه  
قطعیتی حائز اولمالرینی ایستر .

پرنسیپلرینه ، چیفته طبیعت و ماهیتده کورونمکه برابر  
حقیقته بر اولان جوهرینه و کندی تکامل قانوننه عطف ایتدیکی  
ایلك وصف ، قطعی بر محصول ایجاب و ضرورت اوله ، ثابت

وادی بولونمدر . حالبوکه علومک اک اساسلی پرنسیپلرینه بیه  
صرف منطق علمی عملیه سی بویه برادیت تأمین ایده مز . چونکه  
علمده اساس پرنسیپلری خصوصی قوانینک وظائفدر (افعوله) .  
بو قوانین ایسه هیچ برزمان دیکشمز برصورته معین دیه  
تلقی اولونه مازلر .

هه قل ایکنجی وصف اولمق اوزره پرنسیپلرینه ، «عمومیت»  
عطف ایدر . فقط علم حاضرک یالکز تدقیق و مشاهده ایتدیکی  
موجودات حقنده ادعا و تأمین ایتدیکی اوصافی بوتون موجودات  
محتمله یه تشمیل ایدیور که بوتشمیل و تفهیم کیفیتنه نه علمی دنیه بیلیر  
نده استقراء علمی یه مشابه عد اولونه بیلیر . بوراده یادیغی  
استقراء ، تحلیل و تنقیددن محروم برحر کتدر ، بناء علیه علم نظرنده  
حائز قیمت دکلدرد . تدقیق و مشاهده ایتدیکمز موجودات ،  
دواملرینک برقسمنده بعض حادثات اراؤه ایتدیلر که بو حادثات -  
پک عمومی برطاقم فکرلر افاده ایدن و مختلف ایجابات تضمن  
ایدن - وحدت تشکل و تکامل کله لر یله خلاصه اولونا بیلیر :  
بناء علیه وجود بردر و تظاهراتنک یکوننده ، کافه سنده ، عینی  
تکامل قانوننه تابعدر دیه دوشونمک بر استقراء عد اولونا ماز .  
بو ، خصوصی برشینک عمومی برحاله قلب و افراغیدر .

هه قلک مسلکی باری هیچ اولمازسه وحدت ، تکامل کله لرینه  
علمی و تجربی برمعنا براقیورمی ؟ بونی تسلیم ایتک زوردر .  
هه قلک « احد » ی اثره و ماده ثقیله یه ، ماده جامده یه

و ماده ذی حیاته ، فسحته و تفکره ، دنیایه و اللهه حاکمدر .  
 اساس اعتباریله ذی حیاتدر ، حساسدر ، فعل و عمله قادردر ،  
 اک صوک درینلککرینه وارنجهیه قدر عقل ایله متصقدر . تکامله  
 کلنجه بر طرفدن ههقل بونی صورت قطعیده میخانیکی عد  
 ایدرکه بوعلمک ، هیچ دکلسه علم حاضرک دائره قوتی خارجه  
 چیقار . دیکر ظرفدن بیلیرکه آشاغی درجهلره دوغرو رجعت  
 وعودت حرکاتنه رغماً مکملیته دوغرو یورویش غالبدر . بوده  
 ساده جه تعمیم فعلندن فضله برشیدر .

ههقل کندی مسالکنی کلیت اله ( پانتهئزم ) تعیری ایله  
 خلاصه ایدر . بونکه آکلاتمق ایسته دیکی شی اللهک دنیا  
 خارجنده اولمادیغی ، بالعکس سینئه کائناتده بولوندیغی و قوت  
 force ou énergie صفتیله اونو ایچندن تحریک ایتدیکی کیفیتدر .  
 موجوداتک عقلی صورتده تفسیری ، الله ایله عالمک وحدتی  
 وحدت وجود نقطه نظرندن تلقی ایتمکدر ، دییور .

بوراده خارج ایله داخلک ، عالی بر قوت ایله مکنوز بر قوتک  
 بر لرلندن تفریق علمدن زیاده مابعد الطبیعه یی خاطر لاتیور .  
 نهایت ، ههقل بوتون ناقابل ادراکی مجهوله ، اصل ولبنده  
 قابل ادراکه بکزه یین بر مجهوله ارجاع ایتمکی وعد ایلدکن  
 صوکره بر جوهر قانوننه واصل اولیورکه بونک اوصافی نه قدر  
 چوق طانیر سهق کندیسنی او قدر چوق اسرار آلود بوله جغمزی  
 سویله یور .



بناءً عليه هه قلك فلسفه سنى علمك ساده جه بر تمانديسندن  
 عبارت كې نظر ملاحظه يه آلق غير قابلدرد . يالكز حواسى  
 استعمال ايتمه يرك عقلى ده قوللانه جغنى ويالكز عالم ايشى دكل  
 فيلسوف ايشى ده كوره جكنى سويله مكده حقى واردى . اثرى  
 شبهه يوق كه علمى اولديغى قدر فلسفيدر . فقط احتوا ايتديكى  
 عناصر فلسفى ، كوروليور كه ، عقيدوى دنيلن مابعدالطبيعه دن  
 استعاره ايدلمشدر .

\*  
 \* \*

عجبا بوفلسفه ، بولونديغى حال ايله ، هه قلك تعين ايتديكى  
 وظيفه يى ، يعنى دينى رد و جرح ايدرك اولنك يرينه قائم اولمه  
 كيفيتنى ، ايفا ايدميليورمى ؟

هه قل ، دينلى تام وقطعى بر صورتده رد و جرح ايدميلمك  
 ايچون اولنرك اساس پرنسيپنى ميدانه قويغنه چاليشير . بو پرنسيپك  
 ايكيلكدن عبات اولديغنى سويلر . دينلر هر طرفده طبيعى  
 و مافوق الطبيعى قوتلر آراسنده نزاعلر كورورلر كه بونلر هپ  
 قطعى ، جذرى برايكيلكدن نشئت ايدر . بوفكر ك بيك دورلو  
 تطبيقاتى هه قله نظراً باشليجه ايكي ادعاده خلاصه ايديله بيلير .  
 برى الله ايله دنيانك آرى آرى شيلر اولدقلىرى يعنى بونقطه ده  
 برايكيلك بولونديغى قناعتيدر كه غائيت مسلكى بونى افاده ايدر .  
 ديكرى انسان ايله طبيعتك ايكيلكيدر كه انسانلر ك حرر اراده يه  
 مالك و مختار اولملرى مسلكى ده بونى افاده ايلر .

بوتون خطارك والدهسى عد ايتديكى بوايى خطايى رد  
 وجرح ايچون لازم كلن منابى هه قل كندى فلسفه سنده بولور .  
 اونك فكر نجه الهيا تجيلغك نقطه غزيمتى دنيانك جامدو عاقل  
 برما كنه دن عبارت اولماسى فرضيه سيدر كه بر طاقم سطحى مشاهتر  
 نتيجه سنده وجود بولمىدر . برما كنه بالطبع اونى ياپان بر مهندسك  
 وجودىنى ايجاب ايدر . انسانلرك ياپدقلىرى بوتون ما كنه لره  
 قياس قبول ايتمه يه جك درجه ده مكمل اولان برما كنه ، انسانى  
 مهندس لره قياس قبول ايتمه يه جك بر مهندسك وجودىنى  
 ضرورى قيلار .

معبودلىرى انسانه بگزتمه فكرينك تحت تاثيرنده بولنان  
 بو محاكمه ، وحدت وجود فلسفه سنك اوكره تديكى وجهله دنيانك  
 برما كنه دن عبارت اولمايوب اساس اعتباريله ذى حيات برووجود  
 اولدينى آكلاشيلنجه ، كندى كنديلكندن ساقط اولور .

بونك كې ، اراده جزئيه ذهابى ده افعال و حركاتى تعيين  
 وايجاب ايدن قارا كلك تلقيناتى بيلمه يهرك و بى سوق ايدن  
 قوتلىرى بيلمديكمز ايچون كندى كنديلك مژدن برشى ياپديغمزى  
 ظن ايدهرك فعاليتمى شرائط اجرالردن ذهناً تفريق و تجريد  
 ايمه مژدن ايلرى كلير . ايشته بويله تجريد ايديلن فعاليتمى بزه  
 رايجابك تحت تاثيرنده ضرورى اوله رق وقوعه كلكش كې كورونمز .  
 فقط وحدت وجود فلسفه سى اثبات ايدىيور كه بويله كندى باشه  
 چيلاق بر فعاليت آنجق ذهنده وجوده كلكش بر تجريددن عبارتدر .

حقیقتده فعالیت ایله بونك شرائط اجرايیه سنی احتوا ایدن  
ماده نك ایکیسی ده بردر. بناءً علیه هر هانکی بر فعالیت همه حال  
بر طاقم شرائطك تحت تعیین وایجابنده در .

ایشته هه قله کوره تکاملچی وحدت وجود فلسفه سنك  
قارشیسنده الهی دینرك غیر قابل تزلزل ظن اولونان ستونلری  
بوصورتله یرلره دوشر .

فقط موسانك خلق وایجاد کائنات مسلکی واسقولاستیکك  
اراده جزئییه سنی ییقارکن هه قل دینی طوتان تمللرك کافه سنی  
تخریب ایتمش اولدیغه عجا ایمنیدر ؟

هه قل خارجی وعلوی غایتدن یعنی بر صانع ایله اثری آراسنده کی  
صرف میخانیکی مناسبتدن باشقه بر غایت طانیماور . بو غایت  
تلقیسنك دنیا به قابل تطبیق اولمادیغنی کوسترمکه هر نوع غایتی  
بر طرف ایتمش اولمق ظنه دوشیور . فقط بر کره مافوق طبعیجیلک  
بو تلقینک یالکز اسمنده در . چونکه بویده الله طبیعتده کی  
موجوداته تشبیه ایدلمشدر . بناءً علیه بوتلقی ، غایت فلسفه سنك  
نقطه نظرنی تمامیه ، دوعرو بر صورتده افاده ایدیور صایلاماز .  
آرسطودن هه قله کلنجیه قدر ، فلسفه کیتدکجه دها صریح اولمق  
اوزره ، بر غایت تصور ایتمشدر . بو خارجی دکل ، داخلیدر .  
میخانیکی دکل دینامیکدر . حسابلی دکل ، ذی حیاتدر .  
موجوداتده کی انتظام طبیعی بی آلت اوست ایدرک راست کله  
اجرای تأثیر ایتمز ، بلکه داخلدن حیاته باعث اولور ، دها بییه

دوغرو جهد و غیرتی تولیدایلر. طبیعتک قوانینی ایسه بوغائیتک  
تظاهر ایتدر .

کذلک آرسطوده ، ده قارتهده ، لاینبیچده یاخود قانتهده  
تصادف اولونان حریت اراده نظریه سی هه قلک ردوجرح ایتدیکی  
شکلده کی نظریه یه پک بکزه مز. حتی بوفیلسوفلر هه قلک فلسفه سنک  
عیننی سویله مشر یعنی حقیقی ومعلوم اولان اراده ده حریت ایله  
شرائط اجرائیه سنک وحدتی قبول ایله مشردر . حتی اونلرک  
مساعیلری بو وحدتی ده صمیمی ، هم دینامیک هم ذی حیات  
برصورتده تصویره مصروف اولشدر . برمهندسک کنديسندن  
خارج برطاقم قوتلری قوللانمهی کی خیالی و میخانیکی  
بر تلقیدن چوق اوزاقلاشمشلردر .

خلاصه ، فلسفه نك ممثلری نزدنده کوردیکمز غایت  
و حریت تلقیلری ده بر وحدت مسلکده دوغرو کیتمکده در .  
بونی یا بمقله دینلرک روحندن آیرلمش اولیورلرمی ؟ هه قلک  
روح ادیانی اساسلی صورتده ایکیلکده کورمسی دوغرو میدر ؟  
هه قلک بیاناتی وقایعک مشاهده سی اولمقدن زیاده مفکره نك  
بر مطالعه سندن عبارتدر . چونکه بر چوق دینلر انسان ایله  
اللهک وحدت ابتدائییه سی فرضیه سنه استناد ایدرلر . دین بو  
وحدتی حیاتهده افاده ایتمه نك وبوزولمش اولدیغی یرلرده تکرار  
تأسیس ایلمه نك بر چاره سیدر . ایکیلک دینک اصل ولبی اولمق  
شویله دورسون بالعکس اک یوکسک دینلرده عقیده اصلیه

وحدت در . بونی اثبات ایچون بر چوق منلر کوستریله بیلیر .  
 بونلرک ایچنده ال معروفی و خرستیانلق طرفندن ده صوکره  
 قبول ایدیلش اولانی رواقیونک شو حکمیدر : « بز اونده  
 یشارز ، اونده حرکت ایدهرز ، اونده وارز . »

مع مافیه ، شوجهت دوغرودرکه دینلر بر ایکیلک موجود  
 اولدیغنی سویلرلر . الله ایله طبیعتک آیری آیری شیلر اولدقلرینی  
 قبول ایدرلر . چونکه مساعیلری بونلری برلشدرمکه معطوفدر .  
 یالکز ، دینلر ، بوایکیلکی بروقع اولمق اوزره کوستریرلر .  
 یوقسه دینلرک نظرنده وحدت اساساً واردر ووقه حالنده  
 کچه جک برشیدر . خرستیانلرک : « سنک دورک کلسون ، سنک  
 آرزوک سماده اولدیغنی کبی یر یوزنده ده کسب حقیقت ایتسون ! »  
 دعالری « الیوم مخلوقات ایله وجود اولین بیننده موجود اولان  
 آریلق بیتسون و بوتون موجوداتک وحدت مخفیله لی تحقق  
 ایتسون » دیمکدن باشقه برشی دکلدرد .

وجودک وحدت اساسیه سی ایله برلکده بو فعلی ایکیلک  
 تلقیسی اساساً هه قلک موجب اعتراضی اولایله جک برشی  
 دکلدرد . چونکه اوده دنیایی و حیات بشری بو صورتله تصور  
 ایدر . هه قل جوهرک اساساً ناصل بر اولدیغنی ایضاح ایتدکدن  
 صوکره بری دیکرینه معارض ایکی اصل ولب ایله تظاهر  
 ایتدیکنی ، بونلرک بری متحرک اثیر ، دیکری جامد ماده اولدیغنی  
 سویلر . حتی بوایکیلکک دینه بر اساس عقلی احضار ایده بیله جکنده

حكم ايدر . بونك ايچونده عمومى و متحرك اثيرى الوهيت خالقه و جامد و ثقيل ماده يي ده ماده خلق و ايجاد اولق اوزره پيش تأمله آلمق كافيدر ، دير . كذلك اساساً براولان طبيعت بشرده هه قله كوره هيجان و عقل شكلى آلتنده چيفته اوله رق نمايان اولور . معلوم اولان شكل موجوديتلرینه كوره هيجان ايله عقل بربرلرینه معارضدرلر . فرضاً تحرى حقيقت يالكز عقه عاندر ، حسيات بووظيفه دن تماميله خارجده قالير . ترقى فلسفى حسيات ايله عقلك ايكيلىكنى كوزجله تقدير ايدرك عقلى حسيات دن تماميله آيرمقدن عبارتدر .

عمومى صورتده هه قلك طرز مفكره سى ايكيلىك اساسنه مستنددر . اونك نظرنده بوتون حقيقت بر طرفده ، بوتون خطا ديكر طرفده در . حيات بشرى تمثالى ايكي ضد يول آراسنده قالمش اولان هر كولدر . ايكيلىك ياخود وحدت وجود ، مكنوزيت immanence ياخود علويت transcendence علم ياخود دين ، عقل ياخود هيجان ، طبيعى ياخود مافوق طبيعى ، حریت اراده ياخود مجبورييت قطعيه ، غائيت صنعیه ياخود ميخانيكيت جذريه ... هر شى ايشته هه قله بويله ايكي طرزده توپلانير ، مطلقاً بونلردن بريسنى ترجيح و اختيار ايتمك لازم كلير . ديمك اوليور كه هه قل حيات بشرى فعلى بر ايكيلىك شكلى آلتنده كوريبور . فلسفه سنك غايه سى ضدلردن برر دانه سنى ازاله ايدرك بونك يرينه وحدتى اقامه ايتمكدن .



بناءً عليه اكر هه قلك مسلكى غنغوى دينلره صورت  
قطعيده معارض بولونيور وتنقيداتك ضربه لري آلتنده اونلري  
محو وتخریب ایدیورسه بو نتیجه آنجق اودینلرك مغالری پك  
زیاده تحدید حتی تغییر ایدلك سایه سنده وقوعه كلكده در .  
هه قل اساسه هجوم ایتكدن زیاده دستورلره هجوم ایتمش ، بو  
دستورلری داروعادی برمعناده تلقی ایتشدرد . حالبوكه بومعنائی  
بر چوق دیندار مفكره لرده قبول ایتزلر . هه قلك بو طرز  
جرحی حقیقتده دینی مذهبلك تكرار تأسیسی ایچون میدانه  
برچوق اساسات برامقده در .

بو ، موجب حیرت برشی دكلدر . هه قل دینلره استنادگاه  
اولان شیلرك كافه سنی محو وتخریب ایتك ایسته یه مزدی .  
چونكه كندیسی ده ، حسیاته ارجاع ایتدیكى احتیاج دینینك -  
حسیات آیری وطبیعی بر ملكه اولدیغی كبی - انسان ایچون  
بر احتیاج طبیعی اولدیغنه قانعدی . بو احتیاجك ده ، احتیاج  
علمی كبی تطمین الزم اولدیغنی تقدیر ایدیوردی . فلسفه سی  
ایشته تام بو مسئله عملیه یی حل ایده جكدی . عجبا بوكا موفق  
اولدیمی ؟

علم ، دینه قارشى دورابیللك ایچون هه قله نظراً یالکزر  
کیشه لکه مك و فاسفه حاله كچمك كافی ایدی . حقیقتده هه قل  
بوانكشافی آنجق عقیدوی مابعدالطبیعه دن استعاره ایدلمش بعض

مفهوماتی علمه علاوه ایتمک صورتیه یاپه بیلدی . حالبوکه  
وجوده کتیردیکی بوفلسفه یی یالکز دینلری رد وجرحه قابیلی  
دکل بلکه اولنلرک یرینه قائم اولمغده صالح برحاله صوقق  
ایچون هه قل فلسفه نك کندی کنديسنده بوله مایه جفی  
زنکینلکلری ده کذلک خارجدن آلمغه مجبور اولمشر کبی  
کورونیور .

علمه وصنعته مالک اولانک بویوزدن دینه ده مالک اوله جفی  
تکرار تکرار سویلر و وحدت وجود حقنده کی ایمان واعتقادینی  
خیرک ، حسنک ، حقیقتک اساس مشترکی اولان الله بر خطاب  
ایله بیتیرر . حقیقت ، خیر ، حسن : ایشه هه قله نظرآ  
اوج معبود علوی که حضورلرنده کمال حرمتله دیز چو کرز .  
یکرمنجی عصر ایشه بومفکوره شرفه بوهم بر هم اوج اولان  
الله شرفه محراب حرمتی بنا ایدر .

فلسفه سنه بویله بر معنا ویردیکنی معذور کوسترمک ایچون  
آلمانیا نك اک بویوک دهاسی اولان کوته ایله استشهاد ایدر .  
فی الحقیقه کوته شوسوزلری سویله مشدی :

Wer Wissenschaft und kunst besitzt  
Hat auch Religion ;  
Wer jene beiden nicht besitzt,  
Der habe Religion !

( کیم که علم ایله صنعته صاحب ایسه کنديسنده دین ده  
واردر . نه علمه نه صنعته صاحب اولمایان ایچون دین الزمدر . )

بوسوزلرك معناسى نەدر ؟

كۈتە نظرنەدە صنایع نفيسه ، حقيقتدن صيريلمىش بر حالده  
مفكوره دن عبارتدر . بر مفكوره شأيتدن چىقمىش بر پارچه  
يا خود اورادن عكس ايتىش ساده بر كولكه دكلدر ، شأيتك  
پرنسپيدر . اكر كندى كندىمىزك فوقه چىقمىش ايتيورسەق  
بز او كا ياپىشمالى يز ، اوندن الهام آلمالى يز . كمال ، بر لطف  
و هدايت اثرى اوله رق ابتدا بزه بر قابليت ويرملى ، صوكره  
يا واش يا واش بىزى كنديسنه دوغرو يو كستلميدر .

هەقل سپينوزايى داروينه علاوه ايتدىكى كى شىمدى ده  
بوصورتله كۈتە يى ده سپينوزايە علاوه ايدەرك بشرىتك يالكرز  
فلسفى احتياجاتى دكل اصل دىنى و فكرى تمايلاتى ده ممنون  
ايتمك يولنى بوليون .

مسلكه بويى علاوه يى ناصل ادخال ايدىيور ؟ بوراسى  
بك واضح صورتده آكلاشيله ماز . هەقل : عصرى انسان  
اومدهش مبارزە حياتك يانى صيرا هر طرفده حقيقتك ، حسنك  
وخيرك آثارىنى مشاهده ايدر دىيور . اما وارلغك بو ايكى  
منظرەسى آراسنده نه مناسبت واردر ؟ مبارزە حيات قانوننك  
طبيعتك قانون اصلىسى اولديغنى علمدن اوكرنمك ناصل اولورده  
حقيقت ايله حسن وخيرك دنيا ده هر طرفده موجود اولديغنى  
وبونلرك بزم آرزومزه و مساعيمزه غايە تشكيل ايتلمى لازم  
كلديكنى حكمه كفائيت ايدر ؟

کورولیور که هه قل بوراده دینلرک یرینه باشقه برشی اقامه  
ایده بیلیمک ایچون تجربی تلقیلرک یانه و فوقه تجربه یه استناد  
ایتمه ین برطاقم مفهوملر قویمش یاخود تعبیر دیکرله شعور مزده  
سوثر کتیف اوله رق وجود بولان اوامره بر قیمت ویرمشر .  
فقط بویله سوثر کتیف وخیالی بر امر و حکمک وقوف حاله ،  
حقیقی بر مجبوریت حاله چیقارلمسی وحی والهام دنیلن شیدن  
باشقه برشی دکلدنر . بناءً علیه هه قل کوته ایله برابر بزه حقیقته ،  
خیره و حسنه تمایل ایتمکی امر ایتمک ایچون مسلکنک ایچنه  
وحی دینی یه مشابه یابانجی بر پرنسپ علاوه ایتمشر .

فقط فلسفه نك ایچنه تعقیب ایدیله جك بر غایه کمال اولمق اوزره  
حسنی ، حقیقی و خیری ادخال ایتمکه نه لری تکرار تأسیس ایتمش  
اولدیفی بر کره دوشونولسون . دینلرک الهی ، هه قلک دوغرویی ،  
حسنی و خیری طرز تلقیسندن باشقه بر شیمیدر ؟ بو موضوعلر  
بر مثلث یاخود حیوانات فقریه فکری کی ثابت و درینلکدن  
محروم مفهوملر دکلدنر . مادی صورته موجود اولمایان بو اوج  
شیئک ماهیت غریبه سی انسانلرک بوتون مافوق طبعی و دینی  
تصورات و تفکراتلرینی تحریک ایتمشر . مفکره کندی  
کندیسنک فوقه یو کسله رک ، الله تسمیه ایتدیکی وجود ایله  
برلشمکه چالیشه رق بو مفهوملری تعیین و تثبیت ایتمکه اوغرا شیر .  
اگر هه قلک وحدت وجود فلسفه سی صوکرده دن و خارجدن  
کوته نك غایه کالنه دوغرو توجیه ایدلمه مش اولسه ایدی هانکی

اخلاقه ، هانكى دینه منتهی اولدیغنی صریح صورتده تعیین ایتك مشكل اولوردی . هه قلك فلسفه سی دینلره قارشى قویمغه انحصار ایتدیكى مرتجه بالخاصه موجوداتك وحدت اصلیه سی ، عمومی میخانیکیت ، مبارزه حیاتك مقدریتی ، سو بژه کتیف قناعتلرمزك هیچلکی ، هر موجودی کائناتك هیئت مجموعه سنه ربط ایدن تساندك مطلقیتی اوزرنده اصرار ایدیوردی . بو اساسلردن ، حریت اراده ، شخصك قیمتی ، انسانیت ، اخوت ، غایه کمال تعقیبی تعبیر ایتدیکمز شیلره بکزه ين برشی چیقارمق هیچ قابل اولورمی ؟

هه قلك تصور ایتدیكى وجهله علمك فلسفه یه تحول ایتمه سی بر سفسطه اولدیغی کبی بو فلسفه نك علمه انقلابی ده مسلکك اساسلرینه او قدر توافق ایتمز که عادتاً مابعد الطبیعی برشی کبی کورونور .

بونك اك معقول صورتده ایضاحی شو صورتله قابل اولابیلیر : هه قل علمی ، دینلری ییقمغه صالح بر آلت اولابيله جك صورتده فلسفه حاله کتیردی و صو کره فلسفه سنی ، دینلرك یرینه قائم اولابيله جك صورتده بر دین حاله قویدی و غایه ، غیر متجانس بر پرنسیپ کبی ، وسائطی یاراتدی .

زمانزده علمی فلسفه و اخلاق

هه قلك مسلكنده فكر ايله بوفكرى موقع اجرايه قويىمق  
 كیفیتی بر برندن تفریق ایتك لازمدر . هه قل فکرینی موقع  
 اجرايه وضع ایدرکن مختلف مسلکله تمایل وهپسندن برشی  
 استعاره ایتك استعدادینی کوسترمشدر ، بناء علیه بوجهت  
 تنقیده پك مقاومت ایده مز . هه قل داروین ايله سینوزایی ،  
 سینوزا ايله کوتیهی توحیددن زیاده تقریب ایتمشدر . فقط  
 افکارینی موقع اجرايه قویارکن دعوت ایتدیکی اعتراضلرک  
 فکرینه چوروتمی احباب ایتمز . احتمالکه هه قلك بویله  
 مختلف مسلکله تمایل کوسترمسی یکی برفکری درحال موقع  
 تطبیق و اجرايه قویمقده تصادف ایدیلن مشکلاتدن نشئت  
 ایتمکدهدر .

هه قلك وضوح ايله تصور ایتدیکی و عالمانه مدافعه ایلدیکی  
 فکر شودر : انسانلر آرتق حقیقی برقطعیته مالکدرلرکه اوده  
 علمدن عبارتدر . انسانلر بوقطعیته اوصافی نه قدر چوق تفکر  
 و تعمیق ایده جك اولورلرسه اوندن باشقه هیچ برقطعیته مالک  
 اولمادقلرینی و مالک اولمالری احتمالی اولمادیغنی تقدیر ایدرلر .  
 بناء علیه انسانلر وجوده کتیره جکلری مبانی فکریه ایچون  
 علمدن باشقه برتمل آرایه جق اولورلرسه هم کندیلرینی آلتایرلر  
 همده یا کلش بنالر وجوده کتیررلر .



فقط انسان ، تفکراتی موجوداته توفیق ایتمکه برابر ، شعورینه وغیر قابل ازاله برحسہ نظر آینه طبیعت اشیایہ مربوط اولان وکندیسنک نجابتی ، علویتی ، نفسہ قارشی حرمتی ، سعادتی تشکیل ایدن شیدن واز کچمک فکرنده دکلدرد وواز کچمه ملیدر .

علم بوتون بونلره بیکانه در دنیه بیلیر . حالبوکه هه قل علمده یالکز علمدن باشقه برشی کورمیورلرده اونک ایچون بویله دوشونیورلر دیر . کندیسنک اصل فکر غالی ده ایشته بودر . علمی ایجه تأمل ایدیکز ، عقلک اعانه سیله علمک پرنسیپلرینی ، اصوللرینی ، نتیجه لرینی تفسیر ایدیکز . حاصلی ، علمه مصدر اولان عینی ملکات ایله بر فلسفه علمیه ایجاد ایله یکز . بو صورته انکشاف و تمادی ایتدیر یان علم ، ماهیتی هیچ دیکشدر مه دن - ایی یاپلش بر مفکره نک طلب ایدوب ده صرف تجربی علمک تدار کدن عاجز قالدیغی - بوتون نظری وقوفلری ، بوتون عملی وصایای سزه احضار وتأمین ایدر .

ایشته بو صورته غعنوی دینلر ، یرلرینه باشقه شی قائم اوله جنی ایچون ، حقیقه بی لزوم بر حاله کیررلر . استقبالك دینی ، علمک دینی اولاجقدر .

هه قلک فکرینی موقع تطبیق واجرایه قویار کن کوستردیکی نقصانلر حقیقتده اصل فکرک قیمتی هیچ تنزیل ایتمه مشدر . عمومیتله ، بر پرنسیب اورته یاخود فنا صورتده تطبیق ایدلدیکی ،

شدته علیهنده بولونلینی یاخود یوزلرجه دفعه رد و جرح اولونلینی ایچون سقوط ایدوب اورتدن قالماز . ایچنده حقیقی برشی بولونمالینی ، قوه حیاتیه سی ، متانت و فعالیت اولمالینی ایچون بو عاقبه اوغرار . هه قلك فکری ایسه بوکون فکر عالنه حاکم اولان اساسلردن بریدر .

بوفکر ، هه قلده تصادف ایدیلن واساسی اخلاص ایتک تهلکه سنی کوسترن تطبیق واجرا نقصانلرندن اجتناب ایتک شرطیه ساحه فعله چیقمق اوزره برخیلی تشبثلرده بولونمشدر . بوکا موفق اولدینی ادعا ایدیه بیلیرمی ؟

علمی دینلن فلسفه زمانمزدده پک مترقیدر . عنوانه کیتدکجه ده از یاده لیاقت کسب ایتکه چالیشیور . حالبوکه علمک اصوللرینک ترقیسی مابعدالطبیعی باخود سو بره کتیف معلوماتی کیتدکجه بر طرف ایدهرک منحصرأ وقعه اوزرینه استناد ایتکدن عبارتدر . بوراده موضوع بحث اولان وقعه بوتون مدقق و مشاهدلر ایچون هپ بر اولان او بر قتیف ، علمی وقعه در . بونک ایچون فلسفه علمیه ده هیچ بر مافوق طبیعی فرضیه اعانه سنه مراجعت ایتهدن تشکل ایتک چاره سنی آرامقده در . علمدن باشقه هیچ بر تمله ، عقلدن باشقه هیچ بر آله مالک اولماق و عقلی یالکز علمک طلب ایتدیکی منطق عملیاتنه انحصار ایتدیرمک ایستر .

بناء علیه ، فلسفه علمیه اصل علمک مشغول اولدینی مسائلدن ده اعمومیلرینی ، ده ادرینلرینی حل ایچون اوغراشمقندن واز

کچمکسزین دائما علمک ممکن اولدینی قدردها زیاده یاننده دورمغه  
غیرت ایدر . علمک معناسنی تجاوز ایدیور کبی کوروندیکی  
نقطهده بیله علمه صیقی صیقی متصل بولونمق ایستر .

بو وضعیت، فلسفه علمیه نك ایجاباتی جدی دییه تلقی ایدنلرده  
بو فلسفه یی دینلرک اصل موضوعی اولان مسائل عملیه و تصویریه دن  
اوزا قلاشدیرمه یی انتاج ایدر . اکر فرضیه علمیه نك ماهیتی  
یا خود کیمیای حکمی نك اساسلری کبی موضوعلرک تدقیقندن  
دینلره برخلل کلیرسه بو آنجق بالواسطه در وپک آشکار عد  
ایدیله میه جک برطرزده در . واقعا علوم حیاتیه اخلاقی و دینی  
شیلره ده ایقین کبی کورونورلر . چونکه شرائط موجودیتدن،  
انکشافدن ، رقابتدن ، توافقدن ، جمعیات بشریه دن و ترقیدن  
بحث ایدرلر . فقط او علملرک اصولی ده سائر بوتون علمی اصوللر  
کبی مافوقی مادونه ارجاعدن عبارتدر . حالوکه موضوع بحث  
اولان مفهوملرک علوم طبیعیده بزم اخلاقی مفهوملر مرکز معناسنه  
مشابه بر معنای عملیه مالک اولدقلری قبول اولونسه بیله کیم  
قبول ایدر کیم راضی اولورکه انسان خط حرکتی - وجدانی  
وانسان صفتیه بسله دیکی آمال علویه یی هیچ تطمین و بمنون  
ایتمه دن - صرف کنديسندن آشانغی درجه ده کی موجوداتک  
حیاتنه کوره تنظیم ایتسون ؟ جمعیت حیوانیه جمعیت انسانیه نك  
نقطه حرکتی اولمقله بوندن بر جمعیت انسانیه نك بر جمعیت حیوانیه دن  
باشقه برشی اولمادیغی و اولماسی لازم کلدیکی نتیجه سی می چیقار ؟

بونك ايچوندر كه عموميتله ، علما ، علمى وقوفلرك احتوا  
ايتديكى مساعى فلسفيه نك حدودى كچوب ده آمانلرك  
Weltauschaunungen ديدكلرى كنىش تعميملره وبوصورتله  
وجدان اخلاقى و دىنييه حقيقه تماس ايدن مسائله كيريشمك  
ايسته دكلرى زمان تحليلدن و اصول دائره سنده استتاجدن  
واز كچدكلرى كورولور . علمك دىني حقه كى فكرلرى  
علمى صورتده ، مثلا مشاهده اوزينه مؤسس خصوصى  
قوانىدن استنباط ايدىلن عمومى برقانونى ايصاح ايدر كى سرد  
و اتيان ايتزلر . بالعكس ، حال و موقعه موافق نطقلرده ،  
مقدمه لرده ، خاتمه لرده ، قونفرانس لرده علمك فوائد و محسناتى ،  
عظمتنى ، كوزللكنى ، انكشاف ايتدير ديكى خيرك ، فراغتك ،  
ثباتك ، صميميتك ، قابليت موانستك ، تساندك ، بشريت  
وفاكارلغك فضائلى لسان تقدير و تجيل ايله ياد ايدرلر و نهايت  
علم هر شئيه حاكمدر نتيجه سنه و ايرى لر . بوندن بويله ، يالكز علم  
شخصيت انسانيه نك وقار و حيثيتنى تأسيسه و جمعيات مستقبلى  
تشكيله لازم اولان قوه مغنويه و اخلاقيه مالكدور . مقدس  
قانون سعى نظرنده قبول ايدىلن اوهر كسك مساوات و اخوتى  
زمانلرى يالكز علم احيا ايده جكدور .

بونقطه ده علما دىنك يرينه برشى اقامه ايتك ايچون علمك  
كشفياتندن علمى صورتده استخراج ايدلمش صريح مسلكلردن  
زياده كندى حياتلرينك نجاتنى ، تفكراتلرينك علويتنى ،

شخصیتلرینک و دهالرینک نفوذ و اهمیتنی ایلرییه سوررلر .

\*

\* \*

بونک ایچوندر که علم ایله دین آراسنده بر حد متوسط وظیفه ستی  
کورمک اوزره بوايی تعریف ای دیله مه مش فلسفه علمییه تصویری  
ایله اکتفا اولونمادی . بر چوق ذوات دینه قارشی بر فلسفه  
و بر وحدت کبی تلقی اولونمش اولان علمی چیقاره جق یرده  
یکی بر علم تأسیسی قابل اولوب اولمادیغنی دوشوندی لر . بو علم ،  
علمی وقوفلر حقنده موجود اولان عمومی فکر دائره سنده  
تشکل ایده جکدی و حیات بشریه ده شیمدی یه قدر دینک ایفا  
ایتدیکی بوتون وظائف مبرمه یی ایفا ایده بیله جک بر طرزده  
تصور اولونه جقدی .

بوشرائط دائره سنده تأسسه قابلیتلی کورولن خصوصی علم ،  
« اخلاق » اولدی . هر طرفده ، علمی اخلاق فکری تقدیر لرله  
یاد ایدلدی . بونی یالکز آتشین بر صورتده تمنی ایتمکله قالمادی لر ،  
تأسیس ایچون چالیشمغه باشلادی لر . بوسعیك اك شایان دقت  
ثمره لرندن بری تساند اخلاقیدر .

تساند ، خرسیتیانلغک رحم و شفقت و جمهوریتچیلرک اخوت  
فکر لرندن فرتلی بر مفهوم علمیدر . تساند جاذبه عمومییه کبی  
طبیعتک بر قانونیدر . بوتون جمعیات بشریه نك شرط موجودیتی  
و تعالی سیدر . همده ، شرائط موجودیتک خارجنده یاشامنی تصور  
ایده مین هر انسان معقول صریح و یا ضمنی صورتده بوتساندی ایستر .

بناءً عليه تساند نظريات ايله عملياتك نقطه اتصالي، دیندن صرف نظر ایدیه بیلیمک ایچون کشفی ایجاب ایدن وقعه دن طبیعی صورتده فعله کچیشی اراهه ایدر. انسانک حیاتی برقاعدهیه محتاجدر. علم بوقاعدهیی تأمین وتدارک ایدیه مدیکی مدتجه اونی حسیاتدن طلب ایتک ضروری ایدی. تساندجیلک سایه سنده بو نقصان نهایت تلافی ایدلمشدر: علم بر نقطه ده حیات دیمک اولیور. بو نقطه اتصال وتوافقی افاده ایدن پرنسپ ده بزه کافیدر. منور بر عقلک انسان ایچون قویدینی بوتون وظیفه لر بر کره تحلیل ایدیلسون: عدالت، معاونت، تکمل فردی، مساعده کارلق، عالیه، وطنه، جمعیه، انسانیه قارشی فداکارلق وظیفه لری. بونلرک هپسی ده یالکز تساندک علمی مفهومی سایه سنده ایضاح ایدیه بیلیر، محقق کوستریلیر وتحت وجوبه کیرر.

تساند اخلاقی، طرفدارلرینک فکر نجه، هه قلک وحدت وجود فلسفه سنه بر دین صفتیه عطف ایتدیکی وظیفه یی ایفا ایدیه جکدر. شیمدیکی حالده بو اخلاق، توصیه ایتدیکی مساعده کارلق تأثیریه، دینلرک معقول قسملریله عرض ایتدیکی مشابهت دولایسیله دین ايله علم آراسنده رابطه اتصال خدمتی ایفا ایدیه جکدر. فقط یاواش یاواش، تطبیقاتنده انکشاف ایتدجه ومفکره لرده یرلشدجه، دینلرک یرینه کچه بیه جک بر حاله کله جکدر. چونکه یالکز، دینلرک یاپه بیلدیکی بوتون فائده لی



شیلری ساحه فعله ایصال ایله قالمایه رق علمی حرث ایله تشکل  
ایتمش مفکره لره لزوم کوستن دها کنیش ، دها یوکسک  
شیلری ده اجرا ایله جکدر .

تساندجیلر ایشه بوصورته علمی اخلاقی ایکی غیرمتجانس  
ضابطه یه تابع قواعدک مجموعه منتخباتی حالده قالمقن قورتاره رق  
برومتجانس بروارلق و حقیقت حاله کتیره جک صریح مفهومی  
اورته یه قویا بیلدکلرندن دولایی افتخار ایدر لر .

بو ، اهمیتی انکارایدیله میه جک برکشفدر ! علوم حاضره نک  
بدایتنده ده قارت هم قابل تدقیق و مشاهد هم قابل ادراک  
اولان فسحتده عالم مادی ایله عالم ذکا آراسنده کی رابطه اتصالی  
کورمشدی . علم دنیاسی ایله فعل و عمل دنیاسی آراسنده ده  
بوصورته بر رابطه اتصال بولق قابلیدی ؟ اوت ، ایشه اورا  
بهره اتصالی تساندجیلک تدارک ایلشدر .

بومسلکک حقیقته قیمتی عجبا نه در ؟

دنیلور که تساند بر حقیقت علمیه در . شبهه یوق که علم بزه  
برسورو موجوداتک و حادثاتک بر برلرینه ناصل تابع و مربوط  
اولدقلرینی کوستریور . ذاتاً علمک وظیفه سی بوتساند مناسبتلرینی  
کشف ایتکدر . عمل وعکس العمل قانونی برتساند قانونیدر .  
فقط علم ، استقلال مناسبتلرینی ده آراق و تأسیس ایتک خصوصنه ده  
دها آز اعتناکار دکدر .

پاسقال دیورکه: « دنیانک بوتون اقسامی بربرلیله اویله  
 برمناسبتده، اویله برتسلسل وارتباطده درلرکه برجزئی دیگر جزء  
 و بوتون کل اولمقسزین طانیق محالدر ظن ایدرم. » احتمالکه  
 بوعمومی تساند ادعاسی نظری اوله رق مشروعدر. یالکز محقق  
 اولان برشی وارسه اوده شودرکه بویله برپرنسیپک عملی صورتده  
 قبولی علمی غیر قابل برحاله کتیرر. علم آنجق دنیانک بعض  
 اقسامنک دیگر اقسامندن اولدجه مستقل بولوندیغنی فرض ایتمک  
 سایه سنده وجود بولایلشدر. قانون، نوع، جسم تسمیه  
 اولونان شی نسی صورتده ثابت یعنی کائناتک سائر اقسامندن  
 نسی صورتده مستقل برخصوصی تساندر. کپلر قانونلرینک  
 وجاذبه عمومیه قانوننک کشفی منظومه شمسیه نک کندی کندیسنه  
 برنوع کل لشکیل ایتدیکی فکری سایه سنده قابل اولمشدر.  
 نیوتون قانوننک تعبیرلری بیله کوستررکه بعض اجسامک سائر  
 جسملر اوزرینه تأثیری قابل اهامل عد اولونه بیلیر. بارو مترو  
 تجربه لرنده مایع ستونک ارتفاعنی یالکز هوانک تضییقه تابع  
 بولوندره بیلیمک ایچون سائر مؤثراتک کافه سی برطرف ایدلمشدر.  
 شبه یوق که علم برطاقم تساندرلر ارار. فقط علمک دوشوندیکی  
 مسئله هانکی تساندرلی قبول ایتمک، هانکی ظاهری یاخود قابل  
 تصور تساندرلی رد ایتمک لازم کلدیکنی بیلیمک خصوصیدر.  
 علمک تساند کشف ایده بیلدیکی نقطه لر آنجق طبیعتک بربرندن  
 مستقل کبی کورونن حادثه لر آراسنده بعض ارتباطی وجوده  
 کتیردیکی یرلرده در.

بناءً عليه يالكز تساند مفهومی ايله اکتفا ایدوب بونک  
 ضدینی نظر اعتباره آلامق پک کیفی بر حرکت اولور . علمی  
 حقیقه رهبر اوله رق قبول ایدن بر تساندجی حقیقی ودرین  
 تساندلری تعیین ایتک قدر صرف ظاهری وعارضی اولان  
 تساندلری ده ازاله ايله مشغول اولق ایجاب ایدر . تساند یاخود  
 قارشیلقلی بر برینه تابع بولونمه مناسبتلری تأسیسنه ده چالیشمالیدر .  
 فقط تساندلرک یا کلشریله حقیقیلری بر برلرندن تفریق  
 ایدلسه بيله تساندجی وظیفه سنه هنوز یکی باشلايه جق بر حاله  
 کلش عد اولونا بیلیر . چونکه اونک طبیعت طرفدن بیلدیریلن  
 تساندلرله اکتفا ایتمه سی غیر قابلدر . ینه تساندجی بالضروره خیر  
 ایستر ، عدالت ایستر ، انسانلر ایچون سعادت ایستر . بونک  
 ایچون هه قلک او قدر قوتله ردو جرح ایتدیکی الهی ، انسانه بکزمک  
 مسلکنه توافق ایدن عقیده لری تکرار احیا ایده رک طبیعتک  
 تأسیس ایتدیکی تساندلرده شعور بشری ممنون ایتک املنی  
 بسله دیکنی می قبول ایده جکدر ؟ شوراسی آشکاردر که تساندجینک  
 علمدن استعاره ایتدیکی شی یالکزجه بر چر چیوه در ، تساندک مجرد  
 برشکلیدر . بو چر چیوه نک ایچنه احتیاجات اخلاقیه سنی تطمین  
 ایده جک شیلر قویمق فکر نده در . طبیعتک تقدیم ایتدیکی شیلری  
 آز چوق محافظه ایده جک ، فقط بونی ، ده قارتک دیدیکی کبی ،  
 عقلک سویه سیله تألیف ایده بیلدیکی درجه ده یاپه جقدر .

بناءً عليه کورولور که تساندجیلرک پر نسیپی ظاهرده بر اولمقله

برابر حقیقتده چیفتدر. اکثریا اولدینی کبی بوراده ده تک برکله  
ایکی فکری احتوا ایدیور. برطرفده مادی تساند، موجود  
تساند وار که عدالته لاقیددر، خام بروقهدر. بونی انسانی  
نقطه نظر دن تقدیر ایتک انسانه عائددر. دیگر طرف دن معنوی  
تساند وار که حردر، عادلدر. بو اویله بر فکر در که انسان  
بونی کندی مساعیسنه لایق برغایه یاپار. بوتون فکر لری کبی  
بونی ده طبیعتده بولدینی مالز مه یی بیلدیکی طرزده قوللانه رق  
ساحه حقیقته چیقار مغه چالیشه جقدر.

تعبیر دیگرله، علم ایله عملیات آراسنده آرانیلان رابطه  
اتصال تساند جیلک مسلکیله تأمین وتدارک اولونه مایور دیمکدر.  
بواصولده وقعه ایله فکری مختلف مسلک لردن فکر لر طوبلایان  
مسلک کبی یان یانه دیزیور، بونلری عینی نام آلتنه قویمقله  
هپسی بر در دیور.

واقعا بوايضاحاته بعضیلری شویولده جواب ویرر لر: تساند  
معنوی نک بر فکر صرف عد ایدیلهرک تساند مادی یه مقابل دیه  
کوسترلسی دوغرو دکدر. تساند معنوی ده بروقهدر.  
تجربه دن چیقمش بر معلوماتدر، علمی بر حقیقتدر. چونکه  
کوکی سوق طبیعی بشرده در. تساند معنوی طبیعت بشریه نک  
قوانین حکمیه یه مشابه بر قانوننک شعور طرف دن حس وادراک  
ایدله سندن عبارتدر. فرد انسانی ده حیوانلر کبی بعض مخلوقلره  
بالخاصه متساند اوله رق دوغار ویاشار. تساند معنوی دنیلن شی

بو تساند خصوصینک وقوفندن ونظریه سندن باشقه برشی دکلدر .  
 بو ایضا حاتک استناد ایتدیکی مصدره ، شعوری کندی  
 اوکنه قونولان شیرلی مطاوعتکارانه عکس واره ایتمکدن  
 باشقه بر خاصه سی اولمایان بر آینه یه بکزتمه کیفیتدر . بر تشبیه  
 واستعاره بر نظریه حاله کچیریلیور . فقط حقیقته انسان بر چوق  
 مختلف ومتنوع تساندلر قارشیسنده بولونمقده در . بو تساندلرک  
 ایچندن بر قسمی انتخاب واختیار ایتک لازمدر . بعض تساندلر  
 بوزومالی ، بعضیلری ادامه ایدملیدر . حتی ، موجود کورونمیه  
 بعض تساندلری یکیدن تأسیس اقتضا ایدر . از جمله عدالت  
 و ایملک اوزرینه مؤسس تساندلر بوقیلنددر . اگر یاپیله حق  
 ایش یالکز موجود اولان بر شیئی اولدیغی کبی بیلیمک و اوحالده  
 ادامه ایتمکدن عبارت ایسه بوتون بومبارزه لره ، بومساعی یه ،  
 بویورولمق بیلیمز ، عالیجنابانه ، آتشین غیرته نه لزوم وار ؟  
 آشکاردرکه بر طاقم وارقلر آراسنده انتخاب یامق ، بو وارقلرک  
 حدودینی کچمک ایچون بو وارقلردن آیری بر محک حقیقت  
 وقیمت بولمق یا خود آرامق اقتضا ایدر . بو محک حقیقی نره دن  
 چیقارمالی ؟

سوق طبعیدن ، شعوردن ، طبیعت بشریه نک احتیاجات  
 مغویه سندن چیقارمالی دیورلر . چونکه بونلرده برر وقعه در .  
 نظریه نک اعماقده موجود اولان مشوشیت ایشه بوراده  
 تمامیه میدانه چیقار . چونکه وقعه دن وقعه یه فرق اولدیغی

اونوتولیور . حیوانک بارومتره بوروسی ایچنده دورماسی  
 بروقه در . عدالت فکرینک شعوری ده بروقه در . فقط بوایکی  
 وقعه نك ماهیتلری پك فرقلیدر . برنجیسی معین ، اوثرقتیف  
 برطاقم عناصره ارجاع ایدیله بیلیر . بو عناصر هر مفکرده ده همان  
 همان تمامیله بربرینك عینی برطاقم فکرلرله اراؤه اولونور .  
 ایشته بویله عناصردن ترکیب ایدن برهیئت مجموعه علمی بروقه  
 عد اولونا بیلیر . عدالت فکرینه کلنجه بو ، فکری بر شینك  
 صورت ذهنیه سیدر . شبهه یوق که بونده ده اوثره قتیف بر عنصر  
 واردر . یعنی دوشونن کیمسه ده بویولده بر فکر ، ده ا دوغروسی  
 بر حس موجوددر . فقط بوراده موضوع بحث اولان بو عنصر  
 دکلدر . بزده ده باشقه بیک دانه حسیات واردر که اونلره  
 عینی قیمتی عطف ایتمه یز . موضوع بحث اولان نقطه بو حسك  
 دیگرلرینه غلبه سنی تأمیندر . دیمك اولیور که حسه بر حس  
 اولماسی اعتباریله دکل متوجه اولدینی عدالت ، خیر ، انسانیت ،  
 فکری تساند کبی غایه سندن دولایی مراجعت ایدیورز .  
 فقط عدالت وایلك علمی و اوثرقتیف برر وقعه دکلدرلر .  
 بونلر سوثرکتیف و بلا واسطه برر صورت ذهنیه در که  
 تحلیل ایدله مشلدر . علمی وقعه لرك تمامیله ضدی برطاقم  
 وقعه لردر . بونلر خام برطاقم مفهوملردر که علمك تنقید ایتك  
 و قابله صریح و اولچولسی ممکن عناصره ارجاع ایلک وظیفه سیله  
 مکلف اولدینی مفهوملره بکزرلر . حتی بونلر اویله معلوماتدر که



استناد ایدمک ایسته نیلن شعورک شهادتنه اعتماد ایدیلیرسه بونلری علمی وقعه لره ارجاع ایتمک غیر قابلدر . چونکه بونلر مفکره بشرک حقیقت حالی تصحیح ایتمک و علم مستقبلک تدقیقات و تفحصاتنه علم حاضرک شمیدن تخمین ایدمه جکی وقایعی عرض ایله مک یولنده کی مدعیاتنه ترجان اولورلر .

ایشته بر طاقم اوزون و عالمانه دولاشمه لردن صوکره ینه هه قلمک بولوندیغی نقطه یه عودت ایتدک . طبیعت بشریه نك هم مطالبات علمیه سنی هم مطالبات مغویه سنی تطمین ایتمک ایچون هه قل داروین ایله کوته یی ، مبارزه حیات ایله حقیقت ، حسن و خیر عبادتی اوست اوسته وضع ایدیوردی . وحدت وجود دنیلن مسلکی ایکیلک اساسنه استناد ایلوردی . تخیل ایدیلن وحدتی استحصال ایچون علم ایله عملک بر مزج و ترکیبی اولمق اوزره ، علمی نامی ویریلن اخلاق دوشونولدی . فقط بودستور ایله بربرینه تقریب ایدیلن شی آنحق ایکی کلمه دن عبارتدر . یاعلمه ، بونامه جداً لایق اولان علمه مربوط قالینیر ، بوتقدیرده اخلاقه وصول قابل اولماز . یاخود انسانک مطالبات و احتیاجات مغویه سندن حرکت ایدیلیر ، بوتقدیرده ایسه علمه ایریشمک میسر اولماز . برشیئه کسب استحقاق ایتمک ایچون اوشیئک یالکیز اسمنی طاقمق کافی دکلدیر .

اقتحام ایچون نه قدر چالیشیلسه دونوب دولاشوب دوشولن بو ایکیلک کیفیتی حل ایدمک ایسته نیلن مسئله نك کندیسند

موجوددر کبی کورونیور . بومسئله نك دستورینی ههقل پك  
كوزل افاده ایتمشدر : طبیعت بشریه نك كرك عملی كرك تصویری  
اولان احتیاجاتی علم واسطه سیله تطمین ایتمك .

حالبوکه علم علمی وقعه لرك هیئت مجموعه سنك تشکیلاتی  
ووقوفیدر . طبیعت بشریه نك احتیاجاتی آنجق مادی تمللرنده  
علمی وقعه لردر ، غایه لرنده دكلدر . حالبوکه بوراده موضوع  
بحث اولان یكانه جهت ایسه او غایه لردر . بناءً علیه ناصل  
اولورده علمك انسانی نمون ایده بیله جكنه بوجه پیشین حکم  
ایده بیلیرز ؟ حالبوکه بزه علم نامنه منع ایدیلن شی بو الوهیتی  
انسانه تشبیه مسلکی ، انسان ایله موجودات آراسنده اولدن  
تاسس ایتمش بر آهنگ نظریه سی دکلیدر ؟ شعورك تلقیناته ،  
حسیاته ، آرزویه قارشی دائماً بزم نظر شبهه مز دعوت اولنه رق  
بونلرك او بڑقیف وارلقله مناسبتدار اولمادقلری تأمین ایدیلورمی ؟  
تحریات و تدقیقات نتیجه سنده واصل اولدیغمز ایکیلک ، علمی  
وانسانك احتیاجاتی محتاج تألیف ایکی حد کبی وضع ایتمکله  
اورته یه چیقاریلان ایکیلکك نتیجه سندن باشقه بر شی دكلدر .  
علمك دینی ، علمی اخلاق بر تنقید اجراسنی ایجاب  
ایدرلردی که بومسلکله اونی یامغی اونوتمشلردر . مفکره بشرک  
ذکائی ومعنوی احتیاجلرینی تنقید اقتضا ایدردی . بو احتیاجاتی  
تطمینه اوغراشمه دن اول بو احتیاجاتك نه دن عبارت بولندقلرینی ،  
قیمتلیرنك نه اولدیغنی آراشدیرمق اقتضا ایدردی . بونلرك

برر وقعه دن عبارت اولدقلری ، رغایه کماله عائد یاخود حقایقه  
فائق اولق اوزره احتوا ایدرکی کوروندکلری شیلرک برذهب  
باطل اولدیغی یعنی قوانین طبیعت کوره ینه او حقایقه ارجاع  
ایدیله بیلدیکی اثبات ایدیله بیلسه ایدی اوزمان حقیقه بزم ایچون  
میدانده یالکز بر طاقم وقعه لر موجود اوله جقدی . بو وقعه لر  
علمی ماهیتده بر طاقم وقعه لره قابل ارجاع بولونه جقدی .  
ما فوق طبیعی یی ، مطلق ، ناقابل ادراکی ، غایه کمالی تخطر  
ایتدیرن شیلرک کافه سی اوزمان ازاله ایدلمش اولوردی . اصل  
علم بزجه بوتون موجوداتی تمام و حقیقی اولارق تمیل و ارائه  
ایدر ، بزم الک یوکسک احتیاجزدن ، مطلقمزدن و غایه کالمزدن  
عبارت بولونوردی .

---

## دردنجی باب

### پسیقولوژیکلک و جمعیتجیلک

طبیعت و حادثات طبیعیہ : دینک غایہ لری یرینه اقامہ ایدینن حادثات دینیه نك تدقیق و ملاحظه سی .

۱ — حادثات دینیه نك پسیقولوژی نقطه نظرندن ایضاحی -  
حادثات دینیه نك سو بره کتیف و او بره قتیف اوله رق تدقیق و ملاحظه سی -  
حسن دینیک تکامل تاریخیسی - حیات روحیه نك قوانین عمومیه سی  
واسطه سیله حیات دینیه نك ایضاحی .

۲ — حادثات دینیه نك سوسیولوژی نقطه نظرندن ایضاحی -  
سوسیولوژی نقطه نظرینک فوائدی - حادثه دینیه نك اصل و لوی :  
عقیده لر و آیینلر - پسیقولوژی نقطه نظرندن ایضاحاتک عدم کفایه سی ؛  
دینک بروطفه اجتماعیه اولماسی .

۳ — پسیقولوژیکلک و جمعیتجیلکک تنقیدی - بومسلکک  
یامق ایسته دکری شیلر - ویردکری ایضاحات حقیقه علمیمیدر ؟ -  
انسانلرده کی بئلك ایله جمعیات بشریه میخانیککی اسبابه قابل تشبیه میدر ؟ -  
پسیقولوژیکلک مجبوریّت دینیه حسنی ایضاحه غیر قادردر - سوسیولو-  
ژیکلکک حقیقی دکل مفکوره ده کی هیئت اجتماعیه مه مراجعتی .

شیمدی یه قدر تدقیق اولونان مختلف مسلککده دین ایله  
علم ایکی معلوم شی کی قارشی قارشی یه قونولور و مفکره نك  
تضاده دوشمکسزین بونلرک ایکسینی بردن نه نسبتده ونه صورتده  
قبول ایده بیله جکی مسئله سیله اشتغال ایدیلور . حالبوکه مسئله نك  
باشقه صورتله وضع ایدلمسی ده قابلدر .

اون یدنجی واون سکزنجی عصرده علم ، ریاضیات و تجربه‌نک  
 چیفته تملی اوزرنده صورت قطعیده تشکل ایتدیکی زمان حیات ،  
 طبیعت ، روح کبی عمومیتله برر شأنت کبی قبول ایدیلن  
 ومع مافیه تجربه ایلله بیلینمش ، ریاضیات ایلله اثبات اولونمش  
 شیلردن پک زیاده فرقلی بولونان مجرد جوهرلره قارشی نه وضعیت  
 آله جغنی دوشوندی . برمدت تردد ایتدکدن صوکره برتفریق  
 وجوده کتیردی و بوسایهده مشکلات صورت قطعیده حل  
 ایدلمش کبی کوروندی . طبیعتک ، حیاتک وروحک برر جوهر  
 مجرد شکلنده تلقیسنه مقابل علم ، تجربه‌نک بیلدیردیکی فیزیک ،  
 حیاتی ، روحی وقعه‌لری اقامه ایتدی . حالبوکه بو حادثات  
 برطاقم اصل ولبلرک تظاهراتندن عبارت ایدیلر . علم بونلری  
 هیچ بیلیمورمش کبی داورانندی . حکمت طبیعیه ، علم حیات ،  
 پسیقولوژی تعبیرلری محافظه اولوندی . فقط ، آرتق بونلرک  
 معناسی حادثات حکمیه ، حیاتیه وروحیه‌نک علمی دیمکدن  
 باشقه برشی دکلدر . ایشته نقطه نظرک بوتحولی سایه‌سنده  
 علم ، عنعنه‌نک تصور ایتدیکی شکله کوره کنیدیسی ایچون ابدیاً  
 غیرقابل وصول قاله جق اولان برطاقم شأنتلری بنمسه مکّه موفق  
 اولمشدر .

دین حقندهده بویله برنقطه نظر تحولی دوشونوله مزمنی ؟  
 دینی وغایه‌لرینی بر وعمومی بر جوهر مجرد حالنده نظر ملاحظیه  
 آلدقه علم بوبابده آنجق خیالی بر ایضاحات ویره بیلیمکه محکوم

قالدینی حالدہ دین یرینہ حادثات دینہ اقامہ ایدیلیرسه عجبا نه نتیجه حاصل اولوردی ؟ حقیقتده ، دوغرودن دوغرویہ بزہ معلوم اولان یکانه شیلر بو حادثاتدر . بونلری ده دیگر حادثات کی تدقیق ومشاهده ، تحلیل وتصنیف ایتمک قابلدیر . دیگر حادثات حقنده اولدینی کی بو حادثه لردده تجربی قوانینه قابل ارجاع اولوب اولمادقلری آراشدیریله بیلیر . طبیعت کله سیله یالکزر حادثات حکمیه نك هیئت مجموعہ سی معناسی قصد اولوندینی کون طبیعت بر موضوع علم اولابیلدیکی حالدہ نهدن دین بوصورتله نظر ملاحظیه آلیئر یعنی تدقیقات حادثات دینیه توجیه اولونورسه نهدن بر موضوع علم تشکیل ایتسون ؟

فقط عجبا دین ، حادثات دینهدن عبارت تلقی اولوندینی زمان بعض عناصر اصلیه سی خارجدہ بر اقلمش اولورمی ؟ حکمت طبیعیه نك موضوعی اولان حادثات طبیعیه نك خارجدہ طبیعت نامنه تقابل ایدن وهرهانکی بر صورتله بزم دائره تدقیق وادرا کمره کیره بیلیمک قابلیتنی حائر بولونان برشی قالمش اولدینی . کیم ادعا ایدرسه بویله بر ادعای ده آنجق اوسرد ایده بیلیر . حقیقتده ، مابعدالطبیعیه عائد بی اساس فکرلردن کندیسنی . تخلص ایتمش اولان هر مفکره ایچون ، حادثات دینیه وضوح وصراحت ایله توصیف وحکمت طبیعیه نك یاخود فیزیولوژینک قانونلرینه مشابه مثبت قانونلره ارجاع ایدیله بیلدیکی تقدیرده . دین ایله علمک مناسبتی مسئله سنک ارتق میدانن قالقه جفی



آشکاردر . بو مسئله اوزمان علمك شأنت ايله مناسبتی مسئله  
عمومیه سی ایچنه داخل اوله جقدر . بو عمومی مسئله حقیقی  
اولمقدن زیاده لفظیدر . چونکه علم ، آرتق آلمش اولدینی  
شکله کوره ، بزم ایچون شأنتك ممکن اولدینی قدر تام بر  
افاده سندن عبارتدر .

موجودات بو صورته نظر ملاحظه آلندینی تقدیرده ،  
اوکوست قوتی ، هربرت سبنسری ، هه قلی نهایت کری  
چکیلکه مجبورایدن طبیعت بشریه نك اومعنوی ودینی احتیاجات  
شدیده ومبرمه لری عجبا نه اولیور ؟

حادثات دینیه نك پسیقولوژی نقطه نظرندن ایضاحی

بواحیاجلر، شعوره بدیهی و ضروری کی کورونن برطاقم  
 پرنسیپ لرله افاده اولور نورلر. متناهی نك نامتناهی یه تبعیت و مربوطیتی،  
 کائناتك انتظام معنویسی، وظیفه، عدالت دائره سنده نائل  
 مکافات اولمه، خیرك غلبه ضروریه سی پرنسیپلری ایشته بوقیلدندر.  
 حالبوکه اون سکزنجی عصرک موشکاف بر فیلسوفی اولان  
 داوید هام David Hume علیت اساسی مناسبتیه اثبات ایتمدر که  
 ذهنمزه بر حقیقت مطلقه اولق اوزره کورونن بعض حکملر  
 حقیقتده مخلوق ذی شعورده وقوعه کلن باطنی تعدیلاتك مجرد  
 بر افاده سندن و ذکایه انعکاسندن باشقه بر شی دکلدر. واقعا  
 آایله ب آراسنده بر علیت علاقہ سی بولوندیغنه حکم ایتدیکم  
 زمان علیت اساسی دنیلن و بوجه پیشین a priori معلوم  
 اولان بر پرنسیپی تطبیق ایتدیکمی ظن ایدهرم. فقط بو پرنسیپی  
 سرد و اتیان و تحلیل ایتک ایسته دیکم زمان عیر قابل حل مشکلاتلر  
 تحدث ایدر. حقیقتده بن آ آی ب نك تعقیب ایتدیکنی مکرر احس  
 و ادراک ایده ایده مخیله مده وجود بولش بر اعتیاده تبعیت ایدیورم  
 دیمکدر. بو اعتیاد سوقیله درکه آنه زمان وقوعه کلیرسه آرقه سندن  
 ب نك ده وقوعه کله سنه انتظار ایدیورم. ایشته علیت مفهومی ایله

نم ادر اكم بواعتيادی افاده ايتش اولور . عليت اساسنده حقيقي اوله رق موجود اولان شي يالكز افاده ايتديكي روي بر استعداددن عبارتدر . سپينوزاده اراده جزئيه حسني بوكا مشابه بر صورتده تنقيد ايدهر ك بونك بر طاقم افعال و حرركاتده بولونديغمزي بيلديكمز حالده بو شعوره او افعال و حرركاتك اسبابي حقنده بر جهل مربوط اولماسندن ايلري كلديكني كوسترمشدي .

ايشته بو صورتله بعض فكرلري تفكردن آيري شائيتلرله دكل شعور ايچنده محدود بر طاقم حادثات ايله ايضاح ايتكمكه بوفيلسوفلر حقيقي بر انقلاب وجوده كتيريورلردى ، علم وجودى *ontologie* پسقولوژييه قلب ايديورلردى .

بوكون بيله بر چوق مفكره لر ديني شيلري علوم مثبته ساحه سنه ادخاله بو اصولى تعقيب ايدهر ك موفق اوله جقلىرني اميد ايدر لر .

بو صورتله موضوع اولان مسئله اولا تجربه نك كوسترديكى حادثات دينيه يي تدقيق و مشاهده و تحليل ايتمكدن ، ثانياً بو حادثاتك ايضاحاتى حادثات روحيه نك قوانين عموميه سنده آرامقدن عبارتدر .

اليوم علمده اخذ موقع ايتش ، بوتون متخصصلر آراسنده مشترك عد ايديله بيله جك تمام مسلكر موجود اولديغي ادعا ايديله مز . هنوز يكي اولان بوتحريات بويوك اختلافات افكاره ميدان ويرمكده در . اونك ايچون صورت قطعيده اكتساب

ایدلمش نتیجه لردن زیاده بو باده تکلیف اولونان فرضیه لری ،  
اصوللری ، مسئله لری تدقیق ایتمک ضروریدر .

\*  
\* \*

بو تحریاتک نقطه عزیمتی وقایعی ، شعور دینیده نمایان  
اولدقلری وجهله تبیین ایتمکدن عبارتدر . اولدن پیدا ایدیلن  
فکرلر ، هر دورلو نظریه لر ، مسلک لر بر طرفه بر اقیله رق  
ماضیده کی و حالده کی دینلر تحلیل اولونور . بودینلری توصیف  
و تمیز ایدن مؤسسeler ، عمللر ، روحی حالتلر ، اولدقلری کبی ،  
میدانه قونور . بویله شعور دینی یه خاص بر نقطه نظر اختیار ایدیلهرک  
استخراج و تعیین ایدیلن حادثات دینه نک بوتلقیسنه سوثره کتیف  
نامی ویريله بیلیر .

بومعناجه ، حادثه دینه نک اک کوزه چارپان وصفی انسانک  
کندیسنی آز چوق اسرار آلود بر وجود عمومی ایله مناسبتدار  
اولق اوزره تلقی ایلمسی و بعض آرزولرینک تطمیننی اوندن  
بکله مسیئر . اونک بوتون هیجانلرینه ، بوتون تجربه لرینه  
رنک لرینی و معنایینی ویرن شی ایشته بوقناعت ابتدایه در .

یالکز ایمانی بیلوب تصوف حسنی بیلمه نلر ایچون الله ایله  
اتحاد ، تفکرک ، املک و فعل و عملک غایه سیدر . فقط بوغایه  
شیمدیدن تأمین ایدیلهرمز ، بودنیاده پک ناقص بر صورتده قابل  
اولور . بالعکس متصوفه نک شعورنده ایسه الله ایله اتحاد روح  
بشرده فطری و طبعی اوله رق وارددر . روح بشره ترتب ایدن

وظیفه بونی ادراك ایتمك و بوتون حیاتی اونك اوزرینه بنا  
ایلمكدر . ساده جه بر معتقد الله ایله اتحاده دوغرو یورومك  
ایچون فکردن و عملدن حسه دوغرو کیتدیکی حالده متصوفه  
بو اتحاددن حرکت ایدرلر و بو اتحادك ابتدا کندی حسیاتلرینی ،  
صوکره فکرلرینی و عمللرینی تعیین و ایجاب ایتدیکنه قانع بولونورلر .  
متصوفه دهها بودنیاده الله ایله تأمین اتحاد سعادتنی طاتارلر .  
بو اتحاد وجد دنیلن بر حال خصوصی ایچنده تام بر صورتده  
وقوعه کلیر . اوزمان روح الوهیتك سینه سنده الله طرفندن  
یاشادیغنی صریح صورتده حس ایدر . کندیسینی یوق اولمش  
ظن ایتمز . بالعکس کبار صوفیونك مسلککرینه کوره ، روح  
کله نك بوتون معناسیله یاشادیغنی دویار . بوتون حیاتك منبعی  
اولان الله نه قدر صمیمی صورتده برلشیرسه حیاتی او قدر  
قوت و فعالیت کسب ایدر .

ایشته حادثات دینه شعور دینی نقطه نظرندن تدقیق  
و مشاهده اولونورسه کورولن حال بودر . اکر بو حادثات  
یالکز بویله صرف حدسدن عبارت اولان بر نقطه نظرندن  
پیش ملاحظه آلنسه ایدی تضمن ایتدکلی حکملرك قیمتی  
مناقشه ایتمك پك مشکل اولور حتی غیر قابل کورونه بیلیردی .  
کندی کندیسینی حر حس ایدن بر آدمه حر حس ایتدیکی  
ناصل اثبات اولونا بیلیر ؟ کندیسینی الله ایله برلشمش حس

ایدن بر آدمه بویله برشی حس ایتمکه حق اولمادیغی ناصل  
سویله نه بیلیر ؟

ذکالك بالذات کندی ایچندن کلن حکملرینی تنقید ایچون  
هام Hume ک، حادثات روحیه یی سوئر کتیف حدس اصولندن  
باشقه بر اصول ایله تدقیق و مشاهده چاره سی دوشوندیکی  
کورولمشدی. هام، حادثه یی دیشاریدن، اوئر کتیف بر صورتده  
تدقیق و مشاهده ایدر. انسانک وار اولدیغی ظن ایتدیکي شئک  
وار اولوب اولمادیغی، حسیاتنک سببی کبی تلقی ایتدیکي شئک  
اونک وارلنی حقنده بسله دیکمز حسدن مستقل اوله رق کندی  
کندیسنه موجود اولوب اولمادیغی دوشونور و بوشئک بالذات  
حادثه روحیه نک بر افاده سنک خیالی بر صورتده خارجه انعکاس  
ایتدیرلمسندن عبارت اولوب اولمادیغی آراشدرر. ایشته حادثات  
دینه یی یالکز شعورک سوئر کتیف نقطه نظرندن تدقیق ایده رک  
دکل خارجدن و اوئر کتیف بر صورتده تدقیق ایتمک سایه سندم  
بر پسیقولوژی متخصصی اونلری مافوق طبعی ظواهرندن تجرید  
وعلمک قوانینی آلتنه ادخال ایده جکی امیدنی بسله یه بیلیر .

بو اعتبار ایله، بر پسیقولوژی متخصصی حادثات دینه نک  
باشلیجه اوچ قسمه آیرلدیغی کورور : اعتقادات، اصل  
حسیات، آیینلر .

اعتقادات، انساندن خارج ایمشلر کبی تلقی و تصور اولونان  
بر طاقم شیلرک، شائیتلرک صورت ذهنیه لریدر. خارجدن باقیله جق



اولورسه اعتقاد لر، حصوله کلدکلری دورده کی فکر لر ايله، شرائط  
 ذکائییه و اخلاقییه ايله، کذلک اونلری قبول ایدن فردلرک  
 مطالعه لری و آرزولری ایلده صیقی بر مناسبتی حائز کبی  
 کورو نورلر. صورت عمومیه ده انسان، معبودلری، اسکی یونان  
 فیلسوفی قسه نوفانک دیدیکی کبی، کندی رسم و تصویرینه کوره  
 اعمال ایدر. سنت تهره ز قارم راهب لرینه الله طرفندن تبلیغ  
 ایلده چکی سوزلری الله کندی قولاغنه سویلدیکی دویار.  
 حالبوکه الله سنت تهره زه تودیع ایتدیکی درت توصیه  
 سنت تهره زک ذهنی مشغول ایدن شیلرله او قدر صیقی صیقییه  
 حائز مناسبتدرکه بوراده الله آنجق سنت تهره زک شعورینک  
 عکس صدا سندن عبارت اولدیغی حس اتمه مک قابل دکلدر.  
 حس دینینک اعتقاددن آریله رق تدقیقی بر چوق مسائل  
 تولید ایدر. بو حسک عناصری نه لر در؟ حس دینینک ایچنده  
 قورقو، عشق، آرزوی سعادت، سائر انسانلرله اتحاد تمایل  
 فرق اولونیور. بو عنصرلر غایت مختلف نسبتلرده اختلاط  
 ایدرلر و تشریک ایدلکلری عقائده کوره بیک دورلو رنک آلیرلر.  
 حیات دینییه باطنیه نک الک یوکسک نقطه سی وجد و استغراق  
 یعنی الله ايله بلا واسطه بر اتحاد حسیدر. خارجدن باقیلنجه بو حالت  
 شونلردن ترکب ایدر: اولاً، دقت یالکیز بر فکرک یاخود  
 محدود بر مجموعه افکارک اوزرینه طوبلانیر. ثانیاً، شخصیت  
 اورته دن قالقیور یاخود دکیشیور. عینی زمانده جمله عصبیه

غیر طبیعی بر حالده در که بونک ده وصف میتری حساسیتک و حرکتک  
 از چوق تام بر صورتده زوالندن عبارتدر. ذاتاً وجد واستغراق  
 منفرد بر حادثه دکلدر. بر تهیج دوره سنک صوک حدیدر .  
 بو تهیجی بر دوشکونلک تعقیب ایدر. ایشته شدتلی حس دینی  
 بو صورتله از چوق منتظم بر نظمه تابعدر. یا قلاشیر، صوکره  
 اوزاقلاشیر. وجد صفحاتی یبوست صفحه لری تعقیب ایدر ،  
 صوکره وجد باشلار . بو حالتلرک عصی تهیجلر و عصی  
 دوشکونلکلرله مترافق اولدینی مشاهده ایدلمشدر.

دینلرک اوچنجی عنصری اولان آیین، انسان طرفندن قابل  
 اجرا بر طاقم حادثات اولق اوزره کورونورلر. بونلرده مافوق  
 طبیعی دینلن بر فضیلت واردر . یعنی بونلر آ کلامادیغمز  
 و آ کلاشلماسی غیر قابل بر صورتده، دوغرودن دوغرویه انسانک  
 احاطه ایدمهیه چکی باشقه بر طاقم حادثاتک سببی اولورلر.

صوفیه نظرنده آیین بر واسطه دکل بر نتیجه در. بونک  
 نقطه حرکتی روحک بر حالت مخصوصه سیدر. قدرت مطلقه  
 الهیه ایله بر اتحاد کی حس اولونان بو حالت یالکز احتراصلرک  
 وسجیه نک دیکشمه سی کی باشقه حادثات روحیه تولید و تعیین  
 ایله قالماز، جسمانی حادثه لر، عمللرده تولید ایدر .

صورت عمومیه ده دنیله بیلیر که آیین دینی، مادیات ایله  
 معنویات آراسنده و معنویات ایله مادیات آراسنده بر علیت

مناسبتی فکرینی افاده ایدر. بو مناسبتک ناصل اولدینغی بز  
قابل دکل آ کلایامایز.

ایشته حادثات دینییه بی او بر قتیف نقطه نظر دن تدقیق و مشاهده  
ایدنجه بو نوع نتایج استحصال اولونور. حس دینیک تکامل  
تاریخیسی نه صورتله وقوعه کلدیکنی تعیین ایچون ینه بو نقطه  
نظر دن تدقیقاتده بولونیه بیلیر.

فرضا، نقطه حرکتک قورقونک و مخیله نک غلبه سی اولدینغی  
کشف اولونور. بو غلبه نک تأثیریه بالخاصه صاحب قدرت  
ومدهش الهی موجودات تلقیسی وجود بولور. صوکره،  
یاواش یاواش عشق ونشاط انکشاف ودیکر لرینه تقدم ایدر لر.  
عینی زمانده ده ذکا وعقل مخیله نک تصوراتی بقاعده آتیه آلیر لر.  
او زمان الوهیت وحدت کسب ایدر وعینی زمانده سویملی  
وخیرکار اولور: دین، مابعد الطبیعه و اخلاق زنکین و آهنگدار  
بر کل حالنده اتحاد ایدر لر. بو، تکامل دینیک اوج اعلا سیدر.  
نهایت، اوچنچی بر صفحه ده ذکا عنصری احراز تفوق وغلبه  
ایلر. موازنه بوزولور، دین یاواش یاواش علم اوکنده سیلینیر.  
علم اصل ذکایی تطمین ایتک ایچون یاپلشدیر.

\*

\*\*

دینی وقعه لرك او بر قتیف بر صورتده تدقیق و مشاهده سی  
ایله تحلیلی کنیشه دیکه ودرینلشدیکه بز، مثبت بر پسیقولوژی  
متخصصنک املی اولان دواملی بر پسیقولوژی ایضاحاتنه دوغرو  
کوتورور.

دینی وقعه لرك ، معتقد كيمسه لرك شعور لرينك ايسته ديكي  
 كي، مافوق طبيعي واسرار آلود بر طاقم مداخلة لرله می ايضاح  
 ايدلسی لازمدر يوقسه طبيعت بشريه نك قوانين عموميه سی بونلری  
 ايضاحه كافيميدر ؟ موضوع بحث اولان مسئله ايسته بونی  
 بيلمکدر.

حالبوکه هانکی حادته اولورسه اولسون، بر کره او بر قتیف  
 ومعلوم محتویاتنه تنزیل ایدیلیر وعلمک مشغول اوله جنی وقعه  
 ایله بو وقعه نك معتقدك سو بر کتیف شعورنده نه صورتله دوشو -  
 نولدیکی صریح صورتده تفریق اولونورسه ، پسیقولوژیجیلک  
 Psychologisme نامی ویريله جک اصوله کوره ، حادته نك  
 ایچنده علی العاده پسیقولوژی قوانینله قابل ایضاح اولمايه جق  
 هیچ برشی بولومادیغی کورولور.

حس دینیک ارجاع اولوندیغی خوف، جاذبه، خودکاملق،  
 قابلیت موانست کی حسیات انسانک طبیعی حسیاتیدر. وجدک  
 وصف ممیزی اولان دالغینلق و یالکیز تک بر فکر بسله مک  
 حالی ایله وجدده کورولن تهیج و دوشگونلک صفحه لری  
 عمومیتله حیات حسیه عاڈ اولان اوصافک حال افراطه  
 وارماسندن باشقه برشی دکدرلر. روحک بوتون قوتلریغی  
 یالکیز بر شیئک اوزرینه طوبلامق احتراصک خاصه سیدر .  
 تهیجک ، دوشگونلکک توالیسی ده بو حیات حسیه نك قانونیدر.  
 تصوف تظاهراتنه اوزاقدن یقیندن مشابه حادثات بعض امراض

عصبیه ده هر زمان مشاهده ایدیلور . بعض ایستہری حالاتندہ مصرأ دینی دوشونجه لر ، الله ، مریم یاخود شیطان تأثیرلری حسی ، ملاحظات اخلاقیہ دن منبعث ہدیائلر ، کناہ فکر ثابتی ، عذاب وجدانی وعذاب آخرت اندیشہ سی ایستہری اوصافیلہ مشترکاً طبیعی صورتدہ نمایان اولورلر .

کذلک اعتقاد ، افکار ، کوزہ بعض شیلر کورونمہ ، وحی کبی فیکری یاخود خیالی حادثات دہ انسانک روحی تعدیلاتہ اوغراماسی ایلہ قابل ایضاحدر . برعلوی وارلق تصور ایدوبدہ بونلری اونک نتیجہ سی و صورت ذهنیہ سی عد ایتمکہ هیچ لزوم یوقدر .

بونلری علوی تأثیرات ایلہ ایضاحہ قالمق انسانک جہالتندن ایلری کلیر . عنعنہ وعادتک رہبرلک ایتدیکی مخیلہ بوجہلی تلافی ایتمکہ چالیشیر . بر آدمک مزاجنی ، معلومات مکتسبہ سی ، تجربہ شخصیہ سی و شرائط حیاتیہ سی کافی درجہدہ بیلن ایچون اونک اعتقادلرندہ ، کوریورم ظن ایتدیکی شیلردہ ، اوکا کلن وحیلردہ یکی ومعجزہ آلود هیچ برشی یوقدر . انسان ، کندیسنہ مافوق طبیعی کبی کلن شیلرک کافہ سی خبری اولمقسزین کندی اعماق حافظہ سندن چیقاریر . الله سنت ترزہ خطاب ایتدیکی وقت ، اونک فرقہ وارمادن الله سویلتدیکی سوزلری سویلر . بزنی تنویر ایتمک ، بزم یاردیممزہ کلک ایچون کوکدن ایندیردیکمز موجوداتک جوهرینی تشکیل ایدن شیلر بزم

آرزو لر مز، قورقو لر مز، اندیشه لر مز، بیلگی لر مز، جهالت لر مز،  
اعتیادلر مز، محبت لر مز، احتیاصلر مز، احتیاجلر مز، تمایلر مز دره.  
بو دیگر بیلگی مزله برلشهرک دها قوی، دها بویوک، دها ای  
اولمق ایچون بز انسانلر کندی کندی مزی خارجه عکس ایتدیریر زه.  
ایشته الله بو آری برشی کی اولان بیلگی مز دره. بونی خلق  
ایدن عملیه بی شعورانه وقوعه کلکده دره. بزم بیلگی مز بویار ایدی  
شیده کندیسی طانیاز. جمله عصبیه نک بر حالت غیر طبیعی سی  
بزده معین بر تهیج درجه سی وجوده کتیریر سه بویار ایدی  
شیئی یالکیز بر موضوع اعتقاد اولمق اوزره قبول ایتسکه  
قلمایه رق اوندن قورقارز. او بزده ضلالت حس تولید ایدر،  
کوز مزه بعض شیلر کورونور. ناصل که بعض احوالده حس  
وادر اکلر مرک بقیه لری، طور طولری ده ایشه بویله بر حاله بر  
سبب تشکیل ایدر لر.

حسک، اعتقادک و آیینلرک بر برلری اوزرینه اولان متقابل  
تأثیرلری ایضاح ایچون مافوق طبیعی بر مداخله مراجعت  
ایتسکه ده هیج حاجت یوقدر.

حس، یکانه حادثه اصلیه اولدیغی ایچون فکرلرک بونلرک  
بر ترجمه فکریه سندن عبارت اولدقلری قبول ایدیله بیلیر.  
ذکانت رولنی دائره شعور مزه داخل اولان و حد ذاتند  
غیر قابل تفکر بر ماهیتده بولونان حسیاتی صورت ذهنیه لر  
تحویلدن عبارت اولدیغی نظریه سی بو کون پک تعمیم ایتشدرد.



برشینی دوشونمك اونی ایضاح ایتك ، یعنی مفهومی اولدن  
 زده موجود اولان برسیبه ، بر نمونه یه ، بر غایه یه ربط ایتك  
 دیمکدر. ذکامنر حسیاتمزی ایضاح ایچون بویله کندیسینه  
 آلیشغین کله جك مناسب بر برنسپ آراره. بزه الك آلیشغین  
 کله جك شی کندی فعالیتمز اولدیغی ایچون ذکا ابتدا بزم  
 فعالیتمزه مشابه بر سبب فرض ایدر. صوکره ، طانیدیغمز  
 شیرل چوغالده ایچمزده چرپندان حسیات ایله ممکن اولدیغی  
 قدر متناسب بر طاقم اسباب و اشیا ارئه ایدر بیلیمك ایچون  
 قیمتمدار بر خزینه اولان حافظه یه مراجعت ایلر .

اگر خصوصات دینییه دهها زیاده فیکرلرک حسیاتی تعیین  
 وایجاب ایتدیکی قبول اولونورسه، پاسقالک اعتقاد ایتدیکی کی،  
 ذکالك قبول و تسلیم ایتدیکی بر حقیقی قلبه صومق ایچون  
 هدایت ربانییه احتیاج قالمایه جی آشکاردر . حسیات بشریه  
 ذکایه بیکانه دکلدردر . حسیاتک انسانی اولوشی حتی الك حقیر  
 اشکالنده بیلله ذکا و فکر ایله علاقه دار بولونماسدن نشئت ایدر.  
 انسانک حسیاتی و خط حرکتی اوزرینه فیکرلر و عقل ایله  
 اجرای تاثیر ایچون صرف ایدیله جك مساعی ، فلسفه دنیلن  
 شیدر. ذاتاً عقل کله سی عمومی طرز قبولنه کوره هم نظری  
 هم عملی بر قیمتی حائزدر. فیکرک و عقلک تاثیرینه اعتقادک ،  
 بوتون فلسفه نك بر فکر باطلدن عبارت اولدیغی کیم ادعا ایدر بیلیر؟  
 بزهر کون بالتجربه کور بیوزرکه بر فکر، بر مسلک، بر اصول

حسیات مزه ، محبت مزه ، احتیاط مزه بر شکل و ریوز .  
 روسونك مسلكنك بر چوق كشيلرك طرز محبتی وحسی  
 دكشیدردیكى تاریخچه معلوم بر کیفیت دكلیدره حسیات مزك  
 قسم اعظمی محصول ادبیات دكلیدره تلقین تجربه لری فیکر لرك  
 نه درجه لره قدر برر قوت اولابیله جکینی اثبات ایتمشدر .

اگر آینلر حادثه اولین عد اولونیورسه حسیات ومعتقداتی  
 بونلردن انبعث ایتدیرمك ایچون بو اعمالده مکنوز مافوق  
 طبیعی بر خاصیه مراجعت ایتك لزومسزدر . افعال وحرکاتك  
 تفکر اوزرنده کی تاثیر طبیعیسنی خاطره کتیرمك کافیدر .  
 باسقال شومشهور جمله سی ایله بوفیکری پك قوتله افاده ایتمشدر :  
 « ماء مقدسی آلکز ، آینلر یاندر کز ، بوسزی طبیعی صورتده  
 معتقد یابه جق وابلهلشدیره جکدر . »

تکاملنك هیئت مجموعه سیله پیش ملاحظیه آلدینی زمان  
 حادثه دینی نك سلسله ادوار آراسنده عرض ایتدیکی تکامل  
 منتظم ، بوراده مافوق طبیعی تاثیراتك تظاهری موضوع بحث  
 اولمادیغنی اثباته یالکز باشنه کافیدر . طبیعتك تاریخنه حاکم اولان  
 عمومی بر تکامل قانوننك کشفی ، ایجاد وبقای کائنات حقنده  
 علم الهیاته عائد مذهب لرك برطرف ایدلمسنی انتاج ایتمشدر .  
 اگر دینك انکشافی ده هر هانکی بر دوری کنیدیسندن اولکی  
 دوره سنه بر قانونه تبعاً صورت ضروریه ده مربوط اوله جق  
 صورتده بر تکامل کچیرمشسه دینی ده برطرف ایتك ایجاب ایدر .

پسیقولوژی منتسبلرینک تکامل دینی حقنده خطوط عمومیه سیله  
چیزمکه موفق اولدقلری لوحه ایسه دینک بویله منتظم برتکامله  
تبعاً انکشاف ایتش اولدیغنی کوسترد.

خلاصه ، اکر حادثات دینه نك تفسیرینه پسیقولوژی  
اصولنك تطبیقی ایضاح ایدلمه مش نقطه لر براقیورسه بونلرک  
— اعتقادات دینه نك لزوم کوستردیکی وجهله — مافوق طبیعی  
واسرار آلود بر سبب ایله ایضاحی فرضیه سی شبهه یوق که هیچ  
دکلمه موقه ادا مه ایدلمیدر. فقط بویله بر مسئله ده هر شیئی  
بیلیمک و آکلامق نقطه سینه وارلمادیغنی آشکار اولقله برابر  
حادثات دینه حقنده کی وقوف ده حادثات حکمیه ده کی وقوف  
کیدر : بونلر حقنده مالک اولدیغمز معلومات اصول علمینک  
حادثاتک طرز حصولنه تمایله توافق ایتدیکنی ، تام کلدیکنی  
کسیدر مکمل کمزه کافیدر. حقیقت بزه پرنسپلر من واسطه سیله  
ایضاح ایدیله مه یه جک هیچ برشی عرض ایتیه جکدر . بزم  
ایچون هنوز ادراک ایدلمه مش بر طاقم شیر واردر ، فقط ناقابل  
ادراک برشی یوقدر. ایضاح ایدلمه مش واردر. غیر قابل ایضاح  
یوقدر. چونکه اصل ولبنده پیش ملاحظیه آلنان حادثه دینه یی ،  
روح بشرک قوانین عمومیه سیله پسیقولوژی نقطه نظرندن ایضاح  
ایدیوروز. حادثه دینه نك بواصل ولبی ایسه دینی وقعهرک  
کافه سنده همه حال بولونه جقدر .

۲

حادثات دینیه نك سوسیولوژی نقطه نظرندن ایضاحی  
ایشته پسیقولوژی منتسبلرندن بعضیلری بویله، حادثه دینیه نك  
بوتون اوصافی، هیچ بر بقیه، طورطو براقسمزین نهایته  
قدر کاملاً ایضاح ایچون لازم کلمنابعی فیزیولوژییه استناد  
ایدن پسیقولوژیده بوله جقلرینی ظن ایدرلر. فقط ینه بشری  
وقعه لرك مثبت صورتده تدقیقله مشغول اولان، فقط بوقعه لری  
باشقه بر منظره آلتنده پیش ملاحظه آلان دیگر بر علمك  
منتسبلری، سوسیولوژی علماسی، اونلرك بو تشبثده موفق  
اولایلملری احتمالی قبول ایتمزلر.

سوسیولوژی علماسینه نظراً، پسیقولوژی، دینی آنحق  
فقیرلشدیرهرك، پارچه لایه رق، اصل اساسلی عنصرینی خارجه  
براقرق کندیسنه تمثیل ایدر. پسیقولوژی متخصصلری حادثه  
دینیه نك سوؤرکتیف طرفه مربوط قالیرلر و تصوفده اك بارز  
و مکمل برتظاهر دینی کورورلر. فقط اك کزیده سوسیولوژی  
متخصصلرینه کوره دین باطنی، دین اجتماعینک فردی شعورلرده  
آز چوق مبهم و خطالی بر صورتده طنین انداز اولماسندن  
عبارتدر. بر متصوف، دینی کندی حیاته یاخود فلسفه سینه  
توفیق ایدن بر احتراض یاخود تفکر و ملاحظه آمیدر. دین  
حقنده بر علم تأسیسی جداً آرزو اولونیورسه اونی اويله مشتق،  
بوزوق، سوؤرکتیف و مبهم شکلری آلتنده دکل ابتدائی

عمومی، او بڑا قتیف، مادی وار لغیلہ پیش ملاحظہ آلمق ایجاب ایدر. تدقیق اولونہ جق، فکر لری آلنہ جق کیمسہ لر خولیا پرور لر، مستثنا کیمسہ لر، خستہ لر، فیلسوف لر ورافضیلر دکلدرد. ملتک و فرد لک مقدراتندہ مهم واصلی بر عامل اولان واولمقدہ دوام ایدن ذی حیات، ذی نفوذ دینک اصل صاحب صلاحیت ممثلارینه، اورتودوقسلرہ باقالیدر.

اگر بوصورتلہ، حس دینی دکل دہ دینلک کندیلری تدقیق اولونورسہ کورولورک دینلک اک اساسلی مفهوم لری فرض، حرام، مقدس مفهوم لریدر. هر دین، معنوی بر قوتدرکہ فردہ کندیسنی قبول ایتدیرر، اوکا حاکم اولور. اونی طبیعتنہ بیکانہ حرکاتہ یا خود پرہیزکار لغہ سوق ایدر. یالکیز فردی طبیعتلری تدقیق ایدن پسیقولوجی ناصل اولورده حادثات دینہ بی ایضاح ایدہ بیلیر؟ موجود رسمی دینلک دین نہ اولدیغنی حقیقہ بیان ممثلری پسیقولوجی علماسنک سوزده بو ایضاحاتلرینہ قارشى اعتراض ایتکده حقلیدر لر. چونکہ بو ایضاحاتلر مسئلہ بی بیلیمہ مکدن متولد بر سفسطہ در. بونلر دیندہ اصل دین اولمایان شیئی نظر ملاحظہ آلہرق ایضاح ایدلمسی لازم کلن شیئک یانندن کچور لر. اونک ایچون پسیقولوجیکلک وظیفہ سنی بتیرمش عد اولوندیغنی زمان، دینی مافوق طبیعی، علمک حقایقنہ غیر قابل ارجاع بر مؤسسہ یاپان اوصافی بری طرفدہ هنوز ال سورولمہ دن دورور. فیلسوف لر، پسیقولوجیکلک قارشیدیندہ فرض و حرام

اساسلريني ، قانتك قطعي اوامريني ، اومنشأ علويسيله برلكده  
ادامه ايتمكده حقلري واردر . چونكه قانتك مسلكي ، قسم  
منفيسينده ، وظيفه فكيرينك ، بر ذهاب باطل كي ، فردی  
شعور قانونلریله ایضاح اولونایله جكنه اینانمقدن عبارت اولان  
خطايي پك حقلی اوله رق رد ایلشدر .

علوم مادیه و حکمییه دینی علمه أرجاعدن عاجز اولدیغی  
کبی پسیقولوژی نك قوتی ده بوکا کافی دکلدر . اکر پسیقولوژینك  
فوقنده بر علم قصوا ، سوسیولوژی موجود اولماسه ایدی ، اونك  
قارشیدیننده نهایت بوتون اسرار زائل اولماسه ایدی ، بونی  
یابه یلمك امیدینی کسمك اقتضا ایدردی .

\*  
\*\*

اسباب علویه یی ازاله و بوتون حادثاتی بسیط قوانین طبیعیه  
ایله ایضاح ایدیه بیله جك حاله كلك ایچون پسیقولوژی ایجاب  
ایدن تعدیلاتی یاپدی . یالکیز محتاج ایضاح حادثاتی میدانه  
قویمقدن باشقه برشی یایمیان سو برکتیف تدقیق و مشاهداتك  
یرینه او برکتیف تدقیق و مشاهدیه یی اقامه ابتدی : روحی حادثاتی ،  
حکمت شناسلرك حادثات حکمییه یی تدقیقلری کبی خارجدن  
تدقیق ایتمكه چالیشدی .

فقط بو ، هله حادثات دینییه موضوع بحث اولورسه ،  
یایمقدن زیاده سویله مسی قولای بر ایشدر . معلومدرکه متصوفه  
دین خصوصنده بو اصولك استعمالنه قارشى شدتله اعتراض



ایدرلر . چونکه بوکا بر صلاحیت یوقدر . حادثه تصوف بر تجربه در ، مفهومات ایله ، کلمات ایله غیر قابل افاده بر تجربه در . بونی نفسنده تجربه ایتمه ین هیچ کیمسه نه اولدیغنی بیهله مز . بناء علیه بویه بر حادثه خارجدن تدقیق و مشاهده اولونه ماز . بوباده بر فکر ایدینمکه خدمت ایدن علامت خارجیه نك کافه سی اونی آکلاتمقدن عاجزدر .

صوفیه نك بواعتراضلرینك قیمتی نه اولورسه اولسون سوراسی محققدر که پسیقولورثیده صرف خارجی بر تدقیق و مشاهده فیکری واضح برشی دکلدر . هله پسیقولورثی منتسبلرینك شعورك ایلك معطیاتی اوله رق ، تشارك مسلکی طرفدارلرینك قبول ایتدیکی کبی ، بر بردن خارج حالات شعور یا خود حادثات یرینه توحید و ترکیب محصولی بر فعالیت روحیه یی اقامه ایتلرندن بری بو وضوح بوتون بوتون آزماشدر . بوندن دولاییدر که ، تشارکیلك نظریه سنك تصور و تأسیسه سائق اولان علمی ایجاب و ضرورت کیفیتنك پسیقولورثیه تطبیقی کیفی ، مبهم و مشکوک بر حال الماشدر .

سوسیولوژی بو مشکلاتره دوشمنیور . وقعه لری ، بر طاقم مؤثراتك سوقیه ضروری اوله رق وقعه کلیر دییه تلقی ایدن ، صورت قطعیه ده اوبرقتیف بر اصولك تطبیقی دائرة امکانه صوقه جق بر نقطه نظردن تدقیق ایدیور . فی الحقیقه اجتماعی حادثاتده اوبرقتیف صورتده آکلاشیله بیهله جك مرئی عنصر ،

ایریشلمسی مطلوب اولان شأینک آزچوق صادق بر اشارتندن، ساده جه بر عنصر مترافقدن عبارت دکلدر. کندیمی بوشأینتدن عبارتدر. یاخود اوشأینته دوغرو اوله رق قابل اسناد بر صورتده مربوطدر. بر فردك روحی دنیلن شی بر شأینتدر که نه یاپیلیرسه یاپیلیر، اونی تظاهر ایتدیرن حادثاتدن آیریدر، فرقلیدر. فقط بر هیئت اجتماعیه نك روحی بر تشبیه واستعاره دن عبارتدر که معناسی، خارجی و مرئی بر طاقم اجتماعی وقعه لرك هیئت مجموعه سندن اوتیه که مز. سوسیولوژی، حادثات صورتده تظاهر لری ایله عینی شی اولان بر طاقم شأینتله مشغول اولدینی ایچون پسیقولوژینك احتمالکه ده ها خیلی زمان واصل اولامایه جنی صریح و قطعی بر او برقتیفدکه مالکدر.

عینی زمانده سوسیولوژینك ساحه تدقیقاتنك ده ها کنیش اولدینی آشکاردر. واقعا انسانینك حیات اجتماعیده اظهار ایتدیکی بوتون اوصاف، فردلرده فعلاً یاخود بالقوه موجود اولق ایجاب ایدر. فقط فردلرده غیرمعین و غیرقابل فرق وتمیز بر طاقم احتماللردن عبارت اولان شی هیئات اجتماعیده مهم حادثات ایله انبساط ایدر، تأثیرات یاپار، تکامل وتظاهر ایدر. فطرت بشریه نك او اینانلار زنکینلکی، اوخارقه نما توافقی قوتی، هرجهته کی ولودیتی آنجق خارجی و مشترک حیاته صورت جدیده موجوددر، مرئیدر.

سوسیولوژینك، انسانی وقعه لری علمی بر ضرورت و ایجاب

پسیقولوژیدن دها ای تابع طوته بیلیمسی، پدش ملاحظه آلدینی  
 شیئک واضح و صریح اولماسی سایه سنده در . مابعد الطبیعه  
 علماسنک وقعه لری قانون حاله تنزیل وارجاع ایده بیلیمک  
 ایچون بو وقعه لرك آرقه سنده اونلره حاکم برر جوهر مجرد  
 تخیل ایتمه لری بیهوده دکلدی . اکر مشترک بر پرئسیپ وقعه لرك  
 تملی تشکیل ایتمورسه بونلرك بر برلرینه مربوط اولدقلرینه ،  
 بر برلرینه داخل بولوندقلرینه ، منظومه لر (سیسته ملر) تشکیل  
 ایتدکلرینه ناصل امین اولابیلیرز؟ علم وجود جیلک *Ontologisme*  
 حادثاتک بر برلرینه ارجاعی کیفیتنی — که علم بونی بر مصدره  
 اوله رق درمیان ایدر — خیالی بر صورتده تفسیردن باشقه  
 برشی دکلدی . بو ارجاع کیفیتنک مفروض آنلرینی بررسلسله  
 مراتب مفهومات ایله ایضاح ایدردی . فقط علم وجود جیلنی  
 ایله ساده جه بر طرفه آتمق قابل اولماز ؛ اونک آز چوق  
 بروجه پیشین *a priori* یابدینی ترتیبی، تجربه واسطه سیله تأمین  
 ایده جک بر اصول ایله استخلاف ایتک ایجاب ایلر . حادثاتک  
 بر ایجاب و ضرورت و محصولی اولمالری ایچون الزم بولونان او تجربنی  
 انسجام و ترتیب پرئسپندن پسیقولوژیکیلک مسلکی محرومدر .  
 روح ، ذی شعور یا خود تحت الشعور انا ایله بر طاقم مبهم  
 مفهوم لردر که جوهرک عارضی ایله علاقه سنی آنجق مبهم صورتده  
 تأسیس ایده بیلیر . بالعکس معلوم بر هیئت اجتماعی صریح بر  
 وقعه در . ترکب ایتدیکی بوتون وقعه لری — مشروط اولان

شیلری شرطلرینه ربط ایدر کی — بو هیئت اجتماعیه برلشدیرن ایجاب و ضرورت عالم مادیده معلوم بر منظومه نك، فرضاً منظومه شمسیه نك حادثاتی یکدیگرینه ربط ایدن ایجاب و ضرورتدن دهآز علمی دکلدر. تدقیق و مشاهده اوزرینه مبتنی اولان سوسیولوژی تدقیق و مشاهده حدودینی تجاوز ایده . بیله جك حالددر. استناد ایتدیکی تاریخ ایله حکمت وجودینی بنمسه دیکی علم وجود آراسنده اورته بر موقع اشغال ایدر . بو اعتبار ایله تمام برعلمه بکزر. بویله برعلم کی سوسیولوژی ده حد ذاتنده آنجق برر مالزمه دن عبارت اولان وقعه لردن فضله اوله رق بو وقعه لری بر اصول تحتنده ترتیب و جمع ایتمکی مشروع کوستره جك خصوصی بر پرنسپیه ده مالکدر .

بناءً علیه ، بوتون انسانی وقعه لر کی دین وقعه لرکده تام بر صورتده ایضاحی حتی علمی صورتده حلانی سوسیولوژیدن بکله مک اقتضا ایدر .

\*  
\* \*

سوسیولوژینک بر علم صفتیه تعریفندن ده آکلاشیلور که موضوع تدقیقی دین دکل حادثات دینه در . همده بو حادثاتک اوههم هیئت مجموعه سی دکل بونلری تقسیم قابل اولان مختلف صنوف تظاهراتیدر. هر علم کی اوده جزء لردن کله ، تحلیلدن توحید و ترکیه دوغرو کیدر. هنوز یکی تشکل ایتشایتمه مش اولمقـله برابر تفرعات تدقیقاتنده ، یالکـز بر ماده حقنده کی

تدقیقاتنده ، تحریات تاریخیه سنده نظریه لرندن ، هیئت مجموعه حقنده مطالعه لرندن دها میتندر. دینک ، قدسی ، قربان ، آیین ، عقیده ، خرافه مفهوملری کبی ، اک بارز عناصرندن بعضیلرینی ممکن اولدینی قدر مکملیتله تحلیل ایتمکه موفق اولان سوسیولوژی علم نقطه نظرندن حائز قیمت برطاقم نتایج استحصال ایدمک ایسته نیورسه هانکی استقامتده یورومک مناسب اولدینی شیمدین تعینه قادردر.

سوسیولوژی ابتدا عظیم تحریاتی ، تاریخی تبعاتی ، مقایسه لری وتحلیللری سایه سنده حادثات دینیته نک حقیقی اصل ولبنی قطعی وامین اوله رق تعیین ایتمکه موفق اوله جغنی امید ایتمکده در . بواصل ولب ، تظاهرات دینیته نک کافه سنده موجود اولان شیدر . تحلیل نتیجه سنده بونک بر عنصر ابتدائی اولدینی و دیگر عناصرک موجودیتلری واوصافی هپ اوندن ایلری کلدیکی کورولمشدر . حالبوکه مقتدر سوسیولوژی منتسبلرینک آثارندن آکلاشلدیغنه کوره بو عنصر ابتدائی ، حس دینی دنیلن شی دکلدر . حس دینی بعض حادثات دینیته ده اکثریا بولونماز و موجود اولدینی یرده ده مشتق وعینی غایه یه متوجه برطاقم حادثاتک هیئت مجموعه سی حالنده ، مرکب صورتده نمایان اولور . بواساس ، موضوعنده نظر ملاحظیه آلنان اعتقادده دکلدر . جوهری برر شائیت اولمق اوزره تصور ایدیلن نه الله نه ده مافوق طبیعی

دینک عناصر اساسیه سی اولامازلر . چونکه حادثات دینه نك  
محقق صورتده موجود اولدقلری بعض یرلرده بونلره تصادف  
ایدیله دیکی چوق واقعدر .

بوتون تظاهرات دینه ده هر زمان مطلقا تصادف اولونان  
شی عقاید ایله آیندر ویالکمز بونلردن عبارتدر . عقاید بعض  
معین اعتقاداتی بسله مک یولنده کی بر مجبوریت مقدسه دن عبارتدر .  
آیین ایسه بو اعتقاداتك موضوعنه تعلق ایدن كذلك مجبوری  
بر طاقم اعمالك هیئت مجموعه سیدر .

بوراده اساسلی اولان جهت بمض شیلره مربوط اولان  
وبعض اوامر ویانواهی بی انتاج ایدن بر قدسیت مفهومیدر . مقدس  
عد ایدیلن شی بر قوتدر که بوکا تجاوز یا خود حرمت ایدلدیکنه  
کوره همه حال یا مشئوم یا مسعود بر صورتده اجرای تأثیر  
ایدر . ایشه بومفهومدن عقیده لر و خرافه لر یا خود قدسی شیلرک  
ماهیتنه و خواصنه متعلق نظریه لر و تارخیلر تولد ایدر . ینه عینی  
فکردن آینلر یعنی دشمن قوتلری ضبط و تسکینه و خیرکار  
قوتلری جلبه خادم عمللر نشئت ایلر .

بو عقیده لر و آینلر روحده حاصل اولان حسیاتك واعتقاداتك  
سبیدرلر . بر شئیك حائز اولدیغی مقدسیت صفتی ، تضمن  
ایتدیکی حکم و نفوذ ایله ، او یله بر سبب اعتقاددر که بونك  
اوکنده عقل ، طبعی اوله رق کمال انقیاد ایله اکیلیر . مقدس شی  
ایله مناسبتك تولید ایتدیکی هیجانلرک ، تمایللرک ، افعال و حرکاتك



وافكارك هيئت مجموعہ سی حس دینی دینلن و ظاہراً خصوصی  
کورونن او درین و قدسی حسی تولید و احجاب ایدر، انکشاف  
ایتدیرر .

حقیقتده دینی بر حس مخصوص موجود اولمادیغی کبی دینی  
بر اعتقاد مخصوص ده موجود دکلدیر. حس و اعتقاد کرک حیات  
دینیه ده کرک حیات عادیه ده حد ذاتلرنده بر برلرینک عینیدر .  
یالکیز باشقه باشقه سبیلردن دولایی حصوله کملردر. حیات  
دینیه ده بونلر خصوصی بر شکل المشلردر که بوده بر شیئہ  
عطف اولونان قدسیتمک نتیجه سی اولان بر مجبوریتدر. بوفکر  
هر طرفدن مؤمنک حس و اعتقادینه نفوذ ایدر. ایتانمق اونک  
وظیفه سیدر. اعتقادینک غایه سی ایسه او مقدس شیئہ مدیون  
بولونیلان عبادتی ایفا مجبوریتدن باشقه برشی دکلدیر. بسله دیکی  
حس، خوفک یا خود عشقک ناقابل تجاوز برشی فکری ایله  
و مجبوری آیینلری اجرادن روحده متولد برطاقم انطباعات ایله  
امتزاجندن مرکب بر خلیطه در. بو بر زهددر، حرمتدر،  
اینجہ ملاحظاتدر، پرستشدر، تصرف یا خود وجددر. بوتون  
بو روحی حادثه لرده دینی اولان شی یالکیز شکلدر. اساس  
دکلدیر. حسیات و اعتقادات دینیه قدسیتم یا خود مجبوریت  
فکری ایله خارجدن تعدیل ایدلمش اولان حسیات عادیه  
و مشترکدن عبارتدر .

اگر بویله ایسه پسیقولوژینک نه دن دولای حیات روحیه نک  
قوانین عمومیه سنده دینک بوتون عناصرینک ایضا حاتی هیچ  
بر جهتی نقصان براقه دن ، بولامایه جنی آچیقجه کورولور .  
فرضا ، اهمیت فوق العاده سنی سوسیولوژینک تحلیل لرندن  
آکلادیغمز مجبوریّت مفهومی دوشونه لم . پسیقولوژی متخصصی  
نظر نده بو مفهوم شو نقطه لره ارجاع ایدیله یلیر : اولاً ، بو بر  
تجریّد در که بو واسطه ایله فعالیت بشریه نک بعض شیلره دوشور  
طبیعی و ضروری تمایلی یالکز شکلی اعتباریله ( یعنی کړک  
انساندن کړک تعقیب ایدیلن غایه دن متجرد بر حالده ) نظر  
اعتباره آلینیر . ثانیاً ، ادراک ، عمل غایه سنی تعقیب ایده رک ،  
کندی مقولاتی اعانه سیله ، بو تجریّد اوزرنده ایشلر و مجبوریّت  
میدانه چیقاریر . بناءً علیه مجبوریّتک آنجق بر ذهاب باطلدن  
عبارت اولدیغی کورولور .

فقط قانت مجبوریّت اخلاقیه نک خصوصیتی و مافوق  
روحی منشائی پک کوزل میدان قویمش و بونلری تکرار تأسیس  
ایتمشدر . بو مجبوریّت بر شأیندر . پسیقولوژی ایله ایضاح  
ایدیله مه مکله برابر بر ذهاب باطلدن عبارت دکدر . یالکز  
شعور فردینک فوقنده بر ترتیه ربط ایدلمک ایجاب ایدر .  
قانتک ، مفهوم لری تحلیل سایه سنده اثبات ایتدیکی بوشیئی  
سوسیولوژی وقعه لری شرح و ایضاح صورتیله ارا نه ایلر .  
مجبوریّت یالکز هر دینک اک اساسی واک ثابت حادثه سی دکدر .

او بر طاقم صنعی مسلک را یا خود فیلسوف لک و خوالیا پرور لک خیالاتی بر طرفه بر اقیلوبده اصل مؤسس ادیان پیش ملاحظه به آنیرسه کور و ولور که بوجبوریت فردک تمایلات طبعیه سنه یا بانجی حتی معارض کیدر . دینلر طرفندن وظیفه حاله چیقارلماش هیچ بر چیلغینلق یوقدر . بونلرک ایچنده اک نجیبانه لری، اک خیر لیلری بیله فردی کندیلنکسندن قبول ایتیه چکی بر طاقم قاعده لره تابع بولوندر مقدر کری دورماز و اوکا طبعته آز چوق مغایر بر طاقم افعال و اعمال تحمیل ایدر .

شبهه یوق که حادثه دینه فردک روحی ایچنده نمایان اولور . فقط روحنک ساحه شمولنی تجاوز ایدر . یالکزر روحک ملکاتیه ایضاح ایدیه من .

او حالده، دینلرک سویلدکلری کبی، بونلرک منشأ لری بر طاقم علوی اسبابه عطف ایتک مسلکنی می قبول ایجاب ایده چک؟ شبهه یوق که بومسلک صرف بسیق و لوژی به استناد ایدن ایضاحاته فاقدر . چونکه هیچ اولمازسه ایضاح ایدلمسی ایجاب ایدن وقعه بی بروجه پیشین، کیفی صورتده بر طرف ایتمز، علی حاله محافظه ایلر . سوسیولوژینک تحریاتنه آلیشماش کیمسه لر ایچون بو سیستم بر درجه به قدر موقه حقیقی ارئه ایدر . موجود بر قانونی، ایضاح ایده میورم دییه رد و انکار ایتکدن ایسه اونک فرضیه شکنده یا خود خطالی بر صورتده ویریلن ایضاحاتنه اینانمق اولادر . وظیفه به بن اینانیور و بونک ایجاباتی اجرا ایدیورسه م

وظیفه‌ی یهوانك برامری عد ایدوب ایتمه مكل كمك علمی نقطه نظر دن نه تأثیری، نه اهمیتی اولور ؟

فقط ، مجبوریتك علوی بر سبيله ایضاحی قبول ایتمه سوسیولوژی منتسبی مجبور دکلدر . چونکه او علوی سبب یرینه طبیعی بر معادل اقامه ایده بیلیر . بو، حادثه دینهك هم ضروری هم کافی بر سببی اولور .

بو « معادل »، هیئت اجتماعیك کندی اعضالی اوزرنده اجرا ایتدیکی تأثیردر .

بر هیئت اجتماعی کندی اعضالینی طبیعی اوله رق بعض اوامر ونواهی به تابع بولوندر . بونلره رعایت او هیئت اجتماعیك بقا ودوامی ایچون بر شرط کبی تلقی اولونور . شبهه سز که بو هیئت اجتماعی بر طاقم فردلردن مرکب بر مجموعه در . فقط او فردلر بوضورتله ترکیب ایدنجه، فرد حالنده قالدقلری زمان بیلمدکلری یا خود رد ایتدکلری بر طاقم غایه لر قبول ایتشلردر . جماعتجه مشترک بر اراده، فردی اراده لرك یکون حساسیسی ایله هینچ حائر مناسبت دکلدر . بر جمعیت بشریه یکی بر جوهر مجرددر . روح اجتماعی تعبیری مجازی واستعاری بر صورته بر حقیقت مثبتینی افاده ایدر . هر موجود حقیقی کبی بر هیئت اجتماعیده کندی وارلغنی محافظه ایتمه ساعیدر .

هپسی بو قدرله ده قالماز . جماعتجه مشترک فعالیت بر کره تحریک ایدیلنجه یالکز متمایل اولدینی خصوصی غایه انحصار

ایتمز. فعالیت قانون عمومیسنه تبعاً حر بر صورتده ، معین برغایه اوله دن ده نمایان اولور. فعالیت قانون عمومیسسی یالکز ضروری یاخود مفید اولان شیئک دکل ممکن اولان شیئک آرقه سی صیراده کندیلکندن کیدر . بوندن دولایی فردلر ایچ-ون بر چوق مجبوریتلر تولد ایدرکه غایه لری مشکلات ایله ادراک اولونا بیلیر. حتی بعضاً غایه یالکز فعالیت اجتماعیه یی مبهم صورتده تسهیل ایتمکدن عبارتدر .

تدقیق ومشاهده کوستریورکه دین ، هیئت اجتماعیه نک کندیسندن عبارتدر . بوهیئت اجتماعیه بقاسنک وانکشافنک لزوم کوستردیکی اعتقادلری وحرکاتی افرادینه قارشى مجبوری برحاله صوقشدر . دین بروطفه اجتماعیه در .

دینی وقعه نک اساسلی صورتده اجتماعى بروصفه مالک اولماسى ، هر حادثه دینی ده مکنوز اولان مجبوریت عنصرینی الهیات عالمترینک تأثیرات علویه الهیه لرندن وقانتک عقلک جهان شموللغی فکرنندن ده آاز واضح صورتده تنویر ایتمز . چونکه جمعیت بشریه ده فردک خارجنده وفوقنده در . فقط فضله اوله رق جمعیت بشریه ، قابل تدقیق ومشاهده ، قابل حس بر شأنیتر . بوصورتله سوسیولوژی مجبوریت وقعه سنی ینه بروقه ایله ایضاح ایدر ، بر مفهوم ویاخود خیالی بر وجود ایله دکل .

حس واعتقاده کلنجه ، بونلر سوسیولوژی نقطه نظرندن ، جمعیت بشریه نک اعضالری اوزرنده اجرا ایتمدیکی تضییقک

فردی وجدانلرده طنین انداز اولماسندن عبارتدر . انسانك  
 بر فرد صفتيله اساسنی اكلايه مادینی بو تضیق اونك نظرنده  
 بك منطقی اوله رق بر ایمان ، امید و عشق موضوعیدر . اونده  
 نامتناهی درجه ده متنوع دینی هیجانلر تولید ایدر . دینی حادثه لرك  
 اجتماعی منشائی آكلايانلرده بيله بو حادثه لر صرف طبیعی اولمقله  
 قیمتلرندن برشی غائب ایتمز لر . چونكه كرك عادی بر کیمسه  
 ایچون كرك برسوسپولوژی متخصصی ایچون شوراسی دائماً بر  
 بر حقیقتدر كه فرد کندی کندیلکسندن نه اراده سنی جمعیت  
 بشریه زورله قبول ایتدیره بیلیر نه ده جمعیت بشریه نك غایه لرینی  
 و روشنی کشف ایده بیلیر . منسوب اولدینی اجتماعی کتله نك  
 هانکی استقامتمده تکامل ایتدیکنی تدقیق و مشاهده نتیجه سنده  
 تخمین ایتمه باشلادقجه بو کتله نك تأمین بقاسی و سعادت ایچون ،  
 مطیعانه ، بر آلت اولور .



پسېقولوژيچيلاکک و جمعيتجیلکک تنقیدی

بو پسېقولوژيچيلاکک Psychologisme ايله جمعيتجیلکک Sociologisme ك ساحه شموللاری، اكر بومسلکكر دوعرو اولسه ایدی، پك واسع اوله جقیدی . بونلر علم ايله دینك مناسباتی مسئله سنی قطعياً باشقه بر حاله افراغ ایدرلر . دینی علمك قارشیسنه قویوبده بونلرك بربرلرینه ضد یاخود او یغون اولوب اولمادقلرینی آراشدیره جق یرده بو مسلكلر دینی ده علملرك موادی آراسنه ادخال ایدرلر، دینك یرینه علم ادیانی اقامه ایلرلر. دین واردر، معلوم بر وقعه در، نیچون بو وقعه یه دیگرلرندن فرقلی بر معامله کوسترملی ؟ هانکی حق ايله بو وقعه یه اعتراض ایتلی و نیچون اوندن قورقمالی ؟ اصل حقیقی وضعیت علمیه بروجه پیشین فلان و یافلان وقعه غریبدر یاخود مافوق طبیعیدر دیوبده بونك چاره ازاله سنی آرامق دكلدر. حقیقی وضعیت علمیه ، سائر وقعه لر کبی اونی ده تحلیل ایتکی وطبیعی وقعه لر منظومه سی ایچنه ادخال ایلکی آمردر .

ذاتاً شوراسی شایان دقتدر که دینی ساحه ده بو ایش موفقیتله پایله بیلر سه ارکچ اصل وقعه نك اورته دن قالماسنه منجر اوله جقدر . حالبوکه دینلرك عقیدوی بر صورتده تنقیدی عصرلردن بری اوغراشدینی خالده بو نتیجه یه اصل اولامایور . فی الحقیقه ، دینی وقعه لرده حادثات عادییه ارجاع ایدیله مه ین ، علمك

اصول لرینه توفیقاً ایضاح اولونه میان بر طاقم شیر ، قوتلر ،  
 حـلـر، حالتلر فکری وارددر. انسانلر دینک عناصـرینک علمی  
 صورتده ایضاحنی بیلیمه لری یاخود رد ایتمه لری اعتباریله  
 دینداردرلر. دینلرک پایدار اولابیلیمسی حادثه دینه نك اسباب  
 طبیعیه سنك علمی موجود اولمادیغنی ایچونددر. دیگر علملر  
 ایضاح ایتدکلری شیرلرک پایدار قالمه لرینه مساعد اولدقلری حـالـده  
 علم دینک شایان دقت خاصه سی موضوعنی ایضاح ایتـمـکـله  
 اورته دن قالدیرمق و وقعـه لری تحلیل ایتدکجه اونلرک یرینه  
 قائم اولمقدردر. علم ادیان بر کره ذکالرده و روحلرده یرلشیرسه  
 یالکز ماضی ایله مشغول اولابیله جک ، زمان حالده هیچ بر  
 موضوع بولمایه جقدردر.

مع مافیه عجبا پسیقولورژینک یاخود سوسیولوژینک علم ادیانه  
 اصل بر علم کبی تأسس ایده بیلیمسی ایچون لازم کفن معلوماتی  
 واساسلری تأمین واحضار ایده بیله جکلری محققمیدر ؟

\*

\*\*

شکل علمی ایله علمک آری آری شیر اولدیغنی بیلیمک  
 اقتضا ایدر. سقولاستیک علمک یالکز شکله مالک ایدی ،  
 محتویاتنه دکل . علوم معنویه یالکز ایستاتیسیتیکلره وحسابلره  
 تنزیل وارجاع ایدیله جک اولورلرسه بر علم ریاضینک یالکز شکله ،  
 ظواهرینه مالک اولورلر ، قیمت حقیقه سندن محروم قالیرلر .  
 بر علم حقیقه موجود اولابیلیمک ایچون شکل علمینک اويله

محتویات تطبیق ایدلمسی اقتضا ایدر که او محتویات شأنتدن آلمش  
اولمالی و هیچ بوزوله دن بوشکلی آلمغه مساعد بولونمالیدر .  
شیمدی کوردیکمز مسلک کرده حال بویله میدر ؟

حقیقی علمک نظریه سنی ده قارت او صورتله و اویله تعبیر لر  
ایله تعیین ایتشه در که بو کونکی علمه ده توافق ایدر لر . علم ،  
مجهولک معلومه ، ایضاح ایدلمه مش شیتک ایضاح ایدلمش شیده ،  
مظلمک بدیهی به ارجاعی دیمکدر .

علمک ایلک تشبیهی یا خود قابل ادراک نه اولدیغی  
تعیین ایتمکدر . حالبو که بدهتک نمونه سی صورت ذهنیه لر من  
ایچنده ، بر برینه متقابل ایکی قطب کی ، ایکی عنصری تفریق ایله الله  
ایدیله بیلیر . بو عنصر لرك بری نفس sujet دیکری نفسک غیری  
اولان شی objet در . نفس طرفنده فعالیت ذکا ئیه دن باشقه برشی  
یوقدر . علمی انشا ایدن بو فعالیتدر . فقط علمی نقطه نظر دن قابلیت  
ادراک نمونه سنی بو فعالیت تأمین و تدارک ایده مز ، اونو موجود  
فرض و قبول ایدر . ایلک وقوف هر دور لوسو بر کتیف عنصر دن  
تجربید ایدیلش اولان شیئی خارجی (اوبژه) طرفنده بولونور .  
اگر صورت قطعی ده علمی اولمالری آرزو اولونیور سه صو کره  
بوتون بیلکی لر بو ایلک وقوفه بکزه تیلیمک یا خود ربط اولونمق  
ایجاب ایدر . بو ایلک بیلکی ده کندیلرینه مربوط اولان بوتون  
طرز وجود لر له برابر حین یا خود اولچو یعنی عمومیتله اشای  
ریاضیه بیلکی سیدر . ایشته ایلک معلوم بوراده بولونیور . قابل

ایسه دیگر معلوماتك كافه سنی ده بوكا ارجاع یا خود ربط ایتك  
وظیفه سی علمه عاندر .

علمك وظیفه سی شو صورتله ده افاده اولونه بیلیر: وقعه لری  
وقانونلری تعیین ایتك . بو دستوری آ کلایه بيلمك ایچون  
یوقاریکی دستور ایله قارشیلانیدیرلق ایستر . علمك آرادیغی شی  
اوله راست کله وقعه لر وقانونلر دکلدر . علمی یعنی صریح ،  
اولچوله بیلیر ، اوبزقتیف ، حقیقه قابل ادراك ، تعبیر آخرله  
ریاضی یا خود كرك بلا واسطه كرك بالواسطه ریاضی وقعه لره  
قابل ارجاع وقعه لرله قانونلردر .

دینی پسیقولوژی و سوسیولوژی بویله وقعه لر وقانونلر  
عرض ایده بیله جك قابلیتده میدرلر؟

بوراده موضوع بحث اولان پسیقولوژی اصولی داوید هامك  
علیت پرنسپینی برخیله اعتیادینه ارجاع وتنزیل ایتمکله تعیین ایتدیکی  
اصولدر . حالبوکه بو اصول ، برشی — اونی دوشونن شخصدن  
قطع نظر ایدیلرک — حد ذاته نظر ملاحظه آلندیغی  
صورتده ناقابل ادراك عد ایتمکدن عبارتدر . بونك قابل ادراك  
اولماسی ، تدقیق ایدن شخصك بر ذهاب باطلنه ارجاع ایدلمه سی  
سایه سنده در . او شخص ، فرقه وارمهدن ، ایچنده کچن شی  
خارجه عکس ایتدیرر . شی خارجینك واضح صورتده کورولوب  
کورولمه مسنك اهمیتی یوقدر . ذاتاً ظاهری اولان او وضوح ،

مفكره نك كندى داخلى تعديلاتى خارجدن كوره بيلمك  
 ايچون اونلرده ياپديغى صنعى بر تحولدن نشئت ايدر. واضح  
 بر وقوفك شرطى بودر. هام ايضاح ايتمك كلمه سنك معناسى  
 ديكشدير مشدر. چونكه بوراده آرتق موضوع بحث ايتديكى شى  
 مظلّمى واضحه ارجاع ايتمك ، مجهولى معلومه بكمزتمك دكل  
 ظاهرى ومشتقك منشائى واساس حقيقيسىنى يعنى بلا واسطه  
 معلوم اولانى آرامقدر . ايضاحات ديمك آرتق سوبزكتيف  
 شئي اوبزكتيفه ارجاع دكل ، اوبزكتيف شئي سوبزكتيفه  
 ارجاع اوليور .

بويله اولمقله برابر ، پسيقولوجيكلك ايضاحاته قالدشمق  
 ايسته ديكي ، يعنى حادثه دنيده تصادف اولونان مادي ومعنوي  
 اعراض وعلائمك فهرسنى تنظيم ايله اكتفا ايتديكى زمان  
 هامك اصولنى قوللانير ، اعتقادلى بر طاقم حالات شعوره ارجاع  
 ايدر ، اشيائى خارجيه يى داغيتير ، اورته ده يالكيز نفسك  
 اوغراديني تعديلاتى براقير . بناء عليه اصل علمه آرقه سنى  
 چويريور ديمكدر .

اكر بو پسيقولوجى علم نامنى آليرسه بو كلمه نك بوراده  
 علوم حكيميه وطبيعيه ايله آنجق بك مبهم بر مشابهت تضمن  
 ايتديكىنى اونو تمامق اقتضا ايدر. تشارك جيلك مسلكى سقوط ايده لى  
 برى پسيقولوجينك وظيفه سى حادثات روحيه يى ذى حيات شائيتى  
 ايچنده پيش ملاحظه آلان شعورك خواصيله ايضاح ايتمكدر .

فقط شعور نهدر؛ کاملاً حالده میدر؛ یاخود فردی ماضی بی  
یوکنتمش بر حالده عینی زمانده کوزی استقبالهده معطوفیدر؛  
اصل وظیفه سی ایچون فرد زمان تجاوز ایدن بر طاقم غایه لر  
آرامق؛ وار اولان شیئک قارشیسنده شو شی وار اولابیلردی  
یاخود شو دورلو وار اولمالیدی دییه دوشونمک؛ موجودیتک؛  
افعال وحرکاتک برقیمتی اولدیغنی، اولابیله جکینی، انسانیتک،  
کائناتک ترقیسنه براشتراک، بروظیفه بررول تضمن ایده بیله جکینی  
فرده اقناع ایتک اولدیغنی ادعا آرتق جائز دکلیدر؛ فقط بوتون  
بونلر برر انطباعات دینیه دکلده نهدر؛ بوصورتله پرنسیپ اوله رق  
شعوری قبول ایتک دینک کندیسینی مسلکک قلمکاهنه راست  
کله ادخال ایتک اولمازمی ؟

سوسیولوژی دهها حقیقی بر صورتده او برقتیف اوله رق  
حرکت ایدر . مع مافییه اونکده صورت قطعیده علمی وقعه لر  
وقانونلرله اوغراشمقده اولدیغنی محققمیدر؛ حرارت احتساباتک  
سلسله سنی بر مایع سستوننک ارتفاعنده کی تحولات ایله افاده  
ایتک یولنی بر کره بولان بر حکمت شناس آرتق حرارت حقنده  
سوبرقتیف تقدیراته مراجعت احتیاجنده دکلدر . فقط بر  
سوسیولوژی متخصصی او برقتیف وثیقه لرنی آنجق بر طاقم  
سوبرکتیف شائیتلرک علامتی اولمق اوزره پیش ملاحظیه آلمق  
صورتیه قوللانا بیلیر . بوسوبرقتیف شائیتلر فکرینی ده اوکاشعوری



ویریز. حقیقتده سوسیولوژی ایله پسیقولوژی آراسنده تأسیس  
ایتدیکی فرق برخولیدان عبارتدر. بوتون دستورلرینک آلتنده،  
بوتون ایضاحاتنک ایچنده غیرقابل ازاله، ضروری برپسیقولوژی  
عاملی بولونور. جمعیات انسانیه یی ترکیب ایدنلر نهایت انسانلردور.  
جماعتجه مشترک روح تعبیر اولونان شی آنجق فردلرده  
حقیقیدر. یوقسه بو فردلر ایکی قابل تفریق پارچه دن : بر  
فردی بئلکدن برده اجتماعی بئلکک بر پارچه سندن می ترکیب  
ایتمشلردر؟

جمعیت بشریه، خارجه و جودی اولان برشی (اوبژه) دکلدر،  
بر نفسدر (سوژه). جمعیت بشریه ده حقیقی و ذی حیات اولان شی،  
بر سبب تشکیل ایدن و حادثاتی امکان مساعد اولدیغی درجه  
حادثاتی ایضاح ایله یین شی نهایت تحلیلده انسانی شعورلرک ذهاب  
باطلاری، تمایللری، احتراصلری، اعتقادلری و احتیاجلری در.  
جمعیت بشریه علی العاده بر نفس ده دکلدر. فردلرده کی شعور  
بر درجه یه قدر معلوم بر نفس اولدیغی حالد جماعتجه مشترک  
شعور، فکری بر نفسدر. بناء علیه بر فردی نفس قدر بیله  
بر وقعه علمیه عد اولوناماز.

ذاتاً دینی بر وقعه جمعیات انسانیه نک شرائط وجودیت  
و تکمیلنه ارجاع ایدلمکله بونک نتیجه ضروریه سی دینلرک  
طبیعیلشدیرلمسی اولماسی نه دن لازم کلسون ؟  
اصل جمعیات بشریه یی دینی اوامر و آیینلر تشکیل ایتمش

اولسون؛ پروتاغوراسک دیدیکی کبی؛ حیاتک وعدالتک تعلیمی، سیاسی تولید وانسانلر آراسنده روابط دوستانه‌نی تشید ایتمش اولسون؛ بولردن دولایی حادثات دینه‌نک صرف طبیعی یعنی مجبوری ومیخانیکی منشائی ثابت می اولور؛ اگر هر نه‌صورتله اولورسه اولسون بر کره تشکیل ایدن جمعیت بشریه، مؤسسانه — ده‌ا زیاده قوت واعتباری حائز اولسونلر دینه — کنیدیسی اختیاری بر صورتده یاخود سوق طبیعی ایله دینی بر صفت ویریورسه جمعیت بشریه فزدی شعورلرجه مشکلاتله قابل تأمین اوله‌جق بر غایه کمال تعقیب ایدیور دیمکدر. بو غایه کمالک تصویری، تعقیبی بر الهام دینی محصولی اولامازمی؟

شعور کبی جمعیت بشریه‌ده درینلکلرینی تعمیق ایتمک مشکل بر ساحه‌در. دینک بوراده عادی بر آلت وظیفه‌سی دکل بر پرئسیپ وظیفه‌سی کورمدیکنی هیچ برشی اثبات ایده‌من.

\*

\*\*

پسیقولوژی ایله سوسیولوژی حادثات دینه‌ده خصوصی برشی اولمادیغنی وهر نقطه‌ده حیات روحیه واجتماعیه‌نک حادثات اصلیه‌سنه قابل ارجاع بولوندقلرینی اثبات ایتدکن صوکره بونک نه حکمی اولور؛ دینه اعتراض ایدیله‌بیلیر. قبول ایده‌لم که شعور یاخود هیئت اجتماعیه دین تسمیه اولونان شیئک بر درجه‌یه قدر اولدن موجودیتنی تضمن ایتسونلر. اگر بو عنصر بوتون حادثات بشریه‌ده عینی صورتده وجود ایسه علمدن خارج

طوتولماسنه محل یوقدر . ایسترسه عمومی وثابت immanent اولسون، ساده جه طبیعتدن نه فرقی واردر؟

بونقطه ده ، پسقولوژیجیلک ایله جمعیتجیلکک حادثه دینه یی هر دورلو وصف خصوصیدن تجریده خدمت ایدرطن ایتدکلری دلائله مصادف اولورز. بودلائک قیمتی ندر ؟

پسقولوژیجیلک اول امرده ، حادثه دینه نك تماماً بر حادثه دن ، بر حالت شعوردن باشقه بر شی اولمادیغنی اثباته چالیشیر . دینلرک " بحث ایتدکلری علوی جواهر مجرده ، بر ذهاب باطلدن عبارتدر . بونلر انسانک کندی بنلکندن باشقه بر شی دکلدر . کندی بنلکمز ، تعیین وتولید ایتدیکمز شیلردن بعضیلرینی ، ایجه تماشا ایچون خارجه فیلا تیر . ناصل که شعورده عالم خارجی یی تصور ایچون بویله یاپار . انسانده بنلکک تشکلنک ایجابی بودر . بنلکمزک قارشیسنده نه دورلو شی بولونورسه بولونسون بنلکمز یالکز کندیسيله مشغول اولمق ، اوغراشلق مجبوریتنده در . کندی سو برکتیف حالاتنک خارجه انعکاساتی مستقل برر شایتلر کبی تلقی ایتسی اونک ایچنده باطنی بر تعدیلاتنک کندیسی فرقنه وارمه دن خارجه ترجمه ایدلمسندن ایلری کلیر .

بونظریه قبول اولونسه بيله مقصدی تأمین ایدرمی ؟ شبهه یوق که فضای دنیونک هر هانکی بریرنده بر اجتماعکاه معبودات بولونماسی یا خود شو قبه مکوکک اوته سنده ، مجهول عوالمده

بر الله اولماسی اعتقادیغی هیچه ایندیرر . فقط شعور دینی ایله  
بو مادی معبودلر آراسنده بر مناسبت یوقدر .

اگر علویت تعبیریله ، کلمه نك فضائی معناسیله ، انساندن  
خارج بر وارلق قصد اولونیورسه الك ابتدا زمانمزه کی شعور  
دین بو معناده علوی بر الله تصویرینك جعلی و صرف خیالی  
اولدیغی اعلان ایدر . ایشته اصل الله حقنده قولانلادیغی زماندر که  
بو علویت ، خارجیت ، اوثرقتیفلك کلمه لری صرف برر تشبیه  
واستعاره کبی تلقی اولونمق لازمدر . دینك ترقیاتی لاهوتیلکی  
اشیانك طیشندن ایچنه ، سمادن روح اشره کتیرمکدن عبارت  
اولمشدر . انجیل : « اللهك حکومتی سنك ایچکمزدهدر »  
دیور . سهنه كده : « اللری سمایه قالدیرمق فائده سزدر : الله سنك  
یانکدهدر ، سنکلهدر ، سنك ایچکدهدر » دیر . تعبیر دیکرله ،  
الله حادثه دینییه یی خارجدن تولید ایدن یاخود خارجدن اوکا  
مقابله ایدن ، حادثات دینییه دن خارج برشی کبی تصور ایدلمه ملیدر .  
بو دورلو تصور اولونورسه الله سائر جسمانی موجودلره مشابه  
بر وجود جسمانی اولور . الله حادثه دینییه نك ایچنده تصور  
اولونمالیدر . الله انساندن طبیعتده بردها مثلنه تصادفی اولونمایه جق  
بر صورتده ، هر حالده مخیله نك علویت تعبیری آلتنده قصد  
ایتدیکی فضائی بر فرق ایله هیچ قابل قیاس اولمایه جق صورتده  
آیریلیر . ایشته یوکسك دینلرك ، الوهیتك بر وصفی یابدقلمی  
معنویت تعبیریله بو معنا مقصوددر .

شیمدی حادثه دینه‌نک حد ذاتنده نه اولدیغنی بیلیمک قالیر.  
 پسیقولوژیجیلکه کوره بونده کندیسنی حادثه عادیه دن تفریق  
 ایتدیره جک هیچ برشی بوقدر. پسیقولوژینک قوانین عادیه سی  
 اوننی ایضاچه کافیدر. ناصل پسیقولوژی و فیزیولوژی تجربه لرنده  
 بر طاقم روحی تظاهرات تولید ایدیله بیلیرسه بالخاصه بعض عصبی  
 کیمسه لرده حادثات دینه ده تولید اولونا بیلیر.

بو بولده دوشونلمش، یازلمش بر چوق آنا ر واردر. مع مافیه  
 اصل موضوع بحث اولان نقطه یی تنویر ایده میورلر کیدر .  
 بو یالکیز بو کبی مسئله لرده وقعه لک و قانونلک تعیننی وضوح  
 و قطعیتیه پک مساعد اولما مسندن ایلری کلیور دکلدیر . تعقیب  
 اولونان اصولک حادثه دینه‌نک اصل ولبنه و اوصاف ممیزه سنه  
 نفوذده قابلیتلی بر ماهیتده اولوب اولما دیغنی ده محتاج نظر درر.

بو اصول، او برقتیقدر. یا خود ممکن اولدیغنی قدر حقیقه  
 علمی نتیجه لره واصل اولمق ایچون او برقتیف اولمق املنده درر.  
 دیمک اولیورکه وقعه لری آنجق عمومی وقعه لره قابل ارجاع  
 عناصرنده پیش ملاحظه یه آله جقدر. او برقتیف دیمک ذهنده  
 قابل تمثیل وارانیه دیمکدر. مضکره. بشر ایچون برشینی تمثیل  
 وارانیه ایسه اوننی کندیسینک آیشقین بولوندیغنی بر چر چیوه یه  
 ادخال دیمکدر. بونک ایچوندرکه او برقتیف پسیقولوژی منحصرأ  
 مالزمه یی، تظاهراتی، زمینی یا خود جسمانی شرائطی، حاصلی  
 حادثه دینه‌نک بوتون خارجی پیش ملاحظه یه آله جقدر .

في الحقيقة حادثه دينيه ده ديكر حادثات ايله مشترك اولان عناصر  
بونلردر . فقط بوندن دولاييدركه حادثه دينيه نك ايجنده  
او كا خاص بر صورتده موجود اولاييله جك شئي دائرة اشتغالي  
خارجنده بر اقمه بو اصول كندى كنديسى محكوم ايده جكدردر .  
بر مؤمنك حادثات دينيه نك بو نقطه نظر دن ياپيلان  
تصوير اتنده كندى حس ايتديكنى ، كنديسنك نظر نده دين  
تشكيل ايدن شئي طانيه مايه جنى محققدر . او بركتيف تدقيقات  
ومشاهداتيله حيات دينيه نك عناصرى ادراك ايتديكنى مقام  
افتخارده سويله ين عالمه قارشى كوته نك فائوستنده روح ارضك  
فائوسته سويلديكى شو سوز لرله مقابله ايده جكدردر :

Du gleichst dem Geist, den du begreifst Nicht mir

( سن ، آكلاديغك مفكره يه مساويسك ، بكا دكل )

چونكه دين منحصرأ او بركتيف حادثات مترافقه يي پيش  
ملاحظه آلان علمى پسى قولوژينك بر طرف ايتديكى اصل  
او شعورك سو بركتيف و باطنى مظروفيدر . اونك وصف  
مميزى ده بوتون او حادثاته نامتناهى حاكم اولمقدردر .

Erfüll' davon dein Herz, so gross es ist;

Und wenn du ganz in dem Gefühle selig bist,

Nenn'es dann wie du willst,

Nenn's Glück! Herz! Liebe! Gott!

Ich habe keinen Namen.

Dafür! Gefühl ist alles!



Name ist Schall und Rauch,  
Umnebelnd Himmelsglut

( کونه ، فائوست : قلبك نه قدر بويوك اولورسه اولسون ،  
غير مرئيدن اونى دولدور . سعادته ابريز اولديني زمان ايسته ديكك  
كله لري سويله : سعادت ، قلب ، عشق ، الله ! دى . سكا كله  
تكليف ايده جك دكلم . حسيات هرشيدر . كله بر كورولتودن ،  
بر دوماندن ، سمالك حشمتنى بزدن صاقلايان بر سيسدن  
باشقه بر شى دكلدر )

عجبا بوراده بر ذهاب باطل يوقى ؟ حرارت احقساسنك بر  
جيوه ستوننك ارتقاعى ايله كنديسنى افاده ايمه سى كى ، بر  
سوېر كتيف عنصردى اوېرقتيف بر حادته ايله هجبا ترجمه وافاده يه  
مساعد اوله مازمى ؟

حادثه دينه نك پسقولوزى يه وفير يولوزى يه عائد شرائطنه  
كلنجه ، بر چوق سوسقولوزى متخصصلى ، شعور ديننك محتوياتى  
بونلرك بزه تماميله ، صحيح بر صورتده بيلديره ميه جكلرينى تسليمده  
مؤمنلره متفق بولونملري شايان دقتدر . نه قدر ايضاحات ويره لر  
ينه خارجه ايضاح ايدلمه مش بر طور طوقاير . بو ، بر پوته نك  
ديبنده قالمش بر جوهر معند كى شعور ديننك اعماقنده قاله جق  
مستقل و قابل تجريد بر حادته دكلدر . فقط ، شعور ديننده اويله  
بررنك ، اويله بر حال ، اويله بر شكل خصوصى واردر كه پسقولو-  
ويچيلك اونى اهمال ايدر ياخود بوندن بحث ايتسه ده ذهاب

باطله مستند برشی دیه تلقی وانکار ایلر. شعوردینی قدسیت،  
مجبوریت، فرددن دها بویوک و فردی تحت تأثیرنده بولوندیران  
بروجود طرفندن ایسته نلش برشی فکرنی احتوا ایدر. ایسته  
اصل عنصر دینی بودر. حادثات مترافقه خارجدن اوילה بر  
وصف ویریرکه بو عنصر دینی اولماسه ایدی او حادثات بووصفی  
اکتساب ایده منزلردی. تهییج، حزن و ملال بعض کیمسه لرده  
بر شکل دینی اکتساب ایدیورسه بو دینی بر تهییجک، دینی بر  
حزن و ملالک موجودیتندن دکلدر. دنیاده بر طاقم افکار دینه  
بولونماسندن و او کیمسه لرك او افکاره واقف اولمالرندن،  
او افکارک مخیله لرینه انطباع ایتمه لرندندر.

برچوق کیمسه لرده دین، مقلددر. حسیاتلرینک، اعتقادلرینک  
داخلنده برشی دکلدر. بو کیمسه لر یاشادقلری محیطی، تابع  
بولوندقلری تأثیراتی انعکاس ایتدیررلر. باشقه شرائط ایچنه وضع  
ایدلسه لردی پسیقولوژی نقطه نظرندن مشابه بر طاقم حسیاته  
واحتراصاته، بو عینی طرزده اینانمیه، سومکه، ایسته مکه صاحب  
اولابیلرلردی. بو حادثاتده دینی بر وصف هیچ بولونمازدی.  
دین هانکی روحلرده حقیقه موجود ایسه اورو حله ایچون،  
مخیله طرفندن دکل اصل شعور طرفندن بعض فککرلره، بعض  
حسیاته، بعض حرکاته، بشریتی تجاوز ایدن بر طاقم غایه لراوغورنده  
عطف اولونمش غریب، نامتناهی بر قیمتدر. بو شکل شعور بوتون  
پسیقولوژینک و فیزیولوژینک او برقتیف تمثاللرندن طاشار،

اونلرك ايجنه صيغماز. افق باطنيسي يالكز بوتماللره انحصار ايدن برفرد، فكريني بي آنجق برخوليای باطل، بريچلك اولق اوزره تصور ايدە بيلير.

مع مافيه، احتمالكه، پسيقولوژی نقطه نظرندن ده فكري ديني يه حقيقي برقيمت عطف ايتمك يولي واردر. شعوري فردك عمومي حيات وعمومي وجود ايله — براوجندن واقفانه وديكر اوجندن مبهم وعاداتاي شعورانه — براشتر اكنندن عبارت كي تليق ايتمك، ايشته فكري ديني يه بويله حقيقي برقيمت ويرمك اولور. اوزمان حس ديني جزئك كله قارشي بسله ديكي انقياد وتبعيتك برحس وادراكي، برسوق طبعيسي كي اولور.

فقط بويله برمسلكك او بركتيف برپسيقولوژينك حدوديني كچه جي وعيني زمانده سوبركتيف پسيقولوژي بي اعلا ديمك اوله جني آشكاردر. اوزمان بوسوبركتيف پسيقولوژي يه روحك او بركتيف حاله كتيريلمه سي قابل قسمندن اوته طرفده وجود نامتناهينك درينلكلريني اولچمك قوتي ويرلمش وبوصورتله، حكمت وجودي قبول، شان وشرفي تزويد ايديلش اولور.

او بركتيف پسيقولوژي مجبوريت دينيه ده واوكا مترافق اولان موكه افكارده برطاقم باطل ذهابلردن باشقه برشي كوره مز. فقط بو بابده كوسترديك دلائل قناعت بخش دكلدر. بودليللرك اثبات ايتدكلري يكانه شي فرد ايجون مجبوريت، وظيفه يه، قدسيته اينانق برايمان، فكري منفعتدن عاري، تصادفه باغلي بر قبول

اولدیغندن عبارتدر . مع مافیه بر ایمان عقل طرفندن تصویب  
ایدلک ایچون قابل ادراک بر طاقم اسبابه استناد ایتک لازمدر .  
وظیفه ایمانک اسبابی نروده بولونابیلیر؟ سوسیولوژی بونی بزه  
کوستره بیلیمکه کندیسنده قدرت حص ایدر .

برشأیت موجوده اولان فعالیت اجتماعیه نك ایفای وظیفه  
ایتمسی و موجوده اول بیلیمسی ایچون بر طاقم شرائط واردر .  
سوسیولوژی متخصصلری، بونده بر طاقم ضرورتلر بولوندیغنی و بو  
ضرورتلرک مقرر فرودن خارجه اولدیغنی، فرد بو ضرورتلری  
قبوله مضطر قالدیغنی بیان ایدرلر . مجبوریّت حسی فردک بو  
یوکسک ضرورتلری بیلیمه سندن ، آکلاما سندن باشقه برشی  
دکلدر . بوتلقیه کوره دین فردلره تمامیه خارجی بر قدرت  
کبی تأثیر ایدر، اولری اجبار و تربیه ایلر . انسان طبعیه  
نسبتله انسان اجتماعی و دینی ، طبیعت ابتدائیه سنی آرقه لره  
دوغرو سورمش برفوق طبیعتدر .

فقط ، دینک سو برکتیف و فردی عنصرینی بویه ایکنجی  
درجه ده بر اقمق و قابل اهامال بر عنصر اولمق اوزره تلقی ایتک  
دوغرو میدر؟ شبهه یوق که تصوف ، مؤمنک حیات باطنیه سی  
سوسیولوژی متخصصنک خارجی تدقیقات و مشاهداتنه مؤسسات  
سیاسیه ، یا خود کلیسائیه کبی مساعد بر ماده عرض ایتمز . فقط  
بوندن اونک اهمیتسز اولماسی می ایجاب ایدر؟ احتمالکه اک ابتدائی

اولان تظاهرات دینیه پیش ملاحظه یه آله حق اولورسه بو عنصر باطنینک اوراده پک آز اهمیتلی و پک آز بارزا اولدیغی کوروله جکدر. فقط دینک نه اولدیغی بیلیمک ایچون اونک تاریخی نقطه حرکتی آرامق ، مؤخر حادثاتی وقعه لرك برتمادیس کیفیتی ایله ای کوتو اوکا ربط ایتمک کافیمیدر؟ بوکی مسئله لرده تمادی تاریخی یه باقهرق منطقاً اونلرك بربرلرینک عینی اولماسنه حکم ایتمک ناصل جائز اولور؟ ابتدا عادتاً کوزه کورونمز برحاله بولونان بر عنصر دینی صوکره پک مهم ، پک اساسلی برشی اولمشدر. کندی کندیسنی آرایان بر شعور اولا پک اهمیت ویرمدیکی فکر لرك ، حسیاتک ایچنده نهایت کندی کندیسنی بولور. نتیجه ، مادی سببندن آریله رق کندی کندیسی ایچون انکشاف ایده بیلیر. دینک شکل ابتدایی نه اولورسه اولسون متمدن ملت لرده دینک کیتدکجه شخصی و باطنی بر حال آلدیغی تجربه ایله ثابت بروقه در. دها یونانیلر بیه انسانک قیمتی و قدرتی پک درین بر ضرورته حس ایده رک اسکی منقبه لره نظراً انسانک خارجنده وقوعه کلن ، انسانک تأثیری اولمادن مقدراتی تعیین ایله ین دینی و اخلاقی مبارزه لری شعور بشرک ایچنه نقل ایتمشدری .

اسرائیل پیغمبر لری و عیسائک سوز لری استعداد باطنینک تأثیر غالبانه سنی اوقدر میدان وضوحه قویمشدر که دیندار روح لر بو استعدادک مفقود اولدیغی یرده هیچ دین بولونمایه جفی ظننه کیتدکجه میل ایشلر در. بوگون رؤسای دینیه ایچون مشکل

وظیفه دینی هر شیدن اول بر شعور مسئله سی عد ایدن مفکره لره  
قارشی دینک ظاهری اقسامنک فائده سی حقنده کی اعتقادی محافظه  
وادامه ایده بیلیمکده در .

دین، بو کون صورت عمومیه ده بزه نمایان اولدینی شکلده  
فردک محویتنی تضمن ایتک دکل بالعکس تهیجنی ترویج ایدر .  
هر حالده، اصل شخصیت نامی ویریلن یوکسک درجه فردیتده  
حال بومر کزده در . فرد بوتون وارلغک منبعی اولان غایه  
آیینی ایله برلشهرک شخصیتنی بولدیفنه اینانیر. خرسیتیانلرک تثلیث  
اعتقادنده اوچ موجودیت حقیقی و بر برلرندن فرقلی شخصلردر.  
باطناً برلشمش اولدقلرندن یالکزتک بر الله تشکیل ایدرلر.  
بو خصوصی وعادتا مافوق طبیعی مناسبتی یونان قدیم شوجمله ایله  
افاده ایدردی : « هرشی ناصل هم برکل احد تشکیل ایده جک  
هم ده ینه آیری آیری موجود اولاجق؟ » دین، الله تسمیه ایدیلن  
وکندیسنده یاشایان وجودلری بویله برلشدریمک معجزه سنی  
کوسترن بروجود اولدیفنه اینانمقدن عبارتدر .

فقط، بویله یوکسک، کندی کندیلمکندن خیر عمومی به  
متوجه بر فردیتک انکشافی فعالیت و ضرورت اجتماعیه دن نشئت  
ایتمش اولماسنی قبوله هیچ بر مانع یوقدر دنیله بیلیلر . اکر  
شعور، شخصیتی بر واسطه دیبه دکل ده برغایه اولمق اوزره  
تلقی ایدیورسه بو، شعور بشرک صورت طبیعی ده غایه لری  
واسطه لره تحویل یولنده یاپدینی برچوق عملیه آراسنده بر مثالدر .



سوسیولوژی طرفندن رابطه اجتماعییه بو صورتله عطف اولونان دینی قیمت و تأثیر قدر محقق برشی یوقدر . شایان دقتدرکه بونقطه ده خرسستیاللق فکدرلریله آراسنده توافقه ده وارددر . فی الحقیقه سن ژانک برنجی مکتوبنده شوققریه تصادف اولونیور : « کیمسه هیچ بروقت اللهی کورمه مشدر . اکر بز بر برمری سوه جک اولورسه ق اه بز م ایچمزدده بولونوروعشق آیی ایچمزدده تمامیه حیزفعله چیقار . بوتون مسئله ، انسانده دینی حسات وافکار ظهوری جمعیتک تأثیریه ایضاح اولوندینی زمان هانکی هیئت اجتماعیه دن بحث ایدلیدیکی بیلیمکدر .

شیمدیکی حقیقی ، قابل تدقیق و مشاهده وارلغنده نظر ملاحظه یه آلنان راست کله بر هیئت اجتماعیه دن می بحث اولونیور؟ بر جمعیت بشریه نک یالکیز موجود اولماسی ، اونک شرائط موجودیت و بقاسنک ، شرائط انکشافنک افرادینک شعورلرنده اخلاقی و دینی مجبوریتلرله تظاهر ایتهلری ایچون کفایت ایلرمی؟ انسانلرک حقیقته مشکوک یا خود مفروض بر طاقم لزوملری قطعاً مجبوری بر صورتده قبوله جهالت و عطالت سائقه سیله سور وکلندکلری پک اعلا تصور و قبول اولونا بیلیر . فقط بو آشکاردرکه آلداندقلرینی سوسیولوژی متخصصلرینک آثارندن او کړندکلری کون مؤسسات اجتماعییه قارشى آرتق اوباطلانه حرمت معتقدانه بی غائب ایده جکلردر . او مؤسساتی نسبی صورتده ثابت و مفید اولمق اوزره تلقیده دوام ایده بیلیرلرسده ده آرتق مقدس عد ایتیه جکلری شبهه سزدر .

حتی اکثریا مؤسسات سیاسیه نك منحصراً هیئت اجتماعیه نك شرائط موجودیتندن انبعث ایتدیكى فکری انسانلرده او مؤسساتی ادامه دن زیاده تبدیل هوسنی او یاندریر . چونکه او شرائط موجودیت ده هیچ دیکشمز دکلدر . انسان او یله یارادلمشدر که اونك ایچون بر شینك دیکشه بیله جکمه اینانمق عادتا او تحولی آرزو ایتك دیمك اولور . شایان دقتدر که انسانی مؤسسات اجتماعیه یه یوقاریدن باقمه ، اونلری صرف تصادفی و انسانی عد ایتمه ، اونلره قارشى عصیان ایله مکه سوق ایدن شی فکر دیندر . بر طاقم دینی بویوك شعور لر جمعیت بشریه نك قارشیسنه کندی باشلرینه حق و حقیقتك ممثلی ایمشالر کبی دیکیلمشلردر . چونکه کندیلرینك آرقه لرندۀ الله دور ییور دیرلر . جمعیات بشریه نك آرقه سنده ایسه آنجق انسان ، طبیعت و بر طاقم وقایع و احوال کورورلر . شعور دینی شعور اجتماعی ایله عینی شی اولمغه رضا کوسترمك شویله دورسون انسانلری اللهمك حقوقنی حکمدارک حقوقنه ، اشخاصه حرمتی جبر و تضیق رسمی یه قارشى قویمغه سوق ایدر .

بناءً علیه حقیقی جمعیت بشریه ، بر مؤمنك وجدانه کفایت ایدۀ جکنی ناصل ادعا ایدۀ بیلیر ؟ مؤمنلر عدالتی ، عشقی ، ایملکی ، علمی ، سعادتق اللهده طوبیلا نمش ، اللهده حیز فعله چیقمش اعتقادندۀ درلر . جمعیت بشریه بونلری بویله کندیسندۀ طوبیلا نمش ، حیز فعله چیقمش کبی بر منظر عرض ایتمه قادر میدر ؟

آشکار در که روح بشرک دینی قسم‌لرینی یالکزر جمعیت  
بشریه‌نک تأثیر یله ایضاح ایتک ایسته‌دک‌لری زمان موضوع بحث  
اولان هیئت اجتماعی شو حقیقی و معلوم اولان بر هیئت اجتماعی  
دک‌لدر. بو بر فکری، خیالی جمعیت بشریه‌در. دینک افاده  
ایتدیکی آه‌نکک، عدالتک، سعادتک، حقیقتک آرقه‌سی صیرا  
قوشماسی اعتبار یله بر جمعیت‌در. حقیقی جمعیتلر بو غیر مرئی  
جمعیتدن بر درجه‌یه قدر نصیب‌دار اولمالری و اوکا توافق ایتمه‌لری  
اعتبار یله القای حرمت ایدرلر و فردک تحمیل ایتدک‌لری مجبوریتلری  
حق و مشروع کو سترلر.

فکرلرده‌کی بو جمعیتک شبهه یوق که انسانلرده‌کی تمایلات  
دینه ایله صیقی بر مناسبتی واردر. شعور دینی، کندی کندیسنی  
بر آلت اولوق اوزره تلقی ایدر. وظیفه‌سی اونو وجوده کتیرمه  
چالیشم‌قدر. فقط بو جمعیت خیالیه، مادی بر وقعه‌یه تشبیه  
ایدیله بیله‌جک معین و معلوم برشی دک‌لدر. دینی، بو جمعیتک  
ایجاباتی ایله ایضاح ایتک آرتق اونو قابا تجربه‌لرله قابل تدقیق  
و مشاهده سیاسی یا خود مشترک حادثه‌لرله حل ایتک دک‌لدر.

جمعیت خیالیه فردلر طرفندن، بر ملتک‌ک یوکسک اخلاقی و دین  
شعورلری طرفندن تصور و تخیل اولونور. طبیعتک فدا ایتدیکی  
فردی اعظمی بر حد انکشافه و قیمته ایصال ایتکه چالیشدیغی  
کبی عینی زمانده فردلرک اتحادندن — میخانیک قوتلر یا خود  
ساده جه سوائق طبیعی و غننه طرفندن تشکیل ایدلمش مرکباتدن —

دها متحد، دها آهنگدار، دها کوزل بر کل وجوده کتیرمه  
 اوغراشیر . عدالت ، حقیقت ، حسن کبی احتمالکه هیچ بر  
 شیئه یارامایان او مفکره شیرینه حرمت وعبادتی طبیعت  
 بشریه نك مساعد اولدینی اک یوکسک درجهیه اصعاده چالیشیر .  
 صرف طبیعتده موقعی اولمایان یاخود طبیعتی مشکلاته اوغرانان  
 بوتفکر شیرینی، فائده قصوا حاله قلب ایدر . وظیفه سی فردی  
 خوشنه کیمه یین غایه لره منقاد قیلمقدن عبارت بر ما کنه کبی  
 دینی ایجاد و اعمال ایتک شویله دورسون بالعکس دینک وجودینی  
 تضمن ایدر واوندن ملهم اولور .

هر ترقی اجتماعینک منشأنده روح بشرک اعماقدن نبعان  
 ایتمش ، — اولجه مجرب وقابلیت حیاتیه سی مثبت برشی اولمقدن  
 زیاده یکی واحتمالکه بر خولیای خامدن عبارت برشیئه دلالت  
 ایتدیکی حالده — دوغرو ، ابی وقابل اجرا اولمق اوزره قبول  
 ایدلمش بر فکر بولونور . بو فکر بر غایه عد ایدیلیر . چونکه  
 انسانلر اونی غایه کمالک بر افاده سی عد ایدرلر، اویله ظن ایلرلر .  
 هر ترقی اجتماعینک منشأنده ایمان ، امید وعشق واردر .  
 شعور و جمعیت بشریه علمک دینلری ایضاح ایچون بولایله جکی  
 اک شمیر پرنسیپلری عرض وتأمین ایدرلر . چونکه دینی پرنسیپ  
 دوغرو دن دوغرویه اک چوق بویکی ساحده تظاهر ایلر .

# ایکنجی قسم روحیجیلاک تمایلی

## برنجی باب

### ریچل و جذری ایکیلاک مسلکی

دینک علمی نظر اعتبارہ آلفقده کی مجبوریتنک تسلیم ایدیلہ سی .  
۱ — ریچل مسلکی — ریچل : حس دینی و تاریخ دینی —  
ویلہلم ہرمان : ایمانک تملی ایلہ محتویاتی آراسندہ کی فرق — اوکوست  
ساباتیہ : ایمان ایلہ اعتقاد آراسندہ کی فرق .

۲ — ریچل مسلکینک قیمتی — دینہ خاص اولان عنصرک  
انکشافی — فکرجیلاک علیندہ کی مسلکک محذوری : محتویاتسز  
بر سوژکتیفجیلاک — عالم خارجی ایلہ حائز مناسبت اولمیان بر عالم  
باطنی بہ وصول خولیاسی

علم فکرینک تحت تاثیرندہ بولونان و دینی آنجق علمہ  
ربط ایدیلہ بیلدیکی نسبتندہ و معنادہ قبول ایدن مسلکک  
قارشیسندہ زمانمزک تاریخ فلسفہ سی بزه باشقہ برطاقم مسلکک  
دھا کوستررکہ بونلردہ بالعکس دین فکری غالبدرہ بومسلکک  
نظرندہ اصل شایان اهمیت اولان مسئلہ آرتق نظر اہمال ایلہ  
تلقیسی غیرقابل اولان علمک ترقیاتی قارشیسندہ دینک غالبیتی  
ممکن اولدینی قدر ادامہ ایتمکدن عبارتدرہ بومسلکک کورہ

دین کندی کندیلکندن موضوعدر و کندیسنه خاص اساسلر  
اوزرینه مستنددر. عصری علمک یالکیز اشیای طبیعت اوزرنده  
دکل مفکره لر و روحلر اوزرنده ده اجرای حکم و سلطنت  
ایتمک یولنده کی مدعیاتی معلوم اولدینی جهته، دین آرتق کندیسی  
ایله رقیبی بیننده آرالرنی تفریق ایده جک بولمه انشاسیله اکتفا  
ایده مز. یاشادیغمز عصر هر شیئی تدقیق و امتحان و مواجهه  
عصریدر. بناء علیه دین قوه حیاتیه سنی و انکشاف قدرتی آنجق  
کندی حقوقی علمک حقوقیله تألیف ایتمک چالیشه رق و ایجابنده،  
اساسنی تغیر ایتمکسزین، مشروع دیه تلقی اولونان علمک  
ایجاباتی ایله توافق ایده رک اظهار و اثبات ایده بیلیر. عصرک  
هجوملرینه اهمیت ویرمه دن کندی دستورلری، قطعیتی و حقوقی  
ایچنده قاپانوب قالیرسه دین بر مدت کندی کندیسنی آلداته بیلیر،  
فقط هوادن محروم نباتات کی صاراروب صولمقدن قورتولاماز.  
بو اندیشه لر منشاء تاریخیسی قانته و شلایرماخره چیقان  
وچن عصرک نهایتنده حائز اولدینی و بو کونده حائز اولمقدمه  
دوام ایتمدیکی تأثیر عظیم دولایسیله زمانمز دائره افکارینه  
کیرن بر مسلکده پک کوزه چارپار. بو، آلمان الهیات علماسندن  
آلبرهخت ریچل Albrecht Ritschl ک مسلکیدر. [۱]

[۱] الک باشلی اثری Die christliche Lehre von der Rechtfertigung und Versoehung در . ۱۸۷۰ - ۷۴ ده  
انتشار ایتمشدر ( ۳ جلد ) .



## ریچل جیلک

ریچل مسلکک مختلف ذواتده اولدجه مختلف شکلری نمایان اولمشدر. بو خصوصی شکلری تدقیق ایتمکدن ایسه بوراده خطوط عمومیه سنی و روحنی نظر ملاحظه یه آلمق دها موافق اولور. بو روحه نظراً دین غیرقابل جرح برحاله کلمک و حقیقه" اجرای حکم ایده بیلیمک ایچون یابانجی عناصردن تمامیه وشدته تطهیر ایدلمک اقتضا ایدر. دیگر طرفدن ده بوتون خصوصیتی بوتون وسعتی ایله مثبت برصورتده کندیسینی انکشاف ایتدیره. بیلیمک ایچون مالک اولدیغمز شیرک کافه سی دینده بولونمالیدر. علی العموم تعلیم اولوندیغی شکلده، دین بر طاقم یابانجی و نزاھتنی مغل عناصر ایله مخلوطدر.

بو عناصرک برنجیسی فلسفه، مابعدالطبیعه، طبیعی الهیات در. هرشیدن اول بو متفکرلک ابتلاسنی، اسقولاستیکی صورت قطعیه ده برطرف ایتمک ایجاب ایدر. ذاتاً لوتر بونلری شعور دینیدن طرد ایتدیکی حالده صوکره کیزلی کیزلی تکرار صوقولمشلردر. آنجق مجردات اوززنده دولاشان و النده حادثات طبیعیه دن باشقه برشی بولونمایان فلسفه تعریفی اعتباریله عنصر دینی یه ایریشه مز. چونکه بو عنصر دینی حیاتدر، وجوددر، مافوق طبیعی فعالیتدر. هر نظری وقوف، نه اولورسه اولسون،

موضوع دینی ادرا کدن عاجز در . چونکه بیلیمک ملکه سی ،  
 انپانده موجود اولدینی شکله ، ماده قانونلرینک ادرا کنه  
 انحصار ایدر . حالبوکه بوراده صرف روحی شیلر موضوع بحث  
 اولمقده در . دین آنجق بر ایمان ایشی اولابیلیر ، وقوف ایشی  
 اولاماز . دینی ، فلسفی یاخود علمی عنصرلرله قاریشدیرمق اوئی  
 بوزمق دیمکدر .

دیندن چیقارلمسی ایجاب ایدن ایکنجی عنصر طفیلی بشری  
 سلطه در . قاتولیکلک مسلمانلار دین بویله بشری برسلطه آلتنده  
 قالدینی کی پروتستانلغ بعض شکلرلنده ده بالخاصه پیه تیزم  
 Pietisme مذهبنده ، عینی تأثیرلر بویوک یرطوتار . برخرستیانک  
 عیسادن باشقه افندیسی یوقدر .

فقط دینی یالکیز تطهیر ایتک کافی دکدر . بونی بوتون  
 معناسیله ساحه فعله چیقارمق اقتضا ایدر . شالیرماخر زهد  
 وتقوانک نه بر وقوف نه بر فعل وعمل اولمایوب حسک یاخود  
 بلاواسطه شعورک بر ایجابندن عبارت اولدینی پک دوعرو  
 اوله رق سویله مشدر . مع مافیله بو غایت عمومی اساس ایله اکتفا  
 ایدیله مز . چونکه بو اساسه کوره صرف خرستیانلق نقطه  
 نظرندن منتظم بر الهیات علمی تشکیلی قابل دکدر . بویله بر  
 الهیات تشکیل ایدیله نجه ده دین ، شخصی بر طاقم افکاره  
 پارچه لانیر ، داغیلوب کیدر . حسیاتی عمومی حقایق دینیه ایله  
 بسله مک لازمدر . ریچلک اصل یابدینی شی عقل فلسفییه وبشری

سلطه‌یه ساده جه حس دینی دکل تاریخ دینی یعنی کرک انجیلده کرک تاریخ عمومی انسانیتده وقعهرک اوبرقتیف صورتده تدقیقلرینک کوستردیکی شکلده « وحی » یی قارشیی قویماسیدر .

مع مافییه بویه یامقله استعداد باطنینک اساسلی رولی هیچده تنقیص ایدلمش، اولماز. دین روحلرده ، قلبلرک اعماقنده ، روحی حیات و تجاریده ساحه فعله چیقار. حتی ریچل، تلیدلرندن ویلهلم هرمانک بر نظریه سنی قبول ایده رک مابعد الطبیعی حکملرله دینی حکملر آراسنده کی فرقی وارلق حکملرله قیمت حکملری آراسنده کی فرقه تنزیل ایتمش وانجیل دوغرو اولماسی شعور مزده قیمتدار و حقیقی دییه حکم اولونماسندن ایلری کلدیکنی قبول ایلشدر .

فقط ، ریچله کوره ، عینی زمانده حسیات کرک تورانده کرک تاریخ عمومیده صرف نظر ایده مه یه چکی و کندی کندیسنه تدارک ایده مه یه چکی بر مادی محتویات بولور. فرضا قلب کناه حسنی و سعادت آرزوسنی دویاز. ایشته وحیده بو حسیاته بر طرفدن عادل و قهار، دیگر طرفده رحیم و غفور بر الله تقابل ایدر. طبیعی اشیانک ایضاح ایتدیکی سبب انطباعاتی شعور دینی ایشته بو للهد بولور. بو صورتله حسیات کندیسنک معناسنی و تملنی کتب مقدسه ده آرامقله کیتدکجه ده ا واضح ، زنکین و متین بر حاله کلیر. فردی بئلاک حدود دینی آتلاز و بر کلی ساده

باشقه سنك حسياتيله اشتراك ايد بيلير . دين فكرينى حقيقه  
ساحه فعله چيقارير .

ريچل بواساس اوزرينه كنديسنگ الهيات مسلكنى بر وتام  
اوله رق تاسيس ايتدى . بو مسلك عقايد بحثنى بوتون اقسام  
اصليه سى و حقوق ايله ادامه ايتمكه برابر بوتون طبيعى علمدن  
فلسفه دن و صرف انسانى بوتون مؤسساتدن آيرير . بومسلك  
ايلك خرسيتيان وچينده موجود اولان بوتون فكرلرك منطقى  
صورته ترتيب و تنظيم ايدلمش صريح و مجمل بر مجموعه سى ايدى  
اساس اعتباريله انجيلك ابدى و روحانى محتوياتندن عبارتدى .

\*  
\* \*

ريچلك بويله اصل حيات دينيه نى علمك تجاوزاتندن مصون  
بولوندير ارق تكاملنى روح بشرك سينه سنده تأمين ايتمى برچوق  
مفكره لره خوش و ملايم كليوردى .

قانت مسلكى ذهنلى علم عالمك ياخود اصل طبيعت  
عالمك اوستنه باشقه بر عالم وضع ايتمكه آليشدير مشدى . بو، عالم  
محسوس ايله هيچ علاقه دار عد ايدلمه ين حرير و حيات روحانيه  
عالمى ايدى . علوم مثبتة نك ترقياتى ، بو علمى تمثيل ايدن ذواتدن  
بر چوغنده آلائينى ماديتپرستانه شكل و وقايعك محصول ايجاب  
اولدينى قناعتى تفكر و ملاحظه يه مبال ذهنلرده اعتقاد لرينك  
موضوعلى ايچون بو علملرك ساحه نفوذندن خارجده برملجا  
آرامق احتياجنى توليد ايتمشدى .

بوندن باشقه ، ریچلک اوقدر اهمیت ویردیکی تاریخ، اون  
دوقوزنجی عصرده برنجی درجهده برعلم اولمشدی، بردرجهیه  
قدر علوم طبیعییه ایله متناظر بر شکل آلمشدی. ترقیاتی تسهیل  
ایدن رومانیک روحه توفیقاً ، مختلف دورهلرک حادثاتنده  
یالکیز مشترک صورتده انسانی و مشابه شیلری دکل بالعکس  
فرقلی ، خصوصی، ممیز وفردی شیلری آرامخی کندیسنه بر  
وظیفه ایدینمشدی .

بورومانیزم ایسه حسیاتک و حیات باطنیهک تهییج  
وغلیانی ازانئه ایدیوردی. اويله برحالت فکریه افاده ایدیور  
ویتشدیریوردی که دینک روحانی وتصوفی شکلی ایله غایت  
هم آهنگ ایدی .

آلکساندر وینهک شعور بشر وشخص عیساکی جوهر  
اعتباریله واحد بر چیفته تمل اوزرینه استناد ایدن باطنی  
خرستیانلغیده ریچلک تعقیب ایده جکی استقامته متوجه ایدی .  
وینهک فکرلرینک براقدینی درین ایزلر بوکون بیله حالا  
قابل رؤیتدر.

بناءً علیه ریچلک تمایلاتنک، عمومی اوصافی ایله، زمانمژده  
برچوق دینی مفکرهلرده موجود اولماسی طبعیدر . بالخاصه  
آلمانیاده قوجه بر الهیات مسلیکی ریچلک دوشونجه لريله یاشار.  
بونلرک بعض خصوصی طرفلرینی دیکشدرمکله برابر اساسنی  
محافظه ایلر.

ریچل جیلکک تولید ایتدیکی اک جدی مشکلاتدن بری  
استادک اک ممتاز شاگردی اولان ویلهلم هرمانک بحث ایتدیکی  
نقطه در . ریچله کوره شعور دینی کتب مقدسه نك دستورلری  
ایچنده بولونمالی یاخود آکلاشلمالیدر . فقط فرضا سن پولده  
تصادف اولونان دساتیر الهیات ، صرف اوکا خاص برطاقم تجارب  
دینییه دلالت ایدرلر . احتمالک بزرکندیمز بونلری دویمامشزدرد .  
او حالده بو دستورلری ناصل قبول ایده بیلیرز ؟ چونکه اونلر  
بزم آغز مزده بر حرکت ایمان دکل ماکنه کبی یاخود ریاکارانه  
سویلنمش بر سوز اولورلر .

بو اعتراضک آلتنده « ره فورمه » نك طرفدارلرینه میراث  
براقدینی مشکلاتی بولیورز کیدر . « ره فورمه » ، تاریخ نقطه  
نظرندن ، ایکی حادثه یی عینی غایه یه متوجه اولمق اوزره بر برینه  
تقریبدن عبارتدر . بو حادثه نك بری قرون وسطاده تصوفک  
انکشافی نتیجه سی اولان ایمان باطنی نك تهییج و غلیانی دیکری ده  
رونه سانس دورینک ابتدائی صفوتلرینه ارجاع ایدیلن اسکی  
متناره و آبدله رة عودت فیکری ایدی که « انسانیات » متوغللرینک  
اثریدر . بر بریله هیچ حائز مناسبت دکل کبی کورونن بو ایکی  
اساسدن نك بر مذهب چیقارمغه چالیشمق پروتستانلق روحنک  
چکدیکی عذابلردن بری ایدی .

هرمانک تکلیف ایتدیکی چاره حل ، ریچلده صیقی صیقی



بر برینه مربوط اولان ایکی شیئی، یعنی ایمانك تملی ايله محتویاتی،  
آییرمقدن عبارتدر .

تمل ، اصل ایمان صورت قطعیهده ضروریدر و بوتون  
شعورلرده هپ بر برینك عینیدر . و حیک بو قسمنك دوغرو  
بر صورتده شرح و ایضاحی در حال هر صمیمی روحك اونی  
حس ایتسی ایچون کافیدر .

فقط ایمانك محتویات خصوصیهسی ، عقیده نك شکل معینی  
فردلره کوره دیکشه بیلن دهاییقین بر تجربه عرض ایدر .  
بناءً علیه بو محتویات او مختلف تجربه لره تقابل ایده جك صورتده  
مختلف صورتلره بر صورت مشروعهده افاده ایدیله بیلیر .  
فرضا عیسانك حیات باطنیه سنك تفکر و ملاحظه سی روح  
بشرده اویله بر انطباع حصوله کتیررکه بر ضرورت معنویه ايله  
چارناچار عیسایه اینانیر . فقط عیسانك وفاتيله ذنوب بشر ایچون  
بر کفارت ویرلمش اولماسی فکر خصوصیهسی بوتون شعورلرک  
تجربه دینه سی ايله توافق ایتیه بیلیر .

\*  
\* \*

فرانسهده الهیات علمای مشهوره سندن او کوست ساباتیه  
ریچلک نقطه نظرینه بکزه یین بر نقطه نظر قبول ایتشدر .  
او کوست ساباتیه دینی علوم حکمیه نك هر دورلو مداخله سندن  
قورتارمق ، دینه مطلق بر استقلال و بر مختاریت تأمین ایتک  
و علمدن اوفاجق بر یاریم بيله ایسته مکدن آزاده قالمق فکریله

دین ایچون ، علمه تابع اولان اشیای مرئی و حسیه دن غایت اوزاق بر محراب صمیمی آرار. ساباتییه کوره دین انسانک کندیسنده کی سفلی و علوی ایکی ماهیتی و بو سفلی ماهیتک علوی ماهیت اوزرینه بر فوقنی کوردیکی زمان قلب بشری استیلا ایدن حس فحرت ویأسدن تولد ایدر. دین ایشته بزی بو حسدن قورناریر. بو تخلیص کیفیتی بزه او باده یکی معلومانلر و یرمسی صورتیله وقوعه کلز . وارلغمزك مصدر و منبعی اولان قادر مطلق و خیرکار اساسه بر اعتماد یا خود ایمان حرکتی ایله بزی رلشديره رك بونی یاپار.

او حالده ، دین نه در؟ قلبك دعا سیدر ، خلاص و نجاتدر. بو خلاص و نجات بر معجزه در، معجزه بودر. نه صورتله وقوعه کلیر؟ بر خرستیان ایچون بوراسنی بیلیمکه لزوم یوقدر. طبیعتك قانونلری ، علمك او کرتدیکی شکله او غیر قابل تحول حاللری ایچنده بر خرستیان شعوری ایچون اراده الهیهك بر افاده سندن عبارتدر .

بر حیات دینیله یاشایه بیلیمك ایچون اوچ شیئه ، یالکیز اوچ شیئه محتاجم : الله بنده حقیقه و مؤثر صورتده حاضر و موجود اولمالی ؛ دعام قبول ایدملی ، حریت امید بولونمالی . علوم حاضره بو اوچ شیئه دو قونماز. هیچ بر علمده دو قونه ماز کچی کورونور .

اگر بوايلاک فکرلری انکشاف ایتدیرمك و ایچمده .

امكانك بكا مساعده ايتديكي درجه ده ديني ساحه فعله چيقارمق  
 ايسترسم — ذاتاً قلبمك تلقيناتي دويونجه ايسته مه مك هيچ  
 المدن كليرمي ؟ — بر چوق كشيـنك توصيه ايتديكي كي ،  
 نه فلسفه يه مراجعت ايده بيليرم نه ده بعض رؤسا ومقامات  
 روحانيه نك سلطه سنه . بر اثر معماري مجردات اولان فلسفه ،  
 اچمـدن كـندي كـنديلـكـندن فيشـقيرـمش بـولونـان او قـوي  
 حـسه تـمـامـاً بـيـكـانه در . فلسفه بكا آنجق فكري برطاقم مسلكـر  
 عرض ايده بيلير . بونلر بنم اچون هيچ بر تأثير ياماز و بني  
 احتمالـكه ، علم ايله حال مجادله يه سوق ايدر . ديكر طرفدن روحـك  
 ايسته ديكي شئي ولو كه مهم بر كليسا اولسون ، هيچ بر سلطه روحـده  
 يـاـهـماز . روحـك ايسته ديكي شي باطني ، حر و شخصي بر اهـتـدادـر .  
 اچمـده ديني انكشاف ايتديرمك اچون بكا لازم اولان شي  
 دينك باشقه لرنده ساحه فعله چيقـمـش نمـونه سـني و تـاثيرـيني كـورـمـكـدر .  
 بونك ايكي سني ده انجيلك بكا كوسترديكي بشـكـلـده عيسـانـك  
 شخصـنده بولورم .

عيسا ، الله ايله آراسنده بر بابا — اوغول مناسبتـي بـولـونـديغـي  
 حس ايدييوردي . انسان صفتيله بزه او كره تيور ، كوسترييور كه  
 انسانلر اللهك اوغللريد و الله ايله برلشمكه قابليتـلـدرلـر . اونـك  
 شعوري اويله بر يردر كه اوراده بز عيسا واسطه سيله اب عمومي  
 كائنات ايله اشتراك ايده بيليرز . بصورتـله خـرستـيانـلق انـسانـيتـك  
 مطلق و قطعي بر دينـدر .

دها اوتیه کیتمک و بوغیر قابل افاده اسراری مخیله و حواس  
 ایچون ترجمه ایده جک اولان عقایدی صریح و مجبوری بر  
 شکله تعیین ایتمک ایجاب ایلر می؟ قاتولیک مذهبی بوکاچالیشیر  
 و آرقه سندن اسقولاتیک پروتستان مذهبی ده یورور. فقط بومادی  
 علاوه لر هر کون علم ایله دین آراسنده یوکسلدیکنی کوردیکمز  
 نزاعلری تولید ایدر لر. دیگر طرفدن بوعلاوه لک زهد و تقوا  
 ایچون فائده سی ده یوقدر، بالعکس اونی ضلالته سوق ایده بیلیر لر.  
 قاتولیک دیننده اوچ عنصر واردد : ایمان ، عقیده ،  
 سلطه . پروتستان مذهبی خرسستیانلغی صفوت ابتدائیه سنه  
 اعاده ایتمک چالیشه رق کلیسانک سلطه سنی صرف سیاسی  
 و مادی بر اساس دییه لغو وازاله ایتدی، فقط عقیده یی پایدار  
 براقدی . شیمدی عقیده یی ده مجبوری بر موضوع اعتقاد  
 صفتیله اسقاط ایتک زمانی کلشدر. اصل عنصر دینی ایماندر.  
 ایمان زده وارسه دین اوراده در. عقیده دنیلن شی شعور  
 دینینک غیر قابل افاده اولان حالاتی تمثالی بر صورتده دائماً  
 ناقص، دائماً قابل تحول اوله رق تفسیر ایتمکدن عبارتدر.  
 هر وقوف علمی بالضروره صرف تمثالیدر. چونکه بر سر  
 تعریفی اقتضای اوله رق، آنجق برطاقم تمثالرله افاده ایدیله بیلیر.  
 ایمان ایله موضوعی : ایشته بونلری بر بردن تمیز ایتمک  
 لازمدر. اصل اساسی اولان ایماندر. موضوعی ایسه اونک  
 مابعدی و عینی غایبه متوجه بر افاده سیدر.

۲

ريچل مسلكنك قيمتي

ريچلك وتليزلرينك فكلرلى كرك صريح شكللى آلتنده  
الهيات مکتبلرنده، كرك دينى تفكراتك آلدیغى برشكل وضعيت  
صفتيله، هيئت اجتماعيه ايچنده بوكون بيله غايت تعمم ايتشدرد.  
دينى منحصرأ ياخود باشليجه حسياتده، حیات باطنیه ده،  
روحلرك الله ايله اش-تراك روحانیسنده كورهرك دينى، نظرى  
بر موضوع وقوف ياتق وبوصورتله باشقه برصنف وقوف ايله  
یعنى علمى وقوفلرله حال اختلاف ونزاعه صومق تهلکه-سنى  
عرض ایدن مسلك ومذهبلرى ايکنجی درجهده براقان حق  
بوتون بوتون برطرف ایدن برچوق ذوات واردر. ايمان ايله  
آمنت لر آراسنده مقصد ايله متن، روح ايله بدن، دوشونجه ايله  
سوز، فکر ايله شكل آراسنده کی کبی برفرق كورمك فكلرى  
بوكون چوق منتشر ومقبولدر. چونکه اکر دين ايله عقايد  
عینی شی اولسه ایدی عقایدك غیرمعقولیتدن دولایى دينى رد  
ایتمك مجبوریتنده قاله حق اولان برچوق مفكرهرك اصل اساسلى  
عد ایتدكلرى برنقطه دن بوسایه ده دینه مربوط قلا بيلمه لرینه  
امكان براقیور.

ريچلك نقطه نظرينك بويوك محسناتى حائز اولديغى انكار

ایدیله مز.

الهیات منتسبلی ، علم ، نظریه ، وقوف اولان هر شیئی  
دینه بیکانه اولدینی بیانیه بروجہ پیشین a prior برطرف  
ایتدکری ایچون آرتق علمک کندیلرینه مشکلات  
چیقارماسی تهلکه سندن هیچ قورقمازلر. چونکه او یله ساحه یه  
یرلشمش لردرکه، تعریفی اقتضاسی اوله رق، مالکانه علم ایله هیچ  
برمناسبتی یوقدر. بناء علیه یوللرینک اوزرنده علمه ناصل اولورده  
تصادف ایده بیلیرلر ؟ علم ، انسانک ظواهر خارجیه سنی تدقیق  
ومشاهده ایدر، بربرلرینه ربط ایلر. حالوکه زاهد برآدم اللهک  
وقاردش لرینک روحلری ایچنده یاشار. کندی ایچنده اللهک  
تأثیرینی دویار. بوتأثیر آلتنده دعا ایدر، سوهه، امید بسلر.  
علمک بو حادثات اوزرینه هیچ برتأثیری اوله ماز. چونکه  
دائرة تدقیقه داخل اولان حادثاتدن بوتون بوتون آیری بر  
صنفه منسوبدرلر. علم، وقوفلر آرار. حالوکه بو حادثات برر  
شأنیتدر. برطاقم بیلکیلر، برطاقم موجودیتلری وار اولمقدن  
ناصل منع ایده بیلیرلر ؟

بویله صرف روحیجیلک مسلکینک آکلادینی بر معناده  
قبول ایدیلن دین، علم ایله چارپشمه یه برمیدان ویرمیورسه بونی  
خصمنه هیچ طوته ماق ویرمیه جک قدر صوک درجه ده کوچوله رک  
پایه بیلمش اولدیعنی ادعا ایتک بو بحث ایتدیکمز الہیات منتسبلینه  
کوره دوغرو دکلدرد. مادی شأنیت له مشغول اولان عالملر ایچون



احتمالکه صرف روحانی اولان شیلر بر هیچلکدن عبارتدر .  
فقط دیندار آدم بو هیچلکده هر شیئی بولور .

In deinem Nichts hoff 'ich das All zu finden

فائوست ، مه فیستوفه لسه خطاباً :

« سنک هیچلککلکده کلی بولغی امید ای دییورم » دییور .  
اولا بوراده ، مختاریتی ، استقلالی ، حریتی بولیور . اکر  
وجود لاهوتی طبیعتک و علمک شرائطنه تابع ایسه بوش برکله دن  
عبارتدر . اکر وارعد ایدیه جکسه حقیقه مبداء ، تشبث ، خلق  
و ایجاد او اولماسی ایجاب ایدر . هیچ برسبیله مقید اولمقسزین  
کینی بر لطف الہی فکری حقیقتده شونی افاده ایدر که اللہک  
افعال و حرکاتی موجودات تعیین و ایجاد ایده مز . چونکه  
موجودات آنحق اللہ سایه سنده واردر . اللہ ، ایسه آنحق کندی  
کندیسنه تابعدر یعنی تمامیلہ حردر . عالم محسوس ایچندن اخراج  
ایدیلن دینک صرف قلب داخلنده محصور قاله رق یالکز قلبی  
علاقه دار ایدن شیلره انحصار ایتدیکنی سویله مک دوغرو  
دکدر . انسانک ذی شعور و معنوی حیاتنک منبعده یرلشمش  
اولان دین اونک بوتون حیاتی جانلاندیر مق و ایسته دیکی  
شکله صوفی ایچون دها زیاده حائر قدرتدر .

فی الحقیقه تجربه کوسترییور که حیات دینیہ باطنیه یعنی تصوف  
دینلن شی صوک درجه ده زنکین وقوی بر شأنتدر . اللہ ایلہ  
اشتراک یالکز قوتلی یاخود مشفق ، کیزلی یاخود میال انبساط

بر طاقم هیجانلرک منبى اولمقله قالماز. اوليله بر طاقم اراده وایمان  
صاحبی آدملر یقشیدیررکه بونلر وجدانلرینی هیچ برشیده اسیر  
ایتمزلر، اللهک امرینی یایمق ایچون هر شیئی کوزه آلمغه حاضر  
بولونورلر. اللهه اعتماد ایتمک کندی نفسنه اعتماد ایتمک دیمکدر.  
متصوفین، موجوداتی، شو بولوندقلری حال ایله یالکز علمی  
ربط و بند ایده بیلیر دییه عد ایتدکلری ایچون یوزلرینی عمله  
واستقباله توجیه ایدرلر. فی الحقیقه، روحک کندی اوزرینه  
طوپلانماسی، نفسمه، اللهی بولمق ایچون صرف مساعی ایدلمسی  
حیات صوفیهک آنجق ایلمک آیدر. اه برنجریدن عبارت  
دکلدر. کرک اشیانک کرک روحلرک پرنسپیدر. اللهک تصرف  
ایتدیکی بر آدم دنیایی کندی پرنسپینه یاقلاشدیره حق صورته  
دکشدیرمک ایستهیه جکدر. بوصورتله برمتصوفک آلتندن بر  
فعل و حرکت آدمی میدانه چیقاجقدر. اولرک بوقرارلری،  
بوغیرتلری، فراغتلی، شوق و غلیانلری، مغلوب اولماز ثباتلری  
قارشیدسنده حسیاتلرینک برر شأنت اولدیغنی کیم انکار ایده جک  
وحیات باطنیه لرینی قابل اهل بر خولیا عد ایله یه بیله جکدر؟

\*  
\* \*

ایشته بوصورتله دین ریچل مسلیکنه کوره آکلاشیلیرسه  
علمک مخالفتنه معروض قالمادقن باشقه کندی خصوصیتی دائره سنده  
سربستهجه و مؤثر صورته انکشاف ده ایده بیله جکدر. عجبایچلمک  
نقطه نظری مفکره بی تمامیه ممنون ایده بیلورمی ؟

اول امرده، ترقی معلومات و تفکر و ملاحظات نتیجه سنده  
 بو نقطه نظر دن ریچل مسلك كننده بر طاقم تعديلات و وقوعه كلش  
 اولديغنی نظر اهامال ايله كچيشدير مك غير قابلدر. حقیقه تده، وضع  
 ایدیلن اساس، چیفته ایدی. بر طرفدن حس، باطنی تجربه،  
 انسان ايله اللهك مناسبتهك شعوری واردی. دیگر طرفده  
 تاریخ، تورات و وحی اخذ موقع ایتمشدی. واقعا وحیه مستند  
 اولان حقایق، عقلی بر طاقم و قوغلر دییه تلقی ایديله یوردی.  
 بونلر کلمه نك اصل معناسيله بر ریلکی دكلدر و بیلکی اولامازلردی.  
 بونلر بر مسلك حالنده طویلانه بیلیرسه و طویلانمق لازم کایرسه  
 بو صرف شکلی بر نقطه نظر دن وقوعه کله بیلیردی و بر عملیه  
 منطقیه ايله یاپیلیردی. آنجق بو عملیه منطقیه تعریف ایدر، تنظیم  
 ایدر، فقط یالکز باشنه برشی اثبات ایده مزدی. وحیه مستند  
 حقایقی قبول ایتمه نك حکمتی صرف عملی اوله رق قایلردی.  
 بو حقیقه تدر شعور دینیک احتیاجاتيله توافق ایدردی. انسان  
 ایچون بر قیمتی حائر ایدیلر، روح بشره بر قوت و نشاط و بر لرردی.  
 ایشته حکمت قبوللری بو ایدی. مع مافیه بو وحی کیفیتی فردی  
 شعور لرده، و وجدانلره رهبر لك ایتمه که واونلری بر یره طویلانمه  
 قابلیتلی، او بر قتیف بر اساس ایدی و بویله قالماسی لازم ایدی.  
 بویله آکلاشیلان وحی نه صورته محق و معقول کوستریله  
 بیلیردی؟ هر مان دییور که: اکر بنم شخصی تجربه م بنم ایچون  
 یکانه معیار حقیقه ت اوله جقسه باشقه لری طرفندن فرضا بر سن پول،

برسن او کوستن، برلوتەر طرفدن یاشانیلان فقط بئم طرفدن  
 تجربه ایدلمش اولمایان وقعہ لره اینانمغه ناصل مجبور طوتولایلیرم؟  
 هبسی بوقدرله قالماز. ریچلاک تفکراته باشلادیغی تاریخده  
 کتب مقدسه احکام وقوانینی اساسی هنوز قابل مدافعه ایدی.  
 فقط اوتاریمخدن بری تنقیدک ترقیسیله بوغیر قابل برحاله کلشدر.  
 وقتيله کتب مقدسه ده ایمانک محقق تملنی بولیورلردی. فقط  
 کتب مقدسه شیمدی اوتملی تأمین ایده مز لر. او کوست ساباتیه  
 اکر لایخطی بر سلطه یه احتیاج وارسه بونی پروتستانلر  
 کبی تورانک شبهه لی وهیچ تعدیل قبول ایتمین متنبده دکل  
 قاتولیکلر کبی جانلی بر شخصک قابل انخما و سربست ذکاسنده  
 آرامق دها مناسب اوله جفنی سویله یه جک درجه یه وارمشدر.  
 بوچاره حل ریچل مسلیکنه هیچ ده ملایم کلمدیکی جهتله  
 او برکتیف عنصر سو برکتیف عنصره، وحی ایمانه کیتدجکه فدا  
 ایدلمکه باشلاندی. هرمان ایمان ایچون تمل اولق اوزره، بر  
 فردک حیات باطنیه عیسایی تأمل و تماشایدر کن حس ایتدیکی  
 انطباعدن باشقه برشی قبول ایتک ایسته مز. تورانک بزم کناه  
 ونجات کبی چیفته حسمزه تقابل ایدن اه قهاری واه رحیم  
 وغفوری هرمان نظرنده حد ذاتنده برطاقم شأیتلر، حالات  
 روحیه مزک سبیلری دکلدر. محقق اولان شأیتلر بزم حالات  
 روحیه مزدر. عدالت ومغفرت الهیه سوزلری بونلرک آز  
 چوق سو برکتیف برطاقم ترجمه لریذر. صرف بسیط بر ایمان

فردی اولمایان هرشی بو ایمانك آنجق تمثالی بر افاده سندن عبارتدر.  
 كلمه لرك عنعنوی معناسیله نه عقایده، نه کلیسالره احتیاج یوقدر.  
 فرد آرتق کندی کنديسندن خارجه حیقماز. عقایدی بر طاقم  
 تشبیهلردن عبارت عد ایدر، بونلری کندی تجربه شخصیه سنه  
 کوره تفسیر ایلر. بر کلیسا اونك نظرنده هر مجبوری آمنتی  
 رد ایتك فیکرنده برلشمش بر طاقم انسانلر مجموعه سیدر .

بو اصولك محذوری پك آشکاردر ؛ اوده هیچ محتویاتی  
 اولمایان سوېژ کتیفجیلک وادیسنه دوشمکدر.

فلایده ره Pfleiderer ، دینك موضوعنی صرف خیالی  
 بر حاله کتیردیکنی هرمانه مقام مؤاخذه ده سویلر . اونك  
 فکر نجه الهی بوتون بوتون ساحه وقوفك خارجه وضع ایتك  
 اونی بر موضوع تمنی و تمایل حاله کتیرمکدر . بو ، ساده جه  
 الله اعتقاد خیرکاردر، تسلیت بخشدر، جسامت آوردر دیه  
 اللهك وار اولدیغنی ادعا ایتك اولور . بو اعتقادك علمك میدان  
 قویدینی حقیقتلرله قابل تألیف اولوب اولمادیغنی هیچ دوشونولمور  
 دیمکدر . بویله بر ایمان ایسه کنديسنك ساده جه سوېژ کتیف  
 بر ذهابدن عبارت اولمادیغنی اثباتدن عاجزدر .

ریچلک توصیه ایتدیکی تنزیه و تطهیر اصولنی کیتدجه ده  
 جذری بر صورتده تطبیق ایده ایده ، شعور دیندن نفسك ،  
 شخصك کنديسندن بلاواسطه نبعان ایتمین هر شیئی خارجه

براقه براقه اعتقاداتی شعور نظر نده محق و معقول کو ستره جک  
 بوتون عناصرک ازاله اولونه جفی محققدر. چونکه بر شیئی محق  
 و معقول کو سترمک دیمک سو بڑ کتیف و خام وقعه نك حدودینی  
 کچه جک و کندیسندہ عمومیلک و ضروریلک یعنی اوبڑ قتیفلک  
 موجود اولاجق بر سبب بولمق دیمکدر.

عقایدک و مؤسسات مذهبیہ نك قارشیسنه دیکیلہ رک و اونلرک  
 مظاهرتی استخفاف ایله یه رک : یالکیز بن وارم و بو کافیدر !  
 دین بر ایمانک ماهیتی نهدر؟ بو مسالک کوره بو ایمانک ذکا  
 ایله آ کلا شیلہ بیلن لسان ایله قابل ترجمه اولان بوتون افاده سی  
 فردک حس ایتدیکی شیئی کندیسنک خارجنده موجود اولان  
 شیلره ربط ایده رک کندی کندیسنه قارشى ایضاح ایتمک و ذهنده  
 اونی تمثیل ایله مک ایچون یاپدینی بر تشبثدن عبارتدر.

بو صورتله بوتون فکری محتویاتدن تجرید ایدیلن دین  
 مجرد بر شیدن ، بوش بر شکلدن ، یالکیز بر کله دن ، بر  
 هیچلکدن عبارت قالمازده نه اولور؟ ای شیلرده فنا شیلرده  
 عینی قناعت شدیدہ ایله اینانیله بیلیر. اگر دینی توصیف ایتمک  
 صرف ایمان کافی کلسه ایدی هر متعصب آدم ، بر سن پول ،  
 بر سن او کوستن درجه سنه دیندار بر آدم اولمق لازم کلیردی.  
 کورولیور که فعلیاتده یالکیز ایمان ایله اکتفا ایدلمیور. بو ایمانک  
 عیسایه ایمان اولماسی لازم کله جکی آز چوق ضمنی بر صورتده  
 مقصوددر. شعوردن بحث اولونیور. فقط بونک خرسیتیان



شعوری اولدینی ضمناً علاوه ایدیلور. نه یاییلیرسه یاییلیر ، ایمانه او بڑقتیف یا خود فکری بر عنصر ادخال اولونیور . فی الحقیقه ، اولدجه بر معنایی حائز مثبت بر اساس الدہ ایدلمک ایسته نیورسه بو عنصر دن صرف نظر اولونه ماز .

حقیقته ، مجرد و بوش برسو بڑ کتیف جیلکه قائله دن شعور دینی نك ، ایمانك ، عشقك بوتون قیمتلی محافظه و تأمین ایدلمک ایسته نیورسه بونلری منفی صورتده تطهیر ایدرک بر جوق شیلری ایچندن حقیق-اروب آتمق یولنه کیمه مک لازمدر . بالعکس نفسی زنکی نلشدیرمک ، بویولتمک و اوئی عمومی وجوده ممکن اولدینی قدر یو کس لتمک ایستر . ذکای مجردک صرف نظری نقطه نظری حدودینی آتلامق ایچون تعقیب ایدیله جک اصول حیاته ربط ایدیلن ذکانک بوتون منابعدن استفاده ایتمک و ذکا خارچنده بر نقطه نظر آرامغه قالمقامقدر . علمک و عقلک هجوملرینه قارشى اوزاقلرده ، کیتدکجه ده اوزاقلرده بر مایجا آرایه جق یرده بو علمی ممکن اولدینی قدر کنیش بر نسبتده بلع و تمثیل ایله مک ، مساعد اولدینی بوتون انکشافی عقله تأمین ایتمک و بوتون بو معلومات ایله فکری غایه لرك ساحه حقیقه ایصالی ایچون وسائط و آلات ترکیب ایلک ده ا مناسب اولور .

ذاتاً ، یابدقلى کبی ، شعورك ، قلبك و هیجان دینینك ایچنه تحصن ایتمکله علومك تجاوزاتندن ریجیل ایله شا کردلرینك کندیلرینی مصون بولوندی ردقلى دوغرو میدر ؟

اونلر يالکيز حادثات حکميہ دن باشقه بر شيله مشغول  
اولمايه جق و بو حادثات ايله حادثات مغنويه آراسنده بر رابطه  
تأسيسنى دوشونميه جک بر علم فرضيه سنه کوره محاکمه لرينى  
يوروتيورلر. هر حالده علمک ساحه تدقيقنه کيرمه ين و کيرمه ين  
بر صنف حادثات ، حرکات و انطباعات روحيه موجود اولديغى  
قبول ايديوورلر. بر برندن آيرى ايکى عالم کي عالم خارجى و عالم  
باطنيدن ، موجوداتدن و شعوردن بحث ايليورلر . اونلرک  
مسئله کيرينک اصل تملى بو نقطه ده در. شعور اونلر نظرنده اويله  
بر دائره درکه اونک ايچنه هيچ بر قوه طبعيه نفوذ ايده مز .  
موجوداتک منحصرأ ظاهراً و خارجنه توجيه نظر ايدن علم ،  
وسائطدن محروم اولديغى ايچون او دائره ني تدقيق و تعميق  
خصوصى عقلنه کتير مز .

فقط خارج ايله باطن آراسنده کي بو تضاد، علمک نفوذينه  
غير مساعده بر قسم روح تلقيسى آنجق بر طاقم تشبيهلردن  
عبارتدرکه بو کونکي بيلکيلر مزده توافق ايتزلر .

واقعا علم چوق زمان آنجق عالم ماديک حادثاتى بنمسه مک  
ادعا سيله اکتفا ايتمشدر. مغنوى جهته کي حادثاتى مابعد الطبعيه  
يا خود ادبياته بر اقيوردى . فقط بو کون حال د کيشمشدر .  
علم ، ده قارتدن برى مساعى علميه ده انتظام و اصولک مؤثرينى  
و مختلف بيلکيلرک بر برلريله اولان مناسبتلرينى کيتدکجه تجربه  
يده رک کنديسنده آرتق بلااستثنا بوتون انواع حادثاتک تدقيقاتنه

کیریشه بيلمك قوتى حس ایتمکده در. روحك برهيجانى نه قدر  
 اوزاقده کورولورسه کورولسون، علم الهیات منتسبی نظرند  
 نه قدر صمیمی، مخفی، اسرار آلود اولورسه اولسون حقیقی،  
 معلوم، قابل تدقیق و مشاهده بر شیدر، بناءً علیه بر حادثه در.  
 بر طاقم قوانینه تبعاً سائر حادثاته بالضروره مربوط بر حادثه در.  
 بر مؤمن ایسته دیکی قدر کندى حرکت ایمانك، دعا سنك،  
 الله ايله برلشمك یولنده کی حسنك اشیای مادیه ايله ذره قدر  
 علاقه سی اولمایان صرف روحانی حالات اولدیغنی ادعا ایتسون.  
 علمه تعلیق ایتمك ایچون بونلرك دائره شعوره کیرمه لری کافیدر.  
 چونکه ارتق علم، نه اولورسه اولسونلر بوتون حالات شعورك  
 تولدینی ایضاح ايله مشغولدر. عالمده بر طاقم اصوللر موجوددر که  
 توسایه ده یقینه کنندن یقینه کنه یورویه رك، صیرا ايله کیده رك،  
 باطنی خارجییه، اسرار آلودی قابل ادراک، سو بثرکتینی  
 او بثرقیفه ارجاعه موفق اولویور.

حاصلی، اول امرده علمك نه اولدیغی، ساحه شمولنك  
 نویه قدر انتشار ایتدیکی، حدودلری بولونوب بولونمادیغی  
 آکلا شلما دن حرکت ایدیله جك اولورسه علمك ایریشه مهیه جکی  
 بر نقطهیه چکیلمك واوراده ملجأ بولمق احتمال خارچنده در.  
 بوراده اویله بر مسئله وارددر که اوکا یالک زجه دو قونمق و بعض  
 عمومی مطالعات فلسفهیه ايله حل ایتمکه قالقمق کافی دکلدر.  
 بومسئله نی اساس اعتباریله و علمك کندى نقطه نظرندن تدقیق  
 ایتمك اقتضا ایلر.

## ایکینجی باب

### علمک حدودلری و دین

علمک عقیدوی بر نقطه نظر دن تلقیمی و تلقی تنقیدی .

۱ — علمک حدودلری اوزرینه مؤسس بر ستایش دین —

تجربہ نك وقوف علمی به اساس یكانه اولماسی — نتیجه لر : نظریاتده و عملیاتده حدودلر — قوانین علمیہ یالکز تحریات اصوللریدر — علمی وقوفلرک وقعہ لرله مناسبتنک حدودلری ومعناری — بوصورتله آکلاشیلان علمک انکشاف ایچون دینه بر اقدینی امکان — دینی دستورلرک نسبی وعینی غایه به متوجه اوصافی .

۲ — بومسلیک مشکلاتی — علمک افلاسی تعبیرله تولد ایدن

مناقشه — هانکی معناده علم کندیسنه حدود قبول ایدر — بومسلیکده دینک مشکل موقی .

۳ — علمک دینه متوجه کبی نظر ملاحظه به آلماسی — دینی

مذهبلرک اساسلرینک بالذات علم طرفندن وجوده کتیرلمسی ؛ بونقطه نظری محافظه ده کی مشکلات. — علمک حدودلرینک ماهیتی : بونلر یالکز منفی دکلدر . علمک موضوعنک شرطی اولمق اوزره علم فوقنده برشی معناسنی تضمن ایدرلر .

۴ — بردوام قالان مشکلات — علمک و دینک مختاریتلری

مشکلاته اوغرایور — صرف تنقیدی بر اصولک عدم کفایه سی .

دینه بر محراب مقدس اولمق اوزره موجودات مرئیہ نك

اک اوزاق نقطه لرنده ، شعورک اک هجرا درینلکلرنده بر محل

مخصوص آرایاندر مشترك بر ساحت او ستند علم ايله قارشى قارشى به  
 كلكدن و اوساحده علمك احتمالكه دينه بر حق حيات  
 طائمايه جفندن بالخاصه قورقارلر. مغلوب اولمى كوزه آلمقدن  
 ايسه مجادله به كيريشمه مكى ترجيح ايدرلر. حالبوكه حتى علما  
 اينجده بيله بر چوق ذوات بوقورقوي بر آز مفرطانه بولورلر.  
 علمك، غير مجرد شكليله نظر ملاحظه به آلتنجه، علمى  
 اولمقدن زياده فلسفى الهاماته تابع بولونان نظريه لرك ظنندن  
 زياده سربستى انكشاف ادبانه مساعد اولديغى سويلرلر.  
 بونقظه نظردن، زمانمزد علم فكرنده وقوعه كلكش اولان  
 تحولى پيش تامله آلمق لازمدر. يقين وقته كلنجه به قدر علم  
 طبيعت اشياك وقوف مطلقندن عبارتدى. علم، محقق و قطعى  
 بر بيلكى ايدى. علمك ضدى ده فردى و متحول اولان اعتقاد  
 ايدى. علم، حقيقى پرنسيپلرينك كشفنه مديون اولديغى تدقيقاتدن  
 قوت آلهرق آرتق كندى ساحت شموله و حقوقنه بر حدود  
 تصور ايده ميوردى. طبقى اسكى مابعدالطبيعه كبيدى. هر شئي  
 تام صورتده بيلمك ادعاسنى عالم تجربى به نقل ايتمشدى. فقط  
 بو افلاطون ايله آرسطونك بديعى و عقلى مسلكلرندن فرقى  
 اولهرق اويله بر مابعدالطبيعه ايدى كه اساسات اشياك ذكايه  
 و حر اراده بشريه به عائد اولان هر شئي بر طرف ايده رك اونلرده  
 يالكز مادي و ميخانيكى عنصرلر قبول ايديوردى.  
 بويلا بر علمك قارشيسنده دين هجومه اوغراماق ايسترسه

اونىكله تصادف امكانى اولمايان بر ساحه يه چكىلمك مجبور يئنده  
ايدى .

فقط علمك بويله مطلق وى پايان بر بيلكى صفتيله تلقيسى  
بردوام قالماش و بوكونكى علم كندى معناسى حقنده باشقه  
بر فكر بسله مكه باشلامش اولديغنى سويله مك دوزرو اولور.  
بناء عليه علمك حقيقت حالده دينك موجوديتنه نه درجه يه  
قدر مانع اولديغى سؤلى تكرر اراده محل يوقيدر ؟



علمك حدودلری اوزرینه مؤسس ستایش دین

اوزون بر تردد دوره سندن صو کره علم عادتاً اصطفاى  
طبیعی ایله نهایت کندی اصولی تعیین و تثبیت ایتمشدر . علم  
آرتق تجربه ، یالکیز تجربه اوزرینه تأسس ایتک طریقنى  
طوتمشدر . واقعا ، وقعه لری مشاهده ایتدکن صو کره اونلری  
خلاصه ایتک ، تصنیف ایتک ، بر قسمی دیگر قسملره ارجاع  
ایتک و بونلری بر اصول آلتنه آلمق ایجاب ایدر . فقط بو منطقی  
ایشکده رهبری و قونترولیسی تجربه اولمق لازمدر .

علم بو طرز تدقیق و تفحصی قبول ایتمکه صو کره  
قیمتدار بر طاقم فوائد تأمین ایتمشدر . موجوداتی انسانلرک  
مفکره لرنده ارائه ایدن مفهوم لری ساده جه تحلیل و ترکیب  
ایله مشغول اولدینی زمانلرده ایریشمکدن آمین اولامادینی عالم  
حقیقییه نهایت واصل اولیور ؛ تجربه و طبیعتی تکرر ایتمکه  
مجبور ایده جک وسائلی انسانه تأمین واحضار ایلدیکی ایچون  
تطبیقاتده غایت قابل استفاده بر طاقم بیلکیلر الده ایدیور .  
علم او ابدی عدم قطعیتدن وافکار و مطالعاتک نامتناهی تنوعندن  
قور تولمشدر . علم ، بوتون ذکالره کندیسنى قبول ایتدیریور .  
آرتق بوتون مکتسباتی بر معناجه تمامیه قطعیدر .

فقط بو منافعت برده مقابل جهتی واردر که اوده علمک

ساحه سنی و قیمت فلسفیه سنی تحدید ایتمه سیدر. بونک غایت مهم نتایجی کورولور .

دوباره مونک معمای کائنات قارشیدنده اعتراف جهله منتهی اولان مشهور نطق ۱۸۸۰ تاریخندن بری مفکره لری مشغول ایتمکدن خالی قالمامشدر. بحث ایتدیکی یدی معمادن ال آشغی دوت دانه سی ابدیاً غیر قابل حلد، دیور . بونلرده ماده نك وقوتك اصل ولې ، حرکتك منشائی ، احساس بسیطك منشائی و اراده نك حریتی ایدی .

چونکه بودرت مسئله تجربه نك دائره شمولندن خارجه ددر . فی الحقیقه تجربه نك نه قدر امتداد ایده جکی فرض ایدیلیرسه ایدیلیرین ، نه ایلک منشألره نه صوک غایه لره ایریشه مز . زمان ایچنده ایلک ویا صوک حادثه یی - که شبهه سز بر خیال دن عبارتدر - هیچ بر وقت الله ایده مدیکی وایده میه جکی کبی میدان قویدینی توالی ثابتك تظاهر حادثاتی نه درجه یه قدر ایضاحه کفایت ایده جکی ده محتاج سؤالدر . وجود ، کندیسنده معین بر ماهیت وطبیعت اولدینی ایچوندر که بر طاقم قوانینه تبعاً انکشاف ایدر . بوماهیت وطبیعت نه در؟ هیچ دیکشمزمی؟ نیچون فلان صورتله تعین ایتمشدرده فلان صورتله تعین ایتمه مشدر؟ حقنده تجربی بر معلومات ویرمک ایچون هانکی اولیاته اونی ربط ایتلی؟ بو مسئله لر علم ایچون بر دائره فاسده تشکیل ایدر لر . بناء علیه بالضروره علمك خارجه . چیقار لر . تجربه بر طاقم قانونلر یعنی

حادثات آراسنده بالفسيه ثابت مناسبتر مشاهده ايدر . فقط  
بو قانونلرده بر طاقم وقعه لرميدر يوقسه وقعه لره حاكم اولان  
غير متبدل بر طبيعت وماهيته مي منسوبدرلر؟ بورالريني بيلمك  
ايچون علمك بر واسطه سي يوقدر.

علم بويله ساحه شمول نقطه سندن محدود اولديني كبي  
درينلك خصوصنده بي پايان دكلدر . علمك ادراك ايتديكي  
شكلده حادثه ، وجودك عيني عد اولونه ماز . علم بر حادثه يني  
سوئر كتيّف و فردى عناصرندن تفريقه آنجق اوني بر طاقم  
مناسبترلره ، اولچولره و قانونلره تفريق و تحليل صورتيله قادر  
اولا بيلير . فقط ايكي حادثه آراسنده كي بر رابطه اولق اوزره  
قانون مفهومي ، عقل نقطه نظرندن نه قدر غريب اولورسه  
اولسون بر ايبليك ايله بر برينه مربوط ايكي شئي پك قولاي  
تصور ايد بيلن مخيله ايچون هيچ اولمازسه واضح بر شيدر .  
موجود اولمايان ايكي حد آراسنده اولدن موجود بر طاقم مناسبات  
فرضيه سي مفكره بشر ايچون حوصله خارجي بر شيدر . مفكره  
بوني آنجق آكلاماديغي بر شيمك تمثالي اولق اوزره قبول  
ايد بيلير . علم نفس و عنصر مفهوملريني بر طرف ايدهرك مناسبت  
مفهومنه نه قدر چوق اهميت ويريرسه بر چوق دماغلرك موافقت  
وقبوللرينه او قدر زياده مظهر اولور . عيني زمانده بوتون  
مفكره لرده ، بو علمك واراغك تام و صحيح بر صورتده تمثيل  
وارائه سي ديمك اولمايوب اوني آكلامه نك بر طرز مخصوصندن

عبارت اولدیغی و علمک آرزو ایتدیکی او بڑ قتیفلکه واصل اولق  
اوزره بر طرف ایتدیکی شکلرده بر حقیقت اساسی بولونماسی  
لازم کله چکی حسی حاصل اولور.

نظریات عالمنده علمک حدودلری واضح اولدیغی کبی تطبیقات  
عالمنده غایت واضعدر.

معقول بر حیوان اولان انسانک حیات عمومیه سنک شرائطی  
اوله رق بر طاقم غایه لر واردر . انسان بونلری شایان آرزو ،  
ای و مجبوری عد ایتدیکی ایچون قبول ایدر . انسانه بو غایه لردن  
هر هانکی بریسی ایچون اونو ایسته میکی ایجاب ایده جک بر طاقم  
اسباب کو سترمک علمک دائره اقتداری داخلنده دکلدر . علم  
فلان واسطه لرك استعمالی فلان نتیجه یه ایصال ایتدیکنی  
او کره تیر . فقط بو آنجق او نتیجه یه واصل اولمغه قرار  
ویرمشمسه م بنی علاقه دار ایدر . علم بکا خبر ویرر که بر چوق  
انسان فلان غایه یی شایان آرزو ، ای یاخود مجبوری بولیورلر .  
بوندن دولایی بنمده اونلر کبی دوشونمهم می ایجاب ایدر ؟ بر  
آدمک دیگر آدملردن باشقه دورلو دوشونمکه بعضاً ای ایتمش  
اولدیغی کورولمه مشمیدر ؟ یو کسک آدملر دییه تقدیر ایدیان  
کیمسه لرك بویله یو کسک عد ایدمله لری ویریلن فکرلری هان  
قبول ایتمش اولمالرندن می نشئت ایدر ؟ علم بر طاقم وقعله ر مشاهده  
ایدر ، بزه او کر تیدیکی شیلرك کافه سنی بر وقعله اولق اوزره  
او کمزه قویار . حالبو که بن کندی عقلمه کورده حرکت ایتمککم

ایچون بر شیئی بر وقعہ کبی دکل بر غایہ کبی دوشونمکلمکم  
لازمدر. یعنی اوشیمک اولامایہ جغنه فقط اولماسی لایق اولدیغنه  
حکم ایتلمییم. بناء علیہ انسان نقطہ نظرندن حرکت ایتک  
علمک هرشی دیمک اولمادیغنه حکم ایتک و : خیر ، مفید ،  
شایان آرزو ، کوزل ، مجبوری کله لرینه علمک بیلمدیکی عملی  
برز معنا ویرمک دیمکدر .

علمک ایشته تام بومفهوملری ، بر طاقم حسیاته ، اعتیاداته ،  
غنغناه ونهایت خیلہنک ذهابلرینه ارجاع ایتک صورتیلہ ایضاح  
ایتمکده اولدینی ادعا اولونه بیلیرمی ؟ بویله بر ایضاحات ، اگر  
دوغرو ایسه ، عملی ، معقول وانسانی دیکمز حیاتک احساسندن  
باشقه برشی دکلدر . حیات بشر پایدار اولدقچہ بو ایضاحاتک  
بررد وانکارینی تضمن ایدہ جکدر . اگر عمومی حیات وارسہ  
علمک حدودینی تجاوز ایدر .

بالخاصہ حیات اجتماعیہ علمک ویردیکی معلومات ایله اکتفا  
ایده مز . حیات اجتماعیہ یوکسک ومثمر اولا بیلیمک ایچون  
فردک فداکارلغنه ، قوانین انسانیه ، منافع عمومیه ، عدالتہ  
ایماننه ، ماضیہ صداقته وانسال آتیہنک خیری ایچون غیرتنہ  
محتاجدر . حیات اجتماعیہ فرددن اطاعت ، فراغت ایستر ، حین  
حاجتده حیاتی ایستر . حالبوکه ، علمی ارباب علم ایله قاریشدیرانلر  
نه دیرلرسہ دیسونلر علم هیچ بر زمان فردہ بویله کندیسینی فدا  
ایتمہسی وحیات اجتماعیہ منقاد اولماسی ایچون مقنع سبیلر

كوستره مز . حيواناتك ايچنده برچونغي فداكارلق كوستررلر . فقط چونغي ده بر برلرني يرلر . بومثال ، دوشونن بر انساني اقناعه كفايت ايدمهز . چونكه ذكابي سايه سنده او كنديسنه قبول ايتديرلك ايسنه نيلن قاعده نك مشروعتني مناقشه ايدر وهيت اجتماعيه ياديني فمالعك كنديسنه صيچراماماسني تأمين خصوصنده بك اعلا موفق اولور . وقعه دن باشقه برشي طائيمان علم ، خودكاملق حسي فداكارلق حسنه غلبه چالان ، بر آدمي بو مناسبتي بوزهرق فداكارلق حسني غلبه ايتديرمكه وكنديسنه تعلق ايمه ين برخير ايچون نفسني فدا ايله مكه ناصل اقناع ايدمه جكدري ؟ فداكارلق استعدادينك حقيقتده هر شخصك شعورنده جمعيت بشريه نك كندى اعضالري اوزرنده حائر اولديغي تاثيرك بي شعورانه بر انعكاسي اولق اوزره موجود اولديغي مي اثباته چاليشه جق ؟ فقط بر فداكارلق وقوعه كله بيلمك ايچون كنديسني بردن بره ، ايچريدن كليور كي ظن ايمه سي ايجاب ايدر . انسانلر جمعيت بشريه اوغورنده كنديلرني فدا ايدرلر سه بوني تشكيلات اجتماعيه نك برر ميخانيكي محصوللري اولدقلىرني دوشوندكلرندن دكل كنديلرني برر آدم ، برر شخص عد ايتدكلرندن دولاني يابه جقلردر .

ايشته بو صورته ، عصرى علم تجربى ، منحصر آ تجربه اوزرينه مؤسس اولديغي ايچوندر كه كرك نظريات كرك تطبيقات جهتنده دائره شمولي محدود كي كورونور . عجباً علم ، هيچ اولماز سه



صلاحیتدار اولدیغی نقطه لرده مفکره یه حقیقی بر قطعیّت تأمین  
ایده بیله جک حاله میدر ؟ بو بیله مختلف فیهدر . بعض ذوات  
علمک قیمتی کندی - ساحه سی داخلنده بیله تحدید ایتک دوغرو  
اوله جغی مطالعه سنده درلر .

علمک وضعیتنده زمانمزدده وقوعه کلن تبدل اوزرنده  
اصرار ایتک لازمدر . بوصوک زمانلره کلنجه یه قدر علم عقیده وی  
برشکلده ایدی یا خود اوله اولمق ایستوردی . الک قطعی اقسامنده  
علم کندیسنی صورت قطعیده تشکل ایتش کی عد ایدیوردی .  
دیگر قسملرنده ده عینی مکملیته ایریشمک املنده ایدی . هر  
موضوعده ، اساسات عمومیه دن خصوصی شیلرک ایضاحاتی استتاج  
ایدن بر اصول شکنده نمایان اولمق مقصدی تعقیب ایدیوردی .  
اسقولاستیک ، شکل اعتباریله ، اونک غایه کمالی ایدی .

حالبوکه بو کون هیچ بر علم حتی ریاضیات بیله بر اسقولاستیک  
اولمغه راضی دکلدر . بسط وایضاح یا خود تعلیم و تدریس  
خصوصنده کی سهولتدن دولای علم هانکی شکلی آیرسه آلسون ،  
حد ذاتنده ، صوک درجه ده تکمیل قابلیتنی حائز بر استقراردن  
عبارتدر و بویله اولمقده بردوامدر . مسئله بو استقرارنک ناصل  
وقوعه کلدیکنی بیلیمکدر .

بو نقطه نظر دن ، استقرارنک نتیجه لری اولان قانونلر و اساسلر  
ایله استقرارنک تملی اولان وقعه لری بر برندن آیرمغه لزوم وارددر .  
علما آراسنده اوزون مدت حکمران اولمش اولان باقون

فلسفه‌سنة كوره ، قوانین طبیعت كندیدلكرندن مفكره بشره  
حك اولورلر . يالكز ، بونك اچون ، مفكره افكار باطله‌سنى ترك  
ایتملی و تاثیر موجوداته كندیسنى مطاوعتكارانه بر اقالیدر .  
اصل وقوف دیدیکمز شیلرده انسانك فعال هیچ بر مداخله‌سی  
یوقدر . انسان شخصیتنی آنجق حسیاتنده اظهار ایدر . علم ،  
ایشته بو حسیاتی بر طرف ایتمهک چالیشیر .

تاریخ علومك تدقیقی مفكره بشرده علمی مفهوملاك تشكلی  
حقنده یاسیلان پسیقولوژی تحلیلی ایله برله‌شمنجه بوتون بوتون  
باشقه بر نظریه تولید ایتشد[۱] .

علمی قانونلری و پرنسیپلری او یله برشکلده افاده ایده‌رزكه  
بونلر دوغرودن دوغرویه طبیعتدن استیخراج ایدلمش کبی  
کورونورلر . فرضا : « فوسفور قرق درت درجه‌ده ادر » ،  
« عمل عکس‌العمله مساویدر » دیرز . فقط بو عقیده‌وی شکل ،  
نه قدر قولای و راحت اولورسه اولسون سعی علمینك صریح  
نتیجه‌سنى ارانه ایتمز .

حقیقتده ، علمك آرادینی و بولدینی شی بر طاقم فرضی  
تعریفاتدرکه بوسایه‌ده طبیعتی استیجواب ایتمهک موفق اولور .  
قرق درت درجه‌ده اریمك خاصه‌سی فوسفورك تعریفك بر قسمیدر .  
کویا علمك عکس‌العمله مساوی اولماسی پرنسیپی قوتك تعریفك  
بر پارچه‌سیدر . بودستورلك تركب ایتدکلری عنصرلك هیچ

بري حقیقه معلوم دکلدر و صورت واضحه و صحیحه ده معلوم ده  
اوله ماز. بونلرک تر کبلری ده مجهولدر. فقط مفکره برشی آرامق  
ایچون، نه آرادیغنی بیلمکه محتاج اولدیغندن تجربه نك ویردیکی  
نتیجه لری مناسب صورتده انتخاب و تعیین ایدرک طبیعته صریح  
واصول دائره سنده سؤاللر صورماسنه مساعد اوله جق برطام  
تعریفلر تشکیل ایلر.

بو تعریفلرک هپسی عینی پلان دائره سنده دکلدر. ایچلرند  
خصوصی و مشتق اولانلر واردر، عمومی و اصلی اولانلر،  
اولکیلرک شرطی تشکیل ایدنلر واردر. اک عمومی تعریفلر  
بالطبع اک زیاده دواملی و ثباتلیدرلر. بوندن دولاییدرکه  
قونوشورکن بونلر برر پرنسیپ شکلنده کورونورلر و بوندن  
دولایي قطعی برر بیلمکی ظن اولونورلر.

هپسی ایچون لزوملی اولدیغندن دولایي هپسندن زیاده  
لزوملی بر مفهوم دهها واردرکه اوده اصل علم مفهومیدر.  
بوده دیکرلری کبی اعمال ایدلمش بر تعریفدن عبارتدر. حادثات  
آراسنده کی دواملی مناسبتلر فرضیه سینه علم نامنی ویریورم.  
سعی علمی، طبیعتی بو فرضیه یه کوره استجواب ایتمکدن عبارتدر.  
طبقی، مظلونی استجوابدن اول احتمالی بر فکر ایدینن بر حاکم کبی.  
بو تعریفلرده مندرج بولونان حکملر استجوابی ممکن و مفید  
بر حاله کتیرمک ایچون تخیل ایدلمش شیر اولدیغنی جهته برر  
فرضیه اولمقدن باشقه بر ماهیتی حائز دکلدرلر و حائز اولامازلر.

چونکه موضوع بحث اولان مسئله ، بر کل محدود کبی تلقی  
ایدیله بیله جک معین بر فردی دکل هر استقامتده غیر محدود  
ونامتناهی اولان وهله بالخاصه استقبالدیه کی تظاهراتی بزجه هیج  
بر زمان بیلنه مین طبیعتی استجواب ایتمکدر. فقط مذشألری  
و روللری حقنده تنقیدی بر تدقیق اجرا ایدلمه دجه بو فرضیه لری  
بز مطلق پرنسیپ له قاریشدیریررز. چونکه اولا اونلره اوشکلی  
ویرمشرزدر. شکه عائد اوصافی اصل محتویاتک یرینه اقامه ایتمک  
ایچون بزده بر میل وارددر. سوکرده بو پرنسیپ لردن بعضیلرینی  
دیگر پرنسیپلر اولدن موجود عد ایدرلر. چونکه اصوللرمن  
ایچون ثروملی اولان شی بز حد ذاتنده الزم کبی کورونور.  
تجربه ، طبیعت ایله یکانه واسطه مناسبتمن اولدینی ایچون ،  
پرنسیپلرمن کبی صحیح بر طاقم دستورلر، طبیعتدن علی حاله  
استخراج ایدلمشله دییه تلقی ایدیه جک اولسه لر ایدی پک  
معناسز برشی اوله جغندن علمی مفهومملرک تشکلی تدقیقندن  
حقیقان بو نظریه نی قبول ایتمکه مفکره مجبور اولور. دائماً  
متحول و غیر صریح اولان تجربه دن ینه متحول بر طاقم انطباعاتدن  
باشقه برشی حقیقاماز. علمک تجربه اوزرنده اجرا ایتمکی تحولی  
آنحق مفکره نك بر اصول دائره سنده ایشه مداخله سی ایضاح  
ایده بیلیر.

مفکره ایسه بو عملیه ده تعریفلری و نظریه لری واسطه سیله  
بر طاقم بسیط تحریات اصوللری تأسیس ایتمدیکنی او قدر کوزل

مدرکد که مختلف صنوف حادثاتی تدقیق ایچون فائده لری کورولدیکی یا خود بر برینه معال نتیجه لر اعطا ایتدکاری زمان مختلف حتی اصلی فرضیه لرنده بر برلرینه ضد بر طاقم نظریه لری مساوی صورتده قبولدن چکینمز [۱]. اکر مفکره، نظریه لرینی سوق و اداره ایدن فکرلرده موجوداتک بر ایضاح مطاقی موجود اولدیغنه قانع اولسه ایدی طبیعی بویه اولمازدی.

فقط ، دنیله بیلیر که، علم نه صورتله تشکل ایدرسه ایتسون، موجودات ایله توافق ایتدیکی و اونلردن استفاده مزه مساعد بولوندینی غیر قابل انکار بر وقعه در. اشیا اوزرینه اجرای تأثیر ایده بینمک، اونلرک کندی اصول حرکات و تأثیر لرندن بعضیلرینی الله ایتمش اولمق دیمکدر. شبهه یوق که بزم بیلدکیمزک موجوداته مساوی اولمق درجه سنه واصل اولاماماسی احتمال دائره سنده در. فقط وقوفنر شائیتی کیتدکجه صیقی صورتده احاطه ایدیور؛ ایجادلری، اصول و قواعد موضوعه سی، خولیلری آنجق طبیعته دهایی اویمق غایه سیله در. واصل اولدیغی تقریبی شکل — که کیتدکجه اصله دهایی یا فلاشمقده در — ، شائیتیه هیچ بر زمان وصولدن بر عجز قطعی دیمک دکدر. ذاتاً شائیت کله سنک

[۱] هانری پوانکاره نک علم و فرضیه La Science et l'Hypothèse و علمک قیمتی La Valeur de la Science اثر لرینه  
مراجعت .

معناسی حقنده ایجه آ کلا شمع ایستر. علم آرتق مفکرهیه ،  
خارجی شیلرک مشابه بر قویه سنی و یرمک فکریخی بسله مز .  
ذاتاً کورونشه نظراً اشیای خارجیه اویله فرض ایدیلدیکی شکله  
دکدر. علم بر طاقم مناسبتلر کشف ایدر، تجربه بونلری اولدجه  
تحقیق ایلر. کله نك انسانی معناسیله اونک صحیح اولماسی و صحیح  
صفتی آلابیلمسی ایچون بو قدری کافیدر .

بعضیلری تجربه نك بو مناسبتلری تحقیق ایده بیلمسی برشی  
اثبات ایدمه چکی فکر نده درلر. علمی قانونلرک تجربه نتیجه سنده  
موفقیت کوسترمه لری طبعیدر . چونکه بو قانونلر اشیانک  
جریان طبعیسنی اولدن کوره بیلمک کمز ایچون ایجاد ایدلمشدر .  
حتی هیچ موفق اولماقلری یرلرده بیله اونلری موفق اولمش  
کبی تلقی ایتک ایچون پک ای بر چاره مز واردر . بویله بر  
شیئه تصادف ایتدی کمز زمان قبول ایدیلن قوانینک تأثیراته  
مخالف بر تأثیر اجرا ایدن باشقه قانونلر تخیل ایلر. بوضورتله  
آلشقیین بولوندیغمز پرنسیپی قورتارمق ایچون علاوه لر ،  
تصحیح لر یاپار دورورز . نهایت مسلیکک ایچندن چیقلماز  
برحاله کلنجه بر منبع مشکلات اولمقدن باشقه برشیئه یارامایان  
بو پرنسیپی ترک ایدرک باشقه برینی تجربه ایدر. شهه سز که  
استقبالده بو پرنسیپک باشنده عینی حال کله جکدر .

بونک سببی مفهوم لر مزله تجربه آراسنده موجودیتی ادعا  
اولونان تقابل و توافق ای تعریف ایدیلمه مش اولماسیدر . ریاضی



یا خود علمی شیلرک بر لرلیله اولان تقابل و توافقی — که پک صریح اولاییلیر — تجربه ایله اولان تقابل و توافقلری ایله قاریشدریلور. حالبوکه تجربه، کندیسنه قاریشدریلان علمی مفهوملردن تجرید ایدیله جک اولورسه، غایت مهم بر حسدن باشقه برشی دکلدرد. نتیجه ده بز یالکز برشی بیلیرز. اوده فلان نظریه نك تطبیقاده محسوس درجه ده موفقیت کو سترمسیدرد. فقط بو فرضیه نك عملی نقطه نظر دن قابل استفاده اولمق ایچون ناصل بر درجه حقیقه مالک اولماسی ایجاب ایتدیکنی نه صورتله تعیین ایتلی؟ منطقده قبول ایدلمش بروقه در که یا کاش مقدمات دن دوغرو نتیجه استخراج ایدیله بیلیر. بر اصولک شأیت ایله حد ذاتده هیچ بر مناسبتی اولمادن غایت موفقیت کو ستره - بیلدیکنی هر کون تجربه ایدیورز. نقطه حرکتی قابا بر تجربه empirisme دن عبارت اولان علممزك استحصا ایتدیکی نتایجده ده عینی اوصافی محافظه ایتدیکنی کیم اثبات ایده بیلیر؟ بزجه معلوم اولدیغی شکلده، موفقیت علمیه علممز ایله اشیا آراسنده بر درجه یه قدر تقابل و توافقک وجودینی ایجاب ایدر، یوقسه اونلرک برزینک عینی اولماسنی ایجاب ایتمز. بو توافق و تقابل ده نتیجه ده عملی بر مفهوم دن باشقه برشی دکلدرد.

بزم علمی نظریه لر مز کندیلرینک حقیقتلرینی کویا اثبات ایدن او ای تعیین ایدلمه مش تقابل و توافقی زده، نه ایله حاضر دلر؟ تجربه ایله، وقعه لرله. وقعه لرک مفکره دن خارجه ده موجود

اولدینی و مفکره نك كندی تلقلیرینی بونلره توفیق یولنی  
بولدینی قبول اولونیور. و علمه دوغرو دنیور. چونکه کندیسنه  
تابع اولمایان بو شائیتی کیتدکجه ده دوغرو بر صورتده تمثیل  
وارائه ایتدیکی فرض اولونیور.

فقط بوتون بو بنای خیالی صنعی برشیدر. حقیقتده ارباب  
علمك هم آهنگ اولدقلری وقعه، خام و مفکره دن آری برشی  
دکلدر. علمی وقعه در. علمی وقعه نك ایسه نه صورتله تشککل  
ایتدیکی تعمیق ایدیه جك اولورسه، علمك كندی تعریفاتی  
ایچنده احاطه ایتدیکی مفروض قانونلره اویه جق بر صورتده بر  
درجه یه قدر تنظیم و اعمال ایدلمش برشی اولدینی کورولور.  
علمی وقعه ایله خام وقعه یی بر برندن تفریق ایتك لازمدر. خام  
وقعه نه دن کلیرسه کلسون بر قاشدن باشقه برشی دکلدر. علم، وقعه  
تعبیر ایده جکی شیلری بو قاشدن ییجر. علمی وقعه نك کندیسینی بر  
سؤالننامه نك جوابیدر. بوسؤالننامه ایسه مفکره نك عینی نوعدن  
حادثاتی ایضاح ایتك ایچون تخیل ایتمش اولدینی فرضیه لرك یا خود  
قانونلرك بر سلسله سندن عبارتدر. علمی نامنی آله جق اولان  
وقعه لری بز نظریه لر مز، تعریفلر مز، ذاتاً موجود اولان علممز  
واسطه سیله افاده، تعیین، حس و ادراك ایده رز. نظریه لر ناصل  
وقعه لره اویه جق صورتده ترکیب ایدلمشسه وقعه لرده نظریه لره  
توافق ایده جك صورتده ایشله نیلمشدر. نظریه لرك وقعه لرله  
ائتلافی، قسماً بونظریه لرك كندی کندیلرله ائتلافی دیگدره.

چونکه ذکای بشر آنحق فکری بر صورتده اجرای تأثیر  
ایده بیلیر. طرز تأثیر و حرکتی، کندیسنه عرض ایدیان اشیانی  
بعض معلوم اشکال مقولاته ادخال و تمثیل قابل اولوب اولامایه جغنی  
تحریدن عبارتدر. ذکا آنحق اولدن بر طاقم بیلکی و حس  
و ادراک قابلرینه مالک اولمق شرطیله برشیئی طانیه بیلیر. حس  
و ادراک ایده بیلیر. بو مقدمکی بیلکیلرک منشاء اولینی نهدر؟  
اونلر نهی اراده ایدرلر؟ قیمتلری نهدر؟ ایشته بورالرده مسئله  
علمی وقعهلر حدودی خارجه چیقار. بوتون بیلدیگمزشی  
وقوفلرک، حس و ادراکمزک بزه عرض ایدیلن حقیقتلری  
لسانمزه بر ترجمه ایتمکدن باشقه برشی اولامایه جقلریدر. بو اعتبار  
ایله وقعهلرده قانونلر کبیدر. حنی دنیه بیلیرکه وقعهلر بزه  
آنحق بعض قانونلرک بر وظیفه سی اولمق اوزره معلوم اولابیلیرلر.  
چونکه بونلری شعور آنحق کندیسنده اولدن موجود اولان  
برطاقم نمونه لره ربط ایده بیلیرسه مشاهده ایلیه بیلیر.

وقوفک بو شرط عمومیسندن علم کندیسینی قورتاراماز.  
علم اولیه بر لساندرکه بوسایه ده مفکره کندیسنه عرض ایدیلن  
شیلرک ممکن اولدیغی قدر چوق مقدارینی کندیسی ایچون قابل  
فهم یعنی طانماسی و قولالناماسی قابل بر حاله کتیرر. بو لسان  
نه صورتله تشکل ایتشدیر؟ شأنتک نه کی بر قسمنی افادیه قابلیتیدر؟  
نه قدر صحتله بو وظیفه یی کورور؟ بو سؤاللره جواب ویرمک  
شبهه یوق که مشکلدیر. چونکه مفکره اولدن موجود بر طاقم

فکر لری قونترول ایتک ایسترن بوسؤالره آنجق اویا کلس  
فکر لر واسطه سیله واونلرک نامنه یا قلاشه بیلیر. هر حالده بونلر  
عادى تجربه ساحه سنى تجاوز ایتدکلری قدر علمى تجربه  
ساحه سنیدن ده خارجه حیقارلر.

بو ملاحظاتدن مستبان اولان نقطه علمک مطاوعتکار  
بر ذکا اوزرنده موجودات خارجه طرفندن تولید ایدلمش  
بر انطباعدن عبارت اولمایوب مفکره نك ، — منشأ اولینى  
بیلمدیکی بر طاقم موجود مفهوملر اعانه سیله — موجوداتى  
تفسیر ایتسی بو واسطه ایله اونلری کندی آرزولرینک تحققنه  
خادم قیلحق قوتى اکتساب ایتسی ایچون تحیل ایتدیکی بر طاقم  
اشارتلرک هیئت مجموعہ سى اولدیغیدر.

\*  
\* \*

بویله بر مسلک، علم ایله دینک مناسبتلری مسئله سنى عقلی  
صورتده حل ایتک ایچون ریچلک ایکیلک اوزرینه مؤسس  
مسلکینن زیاده مساعددر کی کورونور.

فی الحقیقه ، بو مسلک کوره علمک ذى حیات قسمى، علمک  
دستور لری ایچنده تمثالى بر صورتده ضبط اولونان فعلی و حقیقی  
بیلکیلرک یکونى حیات عملیه مزک استناد ایتدیکی نوع اعتقادادن  
اصل واساس اعتبار ایله فرقلی دکلدر. علم ، ساده جه اعتقادک  
مفکره بشردن طرد ایدلمسى لزومى بوجه پیشین ادعا ایده مز.  
چونکه علمک اصلی مفهوم لری بو اعتقادک وجودینى تضمن

ایدرلر و اونی حفظ ایلرلر . اعتقاد دینی ، بناء علیه ایمان ، یالکیز بر اعتقاد اولدینی بهانه سیله بر طرف ایدیله منر . عینی بر ذکاده علم ایله برلکده وار اولابیلمه سی ایچون علمک سلطه سنی حقیقه اکتسا ایتمش اعتقادلره چارپاماسی کافیدر .

فقط بوجهتده عصری علم ، دینه بویوک بر سر بستی براقده دره . بوتون اشکال وجود اوزرنده بر حق ادعا سنده دکلدر . موجوداتده یالکیز علمک قابل تطبیق اوله جنی طرفلری پیدش ملاحظه آلیر و بوتون بوتون باشقه شیلرک کرک عالم حقیقیده کرک عالم امکانده کنیدیلرینه تقابل ایده جک بر زمینه تصادف ایده بیلمه لرینی رد وانکار ایتمز . عالمک آراشدیردیعی نقطه شودر : موجودات آراسنده ثابت ودائی مناسبترلر وارمیدر ؟ بوندن دولایی شعور دینیک دنیا بی دها ایی بر حاله کتیرمک ایچون بر قدرت وارمیدر ؟ دیه ایراد سوال ایتمه سنی منع ایله مک الحجاب ایدرمی ؟

فقط آرتق دینک علم طرفندن استحصال ایدیلن نتایج قارشى کوز قاپایه مایه جنی آشکاردر . علمه ادعای مناسبت ایتک اونی طانیخی و اوکا حرمت ایتکی تعهد ایله مک دیمکدر . علمک بوکون قلیل المقدار بر طاقم فکر لرله یا شادیخی ، بونلرک دینلری ده ، هیچ دکسه بزه منظور اولدقلری مادی شکلدرده ، علاقه دار ایتدیکی انکار اولونه ماز . بونلرک ایچنده احتمالکه اک مهمی تکامل مفهومیدر .

بو تکاملک نه اولديغنی ومنشاء وماهیتنه کأنجه نه تضمن  
ایتدیکنی، نه افاده ایلدیکنی دوغرو بر صورتده بیلیمک غایت  
مشکلدر و بوشبهه سز بر مسئله علمیة اولمقدن زیاده مابعد الطبیعه یه  
عائد بر مسئله در. فقط تکاملک حادثوی و علمی بر معناسی  
واردر که بونده هر کس متفقدر. بو معناده شوندن عبارتدر :  
ذی حیات موجودات ، بلکه ده بوتون اشیا ، یالکیز بعض  
تظاهر ایلرنده دکل طرز وجودلرینک هیئت عمومیه سنده تحول  
ایدرلر یا خود تحول ایده بیلیرلر. بوتحولک درینلکی ده بوجه پیشین  
قابل تحدید دکلدر. تحولات ایستر تخملمرده وقوعه کلسونلر ،  
ایستر محیطک تاثیرندن نشئت ایتسونلر ، ایسترسه بو ایکی سبب  
برلکده حرکت ایلسون ، شوراسی محققدر که بر موجودک  
ماهیت و طبیعیه تعدیلات و تحولاتی آراسنده قطعی بر فرق  
یوقدر. بر جنسک اوصاف اصلیه سی تسمیه ایدیلن شی آرتق  
بالنسبه ثابت بر حاله کلمش ساده جه بر صفحه تکامل کبی تلقی  
اولونا بیلیر .

بو کون قوجه بر الهیات مکتبی واردر که دینک تاریخ  
خارجیسی بو نظریه لرله تألیف ایتمهک ساعیدر .

بوندر هر انسان متفکرک هر شیده یا مغمه مجبور اولدیی  
ودوغروسی آرانیرسه بوتون حیاتک ، بوتون فعل و حرکتک  
استناد ایتدیکی بر تفریق عملیه سندن حرکت ایدرلر . بوده  
برنسیب ایله تطبیقاتی ، فکر ایله فکرک ساحه فعله چیقماسی کیفیتنی



تفریق ایتمکدن عبارتدر. بز مفکره مزله ، ذهنمزله ایسترز ، موجود شیلرله ساحه فعله ایصال ایلرز. بناء علیه فعل و عملده ، برشیئی موقع فعله ایصال ایتمکده مفکره دن باشقه برشی ، یعنی بر شکل مادی ده بولونمق لازم کلیر. اگر شرائط خارجیه دیکشه جک اولورسه بو شکل مادی او شرطه توافق و تقابل ایده جک صورتده بالضروره دیکشه جکدر. یوقسه معناسی قالماز و آرتق عینی شیئی افاده ایتمز. بو کون اون آلتنجی عصر محرر لرینک یازدقلرینی ایضاحه نهدن لزوم حس ایدیلیور؟ چونکه لسان دیکشمشدر. اونلرک سویله مک ایسته دکلری شیئی افاده ایچون بو کون اکثریا باشقه کلمه لر قوللانمق احتیاجی وارددر. هر فعل و عمل ، هر حیات بویه بر تفریقی تضمن ایدر. چونکه حیات ، ایچنده بولونیلان محیط واسطه سیله پایدار اولمقدن عبارتدر . بو محیط مهم درجه ده دیکشیدیکی زمان ، ایچنده کی موجود ذی حیات یا تکامل ایتک یاخود اورته دن قالمق شققلرندن بری قازشیسنده بولونور .

دین ده بو قانوندن کندیسنی قورتاراماز . دین بهمه حال مؤثر اولمق املنی بسلر . مؤثر اولمق ایچون ، اتسانه کندی لسانیه خطاب ایتمی ایجاب ایلر. اگر دین بر مفکره ده اولدن موجود اولان واونک قابلیت ادراکی ایچون بر اساس تشکیل ایدن مقولاتدن برینه اویمایه جق اولورسه هیچ آکلاشلماز بر حالده قالیر. بناء علیه ، هر حقیقی دینده — برینک نرده

یتدیکی دیکرینک نرده باش-لادیغی صحتله تعیین ایدیله مه مکه  
برابر — ایکی قسم واردر. بونلرک بری اصل دیندر؛  
حیات، اراده، فعل و عملدر. دیکری ده دینک ساحه فعله  
ایصالیدر. یاخود اصل دینک معلوم بر هیئت اجتماعیه ده مندمج  
شرائط موجودیتله وقوعه کلمش بر اختلاطیدر. برنجی عنصر  
اصلاً ذی حیات و معنوی بر پرئسیپه تطبیق ایدلیدیکی زمان،  
کلمه نك تمثالی معناسیله، هیچ دیکشمز. ایکنجی قسم ایسه  
ایستر ایسته مز تکامل موجودات ایله متسانددر.

ایشته بحث ایتدیکنز الهیات منتسبلری یالکنز علمک  
نتایجه حرمت ایتک و بو کون آرق غیرقابل قبول کی کورون  
بر شکل آلتنده فلان ویا فلان اعتقادی ادامه ایچون عناد  
کوسترمه مک شویله دورسون علمک محقیقتی اثبات ایتدیکی  
پرئسیپلری وازجهله تکامل اساسی الهیاته ادخال ایلرلر.

ایلاک دوشونجه — که اصل موجد و مدیر اودر — پایدار  
قالیور، فقط بونک تفسیریاتی، خارجاً کنیدیسی قابل تبلیغ  
بر حاله کتیرن دستورلر، عالم آراسنده تأثیرینی انکشاف  
ایتدیرن مؤسسه لر تکامل ایدیورلر. بر طرفدن بو اشکالک  
تعاقبی ایلاک دوشونجه یه بند ایدن علیت رابطه سی، دیکشمه یین  
تک بر فکر اصلینک ترجمه لرندن عبارت اولدقلری ایچون  
بوتون بو اشکالک محافظه ایتمکدن خالی قاله مایه جقلری  
صمیمی مشابعت اونلرک وحدت معنویه لرینی تأمین ایدر. دیکر

طرفدن ، دینک تظاهراتی بوتون اشیای ذی حیاتک قانونه ،  
تکامل ایدر کن منسوب اولدقلری عالمی تعقیب ایدرک اشتراک ایلر .  
بونک ایچوندر که مذشائنده معنای حقیقی ومادیسنده  
آکلاشلمش اولان بعض افاده لر بو کون — ادامہ ایدیله لر  
مطلوب ایسه — تشبیهی بر معنا ایله قبول ایدمک اقتضا ایدر .  
چونکه ترقی و قوف ومعلومات ایله آنجق بومعنالر قابل تألیفدر .  
فرضا « جهنمه ایندی ، کوکلره حیقدی » سوزلری قیمترلری ،  
جنتک جهنمک بو کون ماده فلان یاخود فلان یرده اولدقلری  
یولنده کی ادعایی بر طرفه براقه رق خیال آرقه سنده معنای  
معنوی بی آرامق ایله محافظه ایده بیلیرلر .

من القديم ، دوچار تهدید اولان بوتون مسالیکک بو یولی  
اختیار حتی چوجوقلق عد ایدیله بیله جک درجه ده سوء  
استعمال ایتدکلری بهانه سیله بویله تشبیه و رموز ایله تفسیر  
طریقنک استعمالی بیهوده وخیال خام قیلندن عد ایدیله مز .  
تشبیه واستعاره انسانک اصل لسانیدر . دقت ایده جک اولورسه ق  
کورورز که بز همان هیچ بر کله بی معنای حقیقی سنده استعمال  
ایتمه یز . کله لرک حیاتی دنیلن شی کله لرک معناسنی فکرلرک تحولاتنه  
کوره تکامل ایتدیرمک یولنده حس ایتدیکمز مجبوریتدن  
عبارتدر . چونکه حیات اجتماعیه نک ایجاباتندن اوله رق فکرلر  
دکیشنجه کله لری محافظه ایتمک ایسترسه ک باشقه برچاره یوقدر ،  
اونلرک معنالری ده دیکشدرملی یز . فکر کندی شکلی درحال

ایجاد ایده من. چونکه اوپله اولسه کیمسه طرفندن آکلاشلماز.  
بناءً علیه هیچ اولمازسه بر مدت ، موجود هیئت اجتماعیه  
ایچون قابلیت ادراکک واحد قیاسیسی تشکیل ایدن شکل  
معلومی بالضروره قبول ایدر. کنیدیسی ایچون یاپلاماش اولان  
بو شکلک یاردیمله ، معنای حقیقیه بر معنای تشبیهی علاوه  
یاخود اقامه ایده رک کنیدیسی افاده ایلر .

بناءً علیه دینک وجودی وانکشافی، — ترقیپرور نامی  
ویریه بیله جک اولان مکتبه نظراً — عصری علمدن دولایی  
هیچ مشکلاته اوغراماز.

دینلرک اعماقنده اصلی بر طاقم حقایق دینه بولونور .  
بونلرک اساساً بر طاقم مابعدالطبیعی اوصافی کنیدیلرینی یکانه  
موضوعی حادثه دن عبارت اولان بر علمک تماسندن مصون  
بولوندیور .

بوندن باشقه دینلر بو حقایق اصلیه نک همان همان بلاواسطه  
بر چوق افاداتی ده احتوا ایدرلر که اونلرده عقاید ، وروحانی  
آینلردر . بونلر بر دستور ایله افاده ایدلرکدن زیاده یاشانیرلر  
و علم ایله پک حال نزاعه گیرمزلر . ایشته بوصورتله در که خرسیتیانلق  
اللهه پدر نامنی ویریر ، انسانلری اللهک اوغللری و بوصورتله  
هپ بر برلرینک قارده شی عد ایلر . بونک کبی اللهک حکومتی ،  
کناهی ، نجاتی ، مغفرتی ، الخ . اوکره تیر .

شیمدی یالکز عقایدک و آیینلرک تفرعاتی قالیر . بوتفرعات

معین بر دورك معلوماتندن و مؤسساستندن استعاره ایدلمش بر  
طاقم عناصره مالك اولمالری اعتباریله باشقه بر دورك فیکرلری  
و مؤسسہلری ایله توافقی ایتمه یه بیلیرلر. بو ایسه دونکی علمک  
و مؤسسہلرک بو کونکی علم و مؤسسہلر ایله بعض نقطه لرده  
تضاد تشکیل ایتمکده اولماسندن باشقه بر معنا افاده ایتمز.  
بو تحولاتدن دین مسئلؤل دکلدیر: دین بوندن دولای ضرر  
کوره مز. خارجاً تکامل ایدهرک ینه عینی حالده ادامه موجودیت  
ایدر.

ذاتاً ایکی طرز تکامل قابل تصوردر. یا دین مقدمه کی بر  
مدنیتک و علمک میرانی اولان دستورلرینی محافظه ایدهرک  
و فقط معنای حقیقی و مادینت ایلچنده اورتدکلری معنای مجازی  
و معنوی نی استخراج ایله یه جکدر. یا خود عقیده پرست الهیاتک  
بویوک تشکیلاتچیلری اولان سن پوللرک، سنت آتانا سیرک،  
سنت اوگوستینلرک، سن تومالرک اثرینی تعقیب ایله زمان حاضرک  
فلسفی و علمی فیکرلرینی بنمسه مکن قورقایه جق و بونلری  
او ابدی و غیر قابل افاده حیات دینیه ایچون انسال حاضره  
نظرنده شبهه یوق که عینی غایه یه متوجه فقط بلا واسطه قابل  
ادراک بر تمثال حاله کتیره جکدر.

### بومسلكك مشكلاتى

علمى تنقيد ايدىدرك بوتنقىدات اوزرىنه دىنى وضع وبنى ايدىن مسلك بعض ذوات طرفندن پك بويوك برشوق و آتشله قبول اولوندىغى حالده بعض شدتلى اعتراضلرده دعوت ايتمشدر . مناقشه نقطه نظرندن بومسلكى خلاصه ايدىن : « افلاس علم » دستورينىك اطرافنده برقاچ سنه اول بويوك بر كوردولتوقومشىدى . بو آوازده جدالك توليد ايتىدىكى برچوق بليغانه اعتراضلر آراسندن قناعت بخش دلائلى بولوب چيقارمق بعضاً مشكل اولور . فرضاً ، علم حاضر ك موفق اولدىغى بويوك كشفيات تعداد ايدلى وبالحاصله بو كشفياتك حيرت بخش تطبيقاتى ايلرى يه سوردولدى . فقط اصل مسئله باشليجه حيات ماديه يه تعلق ايدىن بو رقياتك دونىكى علم طرفندن يالكز حيات ماديه يه دائر دكل بشريت ك سياسى و اخلاقى حياتى حقنده ده دفعات ايله وقوع بولان وعدلرى ساحه فعله ايصاله كافى كلوب كلمه يه جكنى بيلمكده در .

بر قسملرى شويله مقابله ايتديلر : علم افلاس ايتىدى . چونكه انجاز ايتىدى ديه علمى مؤاخذه ايتىدىك كز وعدلرك هيچ برى معقول و حقيقى هيچ بر علم طرفندن صادر اولمامشدر . بو جواب علمك انسان ايچون هر شى ديمك اولمادىغى معنا سنى تضمن ايدىيوردى .

مع مافيه ، علم حاضر ك بو مختلف مدح وستايشلرى آراسنده



اساسلی بر فکر دوران ایدر که فی الحقیقه علم، مفکره لره بونی  
 کیتد که قوتله انطباع ایتدیر مکده در. اوده علمک ترقیاتنه بر  
 حد تعین ایتمه نک قابل اولامایه جنی فکریدر. شبهه یوق که عالم  
 مادیات ایله عالم معنویات آراسنده، حیوانی جمعیتلره انسانی جمعیتلر  
 آراسنده بویوک فرقلر واردر. فقط ماده غیر عضویه بی ماده  
 ذی حیاتدن یا خود حقیقی حرکتی مجرد میخانیکدن تفریق ایدن  
 مسافه ده غیر قابل مرور کبی کورونمیورمی؟ حالبو که ظاهرأ  
 بر لرلندن آیری کورولن بوعالملر آراسنده ده اتصال و تمادینک  
 وجودی کیتد که تأسس ایدیور. بنام علیه بوتون اشکالی  
 آلتنده وجود ایله علمک تطابق و توافق استقبالك تمامله ساحه  
 فعله حیاتاراجنی احتمالی نه دن رد ایتلی؟

علمک تکمیل مخترعانی ایچنده هیچ برینک طبیعت بشریه ده کی  
 مطالبات معنویه تقابل ایتمه دیکی و بومطالبات علمک خارجنده  
 و فوقنده اولدینی ایچون عام مستقبلک، اونلری تطمین ایده میه جکی  
 ادعا اولونیور.

فقط بو اعتراضه یا کاش بر قیمت ویریلیور. بر طاقم محقق  
 حقیقتلره دسترس اولمالری عالمرک مفکره لرنده صاحب صلاحیت  
 اولدقلرینه دائر بر حس، بر امنیت حسنی تولید ایتمشدر. بوندن  
 بویله بوتون فعالیت ذکائیه بی هپ بو اولچویه تطبیق ایدیورلر.  
 اونلره توافق ایتمه ن تحریاتی بیهوده و غیره شروع بولیورلر. عالمر  
 بزم وسائط و قوئلره قابل تألیف اولامایه جق بر طاقم نتایج مطلقه بی

اسکیمی کی اخبار و اعلاندن بو کون توقی ایدیورلر . هر علمک نسی اولدیغنی سویلیورلر . فقط بو افاده یی حقیقی مناسیله آکلامق اقتضا ایدر . بوندن علمک مشغول اولدیغنی ساحه نك خار جنده باشقه بر ساحه ، بر «مطلق» ساحه سی واردر ، باشقه دورلو علمر بو ساحه ایله اشتغال ایده بیلرلر معناسی حیقارلما ملیدر . بالعکس بو افاده علم ایچون قابلی اولان بر ساحه یه کیرمکدن ذکای بشری منع ایدر . چونکه برشی علم ایچون ناقابل ادراک ایسه بو موضوعک باشقه بر احکام و قواعد ایچون ده غیر قابل ادراک اولدیغنی اولویته آشکاردر . بناءً علیه علم کندیسنه خاص بر وقوف و صلاحیت حسیله متین وقوی بر صورتده زده ده : بن بیلورم ! دیرسه بومفکره بشر ایچون واردر دیمکدر . زده علم : بیلورم ! دیرسه : کیمسه بیلورم ادعاسنده بولونماسون ! دیمکدر .

بناءً علیه عصری علم ظاهر آدها متواضع کورونمکله برابر دینک سر بستجه انکشافنه عقیدوی علمدن زیاده مساعد اولدیغنی آشکار برشی دکلدرد . علم نقطه نظرندن دین آنجق بر طاقم کیفی تلقیلرک بر هیئت مجموعه سندن عبارتدر . چونکه دین ، علمک آنجق شکلی اکتسا ایده بیلر . مع مافییه بوده اونک تمامیتی ایچون تهلیکه سز برشی دکلدرد . ناصل که اسقولاستیکک مثالی بونی پک اعلا کوسترد . دینک اساس باطنیسنه کلنجه بونلر شبهه یوق علم نظرنده یکانه شایان قبول اولان اوبر قتیف حقایق تجربیه یه تشبیه ایدیله مز . علمک حدودلری

خارجنده ادامہ ایدلمک ایستہ نیلن شیئک باشقہ بر علم اولمایوب  
بر اعتقاد اولدیغی ادعاسی کافی دکلدر . بر اعتقاد علم نقطه  
نظرندن حائز قیمت اولا بیللمک ایچون هم وقیملرک تدقیق  
ومشاهده سی اوزرینه مؤسس اولمالی هم ده علمک استقامتی جهته  
متوجه بولونمالیدر .

علمک کندیسنه براقیر کی کوروندیکی ساحه ده محصور  
قالان اعتقاد دینی، بوارده بیله کندی استقلالنی وحریت انکشافنی  
تأمین ایده مز . علمک هر ترقیسی اونی تهدید ایدر . علمک  
موجودات حقنده ویردیکی ایضا حاتده کی نقصانلری دین  
کمال اندیشه ایله تعقیب ایدر؛ شوطرفده برچاتلاق پیدا اولدیغی،  
اوتہ طرفده بر بوشلق دولدیغی کورور . کندیس ده توافق  
وتطابق ایچون کوسه تردیکی غیرت مفرطه ایله کندی علمینده  
بر مقایسه یه میدان آچار . چونکه دین، علمک قطعی وغالبانه مشی  
وحرکتیه قارشى بر طاقم عدم قطعیتلر وقور قاطقلر عرض ایدر .  
آرتق دین و قتیلہ بویوک بر استناد کاهی اولدیغی حالده بو کون  
آنحق مؤمنلرک زهد وتقواسی ومخیله سی طرفندن اوزرینه بعض  
حقیقت الوانی کیدرلمکه اوغراشیلان بویوک بر کله دن عبارت  
قلمش برشی کی کورونور .

ایشته دین، علمک اراده ایتدیکی بوشلقلردن استفاده ایتمک  
ایسترسه معروض قاله جنی تہلکه لر بونلردر . مع مافیہ بر چوق

علمایه و فیلسوفان کوره بویتهایکه لر حقیقی نکدر لر . علمی دینه  
 معارض کی ظن ایتکاری ایچوندر که دینی تهدید ایدیور لر .  
 حالبو که بو بریا کلس فیکردر . علم و علمک شرائطی حقنده  
 بو قدر محاکمه یوروتوله جک یرده الک مهم نتایجندن بعضیلری  
 تدقیق ایدیلسون ، کوروله جکدر که علم کنیدی حدودلری  
 داخلنده بیله دین استقامتنه متوجهدر . بو طرز رؤیتی تدقیق  
 ایتک ایجاب ایلر .

علمك دينه متوجه كې نظر ملاحظه ټه آلماسې

علمده، ا كثر يا ماديتپرستك و طبيعتپرستك شهرتي بولونمقله  
برابر بر چوق فيلسوف و علما واردر كه علمك اصوللري  
و محتوياتي دينك اساسلري ايله تعارض ايتديكني انكارده اصرار  
ايدرلر. حتي اچلرلنده بمضيلري، اسقولاستيكل دين ايله علمك  
منشاند فرقلي، فقط استقامت اعتباريله عيني نقطه ټه متوجه  
ايكي طريق اولمالري حقهده كي نقطه نظريني ادامه ايتمكده بيله  
بر باس تصور ايتزلر و علم حاضر ك مسلكلرلنده عقايد دينه نك  
مقدمات ابتدائيه سني كورورلر.

بعض علما بو كونكي تكاملچيلك مسلكلنده عقايد دينه نك  
شخصيت الهيه، خلق و ايجاد كائنات، مثيريت دعا و ابديت  
روح حقهده كي تااميناتنك علامتلريني كورورلر [۱]. ممتاز بر  
حكمت شناس عصرى علمك نتيجه حكمي اولمق اوزره انجيلك  
« پاتر » ني و خرسقيان كليسالرينك آمنت سنك اساسلي نقطه لريني  
كوستير [۲].

مع مافيه، عموميتله بو كون علمده دها دولامباچلي بر يولدن  
دينه بر مدخل آرامقه درلر. مناقشه، علمك حدودلري تعبيرينك  
ماهيتي و واضح معناسي نه اولديغني تعيين نقطه سنده جريان ايد يور.

Armand Sabatier: La Philosophie de l'effort [۱]

Sir Oliver Logde: The Substance of Faith [۲]

علمك حدودلری اولمق، اورادن اوتوده هیچ برشی بولونمادیغنی صورت قطعیده رد وانكار ایتك دیمکیمیدر؟ علم اوحدودلردن اوتوده برشی آرامقدن، برشی تصور ایتكدن بزی صورت قطعیده منع ایدیورمی یوقسه بو برنسی رد وانكاردن، آرسطونك دیدیکی کبی، برمحرومیتدن می عبارتدر؛ مالک اولدیغمز بر شیتك تضمن، دعوت واجباب ایتدیکي مالک اولمادیغمز، محروم بولوندیغمز بر شیمیدر؟

کندیلریله مشغول بولوندیغمز علمایه کوره علمك حدودلری تعبیری مفکره بشر ایچون، علممزی مکمل و تام بر بیلکی حالنه کتیرمك اوزره لازم اولان بر وقوفك فقدانی تضمن ایدر. علم کندی کندیسنك کافی اولمادیغنی بك اعلا ادراك ایدر. علمك پرنسپلری بر طاقم منفی مفهوملردر، محتویاتلری ده غیر معیندر. مفکره بشره بر شیتك ساده جه شو اولمادیغنی و بو اولمادیغنی او کره تیلدیکي زمان مفکره نك او شیتك نه اولدیغنی دوشونمه سی غیر قابلدر. بناء علیه وقوف علمی فوقنده بروقوف بولوندیغنی احتمالی احاطه ایدن شی علمك خارجنده بر فعالیت روحیه دکل بالذات علمدر. پاسقال : « عقلك صوك حرکتی کندیسنك فوقنده نامتناهی بر چوق شیلر بولوندیغنی تسلیم ایتکدر » دیور.

بر کره، علمی، عمومی اصوللر. و روحی اعتباریله



نەدن دولایى دینه معارض و مخاصم عد ایتلی ؟ علم ، حادثاتی قوانینه منقاد بولوندر مرغه چالیشیر . یعنی تحول ایچنده انتظام و ثباته ، ترتیب و نظامه ، منطقه ، ذکایه تابع بولوندر مق ایستر . علم بر طاقم بسیط و عمومی قانونلر آرار و تفرعات قانونلرینک کرفتلکنی و تنوعنی بو عمومی قانونلره ارجاع ایتک املنی بسلر . بوندن دولایى دنیایی بر و آهنگدار یعنی کوزل بر اثر عد ایتکه میالدر . فی الحقیقه ، یالکیز بر فضا ، اوقلیدک کوستردیکی بزم فضامن ، حقیقی حیزک بوتون خواصنی ایضاحه کافیدر . تک بر قانون ، نیوتون قانونی هیئت عالمنک بوتون حادثه لرینه حاکمدر . حکمت طبیعییه ده احتمالکه ایکی قانون اصلی یقیشیر : قوتک بقاسی و تاثیر اقل قانونلری . علم وحدته متوجه و متمایلدر و وحدتی بولور : بو حالده علم الله دوغرو کیدیور دیمک کیفی بر سوزمیدر ؟

فقط عینی زمانده علم بو غایهیه واصل اولامایه جغنی تقدیر ایدر . فی الحقیقه علمک اساساتی تجربه نك مسامحه ایله کچیشدیردیکی بر طاقم فرضیه لردن عبارتدر . علم یالکیز : شیمدییه قدر هیچ بر نظریه وقعه لر واسطه سیله یاپیلان قونتروله بو قدر موفقیته مقاومت ایتمه مشدر دییه بیلیر . یوقسه بو فرضیه حقیقتدر دییه مز . علمک بر فرضیه اعانه سیله طبیعتی استجواب ایتمکدن عبارت اولان طرز و قوفی ده اوکا بو کون ایچون کافی کلن بر طاقم ایضاحات بولماسنه خدمت ایدر . کافی عد ایدیلن بو ایضاحاتی

ضروری و قطعی ایضاحات حالته قلبه علمك اصوللری مساعد  
دکدر. مع مافیه البته مثبت و مطابق بر طاقم ایضاحات ده واردر.  
علم بو ایضاحاتی ویرمکدن عاجز اولدیغنی مشاهده ايله برابر  
بزه او ایضاحاتك وجودی ده تأمین ایدر.

میخانیکی دنیان فلسفهیه نظراً [۱]، اجسامك خواصی  
واضح و مثبت بر پرئسیپ ايله، ماده و حرکت واسطه سیله ایضاح  
اولونور. بوگون بوتون حادثاتی ایضاح ایچون میخانیکی نمونهك  
استعمالی ترویج ایدنلر آراسنده بیله او تخیل ایتدکلی حرکتلری  
کافی درجه ده قوتلی آلتلرله حس و ادراک ایده بیلدکارینی ادعا  
ایدنلر پك آز اولدیغنی اونو تمام ایدر. اونلر بو « حرکت » ی  
قوانین حادثاتی بولمق و شرح و بسط ایتك ایچون مالك اولدیغمز  
اك موافق بر تمثال مقامنده استعمال ایدرلر.

فقط حکمت شناسلردن برچوعی بو تمثالی پی فائده،  
بر طرف ایدلمسی قابل، ساده جه بر یاردیجی عد ایدرلر. وظیفه سی  
بیتمجه علمك بوکا احتیاجی قالمایه جغنی سویلرلر. اونلره کوره،  
قابل تدقیق و مشاهده اولان حادثاتك هیئت مجموعه سنی حرکت  
اساسنه ارجاع ایتك تشبیهی زمانمزده کی میخانیک متخصصلرینك  
کیتدجه دهها اینجه و گرفت ایجادلرینه رغماً موفقیتسز لیکله

[۱] پوانکاره L. Poincaré : عصری حکمت طبیعییه

. La Physique moderne

نتیجه نمیشد. حقیقی توحید یولی ترمودینامیک طرفندن  
چیز نمیشد. سوکره بوده انرژی *énergétique* علمه منقلب  
اولمیشد. بو علم ایسه موجوداتک طبیعت و ماهیت اصلیه لرینی  
بر طرفه برافه رق اونلرک یالکیز اولچولمسی قابل تظاہراتی  
پیش ملاحظه آلمق صورتیه تأسس ایتمیشد. اولچولان شی  
حیزمیدو؟ حرکتیمیدو؟ یاخود باشقه بر شیمیدو؟ بورالرینک  
هیچ اهمیتی یوقدو. اولچولر قانونلری بولمسه، نظریه لر بنا  
ایتمکه، بر طاقم اساسلر استخراج ایلمکه کافیدو. بو سایه ده  
معلوم اولان حادثه لر تصنیف اولونه بیلیر و استنتاج طریقیه  
طبیعتیه یکی یکی سؤاللر ایراد ایدیله بیلیر. دها فضله ایسته نه بیلیر؟  
انرژی تیک، علمک صرف تجربی و علمی اولان قسمی آله رق  
وما بعد الطبیعه عائد، غیر قابل تحقیق بوتون طور طولری آله رق  
علوم حکمیه مک شیمدییه قدر طانیدیغی اک مکمل بر شکله  
واصل اولمیشد.

انرژی تیک علمک یکانه موضوع اوله رق قبول ایتدیکی  
بوقوت *énergie* نه در؟ بونک حقیقه آنجق منفی رفیکری واردو.  
بوقوت نه حرکتدر، نه ده تدقیق و مشاهده ایتدیکمز مشخص  
شأیتلردن بریدر. بزده اکسیک اولان بر وقوفک اشارتیدر.  
طرز تحوّللرک بوتون انواعی انرژی تیک واسطه سیله احاطه  
ایده بیلیمک قابلدو. یعنی یالکیز موضعی حرکت دکل اصل فیزیکی  
حرکتلر یعنی خواص و ترکیبات تحوّللری، آرسطونک فساد و تغیر

دیدیکی شیلرده آ کلاشیله بیلیر. فقط بو امکان، حادثاتک آنجق  
 شکلی حقنده وارددر. بو شکک کندی باشنه هیچ بر خاصه  
 حکمیه سی موجود اولمادیغی ایچون اونی ارئه ایدن دستورلر  
 — حادثه لر دیگر طرفدن اصل حکمی مشابعت واختلافلرینه  
 یعنی کیفیتلرینه کوره تصنیف ایدمز لر سه — غیر قابل  
 استفاده اولور لر . بناءً علیه عالمک نظر نده ، ریاضی معاملهنک  
 وحدت وعینیتی آتنده بو کینی فرق مسئله سی موجود در .  
 کیفیت فکری ایسه ندر؟ علم نقطه نظرندن بونک منفی برشی  
 اولدینی آشکاردر: بو، تدقیق ومشاهده نک تحلیلله تودیع ایتدیکی  
 بویوکلک لک اوله بر شرطنک فیکریدر که او شرط بویوکلکه  
 ارجاع اولونه ماز . مع مافیه عینی زمانده بر شأیت فیکریدر ؛  
 صرف بر رد وانکاردن عبارت دکلدر . وارلغک تجربه محسوسی  
 وعلمی تجاوز ایدن بر صفحه سی حقنده بالذات علم طرفندن  
 وقوع بولان بر اشارتدر .

بوکا بکزر نتیجه لر بیولوژیدن ده استخراج ایدیه بیلیر .  
 بوکون همان همان صورت عمومیه ده تعمیم ایتمش بر فکره کوره  
 حیات ، ادامه سی ایچون کندیسنه خاص اولان بر قوت و فعالیت  
 استهلاک ایتیمورسه بیلله ساده جه حکمی و کیمیوی بر طاقم قوتلره  
 ارجاع اولونه ماز . بوفیکر اکثریا او قدر صریح ومثبت تعبیر لرله  
 افاده اولونور که بیولوژینک ساحه سی موجوداتی بیلیمک

خصوصنده حکمت طبیعیہ ساحہ سندن دھا کنیش کبی کورولور۔  
 فی الحقیقہ یالکز حیاتک وار اولدینی و صرف بر مقانیزمہ دن  
 عبارت اولمادینی بیلند کدن فضلہ تعریفی ده یاللمتده در : حیات  
 بر موافقت متقابله ، بر سلسله مراتب ، اجزاء و کل آراسنده  
 بر تساند ، غیر متجانس عناصرک توحیدی ، بر فکر مبدع  
 ومدير ، محیط ارانہ ایتدیکی مشکلاته مبارزه ایدہ رک وبر طاقم  
 منابعدن استفادہ ایلہ یه رک معین بر عضویّی ادامہ ایتک ایچون  
 صرف ایدیلن غیرت دیه تعریف اولونیور۔ بوتون بوتعریفات  
 مثبت بر معنایی ده حائز اولدقلى کبی عینی زمانده میخانیک  
 فوقنده بر معنایی ده حائزدرلر۔ بونلر حقیقہ علمی عداولونورلر سه  
 علمک بزی کندی کندیلکنندن ، اصل خارجی حادثات  
 عالمدن باشقه بر عالم ایچنه ادخال ایتدیکی نتیجہ سی قولایلقله  
 چیقار۔

فقط بوتعریف ودستورلری ، مثبت اولان جهتلرنده حقیقہ  
 برر علمی معلومات عد ایتک خطادر۔ بو معنا ایلہ اونلر برر  
 استعاره وتشبیهدن عبارتدرلر ، شعور مزده حیاتک مشاهدہ سنہ  
 مربوط بر طاقم حسیاتدن استخراج ایدلمشالردر۔ بیولوژی  
 متخصصلرینک شأیت ایچندن حیاتی نامنی ویردکلى بر صنف  
 حادثاتی چیقاروب آلمالری ایچون برر علامت ، برر دستور ،  
 برر اشارت نقطه لری خدمتی کورورلر واونلرہ حیاتی وصفی  
 طاقارلر۔ ناصل که قوت ، کتله ، جاذبه ، عطالت تعبیرلری ده بر



حکمت شناسه ، حکمی وصفی و یردیکي حادثاتی اورادن  
کسوب چیقارمق ایچون خدمت ایدولر. فقط روحی تمثاللر  
حکمت شناسلر طرفندن ریاضی تمثاللره همان همان غایت صحیح  
بر صورتده قلب ایدیله بیلیمش اولدینی حالدده حیاتی تعریف ایدن  
تعبیرلر بر بیولوژی عالمی نظرندده سویر کتیف بر معنا محافظه  
ایتمشلردر. بونک ایچوندرکه صرف علم نقطه نظرندن اونلرک  
معناسی منفیدر. حیاتده بر وصف ممیزی اولان حادثاتک  
فیزیک میخانیکیمه ارجاع ایدیله میسه جکلرینی ، بر جهتدن  
غیر میخانیکي اولدقلرینی افاده ایدرلر.

مع مافیہ حیاتک حتی علمی فکری بیله ساده جه بر نفی  
وانکاردن عبارت دکلدز. حیات فکری مجهول بر شیئک  
تصدیق وتأمین ایدیله سیدر. او شیئک نه اولدینی بزم او بر کتیف  
تفحصاتمزدن قاصقهله برابر تظاهراتی ادراک ایدهرز. بو بر شیئک  
ترس طرفیدر. شبهه سزکه اونک برده یوزی واردر. علمی  
نقطه نظرندن غایت مؤثر اولان بو منفی مفهوم — اکر حقیقته  
اونک آلتنده مثبت بر مجهول بولونمادیفی فرض اولونه حق  
اولورسه — اورته دن زائل اولور و یردیکي نسبی ایضاحاتده  
میداندن قالقار.

ذی حیات انواعک منشائی مسئله سنک تدقیقی بو کون بوتون  
علمه حاکم کبی کورونن بو نظریه نک ، تکامل نظریه سنک  
انکشافی ایجاب ایتدی. دینی عد ایدیلن اعتقادلردن بونظریه یی



تفریق ایدن فرقلر اول امرده ذهنلری بو نظریه نك اوا اعتقادلره  
هر جهتجه ضد اولدقلری دوشونمکه سوق ایتدی . آدین :  
عنایت ربانیه ، خلق و ایجاد ، ذکا ، حریت تضمن ایتدیکی  
ایچون تکامل کلمه سی آنجق بر مقابله یه ، کور بر مجبوریت  
و ضرورت ، مادیتپرستلک افاده ایده بیلیر دنیلدی .

حالبوکه بالذات علمک بو نظریه حتمده یورو تدیکی تنقید  
چوق کچمهدن اثبات ایتدی که تکامل فکری یکنظرده تحیل  
اولوندی کبی ساده ، واضح و صریح دکلدی . ایچنده بر چوق  
مغنا و واردی و هر حالده فرض اولوندی کبی خلق و ایجاد ،  
حریت و ذکا فکری زینی سعادته ره رد و انکاردن عبارت  
بولونما یوردی . علمادن و فلاسفه دن بر قسمی تکامل نظریه سنگ  
دنیا یه بر وحدت ، بر اتصال و تمادی ، بر حیات ، بر ولودیت ، بر  
آهنک ، بر استقامت مشترک کتیر دیکنه و انواعک ثابت و غیر  
متحول ظن ایدلمسی فیکرنده بونلرک هیچ بولونمادیغنه دقت  
ایده رک تکامل جیلکک دینی فیکرلره معارض اولمق شویله  
دورستون دنیا وانک کشفانه دائر اشکال اصلیه نك هیچ تحول  
قبول ایتمز تعددی حتمده کی عنعنوی اعتقاددن زیاده ده ا معظم  
و بر صانع الهی به ده ا لایق بر فیکر ویردی کبی ادعا ایتمش لر دره  
دو غروسی آرا نیرسه بو تفسیر نظریه نك معنای علم یسنک حدودی  
خارجنه چیقار . فقط مبالغه یه دوشمه دن دنیه بیلیر که تکامل  
حتمده کی فیکر علمی حیات یا خود قوت فیکرندن زیاده حد ذاتنده

ناقص بر فکردد، بر رد وانکار در که بر مفهوم مخالف اوله رق  
برده تصدیق ایجاب ایدر .

بوکون مثبت کی کوروندیکنه نظراً نباتات و حیواناتده  
نوح دنیلن شی هیچ دیکشمز وابدی بر شکل وجود دکدر .  
داروینه شویله بویوک بر اعتراض توجیه ایدیولردی : بر طاقم  
انواعک اورنه دن قالدیغنی کورمیورز، فقط نیچون یکی انواعک  
تولد ایتدیکنی کورمیورز؟ بو اعتراض شیمدی ازاله ایدلمشدر .  
مجربرلر، آنی بر تحویل طریقیله یکی نوعلر یاراتمشلردر . بونوعدن  
آزچوق فرقنی برچوق نوعلر تولد ایده بیلیور . بناءً علیه  
اساس اعتباریله انواع موجوده نك هپسنگ تکامل طریقیله وجود  
بولدیغنی تلقیسنه مانع اوله حق برشی قالماشدر .

بوفرضیه نك معناسی نهدر ؟

تکاملجیلک بالضروره تنوعاتک منشائی مسئله سنی تولید  
ایدیور . شیمدی یه قدر بومنشأ حقنده تکاملجیلک قبول عامه یه  
مظهر اولمش چاره حللر بولاماشدر . باشلیجه ایکی تمایل آراسنده  
اهتراز ایدوب دورمیور . بونلرک هر ایکسی ده برطاقم وقعه لر  
وتجربه لر استناد ایدیور . بونک ایچون ، بعض ارباب علم  
بونلری تألیف و مزجه چالیشیورلر . داروینک نقطه نظرن  
تخطر ایتدیرن بوتمایللردن برینه کوره ایلمک تحول تخمده وقوعه  
کلیر . بوتحولاتدن بدضیلری محافظه اولونور، چوغالیر ، ثابت  
نمونه لر تشکیل ایدر . لامارک قبول ایتدیکی دیگر نقطه نظره

کوره تحولاتك اسباب اصلیه سی محیطك تأثیری و محیطه توافق  
ایتمك ایچون موجوداتك صرف ایتدیکی غیرتدر . بو ایکی نقطه  
نظرك توحیدی عقله بك ملایمدر . چونکه تخمده تعدیلات  
فکری محیطك تأثیرینه مانع اولمایه جنی کی محیطك تأثیری  
فکری ده تخمده تعدیلات وقوعی فکرینه مانع دکلدر . بعض  
تجربه لرله ثابت اولدیغی وجهله محیطه توافق کیفیتیه ولد حجره لرك  
محصولاتی اوزرینه اجرای تأثیر ایده بیلدیکی کی تخمده برتحول  
وقوعی ده شرائط وجوده توافق مجبوریتی ایله امتزاج ایلیه بیلیر .  
عجبا بو ایضا حاتده استعمال اولونان مفهوم لرك علماً برر  
مثبت مفهوم اولمالری قابل ادعایمدر ؟

تخمده تحولات مسله کی بو تحولاتی یا برنوع کنیدی کنیدیکنندن  
وجود بولمه صورتیه یا خود اولجه مخفی برحالد بولونان برطاقم  
اوصافك بعض احوال و شرائط تأثیری آلتنده انکشافی کیفیتیه  
ایضاح ایدر . یا خلق و ایجاد یا فطریت : ایشته تکلیف اولونان  
فرضیه لر .

محیطك تأثیرینه قارشى عکس العمل مسله کی بر موجود  
ذی حیاتك یا خارجی بر تأثیرك مطرد بر فعل و عملی آلتنده معین  
برتمایل اکتساب و اظهار ایتمك یا خود شرائط خارجییه توافق  
ایده جك صورتده کنیدی کنیدیسنی تعدیل ایده بیلمك خاصه سنی  
تضمن ایلر .

تعدیلاتك نسبی بر تثبیتی کیفیتنه کلنجه ، بو ، موجود ذی حیاتك

یا کندی کندی میکنند یا خود بالنسبه ثابت بر محیطك تاثیریه  
اكتساب ابتدیی اعتیاده تشبیه اولمقدمه در .

فقط ظواهره رغماً ، خلق و ایجاد ، توافق و تطابق ، محافظه  
و بقا مفهومی بوری بوراده ، هیچ دكسه علم نقطه نظرندن تمامیه  
مثبت بر معنایی حائز اولمقدمه چوق اوز اقدر لر . چونكه بو مفهوم مرك  
محتویات سده مثبت اوله رق بولونان شی سو بر كتیقدر ، غیر قابل  
تعریفدر ، علمی صورتده بسط و ایضاحه قابلیتسز برشیدر . بو  
مفهوملر ذی حیات انواعك تشكلی بر ترکیب کیمیوی یا پیغمه  
بکزه میه جگنی افاده ایدر لر . حقیقنده بونلر انواعك غیر متحول  
اولدقلری نظریه سنده مندرج بولونان مفهوملره نسبتله علمی  
لساندن ده اوز اقدمه در لر . اومسلکده كرك عالم ذی حیات كرك  
عالم غیر عضوی معین و غیر متحول ، مقداری محدود عناصردن  
مرکب ایدی . بونلرک مختلف صورتلرله ترکیبی صنوف آراسنده کی  
سلسله مراتبی وجوده کتیریوردی . حالبوکه عالم نباتات ایله  
عالم حیوانات یالکز کندیسینی ترکیب ایدن فردلرک هر برنده  
دکل هیئت مجموعه سنده دخی یا شایوب تکامل ایدنجه آرتق بونلر  
مادی بر قوللقسینونه ، ثابت و متجانس وحدتلردن مرکب بر  
مقدار محدوده آنجق ظاهرأ بکزر لر . بونلرده تحول جذری بر  
شی اولق اوزره تالیق ایدلمکده در . علمك استناد ابتدیی معین  
و ثابت اساسلر ایسه آرتق یالکز موقت و محتمل برشی اولیور لر .  
بو مفهوملر ، میخانیک نقطه نظرینی تجاوز ایتدکلری جهتله عام

نظر نده بر طاقم رد و انکار لر دن و بر مسئله نك افاده سندن عبارت در لر . شعورك كندى افعال و حرركاتى حقنه و يردىكى ايضاحاته مشابه بر ايضاحات فكرينى تلقين ايدر لر . قبول ايديلن دستور لر كوره ، مخلوق ذى حيات حياتى ادامه و بسط ايتمك ايستر . بوكا موفق اولمق ايچون ده اطرافنده كى احوال و شرائطه كوره تحول ايدر و كندى كنديسى تعيين و ايجاب ايلر .

بو ايضاحاته على العاده علت غائيه ملاحظه سنه مستند *téléologique* ايضاحات دنيلير . نافذ نظرى بر فيلسوفه ، بر غسونه ، كوره [۱] بو ايضاحاتى وقعه لر له هم آهنگ بر حاله قويمق ايچون اولرى كرك ميخانيكيك كرك علت غائيه ملاحظاتنك فوقنده اولمق اوزره تصور ايتمك لازمدر . علت غائيه ملاحظاتى عالم نباتاتى عالم حيواناتك و سوق طبيعى يى ذكانك آشاغى طبقه سى عد ايتمكه سائقدر . حالو كه بونلر حقيقتمده عيى فعاليتك مختلف استقامتله متوجه اوچ انكشافندن عبارت در لر . مختلف استقامتله دنكين و متنوع بر تحصيل كيفيتى كندى كنديلك سندن خلق و ايجاد فيكرينه اولدن تصور ايدلمش و ساحه فعله ايصال تا يخنه حاكم بر غايه فيكرينه اولديغندن زياده توافق و تقابل ايدر .

اسپينوزانك حيات حقنه كى مسلكنى تخطر ايتديرن بو نقطه نظر لر نه اولور سه اولسون ، شوراسى غير قابل اعتراض كى كورونور كه بيولوژينك اصل مفهوملى علمك فوقنده



بر شیلردر و بناءً عليه علم نقطه نظرندن بونلر آنجق برر منفی مفهومندن عبارتدر .

فقط بوندن ، اونلرك مثبت و سوبژكتيف معنا لريني علمك  
بي فائده ، خیالی و صرف لفظی برشی دییه بر طرف ایتسی لازم  
کمز . چونکه بو تلقیلر صرف کمی ، صحیح و او بڑکتیف اولور لرسه  
تسکیمیل خصوصیتلرینی غائب ایده جکلر وار باب علمه تحریاتلرنده  
و توحید و ترکیبلرنده رهبر اولابیلیمك خاصه سندن محروم  
قاله جقلردر . قانت بعض پرنسپلرك بزه حقیقی هیچ بر وقوف  
ویرمدکاری جهتله برانشا قیمت و قابلیتندن محروم اولمقله برابر  
حادثاتی تصنیف ایتمه ، تجربه بر ترتیب ایلمکه زمین احضار  
ایتدکلرندن دولایی — طبیعتك حقیقی بر سعی و عملنی صادقانه  
تمثیل و ارئه ایدیورلر مشکی — بر ترتیب و تنظیم قیمتی حائر  
اولدقلرینی سویلیوردی . بو مسلك بو کونده بیولوژییه قابل  
تطبیق کورونمکده در . حالبوکه بو ، بزه علمی ، وسائط تفحصاتی  
تجراوز ایدن بر شائیته آصیلمش قالمش بر وضعیتده کوستیر .

بونقظه نظرندن علوم معنویه بالخاصه معنیداردر لر .

بو علوم ایکی صورتله تلقی اولونمقده در : صرف مثبت بر علم اوله رق  
یا خود برر قانون و قاعده علمی اوله رق sciences normatives  
قاعده علمی اوله رق تلقی ایدیلیر لرسه حییات بشریه نك  
اساسات مدیره سنی محتویاتلری ایله دوغروندن دوغرویه بزه



تأمین واعطا ایدرلر . بو اساساتی علوم حکمیہ دن ایستہ مک  
بیہودہ در . قاعدہ علملری انسانہ ، شخصیتک انکشافی ، وظیفہ ،  
سعادت ، فرد ایله ہیئت اجتماعیہ نک اشتلافی ، عدالت ، منفعت  
عمومیہ ، تساند ، شعورلرک اتحادی کی برطاقم غایہ لر عرض ایدرلر  
یا خود بو غایہ لری قبولہ بزى اجبار ایدرلر . حالبوکہ بونلرک حد ذاتندہ  
نام اولہ رق تصور ایدلمش اک صوک برطاقم پرنسیپلر اولمادقلری ، یالکنز  
خصوصی برماہیتدہ برطاقم مسئلہ لر ارأئہ ایتدکلری وبومسئلہ لری  
یالکنز تجربہ واسطہ سیلہ حل ایتمک قابل اولمادینی آشکاردر .

بعض کیمسہ لرہ کورہ بو غایہ لر نامتناہی ، اکمل ، لاهونی  
اوزرینہ آچلمش بر نظارتدن عبارتدرلر . اکر بویلہ اولسہ  
ایدی علوم معنویہ افکار مدیرہ لریلہ دینہ حقیقی بر مدحل  
تشکیل ایدرلردی .

باشقہ بر مکتب ، علوم معنویہ یی سائر علومہ دہا . صیقی بر صورتدہ  
تشبیہ ایدر . تظاہرات اخلاقیہ واجتماعیہ سندہ نظر ملاحظہ آلان  
انسانک بر تاریخ طبیعی حالنہ کتیرمک ایستر . علوم معنویہ  
افسانلرک افعال و اعماللرینی سبیلرندہ ، طرز اجرالرنده  
تدقیق ایدرلر . ناصلکہ علوم حیاتیہ دہ حیوانک وظائفی واشکال  
موجودیتی ایله مشغول اولورلر . عملی احکامہ کلنجہ بو تلقیہ  
کورہ اونلر علمک تطبیقاتیدرلر ، فقط علمہ داخل دکلدرلر .  
فی الحقیقہ ہر علم ، علم اولق صفتیلہ ، صرف نظریدر . تطبیقات  
یا علمدن اول یا صوکرہ کلیر ، فقط علم ایلہ قاریشماز .

بوصورتله آكلاشيليرسه علوم معنويه دين ايله هر دورلو  
رابطه يي قيرمه نك غايت امين بر چاره سنى بولا بيلير  
ديمكدر. اوده صرف نقل و حكايه واديسندن آيرلما مقدر .  
انسانلرك ادوار مختلفه ده عدالتدن ، سعادتن ، وظيفه دن ،  
حقدن ، شخصيتدن ، تساندن يا خود شعور مشترگدن شو  
يا خود بو معنالره بحث ايتمش اولدقلىنى مشاهده ايله اكتفا  
ايدرك بومفهوملرك منشاى و معنای حقيقيسى نه اولدقلىنى ،  
قيمتلرينك نه دن عبارت بولونديغنى هيچ صوروشد يرماز . فقط  
بويله نقل و حكايه ايله اكتفا ايدن بر علم اصل علم دكلدر .  
علوم حكيميه مشابه اولق ايچون حادثات معنويه نك علمى ده  
ايضا حاته كيريشمك اقتضا ايلر .

علوم معنويه بوگون عموميتله شعورك حياتى و حيات  
اجتماعيه يي صرف فيزيك و مادى اسباب ايله ايضاح ايتمك فكرنده  
دكلدر . پسيقولوژى ، اخلاق ، سوسيولوژى ، كنديلرينى  
ماده نك علملرينه باغلايان رابطه لرى قيرمادن كنديلرينه خاص بر  
برطاقم پرنسيپلر ادعا و طلب ايدرلر . بناء عليه حادثات معنويه يالكنز  
حيات بشرك فيزيولوژى يه و حكمت طبيعيه عائد شرائطى ايله  
دكل ، شعورك شرائطى ، ذكانك و اراده نك خواصى ، حسياتك ،  
تمايلاتك ، افكارك تاثيرى ، فرديت ، سعادت ، وظيفه ، مساوا ،  
حریت ، عنعنه ، شعور مشترك ، تساند ، انسانيت ، عدالت ، آهنگ ،

ترقی ، عقل ، الخ . بر طاقم فکر لک خصوصی روللری کبی اصل معنوی اولان اسباب ایله ده ایضاح اولنه جقدر .

بو اساسات نه لردر؟ علمی نقطه نظر دن بونلر بر انکار دن عبارتدر . بونلر بر طاقم سو بڑ کتیف خیالت لردر که ذکا مزک بیلمدیکی و حد ذاتلر نده نه اولدیغنی بیله میه جکی او بڑ کتیف سببلرک یرلرینی طوتار لر . بو کبی اساسا دن استخراج ایدیلن ایضاحا تده صریح صورتده بولونان شی موضوع بحث حادثاتک المزدہ کی مؤثر اسباب ایله ایضاح ایدیلہ مدکلریدر . بر منطق معرفتی ایله ایشه بر طاقم فکر لر ، غایہ لر ، قابل ادراک اولامایان هیئتیلہ بر حیات ذی شعور قاریش دیر رز ؛ بوسیال شیلره بر دستور اکسا ایدہ رز ؛ بونلری بر نوع میخانیککی قوا و موجودات حالنه کتیریر ، و مؤثر بر سبب ایملر کی قوللانیرز . آرتق کندی مزی علمی بر ایضاحات ویرمش ظن ایلرزه . فقط بوقیل ایضاحاتک معناسنی و قیمتنی علمی بر صورتده تعیین ایتک ناصل قابل اولور ؟ حیات معنویه ، ترقی یه تمایل ، یکیدن یاراتمق و طبیعتدن ای یایمق ادعاسی نرہ دن کلیور ؟ نه ایستیورز ؟ نرہ یه کیدیورز ؟ بوتون بوممكن شیلری ضروری یه ، بو غایه کمالی حقیقی یه ، بوتون بومستقبل محتملی معلوم و موجود شیلره تنزیل ایتک شعوری آخج بر قوه مغفله کبی تلقی ایتکدن باشقه بر معنا فاده ایتمز . او حالده ، شعورک ویردیکی ایضاحاتک نه قیمت قالیور ؟ ذاتاً کندی لری خیالی اولان بر طاقم حادثاتک ینه خیالی بر طاقم ایضاحاتندن عبارت اولما یور لر می ؟

صرف علمی نقطه نظر دن بوفکر لر بر انکار دن، میخانیکی  
ایضا حاکم امکاتی انکار دن عبارت در . فقط بوراده ده ، حق  
بالخاصه بوراده بو انکار لرک غیر تام اولدیغنی و بو انکار لر  
مقابل بر طاقم تصدیق لر بولوندیغنی سویله مک ایجاب ایدر . اگر  
عالم رده ریاضیون کی یاهرق بو مفهوم لرک سو بڑ کتیف و عملی  
معنالی نه اهمیت ویرمه لر ایدی بونلری زه ده قوللانه بیلیر لردی ؟  
فقط اهمیت ویرمه مک نقطه سی او قدر عقلاری نه کمر که مفهوم علمی  
نامنی ویرد کیری شی ایسته بو سو بڑ کتیف معنادر . بر علم هیئت  
منتسبی ، ظواهره نظراً کونش ارض اطرافنده دونیور مش کی  
محاکمه یوروتدیکی زمان ارضک کونش اطرافنده دوندیکی فرض  
ایده رک غنی صورتله محاکمه ده بولونه بیله جکنی حتی بونک ده  
قولای و موافق اوله جغنی بیلیر . فقط بر اخلاق یا خود سوسیولوژی  
عالمی مشغول اولدیغنی سو بڑ کتیف ظواهری او بڑ کتیف تعبیر لرله  
ترجمه ایتک ایسته دیکی زمان کنیدیسی علاقه دار ایدن حقیقتک  
طیان طبانه ضدی بر موقعه کیمش اولدیغنی و آرتق محاکمه  
یوروته مه یه جکنی کورور . انسانلر دن ، اونلرک فردیتلر ندن ،  
شخصیتلر ندن ، تساندلر ندن ، فردی یا خود مشترک شعور لر ندن  
بحث ایتک ایچون بونلرک بر طاقم شیلر افاده ایتد کیری قبول  
ایتک لازمدر . بو ایسه او بڑ کتیف بر علم نقطه نظر دن یک  
صو کو تورور برشیدر . حادثاتک بر طاقم اخلاقی و اجتماعی مفهوم لرله  
ایضا حاکمی صرف علمی بر اخلاقک و سوسیولوژینک ساحه شمولی

تجاوز ایدن ایضاحاته پکده ای کتم و اخفا اولونا به دن مراجعت  
دیمکدر .

خلاصه ، مشغول اولدیغمز فیلسوفلره کوره ، علمک  
حدودلری صرف بر طاقم نفی و انکارلردن عبارت دکلدر .  
بالعکس بزم ایچون علوی بر طاقم شائیتلرک اشارتیه درلر . بو  
علوی شائیتلر اولماسه ایدی علمک حدودلری بیه آکلاشلماز  
برشی اولوردی . اکر عالملر ، مفهوملرینه قابل استفاده اوله جق  
صورته مشخص بر معنا و یرمک ایستورلرسه علمک بو  
حدودلری خاطره سنی مفکره لرده آزچوق محافظه ایتلیدرلر .  
بناءً علیه علم قطعياً بیطرف دکلدر . اونک بوجه استقامتی  
واردر . بوجه استقامت پک عمومی ایهده شعور دینیک  
برر بدهت حالنده موجودیتنه حکم ایتدیکی شیلره دوغرو  
اولدیغی ده آشکاردر .

بو تقدیرجه دین کیفی بر تصور و تلقیدن ، علمک احتمالکه  
نظری بر صورته خوش کوروبده حقیقتده هیچ مناسبه  
اولمادیغی برشیدن عبارت دکلدر . علمک کندیسسی ، فرقنده  
اولمادن ، دینی آرار . ایشته دین بوضورتله کندی اساساتنه توفیقاً  
سربسته انبساط ایتدیکی ائنده بیانات و تأییداتنک اساسات  
عمومیه لری علمک مصدره لری ایله توافق ایتدیکنه واقفدر .  
کندی ایشنه خادم اولا بیه جک شیلری علمدن آلوب تمثیل

ایتمکه دین غایت غیر تمکشدر . بحث ایتدیکمز ذوات علمی بر  
یابانجی یاخود بر رقیب دییه بر طرف ایتمک شویله دورسون ،  
دینلرک تاریخی وطبیعی جهتلری حقنده الک دوغرو ، الک صاعلام ،  
الک تام و بناء علیه دینه دهالایق والک مؤثر بر فکر ایدینمک ایچون  
بوتون قوتلریله علمی امدادلرینه چاغردقلری مشهود اولیور .



### بر دوام قالان مشکلات

شبهه یوق که دین ایله علمک ائتلافی بوصورتله آکلامق واجرا ایتک، قابل تصور اولان صورتلرک اک قوتلیسی، اک قناعت بخشیدر. مع مافیله بر عالمک یاخود دیندار بر آدمک وجدانی تمامیه تطمین ایتدیکی محقق عد اولونه ماز.

علمک نتایجی، هیچ طالب اولمادن، ساده جه اخذ و قبول ایچون صرف ایتدکری مساعیه رغماً روحیجیلر (سپریتو آلیستلر) ده علمک حدودلرینی دینه مساعد برشکلده تفسیر ایتدکری زمان ارباب علمک اعتراضه اوغرامق تهلمکه سنه معروضدرلر. علم ایچون اصلی بر عقیده وارسه اوده نزهیه کیتدیکنی بیلمز اولمقدرد. علم کندیسنه حدودلر قبول ایدرسه بونک آرقه سنده نه اولدیغنی هیچ بروجهله بیلمز. کرک بو بیلمدیکی شیلرک کرک بیلدکرینک تفسیری علم ایچون نظر شبهه ایله کوروله جک برشیدر. علم کندی استقلالنه، مختاریته، بیلمه مک حقنه قارشی غایت قیصقانجدر. دیگر طرفدن شعور دینی ده، موجود اولایلمک ایچون علمدن مساعده ایسته مک مجبوریتنده بولونمايه قارشی حیرتله دوشمکده دوام ایدر. شبهه یوق که علمک اثبات ایتدیکی نتیجه لره قارشی اعتراض ایتمکی دوشونمز. کندیسى ایله علم آراسنده برمناسبت بولونماسی لازم که جکنى، علم ایله دین بربرلینه

تمامیله غیر متجانس اولامایه جقلرینی قولایلقله تصور ایده بیلیرم  
چونکه الله وارسه دنیانک سببی اودره، علم ده بودنیانک قانونلرینی  
تدقیق ایدره. سبب ایله نتیجه آراسنده هیچ بر مناسبت بولونمامسی  
امکان خارجنده دره. فقط دین ده مختاریت و سربستی انکشاف  
ادعاسنده دره. هر حیات کبی اوده کندی کندیسسی قالمق و ایچندن  
بوتون قوتلرینی بسط ایتمک ایستر. حالبوکه هر شیئه رغماً دین  
ایچون تظاهر حققی علمک تلقیاتنه تابع بولوندرمق فیکرینی  
الزام ایدن بر مسلک داخلنده دین بر صیقینتی حس ایدره.  
بناءً علیه علمک حدودلری مسلککنده نه علم نه دین  
قارشیلقلی ادعا ایتدکلری مختاریته کندیلرینی تمامیله صاحب  
کوره مزله.

واقعا، مسئله الک ایجه ومدقق بر ذکایه بیله میدان اوقویه جق  
برشکلده کورونیور. چونکه دینی اوصورتله تلقی ایتمک یولنی  
بولمالیدرکه دین هم کندیسنه خاص اساسلر دائره سنده انکشاف  
ایتمکده سربست اولسون هم ده قابل ادراک بر طاق مناسبتلرله  
علمه مربوط بولونسون. فقط عجبا مسئله نك بو قدر مشکل  
وغیر قابل حل کورونمسی دین ایله علمی فضا داخلنده یان یانه  
موجود و بونی اله کچیرمک ایچون مادی شیلر کبی بر برلریله حال  
مجادله ده اولمق اوزره تلقی ایتمکده اصراردن ایلری کلیورمی؟  
علمک دینه هانکی موقعی ترک ایتدیکی آرانپور، علمک اشغال

ایتمدیکی فضاتک اطراف دها اوتوده بر ساحه موجودیتی تضمن  
ایدوب ایتمدیکی صوروشدیریلور . بوتون بو افاده لر ایسه بر  
تشبیهدر . شائیتی فضائی مخیله یه عائد بر لسانله افاده ایتمکدر .  
هیچ دین ایله علمک مناسبتی بو قدر بسیط ، مادی مناسبتله  
بو قدر مشابه بر صورتده اولایلیرمی ؟ بالعکس ادراکی و تعینی  
غایت مشکل اولمق ایجاب ایتمی ؟ بو ، نوعی کنسینه مخصوص  
بر مناسبت اولمق لازم گلزمی ؟

فقط ، شاید بویله ایسه اوزمانده بو مناسبتی کشف ایده .  
بیلیمک ایچون نظر ملاحظه یه آلدیغمز اصولدن دها مابعدالطبیعی  
بر اصول قوللانمق اقتضا ایدر . تدقیق ایتمیکمز اصول ، تام  
تنقیدی ایدی . علم ایله دین حقنده بزجه معلوم اولان حاللریله  
تفکرات و ملاحظاتده بولنمقدن وهر ایکسینک شرائط وجودی  
نه اولدیغنی آرامقدن و بو شرطلر معلوم اولونجه نه صورتله  
تألیفلی قابل اوله جغنی دوشونمقدن عبارت ایدی . بو اصول  
علم ایله دینی آنجق بر برلرینی قارشیلقلی احما ایتک ایسته یین  
ایکی رقیب حالنده قارشلی قارشلیه قویمقدن باشقه بر نتیجه یه  
واصل اولاماز . فقط علم ایله دینی خارجدن نظر ملاحظه یه آله رق  
اساسلرینی تنقید ایله اکتفا ایده جک یرده هر ایکسینکده ناصل  
تولدا یتمک لرینی تولد ایدر کن کوروب منشأ لری وانکشاف لرینک  
باطنی پرنسیپ لری آکلاسیله جق اولورسه احتمالکده یوموشاق ،

دها صمیمی بر نوع مناسبت کشف ایتمک قابل اولور. بونک ایچون  
یالکز تنقید فلسفییه دکل اصل فلسفهیه، حیات فکریه و معنویه نك  
اساسات اولینی حقنده بر نظریهیه مراجعت ایتمک ایجاب ایدر.  
علمک حریتنه حرمت ایتمکه اعتنا کار اولدقلری قدر دینک  
حریتنی تأمین ایتمکده غایت دقت ایدن پک نافذ بر طاقم مفکره  
صاحبلری ایشته بو طریق تجریه ایتدیلر .

## اوچنچى باب

### فلسفه فعل وعمل

- ۱ — پراغماتيزم — مفهوم علمينك فرضى بر آمر اولماسى ؛ پراغماتيزم نقطه نظرندن حقيقت فكري .
- ۲ — بر فعل وعمل بشرى فلسفه سى فكري — علمك فعاليت بشريه نك محصول ايجادى اولماسى — دينك روح بشرك اك درين بر آرزوسنك ساحه فعله چيقيما سندن عبارت اولماسى — عقايدك صرف عملى بر طاقم حقايق اولماسى — دين ايله علمك فعل وعملك منبعيله وسائلى آراسنده كي فرقه تقابل ايتلىرى
- ۳ — بعض مطالعات تنقيدكارانه — صرف فعاليت فهومنده مندج مشكلات — كرك علم كرك دين ايچون تاميله فكري بر اساس بولق لزومى .

حيات ذكائيه و معنويه نك اساسات اوليني حقنده بر نظريه تأسيس ايتمك ايچون ده قارت چالشمشدى . يالكرز علمى دكل عملى وحتى دينى حقيقتلر ك منبع مشتركى عقلده بولونه جغنى ظن ايتمشدى . اونك بو عقلي جيلق مسلكى غير كافى كلكشه، ده قارتك مقصدينى تكرار تعقيب ايدهر ك اصل عقلك يعنى بالخاصه ذكائى اولان ملكه نك يرينه فعاليتى اقامه ايتمك قابل اولمازمى ؟ چونكه ده قارتدن صوكره كي فلسفه، فعاليت ذكائيه نك قيمتنى و خصوصيتنى كيتدكجه ميدان وضوحه چيقارمشدر . فلسفه فعل وعمل، علم ايله دينك مفكره بشرده بر منبع مشتركى چيقد قلرينى عجب ارايه ايدهر مى ؟

### پراغماتیزم

علمك استحصالاتنده مفكره نك فعال اولماسى ارباب علمجه  
بوكون صورت عموميه ده قبول ايدلمش بر فكدردر . فقط بو  
سوزى سويلر كن على العاده مقصدلرى حقيقتك كشفى مفكره نك  
صرف مساعى ايتمنه ، بر طاقم ايجادلرده بولونماسنه ومالك  
اولدينى بوتون منابعى عاقلانه قوللانماسنه احتياج كوسترديكنى  
آكلامقدردر . بر كره وجود بولدقن صوكره علمك حدذاتنده  
فعاليت بشريه نك بر طرزندن باشقه برشى اولماديغنى ادعا ايتك  
ايسته مزلر . ابتدا بر فرضيه اورتهيه قونور . وقعه لر بوفرضيه ي  
حق كوسترلرسه او فرضيه قانون حالنه كيرر . مفكره نك  
بو قانونى نه صورتله كشف ايتديكى مسئله سى آرتق يالكز  
تاريخ نقطه نظرندن حائز قيمت اولور .

شيمدى اشتغال ايده جكمز فيلسوفلر نظرنده ايسه بالعكس  
مفكره او فعاليتي ايچنده پيش ملاحظيه آلنيرسه يالكز علمك  
بر مؤثر وعاملى دكلدر ، بالعكس موضوعى وجوه ريدردر .

زمانمзде بو نقطه نظرى ، « پراغماتيزم » نامى ويريلن  
مشهور بر مسلك فلسفى طرفندن پك حائز خصوصيت بر طرزده  
قبول ايدلمش كورييورز .

پراغماتيزم مسلكنه منسوب اولان فيلسوفلره كوره علم  
يالكز مفكره فعالك بر اشتراك وحصه سنى تضمن ايتمز .



مفکره موجوداتی کندی نقطه نظرندن پیش ملاحظه آیر  
و کندی استعماله صالح برطاقم تمثالر ایجاد ایدر. علم، فعل  
و عملده میالدر. فعل و عمله خدمت ایتمکدن باشقه غایه سی  
یوقدر. علمی مفهوم ملک منشائنه قدر حقیقکیز: کوره جکسکیز که  
بونلر سزه فلان ویا فلان حادثه نی میدانه حقیقارمق یا خود  
فلان و فلان نتیجه یی استحصال ایتک ایچون تعقیب ایدیله جک  
اصوللری ارائه ایدرلر. بونلر فعل و عمل ایچون برر قاعده در،  
برر فرضی اوامر در. علمی فکرلرک ایچنده بو معنادن باشقه  
هیچ بر حقیقی محتویات یوقدر. عملی نتیجه لر تولید ایتمین  
بر قضیه نک هیچ معناسی اولاماز. طرز حرکتده برر فرقلی  
نتیجه یه واصل اولمایان ایکی قضیه بررلرندن آنجق لفظی  
صورته فرقلی اولایلرلر.

علمی دستورلرک معناسی صرف عملیدر دیمک بودستورلرک  
ماضیه دکل استقباله تعلق ایتدکرینی سویله مک دیمکدر.  
علم، ماضی نی آنجق استقبال ایچون پیش ملاحظه آیر. فلان  
فلان حرکتده بولونه جق اولورسه ق نه کبی بر نتیجه یه انتظار  
ایتمه من لازم کله جکنی، الیوم فلان و فلان احتساسی دویارسه ق  
یزده نه کبی احتساسلر تولد ایده جکنی علم بزه خبر ویرر.

ایشته بوندن حقیقتک بر ایش و عمل نقطه نظرندن تلقیسی  
فیکری (پراغماتیک فیکری) تولد ایدر. حقیقت بزم تلقیاتمزک  
اولدن بر دفعه ده بردن ویرلمش اولان و دنیا دنیلن کلک فلان

یا خود فلان جزئیه توافق دکلدر . فلان ویا فلان نتیجہ فی  
استحصال ایتک ایستہ دیکمز وقت سادہ جہ تلقیاً تمزدن برینک  
بزہ ایفا ایدہ بیلہ جکی خدمتدن عبارتدر . حقیقت دیمک قابل  
تحقق برشی دیمکدر . قابلیت تحقق ایسہ تجربہ آردہ سندہ بزہ رهبر  
اولمغہ قابلیت معناسنی افادہ ایدر .

بناءً علیہ بر تلقینک حقیقتی آنجق یالکمز حادثہ دن صوکرہ  
تحقق ایدہ بیلیر . بر حقیقت مثبتہ لایخطی بر حقیقت اولمق اوزرہ  
آنجق ماضی یہ عائد اولابیلیر ، استقبالہ دکل .

ہمسی بو قدرلہ قالماز . علم یالکمز فعل و عملی استہداف  
ایتمز . کندیسیدیہ بالذات فعل و عملدر ، مؤثردر و ایجادکاردر .  
علمک استقرارینک استہداف ایتدیکی استقبالک ناصل اولاجنی  
عجبا اولدن تعیین و ایجاد ایدلمشیدر ؟ استقبالی خطاسز بر صورتہ  
تخمین ایدہ بیلیمکدن بزہ منع ایدن شی یالکمز جہالتمز میدر ؟  
عقلجیلر بویلہ ادعا ایدرلر . اونلرک نظرندہ شأنیت ازلدن  
بری یاللمشیدر و نامدر . مشہور بر سوزہ کورہ حال ماضی فی  
محمول و استقبال ایلہ حاملہ در . فقط پرانماتیزم مسلکی اربابنک  
نقطۂ نظری بوتون بوتون باشقہ در . اونلر شأنیتک بر  
طرفدن وجود بولمقدہ اولدیغنی و استقبالک زمان حال طرفندن  
تعیین و ایجاد ایدلمدیکنی سویلرلر . استقبالی خلق ایدن اسباب  
آراسنہ برنجی درجہ دہ بالذات علمی قویارلر . حر و انسانی اولان  
علم ، طبیعتی اولیلہ بر طاقم نتایجہ معروض بولندیرر کہ طبیعت

کندی کندیلکنه قالسه بونلری حصوله کتیره مزدی .  
 بوندن باشقه ، پراغماتیسترلر کوره شعور مزده فکر لر مزه  
 رفاقت ایدن اعتقاد ، بر حادته نك ساحه فعله چیقاجغنه ایمان ده بو تحقیق  
 کیفیتنك عامل لرندن بریدر . ایمان کندیسنك تجربی بر صورتده  
 تحقیقی خلق ایده بیلیر و تاثیر ذاتیسیله صحیح و حقیقی اولابیلیر .  
 ایمان ده روح بشرده خارجدن علاوه ایدلمش ، عزم  
 و اراده نك تاثیرندن آزاده بر حالت دکلدرد . شبهه یوق که کندیمزه  
 راست کله بر اعتقادی و یرمك المزده دکلدرد . فقط حیات بزى  
 چوق کره اويله شغلر قارشیسینده بر اقیر که بونلردن برینی  
 اختیاره بزى ذکامن مجبور ایتمز ، حتی صرف ذکائی اسباب ايله  
 حرکت ایده جك اولور سهق بو اختیار کیفیتى غیر ممکن بر حاله  
 کلیر . ایشته اناسلی و عملی حدلرنده پیش تأمله آلمان مسائل  
 دینه بو قیلدندرد . جمعیت بشریه ، دنیا ، کائنات بکا کندیلرندن  
 بحث اولونور کن « بو » دینلن شیلر میدر یوقسه کندیسینه :  
 « سن » دیه خطاب اولونان بر قرین میدر ؟ بو ایکی احتمالدن  
 برینه قرار و یریشمه کوره خط حرکتیم بوتون بوتون فرقلی  
 اولور . قرار ایسه شبهه یوق که بنم اراده مه وابسته در . باشقه لرینه  
 و دنیایه قارشى اولان وظیفه مه اینانوب اینانماق و بناء علیه  
 جریان حادثاتی اولدینی کبی بر اتمق یا خود تعدیل ایتك بنم  
 المده در .

دېمك اوليور كه بالذات حقيقت ده ، تعييني غير قابل بر درجه  
داخلنده ، بر محصول انسانيدر . بو يالكيز عالمي انسانك  
يا پماسندن دكل علمك موضوعي اولان شينك ، وجودك ، ده  
— كه علم بونك بر تاثير و نتيجه سي كي كورونور — من الازل  
يا پلش بر شي اولمايوب جوهريني تشكيل ايدن مادي موجوداتك  
تاثير لريله وبالخاصه علمه واعتقاده استناد ايدن فعاليت بشريه  
طرفندن دائمي صورتده يالمقده اولماسندن نشئت ايدر .

بر فعل و عمل بشری فلسفه سی فکری

علم ایچنده فعل و عملك حصه سنی پراغماتیزم فلسفه سی  
منتسبلرینك یابدقلرندن فضله نفوذ نظرله و مهارتله بولوب میدانه  
قویایلیمك پك مشكلدر. فقط بو فعل و عملك طبیعت و ماهیتی  
و معناسی بو مسلكده — هیچ دكلسه آریجه ، یالکیز باشنه  
پیش تأمله آلدینی وقت — بر پارچه غیرمعین قالب قالمادیغی  
جای سؤالدر. چونکه بو پراغماتیزم مسلكنه منسوب اولان  
یاخود منسوب عد ایدیلن بر چوق ذوات آراسنده کی مهم  
فرقلردن بو آکلاشیلیور .

دنیلورکه حقیقی بر فکر و اعتقاد دیمك قابل تحقق ،  
خیرکار ، مؤثر ، کارلی بر اعتقاد دیمکدر . فقط « کارلی »  
اولق کله سنك معناسی نامتناهی دکیشه بیلیر. بمضیلری واردرکه  
کندیلرینه برشی تأدیه ایدیله جکی زمان نقد پاره دن باشقه برشی  
قبول ایتمزلر. برنیوتون ایسه گندیسنه وقوع بوله جق تأدیاتك  
کائناتك قانونلرینی وحدته ارجاع ایده بیله جك بر طاقم تعمیملر  
شکلنده اولماسنی ایستر. کیمیسنك علمدن بکله دیکیشی بر حظ  
مادیدر . کیمیمی بیلیمك غرورینی ، موجوداتك مقانیزمه سنه  
نفوذ ایتمك ذوق وجدانیدسنی اوندن بککر. باشقه بری روحك  
سکونتنی ، معنوی قوتی ، فیکرلر آراسنده ائتلاف و توافقی ،  
یاخود وارلغك انکشافنی و بویومه سنی یاخود بشریتك غایه

کمالارینه مفتون، هم حریتپرور هم تک یکانه بر جمعیت بشریه نك  
 ساحه فعله چیقماسنی تأمین وتسہیل ایدن شیلره « خیرکار »  
 نامنی ویریر. پراغماتیزم بو نقطه نظرلرک هیچ برینی رد ایتمز،  
 خارجده بر اقاماز. هیچ برینی قبوله بزی منطقاً اجبار ایتمز.  
 بو بر مسلك اولمقدن زیاده بر اصولدر. عملیه نك بر نظریه سی  
 اولمقدن زیاده نظریه نك عملیه یه مناسبتنی تعیندن عبارتدر.  
 بوصورتله، بو شکله پراغماتیزم، فلسفه فعل وعمل فکرینی تمامیه  
 بیتروب توکتمز.

بونلری دهـا تام بر صورتده ساحه فعله ایصال ایتک  
 ایستہن بر چوق متفکرلر، علمک سینہ سنده یالکز بر مؤثر  
 وعملی اولما اندیشه سنک حکمران اولمایوب کلمه نك تام معناسیله  
 ومثبت اوصافیه بو فعل وعملک موجود اولدیغنی اثباته چالیشیرلر.  
 بو فعل وعمل کنديسنی جریان حادثانه ساده جه بر مداخله دن  
 تفریق وتمیز ایدن مثبت اوصافه مالکدر. بونی حقیقی بر فعل  
 وعمل دیه تعین وتعریف ایدن شیـده بو اوصاف مثبتہ در.  
 بو دوشونجه دن نشئت ایدن مسلكلر، حقیقتده بر برلرندن  
 يك فرقیدرلر. اونلری صریح صورتده طایمق ایچون آری  
 آری تدقیق اقتضا ایدر. معافیہ مشترک بر تمایللری واردرکه  
 بونی بولوب چیقارمق غیر قابل دکلدر.



علمه عائد اولان جهتمده بو تمایل بروجه آتیدر :

برقاچ سنه دن بری پک تعمم ایدن بر فلسفه نك منتسبلری [۱]  
 دیورلر که : علمك مصدره لری Postulats ، پرنسپلری ،  
 تعریفلری بر طاقم موضوعاتدن و کیفی بر اتخانك نتایجندن  
 عبارتدر دیدیکمز وقت بونلر احتمالکه تجربه طرفندن تلقین  
 وتولید ایدلمشلسه ده تجربه نك بونلری قبوله بزی اجبار  
 ایدمه میه جکسی قصد ایلرز. تجربه ایله اونی علمی صورتده ترجمه  
 ایچون قوللانندیعمز مفهوملر آراسنده بر فیصل واردر . فقط  
 بوندن او مفهوملرک صرف جعلی و صنعی صورتده اختراع  
 ایدلمش اولماسی نتیجه سی چیقماز . موجودات طرفندن آنجق پک  
 ناقص بر صورتده وقوعه کلن تعیین و ایجاب کیفیتنك حکمتی اساساً  
 بر طاقم فرضیه لر تخیل ایدن ، تعریفلر وجوده کتیرن مفکره نك  
 کندیسنده در . مساعی علمییه بی اجرا ایدن شی بر تصادف  
 یاخود راست کله بر فعالیت دکلدرد . بو ، اوصافی قید و اشارت  
 قابل اولان ، معین بر فعالیتدر .

اولا ، علمی بنا ایتمه خدمت ایدن فکرلر حقیقی برر  
 ایجاد و اختراعدردر . بونلر ساده جه احتمال دائره سنده برر فکرندن  
 عبارت دکلدردلر . اساسلیدرلر ، شمردرلر . دهانك ایجادلری  
 مخیله نك کیف و هوسندن تفریق ایدن بر قیمت ذاتیه مالکدرلر .

[۱] پوانقاره ، میلو Milhaud دوئم ، Duhem ، لورو  
 Le Roy ، هوفدینگ Hoeffding ، الخ .

یو ایجاد و اختراع لر هر جهته ده پك زیاده مبدولیتله ، تنوعه  
 ویتمز توکنمز بر یکیلکه وقوعه کلیرلر . اولردن هربری  
 پایدار اولمق ایچون اوغراشیر ، تعدیلاته اوغرار ، معلوماتك  
 ترقیاتنه او یار و مغلوب اولدینی زمان بیله یکی بر طاقم اختراعلره  
 میدان آچار . کندی کندیسنی یار اتمق ، پایدار اولمق ، انکشاف  
 اتمك ، کندی کندیسنی قبول ایتدیرمك ایچون غیرت صرف  
 ایدن حقیقی بر وجودك ، حقیقی بر مخلوقك فعل و عملی ایشته  
 بو علامتلردن طانیلیر . بو وجودك طبیعت و ماهیتی نه در؟ بوتون  
 بو خلق و ایجاد ایدیلن شیلر هانکی بر غایه ایچون تصور  
 ایدلمشلسه ایشته بوغایه بو وجودك طبیعت و ماهیتی اراؤه ایدر .  
 تجربه طرفندن ویریلن وقعهلره فیکرلرینی توافق ایتدیرمك  
 ایچون مفکره نك صرف ایتدیکی مساعی کمال اصرار ایله نظر  
 دقتمزه وضع ایدلمکده در . بونده حق لری واردر . عصری علم ،  
 عالم حقیقییه بر تصرف معناسنی افاده اتمك ایستر . خیالی بر عالمی  
 ساده جه عقیم بر صورتده تماشادن عبارت قالمق ایسته مز . فقط  
 افلاطونلرك ، آرسطولرك — ذکامزك کندی کندیسنی  
 طانیه مادینی — عالم حواسدن ذکا ایله قابل ادراك بر عالم ترکیب  
 اتمك ایسته یین او انسانی فلسفه لری بونکله بر طرف ایدیلور  
 ظننده ایسه لر خطا ایتش اولورلر .

علمی فرضیه لر صورت عمومیه ده دیایه یا وحدت یاساده لك  
 یاخود تمادی قویغه میالدرلر . بو اوصاف ایسه تدقیق و مشاهده

وقعه لری دکلدر . بونلر یکنظرده شـأنیتک ضدی کبی  
کورونورلر . حتی بونلری بربرلریله تألیف بیله مشکلدر . چونکه  
دنیا مـزک اقسـامـنک نامتناهی تعددی معلوم اولدیغی ایچون بو  
دنیا نـک بر اولماسنی ایسته مک بوتون اقسامنک بربرلری اوزرینه  
عمل وعکس العمل اجرا ایتمه لرینی ایسته مک اولور که بو ایچندن  
حیقلماز بر قاریشـیقلغی موجبدر . کذلک تمـادی نی آراق  
ساده لیکدن اوزاقلاشمقدر . بربرلرندن اساسلی بر صورتده  
آیرلش صنفلرک تعددی بو ساده لکی ده ائی تأمین ایدر .

علمک تعقیب ایتدیکی بو غایه لر مفکره نـک موجوداته  
جبراً وضع ایتدیکی بر طاقم قانونلردن باشقه بر شیمیدر ؟  
مفکره نـک طبیعتی معلوم اولدیغی جهتـله خام تجربه نـک عرض  
و ارا نه ایتدیکی شکلرده موجوداتی کنـدیسنه تمثیل ایتدیره -  
مه دیکـندن اونلره بویله قانونلر وضع ایتـمکه قالقار .

فقط وحدت ، ساده لک و تمادی ، قابلیت ادراک دنیلن شیئی  
تشکیل ایدرلر . بناه علیه ایجاد و اختراع علمیده تظاهر ایدن شی  
راست کله بر حیات فکریه دکلدر . بر ذکانتک ، بر عقلک اصل  
حیاتی ، کنـدیسنده بر قابلیت ادراک نمونه سی بولونان بر حیاتدر .  
عجبا عقل علمک بر عمله سندن باشقه بر شی دکلیدر ؟ عقلک علم  
ایچنده ایفا ایتدیکی ایش کنـدی کنـدیسنک خارچنده بر غایه  
مالکمیدر ؟ کله نـک فائده جیلک معناسیله صرف عملی بر غایه می  
متوجهدر ؟

بشريتده فكر منفعتدن عارى يا خود تعبير ديك رله اك بويوك  
منفعتى علمدن عبارت تلى ايدن بر علم موجود اولديغنى انكار  
ايتك مشكلدر. بويوك بيله يونان دوشونجه لرينه وارث بر چوق  
ارباب علم واردركه، آرسطو كى، علم اچون علم طرفداريدر لر  
و آرسطو ايله برابر شوفكرده درلر: « باشقه هر مشغله بودورلو  
علمدن دهالزومليدر، فقط هيچ بر مشغله بوندن دها اى دكلدر.»  
بومفكره لك واسطه يى غايه مرتبه سسه چيقاردقلى مقام  
اعتراضده سويله نه بياير. بوراسى ممكندر. فقط خطا عد ايديان  
بوتحويل، طبيعتك بويوك بر قانونى و ولوديتك محركرندن بريدر.  
ماده حياته نسبتله برواسطه اولقله برابر طبيعت اوى حد ذاتنده  
برغايه ايمش كى بسط ايدر. انسان اچون برواسطه دن باشقه  
برشى اولميان سوق طبعى، حيوانى، حيوان اچون برغايه در.  
انكشاف بشريده كى بو ثروت هر فردك كندى صنعت و حرفتى  
بك زياده تقدير ايندرك اوى اك يوكسك، اك نجيب برغايه  
عد ايتمسندن ايلرى كلير. كوزل ديديكمز شى موجوداتدن  
استخراج ايدلمش و كندى كنديلكلرى اچون انكشاف  
ايتديرلمش برطاقم اوصاف دكليدر؟ اويون، ملكاتمرك حد  
ذاتنده برغايه كى تلى ايديلن ساده جه تمرينلرندن باشقه برشميدر؟  
برشيتك منشاء اعتباريله و تكامل تاريخى يه كوره برغايه يا خود  
برواسطه اولماسنك نه اهميتى واردر؟ موجوداتك قيمتلىرى  
تقديرى اونلرك علت غايه لرى اعتباريله ايفا ايتدكلرى روله

تابع دكلدر. اكر انسانلر علمى، فائده نك فوقه قويىقى ياخود علمك حد ذاتنده قصواى فائده اولديغى حكم و اعلان ايتك ايتيورلر سه حقسنز اولدقلىرى كندىلرينه ناصل اثبات اولونه بيلير؟ انسانلرك ويردكلرى عملى حكملره باقيله جق اولور سه واسطه و غايه ترتيبى آلت اوست ايتمكدن وابستدادن آنجق ايكنىجى درجه ده و آشاغى طبقه ده بولونان برشئى اك يوكسك درجه لره چيقارمقدن بر ذوق آلدقلىرى كورولور. يكي وبويوك اوله رق ياپيلان همان هر شئك منشائى بودر .

ذاتاً اصل فائده دنيلن شيدن آيريلش اولان علم يالكىز بوندن دولايى مطلق بر غايه حالنه تحويل ايدلمش دكلدر. علم عقلك انكشافى اىچون برواسطه اولويور. ده قارتك ديدىكى كى عقل وار اولق، بويومك وماهيت و طبيعته كوره كندى كندىسنى تعيين ايتك اىچون حقيقتلره بسلمكه محتاجدر. هر موجود كى عقل ده آنجق اجراى فعل و تاثير ايدىرك، كندى فعل و عملى ايله كندىسنى ياهرق وار اولاي بيلير وسينه سنده طاشيدىغى قواى ذكائيه يي آنجق اك مكمل بر فعل و عمل ذكائيسى اولان علم ايله موقع فعله چيقارا بيلير .

ايشته، علم، طبيعتك بر اثرى، شعور، بونك بر صحنه سى دكلدر. كذلك علم حكمت وجودلرى فائده لرندن عبارت اولان بر طاقم بسيط رچته لر مجموعه سندن عبارت ده دكلدر. بو بر معين فعاليتدر، معقول و ذكى اولق اعتباريله بالذات فعاليت بشريه در.

علم ده لسانلر کيدير. موسيو بره آلك پك اينجه بر صورتده اثبات ايتديكي وجهله لسانلر موجوديتلرينك وتکامللرينك پرنسپي مفکرة بشرک خارجنده بولونان بر وجود دکدرلر. مفکرة، ذکا، اراده بشر: ايسته لسانک يکانه سبب حقيقيسي. لسان مفکرة دن هيچ بر صورتله آريلاماز. چونکه کنديسنده حيات نامه موجود اولان شي آنجق مفکرة دن نه آلمشه اودر.

\*  
\*\*

بعض علما، علمي بزه بويله انسانک فعاليت ذکايه سنده مندمج اولمق اوزره کوستيرلرکن بوفکرة تقابل ايتمک اوزره دين حقنده برمسلك ظهور ايتدي.

دين اکثرثا انسانه خارجدن امر اولنان، قبول ايتديريلن بر منظومه اعتقادات و اوامر اولمق اوزره اراده ايديلير. فلان سلطه نك حقيقي وموثوق بر صلاحيتي اولديغي، فلان آمنت يه اعتقاد ايدلمسني، فلان عمللرک اجرا اولونماسني امر ايتديكي آز چوق عقلي بر صورتده اثبات اولونور. دين ده بو سلطه يه ساده جه اطاعتدن عبارت ديه کوستيريلير.

فقط، بحث ايتديکمز فيلسوفلر، بو اثباتلر دوغرو اولسه ده، بو صورتله قبول ايتديرلمک ايسته نيلن ايمان ماده لري مفکرة يه، اعتقادي کله اوزرينه دکل فکرلر اوزرينه بنا ايده جک صورتده واضح بر معنا عرض ايتسه ده بو اعتقاد و عبادت لک انسان ايجون شعورک، خريستان شعور و غنغنه سنک ويرديکي معناه بر دين



تشکیل ایده جگنه ناصل امنیت ایدیه بیه جگنی صورارلر .  
 بر دین دیمک روحده مافوق طبیعی بر حیات دیمکدر . بونلر  
 یان یانه ، بر برندن آیری ایکی شخص وجوده کتیره جک صورته  
 بر برندن مستقل ، یان یانه ایکی وارلق دکلدلر . بر طرفدن  
 حیاتنک معنا و افاده سی نامتناهی صورته تعالی ایدر کن حریقنی  
 محافظه ایدن فردک کندیسیدر . اگر اعتقادلر انسانک طبیعت  
 و ماهیتی ایله حد ذاتنده بر مناسبتی حائر اولماسه لردی بویه بر  
 تأثیر ناصل اجرا ایده بیلیر لردی ؟ بعض اعتقادلرک منطقاً اساسلی  
 اولدقلری حالده قلب و شعور بشر اوزرنده ، آرشیمدک اساسنه  
 یا خود جاذبه عمومیه قانوننه اعتقاد قدر آنحق اجرای تأثیر  
 ایده بیلیمسی غیر قابل تصور برشی دکلدر . اگر اعتقادات دینه  
 یالکیز منطقی اعتقادلردن عبارت اولسه لر ایدی دینی تسمیه  
 ایدیلن افعال انسان ایچون بر طاقم خارجی حرکاتدن عبارت  
 قالیر ، روحی بونلره اشتراک ایتزدی .

فقط ، دنیله بیلیر که ، انسان متناهیذر ، یخطیدر ، شره  
 میالدر . دین ده انسانی تبدیل و تحویل ایچون کندیسینده اجرای  
 نفوذ ایدن تأثیر الهیدر . فقط طبیعتک کندیسینده دینه دوعرو  
 بر تمایل ناصل بولمالی ؟ متناهی بر وجوده نامتناهیلاک قارشیسینده  
 آنحق بر وظیفه ترتب ایدر : اطاعت . یوقسه متناهیکنک کندی  
 کندیلکندن نامتناهی بی آکلایوب در آغوش ایده بیه جگنه می  
 احتمال ویریلیور ؟ بوکا قادر اولایلیمک ایچون نامتناهیکنک عینی

اولمق لازمدر . بویه بر فکره طرفدار اولمق کلیت اله جلیق  
Panthéisme ایچنه کومولمک اولور .

فعل وعمل فیلسوفلری بو نقطه نظری قبول ایده بیلیمک  
ایچون انسانک یالکمز ادراکدن عبارت اولماسی لازم کلیر دیرلر .  
فی الحقیقه ادراک نظرند موجدات و اشیا آراسنده کی مناسبت  
یرینه اولمک مفهوملری اقامه ایدلمشدر . مفهوملمرده نتیجه ده  
یا بر برینی احتوا ایتمک یا خود سلب ایتمک مناسبتلرندن باشقه  
برشی قبول ایتمز لر . فکرجیمک نقطه نظرندن اکر الله ایله  
انسان بر برلرینک عینی دکل ایسه لر همه حال بر برلرینه خارج  
شیلر اولمق ایجاب ایدر . کلیت اله مسلکی بر طرف ایدیلنجه ،  
بو معناه دین انسان ایچون آنجق خارجدن قبول ایتدیرلمش  
بر تضیق و اجباردن باشقه برشی اولاماز .

فقط انسان یالکمز ادراکدن عبارت دکلدر : انسان ، ده  
زیاده فعالیندر ، یا خود ده دوغروسی ، فعل وعملدر ، تصرفی  
کندی وارلغنی ادامه یا خود تمیه ایتمکه صالح کبی کورونن بر  
شینده دوغرو دائمی بر حرکتدن عبارتدر . ایشته صرف انسانی  
اولان فعل وعملک شرائطنده دینک طلب ایتدیکی فقط ادراکک  
اثبات ایده مدیکی بو مافوق طبعینک طبیعی ایچنده موجودیتنی ،  
ایچنده اریبوب محو اولمدهن اتحادینی بولابیلیرز کبی کورونور .  
بوراده موضوع بحث اولان فعل وعمل عزم و اراده نک  
فعل وعملیدر . یا خود اصل ، اک اعلا بر فعل وعملدر .

يکي فعل وعمل فلسفه سـنه کوره انسان يالـکـز ضـمنـاً  
ايسته ديکي شئي صراحة ايسترسه يعنى کندی عزم واراده سنک  
طبيعي اوله رق تمايل ايتديکي غايه يني درک وتميز ايلرسه وبوغايه يني  
جداً ساحه فعله ايصال ايتک نيتنده بولونورسه کندی آرزوسنى  
تحقق ايتديرمک ايچون اللهه ، مافوق طبيعى به محتاج اولديغنى  
آ کلايه جقدر .

فعل وعمل نه در؟ برانسان ساده قوت صرف ايتک وخارجي  
شيلري بنمسه مکه چاليشمقله بوکا بر فعل وحرکتده بولونيور،  
بر انسان کي حرکت ايدييور دنيله بيليرمي؟ فعل وعمل ايچون  
بر غايه لازمدر . بو غايه موجود اولاييلمک ، حقيقي بر فعل  
وعمل ايجاب ايدم بيلمک ايچون طبيعتک کندی ميخانيکي  
قانونلريله کندی کنديلمکندن حصوله کتيرديکي شيدن باشقه  
دورلو برشي اولمق ايجاب ايدر. بر فعل وعملده بولونان کيمسه  
ايلري به ويوقاري به باقار. اوکا کوره قانونلر، شرائط معلومه نك  
بيلکيسي، طبيعتک ياپديغندن ده ايني ويکي برشي يابق ايچون  
برر آلدن عبارتدر.

حقيقتده ، انسان نه ايستر؟ اونک بوتون موجوديت معنويه  
و ذکائيه سنى حرکته کتيرن ايلک حمـله اراده نه در؟ حيات  
بشرک اک اصلي مسئله سى بو ايلک حمـله اراده نك تعيـنـتـنـده  
مندمجدر .

فعل وعملک غايه سى بر مقصدک ساحه حقيقتده ايصاليدر .

تام و مکمل بر فعلی و عمل ، قوتك آرزويه مساوی اوله رق  
نمایان اولماسی شفقنده تحقق ایدر. حالبوکه افعال بشریه نك ،  
صرف بشری افعالك : فعاالت علمیه ، تأثیر فردی ، تأثیر  
اجتماعی ، ساده جه تأثیر اخلاقی کبی مختلف شکلرینه باقم .  
بونلرک هیچ برنده قوت ایله اراده آراسنده ارادیغمز او مساوات  
یوقدر .

علم هر شیئك تعیین و ایجاب دائره سنده وقوعه کلسی اساسنی  
تضمن ایدر. بو آنجق او تعیین و ایجاب کیفیتنه حاکم اولان بر  
مفکره طرفندن حر بر صورتده وضع ایدلمش بر صورتده ذهنمه  
صیغابیلیر. بئلك، هیئت اجتماعیه، انسانیت، انسانه بر اراده سنك  
تمایلاتنه تقابل ایدمه بیله جك غایه لر عرض ایدر. فقط بو غایه لر  
حدودلرینی تجاوز آرزوسنه دوشمه دن ، بونلرک کندیسنی  
هر شیئه رغماً دها اوته طرفده برشی آرامغه سوق ایتدکلرینی  
کورمه دن تفکر و ملاحظه ایله تعقیب ایتمه سی احتمال خارجنده دره  
ایشته بو صورتله فعل و عمل انسانه کندیسنده بودنیانك شیرینه  
منتهی اولان بوتون اراده لرک فوقنده بر اراده اولیه بولوندیغنی  
اخبار ایدر.

بونك اوزرینه انسانك شعوری قارشیمسنده ایکی شق نمایان  
اولور . اکر یالکمز تجربه ایله معلوم اولان شیرلی ایسته مکله  
اکتفا ایدرسه اراده سی تطمین ایدلمه مش وعاجز بر حالد  
قاله جقدر . فقط اکر اراده سی اونی تطمین ایدمه بین اشیای

موجوده و حاضرہ دن آیرارق بوتون طبیعتی تجاوز ایتدیکی کبی  
اونک واراغنی ده تجاوز ایدن او غایه کجلی ارادهیه کوره تنظیم  
ایده جک اولورسه آرزو ایتدیکی غایهیه یعنی اختیار ایله قوتک  
موازنقنه واصل اولابیله جکینی ذهن تصور ایده بیلیر. دیدیکمز  
ایکی شق ایشته شودر: یا مقتدر اولامادن ایسته مک یا خود ،  
بر معناجه آرزو سندن فراغت ایده رک مقتدر اولمق . بو شقلر  
مفکرده انسانه نسبتله هم علوی هم انسانده داخل بر وجود  
فکری تولید ایدر. انسانده داخلدر، چونکه کنديسنک آرزوسی  
وایلك حرکتیدر. علویدر. چونکه معلوم دکلدر وادرا کنک  
اونی حبس ایتدیکی او برکتیف عالم ایچنده معلوم و موجود  
اولاماز. ایشته تام مافوق طبیعی بودر. افعال و اعمال بشریه نک  
ایسته دیکی حیات ، قدرت و وجود درکه افعال و اعمال بشریه  
بونلری کندی باشنه تحقق ایتدیرمکه غیر قادردر.

بو شقل ایکی حدندن برینی ترجیح ضروریدر و غیر قابل  
اجتنابدر. حقیقتده هر فعل و عمل بونی احاطه ایدر. مسئله نک  
حدلری معلوم اولدینی ایچون بو ترجیح و اختیار بر ایمان ،  
امید و عشق حرکتندن یعنی حیات دینه نک اعماقی تشکیل  
ایدن حرکتدن باشقه برشی اولاماز.

ایشته اصل احتیاج دینی بو صورتله فعالیت بشریه نک شرائط  
اساسیه سنه ارجاع ایدیلور. بو، احتماله که تحلیلك شعشعه و نفوذندن  
تجربید ایده بیله جکی ساده جه بر سوئرکتیف معلومدن عبارت

دکدر. فعل و عمل بشرینک شرطی اولمقله برابر عینی زمانده هر وقوفک ، هر شعورک ، بناءً علیه نهایت — وارلغه عطف و اسناد اتمه من و کندیلرینی برر شأیت دییه تصور ایله مه من اعتباریله — بوتون وقعه لرکده شرطیدر.

فقط دینلر یالکیز شعورک بو صمیمی اخبار و تبلیغندن عبارت دکدرلر. بر طاقم عقاید شکلی آلتنده نمایان اولورلر. بو عقاید مفکره به بر طاقم صریح و خصوصی اعتقادات موضوعلری عرض ایدر. بوندن ده بعض آیینلر ، عبادتلر حیقار. بو عقایدک مفشائی و معناسی نه در [۱]؟

اگر بونلر کلمه نك دولو و علمی معناسیله برر وقوف اولمق اوزره پیدش ملاحظه یه آلتیق ایجاب ایتسه ایدی عقل و بالخاصه علم و عصری تفکر قارشیسنده پایدار اولامازلردی .

بر عقیده صرف نظری معناده او یله بر قضیه در که کندیسنی غیر قابل اثبات اولمق اوزره عرض ایدر. حالبو که عقل نظری آنجق اثبات ایدلمش یا خود بر صورتله قابل اثبات اولان شیلری قبول ایلر . عقاید سلطه اصولیله اثبات اولونورلرمی دنیله جک ؟ عصری علم بویله سلطه اصولنی رد ایتمکده اولدیغنی اعلان ایتیمورمی؟

[۱] ادوار لورووا E. L. Roy : عقیده و تنقید Dogme et

critique اثرینه مراجعت .



بر عقیده ، ایکنجی درجه ده ، اوله بر قضیه در که اونک  
تبلیغ وافاده بی واضح و فرقلی بر مفهوم حاله قونوله ماز .  
شبه یوق که اسملری ، تعریفلری تعیین ، تقریر ، تثبیت ایدلمشدر .  
مفکرمه بونلرک بر وقوف اولماسی ذهاب و خولیاسنی و یرنده  
بودر . فقط شخصیت الهیه ، روح بشمرده هدایت ربانیه نک  
تأثیری تعبیرلریله نه آ کلادیغنی کیم حقیقه قابل ادراک تعبیرلرله  
ایضاح ایده بیلیر؟ الله کله سیله نه آ کلادیغنی سویلدیکی سوزلری  
بالدات آ کلامق شرطیله کیم افاده ایده بیلیر؟

Magst Priester oder weise fragen  
Und ihre Antwort schein mir Spott  
Ueber den Fragen zu sein

( کوته ، فاثوست : پاپاسلری ، حکمای استجواب ایده .  
بیلیرسک : ویره جکلری جواب مسائل ایله استهزا ایدر کچی  
اوله جقدر ) .

اگر عقایدی حرفیاً قبول ایتک لازم ایسه ، نیچون  
بداخته قارشی کوز قاپامالی؟ اونلر بومعناجه علم ایله قطعاً قابل  
تألیف دکلدرلر .

ایشته بوتون بو اسبابدن دولایی آرتق مسئله شو تعبیرلرله  
موضوع اولور : یا عقاید دوشوب اورته دن قالته جق یا خود  
اصل معنای نظریلرندن باشقه بر معناده آ کلاشلمالری ایجاب  
ایده جکدر .

عقاید همچون اساساً، تمامیه نظری اولمایان بر معنا آرامق  
 بك جرئتكارانه بر تشبث، غنغنوی نقطه نظره يكي بر نقطه  
 نظر اقامه سی کبی بر ایش می تشکیل ایده جکدر؟  
 بحث ایتدیكمز محرر لرله نظر آء عقایدك تحلیل لرندن وتاریخلرینك  
 تبعندن مستبان اولور كه عقاید كندیلرینی برر بیلگی وبالحاصه  
 برر مثبت وتام بیلگی اوله رق عرض ایتزلر. اونلرك معناسی  
 هرشیدن اول منفیدر.

« شخصیت الهیه » مفهومی ناصل اولورده مثبت، واضح  
 و آیری بر مفهوم دییه قبول اولونه بیلیر؟ بو ایکی کلمه نك یان یانه  
 کلمه سی مفکره یی بر مشکلات اوچورومنه آتار. بو عقیده نك  
 واضح صورتده افاده ایتدیکی نقطه اللهك برشی کبی، بزم حواس  
 واسطه سیله طانیدیغمز ماده مشابه بر ماده کبی تصور ایدیه -  
 میه جکندن عبارتدر. اسقولاستیکك شکلپرستلیکی ایچنده ایمانی  
 بك صیقیشوب قالمش اولان سن توماسك دیدیکی کبی، عقیده لر  
 الهی شیلری کندیلرینه اویمایان تعریفلری بر طرف ایتك  
 طریقله، منفی صورتده تعریف ایدر لر.

بو، عقائد نظرنده وجود یالکز عدمك بر ایفای وظیفه سی  
 کبی تصور ایدیلور دیمکیمیدر؟ بویله ایسه هیچ بر قیمت  
 حقیقه سی اولمایان مجرد بر ادعادن عبارت قالیر. لایبنیچ مغلق  
 وغیر قابل تعریف دیمك هیچ دیمك اولمادیغنی سویلردی.  
 هله بالحاصه اصل ولبری اعتباریه، بزم مفهوم لر مزك چرچوه لری

خارجنده قالان بر طاقم شیلر موضوع بحث اولدیغی زمان، بونلری واضح و فرقلی صورتده دوشونمه مکه برابر حقلرنده حقیقی و فعلی بر فکر من بولوندیغی مشروع بر صورتده قبول اولونه یلیر. بز حقیقته آنجق مغلق و مبهم صورتده آکلادیغمز بر طاقم مفهوم لرله یاش-ارز. بومفهوم لر هم فعل و عمل له هم تحریرات علمیه یه تقدم ایدر لر، اولری سوق و اداره ایلر لر. ذاتاً بوتحریرات علمیه او مفهوم لری فرقلی، آیری برز فکر حاله قویمق ایچون صرف ایدلمش بر سعیدن باشقه برشی دکدر.

عملی و اخلاقی بر نقطه نظر دن پیش ملاحظه یه آلنجه عقاید تکرار واضح و مثبت اولور لر. شخصیت الهیه نه در ؟ ادراکک نظر نده بونک نه اولدیغی سویه مکدن عاجزم. فقط شو توصیه اخلاقینک نه اولدیغی در حال آکلارم: الله ایله اولان مناسبت-کیزده بر شخص ایله اولان مناسبت-کیزده یاپدیغ-کیز کی حرکت ایدیگز.

بو عقیده هر شیدن اول عملی بر توصیه ایسه بو عقایدی علی العموم انسانلره عرض ایدن نظری شکل لک محقر اولمالری یاخود لاقیدانه تلقی ایدلملری ایجاب ایتمز.

بو شکلر ضروریدر: فعالیت بشریه دوشونجه دن آیری دکدر. حقیقی تفکر ده بر فعل و عمل دن آیریلاماز. عقیده یه محل اولان فعل و عمل بر « فعل دوشونجه » در، فکر ایله بر اشمش بر فعل و عمل در که — موضوعی ایله ادراک کز آراسنده کی

عدم تناسبدن دولای — بالضروره مبهم و مغلق اولمقله برابر  
فکری بر حدس مقدمه و طاسلاخی، دوشونمک ایچون برسائق،  
تلقیات ذهنیه ایچون بر منبعدر. بناءً علیه عقیده صرف عملی  
بر قضیه دکلدر، ایچنده نظری بر عنصرده وارددر. مفکره  
ایچنده شکل ظاهر، بالقوه موجوددر. ایشه بونک میدان  
وضوحه چیقارماسی وانکشاف ایتدیلمسی پک طبیعیدر.

هر دورلو صورت ذهنیه دن تجرید ایدیلن حدس محض،  
شعور ایچون غیر قابل ادراکدر، غیر قابل تبلیغدر. لسان،  
او نامتناهی تهراتی، علم او منظومه تمثالری، عالم خارجی،  
ترکب ایتدیکی او بر چوق مناسبترک انتخابی ایله انطباعاتی قید  
وهم جنسلیینه تبلیغ ایچون انسان طرفندن قبول واستعمال  
اولونان بر طاقم اشارتلدن عبارتدر. هردوشونجه افاده ایدلمکه  
میالدر، هر فعالیت بر طاقم شکلدر ایجاد ایتکه ساعیدر.

ایشته بو صورتله عقیده لرك کندیلرندن اونلری شعور  
قارشیسنده تثبیته صالح بر طاقم شکلدر دوغار. انسان بوسایده  
هم جنسلیله عقاید حقنده بحثلر یوروتوبیلیر.

وقوفک قانون اُصلیسینه کوره، بو شکلدر بر رآلتی اولدقلری  
قابلیت ادراک و قابلیت تبلیغی ساحه فعله ایصال ایده بیلیمک ایچون  
کندیلرینی اخذ و تلقی ایدن مفکره لرده الیوم موجود اولان  
مقولانه توافق ایدرلر. مفکره ده بدن کیدر. اونک ایچون غذا  
اوله بیله جک جوهر لر آنجق کندیسنک جوهری اولابیله جک شیلدردر.

بونك ايجوندر كه عقايدك قابل تخيل وقابل ادراك اولق  
 ايجون صارندقلرى نظريات تصويريده هر دورده حكمت بشريه نك  
 حالات متعاقبه سنى تمثيل وارائه ايدن بر طاقم علمى وفلسفى فكلر لر  
 كورولور. انسانى ذكاسنك اك كوزل ثمراتى اللهك خدمته  
 تخصيص ايتديكندن دولايى مؤاخذه ناصل قابل اولور؟  
 مع مافيه، عقايدك تاريخى انسانه دائما اخطار ايدر كه اللهك  
 اوامرى اساساً هپ عمليدر. بونلك احتوا ايتدكلرى معنا  
 انسانلك ويرمكه تشبث ايده جكلرى ايضاحاتك دائما فوقنده  
 قالير. اصل ولى اعتباريله بر هيئت اجتماعيه معلومه داخلنده كى  
 قابليت ادراك ايله متناسب اولان سعى ذكائى، عقايد دينيه موضوع  
 بحث اولدينى زمان، آنجق تمثاللر، دائما مفيد، دائما قابل تكمل  
 وموقت بر لسان عرض وتأمين ايده بيلير.

\*

\*\*

ايشته بوصورتله زمانمزمده، هرايكيسى ده فعل وعمل بشرينك  
 شرائطى اوزرينه مؤسس بر فلسفه علم ايله بر فلسفه دين ،  
 متفقاً دكل فقط بر برلرينه موازى اوله رق ، تشكىل ايتمشدر.  
 بو ايكي فلسفه بر برلريله مقايسه ومواجهه ايديله جك اولورسه  
 هرايكيسنك ده فلسفه فعل وعمل نامى آلتنده برلشديريله بيله جك  
 درجه ده بر برلرينه اويغون اولدقلرى كورولور.

هرايكى طرفده ده حيات فكلرى اصلى واساسى برشى اوله رق  
 قبول ايدلمشدر. هرايكى طرفده ده حيات كندى كنديسى

آکلایه رق ادراکک ترکیب ایتدیکی بر طاقق تمثاللرله کندیسنی  
افاده ایدر. بو تمثاللرهم ثابت هم متحول برر اشکالدر، طبیعتده  
تکاملک مرحله لرینی کوسـترن موقتاً ثابت نمونه لره بکزرلر.  
هرایکینسک ده ساحه فعله ایصال ایتک ایسته دیکی غایه او  
خصوصی وعلوی حالنده حیات بشردر. فلسفه فعل و عمل  
مشترک بر کو تو کدزکه دین ایله علم بوندن تشعب ایدرله. کرک  
بر برلندن فرقلری کرک بر برلیله مناسبتلری ایسته بوصورتله  
ایضاح ایدلمش اولور. چونکه اصل فعالیت بشریه نک ایکی شکل  
اساسیسی واردر: فعالیت ذکائییه، فعالیت ارادیه. علم برنجی  
شکل فعالیتک ترهر وانکشافندن عبارتدر. دین ده ایکنجی شکل  
فعالیتک تام بر صورتده تحقیقیدر. علمک موضوعی اولان  
دنیا و دینک موضوعی اولان الله نه قدر اولچولمه سی غیر قابل  
درجه ده بویوک اولورلرسه اولسونلر، بونلر انسانده برلشیرلر.  
انسانک طبیعتی او وحدتی ایچنده هر ایکینسنده اشتراک ایدر.  
بو فلسفه منتسبلرینک فکررنجه علم ایله دینک مناسبتنی  
ذکاجی سیسته ملرک قادر اولامادیغی درجه ده باطنی و روحی  
بر صورتده بوفلسفه ایله ایضاح قابلدر.  
علم انسانه خارجی افعال و اعمال چاره لرینی تدارک ایدر.  
انسان علم سایه سننده عزم واراده سنی عالم مادی یه کیتدجکه  
دها زیاده قبول ایتدیره بیلله جک بر صورتده حرکت حالنده نحلی  
ایتدیره بیلیر.



فقط بویله بر قدرت ایله مجهز اولان فعالیت بشریه نك  
 كندی اساس و غایه سی حقنده بر طاقم سؤاللر ایراد ایتمی و بونلره  
 جواب آراماسی طبیعیدر . ایشته بوسؤاللر ایراد ایتمكه كندیسنه  
 ساحه دینی كشاد ایدر . دین فعالیت بشریه یه كندیسنه لایق  
 بر غایه تعیین ایدن و بو غایه یی فعلی و مؤثر بر صورتده ایسته یه بیلمك  
 ایچون ایجاب ایدن او قدرت صمیمیه یی اوکا ویرن بر حکمت  
 علویه در .

مفكره ، علم و دین فكر لرینی انكشاف ایتدیردكه عادتاً  
 بر لر یله تلاقی یه دوغرو یورودكلرینی كورور .

علمك صوك سوزی طبیعی ، انسانك تحت استفاده سنه  
 وضع ایدن بر طاقم قابل ادراك تمثالره تنزیل وارجاع ایتمكدردر .  
 كائناتی افاده ایدن بوشیلر نه قدر یوكسك اولورلر سه اولسونلر  
 اونلری انسان تصور ایتمكدردر . اونلر انسانك كندیسندن عبارت  
 دكلدرلر . انسان دوشونه جك اولور سه اونلرك كندیسی ایچون  
 نه قیمتی حائز اولدقلرینی ، كندیسنی اونلرك ایچنده بوغمو می  
 یوقسه اونلری قوللانمق می ایجاب ایتدیكنی آراشدیریر . حیاتك  
 جسامتنی و بالخاصه حیات دینی و معنویه نك حشمتنی پك جانلی  
 بر صورتده آكلایان انسان و بالخاصه عصری انسان ذكاسنی ینه  
 كندی ذكاسنك قابلیت و هنر یترینی تدقیق ایچون استعمال ایلر .  
 ذكانك علمده تجلی ایتدیكى وجه ایله كندی كندیسنه و اونك  
 وجدان انسانیسنه کافی كلوب كمدیكنی عقلك صوك اعماقنی

تشکیل ایدن او کیزلی حس حقیقت نامنه صورت و شدیرر . بو مسئله بی وضع ایتک بیله دینک امکاتی تصور ایتک دیمکدر . دیگر طرفدن ، دین ده انسانک الله ایله هم سعی اولماسنی ایستر . بناءً علیه ملکات بشریه بی استخفاف ایتز . مفکره بشردن ، لسانی ، مالک اولدینی اشارات و اشکالک هیئت مجموعه سنی حد ذاتنده لسان ایله غیر قابل افاده اولان شیئک ممکن اولدینی قدر درین ، صادق و مؤثر بر صورتده افاده سنه حصرو تطبیق ایتسنی بکدر . هپسی بو قدرله قالماز : دینک یکانه غایه سی فرد لرده قابلی و منزوی بر حیات حاصل ایتک اولمادینی آشکاردر . اه دنیادن خارجه چکیلمش دکادر . تأثیرینی دنیانک ایچنده کوستیرر . بناءً علیه دین انساندن او کادرت مادیه بی ویرن علم واسطه سیله اللهمک حکومتک میدان فعله کله سنه چالیشمنی بکدر .

بو صورتله آکلاشیلیرسه دین ایله علمک مناسبتی ، مشغول اولدیغمز متفکر لرجه ، ظاهر آ بر لرینه ضد کوروندکلری حالده هر ایکسی ده لازم اولان ایکی شرطی یعنی وحدت اصلیه واستقلال متقابلی توحید ایدر .

دین ایله علمک وحدتنی یاپان شی بشرک فعل و عملیدر . هر ایکسی ده بو فعالیتدن نبعان ایدر لر . فعالیت بشریه بوتون شمولیه ساحه فعله چیقاییلمک و سائنطی اونلرده بولور .

استقلال لرینی تأمین ایدن شی ، همزمان اوله رق مختلف انکشاف لره امکان ویره بیلیمک یولنده حیاطده مندمج اولان بر خاصه

عمومیه در . اگر بوانکشاف فلر یالکز کندیلرینی ارائه ایدن  
مفهوملرله تقدیر ایدیلرله ایدی بربرلرله غیر قابل تألیف عد  
اولونه بیلیرلردی . قلب بشردہ تحلیلک بولدینی تضادلر تحلیل  
نظرندہ غیر قابل ایضاح کی کورونور . فقط بونلرک تضاد اولوشلری  
برمنطقجینک ایشہ مجرد بر نقطہ نظر دن باقاسندن نشئت ایدر .  
حقیقتدہ بونلر حیاتک مختلف تظاہراتیدر . حیات حریتپروردہ ،  
موجود اولابیلن ہر شیئی پایدار بولوندر مغہ میالدر . حتی حیات  
عینی زماندہ ایکی منہالری ، بزم بربرلرینہ ضد دیدیکمز شیلری  
برلکدہ موجود بولوندر مقدن خوشلانیر کی کورونور .

علم ایلہ دین حیات بشریہ نک ایکی آنیدر . بریسی بو حیاتک  
عالم خارجیہ دوغرو انبساط وانکشافیدر . دیکری دہ بالعکس  
کندی اساسنہ ، ہر حیاتک اساسنہ دوغرو توجہ ایدہ رک کندی  
کندیسنک نامتناہی صورتدہ فوقہ چیقمق ایچون اورادن قوت  
آلان عینی حیاتدر . بو ایکی انکشاف آراسندہ کی فرق اوصورتدہ در کہ  
ہیچ بروجلہ بری دیکرینہ مانع اولاماز . ہر ایکسی ، عملی  
بر صورتدہ بر برلرندن مستقل ومختار اولہ رق تصور ایدیلہ بیلیرلر .  
واقعا ، علم ایلہ دین مشترک بر زمین اوزرندہ بر برلرلہ  
قارشیلایشیرلر . بودہ طبعی وقعہ لرہ تعلق ایدن مفہوملر وشکلر  
ساحہ سیدر . فقط فلسفہ فعل وعملہ کورہ بومفہوملر نہ دین  
نہ دہ علم ایچون حقیقتک تام برر افادہ لری دکدرلر . بر برندن  
آزچوق فزقلی ایکی منظومہ تمثالک موجود اولماسی ، مفکرہ بشر

ایچون بویوک بر غرابت تشکیل ایتمز . حتی ساحه علمده بیله  
بونلری بر درجهیه قدر قبول ایدر . دینک تمثاللرینک علم تمثاللریله  
اتلافنک تحریسی ، اسکی زمانلرده اولدیفی کبی ، بو کونده  
یا پیلا بیلیر و دینک هیچ بر فدا کارلغه قاتلانماسی ایجاب ایتمز .  
ناصل که الده کی ترجمه لر آکلاشلماز بر حاله کلدیکی زمان اسکی  
بر محررک تفکراتی بزه یکی لسانه ترجمه ایدلمش بر حالده منظور  
اولق ایچون تعدیله هیچ احتیاجلری یوقدر .

### بعض مطالعات تنقیدکارانه

فلسفه فعل و عمل غایت شایان دقت بر تشبث دارد. بو، شعورده،  
 بزه بلا واسطه معلوم اولان وجودده ذکادن دها درین، ذکات  
 پایدار بر اقدینی تضاد لری ازاله یه و بوضورتله روحک مختلف  
 قدر تدرینک وحدت اصلیه سی ایله حر و تام انکشاف لری نی تألیفه  
 قابلیتلی بر پرنسپ بولمق ایچون بر غیر تدره. هنوز یکی اولان بو  
 فلسفه، بویوک قلاسیک مسد کلرک کولکه سنده فیلز لنمش اولمقله  
 برابر احتمالکه دها بویوک ترقیلره نائل اوله جقدره. و احتمالکه  
 درین، منکشف و عالیجنابانه حیاته حریص اولدقلری قدر  
 ذکایه ده مفتون اولان مفکره لری کیتدجه دها ایی تطمین  
 ایده جکدره. فقط شیمدیکی شکلی آلتنده قارشیلشدینی مشکلاتی  
 آنجق ناتمام بر صورتده حل ایدر.

ابتدا، علم ایله دین آراسنده تأسیس ایتدیکی ائتلاف  
 یکنظرده کوروندیکی قدر حقیقی و واضعاً معین میدر؟  
 دنیلور که فعالیت هرایکی سنکده مشترک کوکیدر. فقط  
 هانکی فعالیتدن بحث اولونیور؟

چیلاق و غیر معین بر فعالیت می؟ احوالده بر چوق سؤالر  
 وارد اولیور: غیر معین بر فعالیت قیمتی نه در؟ بویله بر فعالیت  
 ساده جه بر قدرت تحولدن حتی غایه سز بر طاقم حر کتله حصوله  
 کترین میخانیکی قوتلردن نه جهته ده فرقلیدر؟ بر حر کتک

شعور ایله مترافق اولماسی کیفیتی بوکا علم ایله برلکده دینی  
تأسیس ایده بیلیمکه قادر بر یوکسک قیمت ویرمکه کافی دکلدر.  
اگر بو فعالیتیه قارشی شعور مطاوعتکارانه براحتساشدن ، او  
فعالیتیه ساده جه منضم اولان ایکینجی بر حادثه دن عبارت ایسه  
فعالیت ایله برلکده موجود اولماسنک آنجق لفظی برقیعتی اولور.  
واقعا بومشکلاتدن قور تولق یولی بولونیور. اساس اوله رق  
غیرمعین بر فعالیت دکل علی حاله انسانک فعالیتی یعنی انسانک  
انسان اولق ایچون ، انسانلق صنعتنی تا نهایتنه قدر ایفا ایتک  
ایچون اجرایه مجبور اولدینی معین فعالیت آلنیور. فقط اوزمان  
برمحذوردن اجتناب ایدرکن باشقه بر محذوره تصادف ایدلمش  
اولیور .

دنیلنیورکه فعالیت بشریه نك ایکی تعینی ، ایکی استقامتی واردر:  
بر طرفدن ذکا ، دیگر طرفدن اراده در. ذکا صفتیه انکشاف  
ایده رك علمی تولید ایدر. اراده صفتیه ساحه فعله حقیقه رق  
دینه دوضرو میل ایلر . دین ایله علمک مناسبتی بوصورتله  
ذکا ایله اراده نك مناسبتنه ارجاع اولونور. فقط بونکله مشکلاتک  
آنجق موقعی تبدیل ایدلمش اولور. چونکه ذکا ایله اراده نك  
مناسبتلری مسئله سی ، — هریکیسی ده حاضر برر خواص کبی  
دکل ده مفکره نك حقیقی برر فعالیتی اولقی اوزره تلقی ایدیلاسه بیله —  
مظلم و مختلف صورتلره قابل حل برحالده در، مسئله یی مفهومیملر  
دائرة سندن فعل و عمل دائرة سنه نقل ایتیمکه اقتحام ایدلمش



ظن اولونان ايکيلک بوتون مشکلاتيله تکرار نمايان اولابيلير.  
فلسفه فعل و عملک دين ايله علمی طرز تألیفی ناصل  
اولورسه اولسون، بوراسی دوشونولمیه رک بو فلسفه نك دها  
شیمدین کرک دين کرک علم حقنده آری آری دوشرو بر  
نظریه میدان قویدینی ادعا اولونه بیلیرمی؟

فلسفه فعل و عمل نه قدر چوق ماهرانه محاکمه لی تحلیللر  
یاپارسه یاپسون، علمک یالکز حادثاتی دائره شموللرینه آلان  
بوتون اولچولری، بوتون مفهومملری اعمال ایتکله قالمایه رق  
حادثاتک کندیلرینی ده یاپدیغنه ارباب علمی پک کوچکله اقناع  
ایده بیلیر. بوتون بیلکیلر مزک بهمه حال نسبی اولدقلرینی ونسبی  
قالاجقلرینی اثبات ایدن علم بوتون عملیات علمیه ده انسانیک  
مداخله محتمله سنی بالذات برچوق دلیلله تأیید ایدر. فقط  
بو اثبات صوک حده واردیر یله رق بالذات وقعه نك بر اختراع  
بشردن عبارت اولدینی ادعا ایدیه جک اولورسه اوزمان اعتراض  
ایدر. وقعه بزم اولچو ایچون قوللانديغمز واحد قیاسیلرک  
هیچ بریله اولچوله مدیکی وحد ذاتنده بر طرز مخصوص ايله  
وار اولدینی ایچوندرکه اونی تعیین مقصدیله او قدر غیرت صرف  
ایدیورز. استحصال ایتدی کمز نتیجه لرده آنجق بر طاقم تقریری  
شیلردن، ناتمام وموقت وقوفلردن عبارت بولونیور.

دیگر طرفدن، مفکره نك علمی تمثاللر ایجاد ایتک ایچون  
صرف ایتدیکی سعیه کلنجه ارباب علم بوراده ساده جه بر طاقم

موضوعاتی افاده اتمه به منتهی اولان بر طاقم کینی عملیه لر موضوع بحث اولماسنی قبول ایده مز لر . بو عملیه لر ی بعض اساسات ذکائیّه تنظیم ایدر . بونلر بزم اشیا حقنده کی وقوفزّه قابلیت ادراک ادخاله ساعیدر لر ، بونلر بزم کندی کندیمزه تعیین ایتدیکمز بر غایه کماله تقابل ایدر لر . حاصلی بو عملیه لر عقل ، معنای وجود ، انتظام و آهنگ دیدیکمز شیئی تضمن ایلر لر .

بونک ایچوندر که علمی پراغماتیزم انکشاف ایدر کن ایلک موضع لرینی محافظه ده مشکلات چکر ، علم حقنده کی قلاسیک نظریه نک اساسنی تشکیل ایدن وجود و عقل حکملرینه آز چوق عودت ایلر .

فقط ، دنیله بیلیر که ، بالذات او بر قتیف وارلغک ده صرف بر فعل و عملدن ، سیال و اساساً غیر ثابت بر تمادیدن عبارت اولمادیغی نهدن معلومدر ؟

متأخرینک تکاملجی عالمی بویله بر حقیقت ایله قارشیلانمغه حاضر در . بونی تحت انضباطه آلمق ایچون وجود ، وقعه و او بر قتیفلک فیکرندن وازچکمییه جکدر . یالکمز ، دوامک هر آننده اشیانک موجود حالتی قید ایده جک ، صوکره بو مختلف حالاتی بر طاقم قوانینه توفیقاً بر لرلرینه ربط ایلهیه جکدر . شبهه سز که نهایتده یکانه محک حقیقت تجربی موفقیتدن عبارتدر . فقط ارباب علم بوندن دولایی استمبالک قسماً تعیین وایجاب ایدلمه مش اولدیغنه و کندیلرینک تلقیاتی محق کوسه تر دجک

وقعه بی بالذات خلق و ایجاد ایدیه بیهل جکله رینه حکم ایتزلزلر. حادثه نك  
 حصوله کله بی ایچون لازم اولان اولیات آراسنده ایمان ده  
 بولونمق اقتضا ایدن یرلرده بیهل استقبالك ایجاب و تعیین نتیجه سنده  
 وقوعه کلدیکنه دائر اولان نقطه نظر لرینی محافظه ایدرلر. چونکه  
 بو ایمانی ده برطاقم قوانینه تبعاً حصوله کلیر دییه تلقی ایتمکده دره.  
 دیمک که علم کندی شرائطی و فعالیتنی دهها ای تقدیر  
 ایتدکجه جذری پراغماتیزمه و فعل و عملی ذکادن اوله قویان  
 فلسفه یه منتهی اولمق شویله دورسون بالعکس اونلردن اوزاقلاشیر.

عجبا فلسفه فعل و عملک انکشاف ایتدیردیکی دین کندی  
 خصوصیتی محافظه ایتمش برحاله قالیورمی؟

اساس اوله رق دنیلور که ادرا که توجیه خطاب ایدن هرشی  
 دینک کندیسی اولمایوب بر افاده سی، بر تمثالی، بر ظرفیدره.  
 بو اعتبار ایله دینک ساحه سی صرف تطبیقات و حیات اولمق  
 اقتضا ایدر.

فقط حقیقه تنده هر حس، هر دینی فعل و عمل برطاقم فکرلر،  
 مفهومئر و نظری بیلکیلر احتوا ایدر. دینلرک بزجه معلوم  
 اولان شکللرندن بوتون ذکائی عنصر چیقاریله جق اولورسه  
 عجبا کری یه نه قاله جقدر؟

مع مافیه بو اعتراضه اهمیت ویرلمیور. مفکره نك ایچنده  
 مفهومندن آیری بر اساسک موجودیتی دیوژنک حرکتی اثبات  
 ایتسی کبی، وقوعه و فعل ایله اثبات اولونیور. انسان بر فعل

وحر کتده بولونیور، فعل وحر کت ایسه بر مفهومه غیر قابل ارجاعدر.

فقط بو فعل و عمل نه در؟ چونکه بونده دینک تملی کوره بیلمه من ایچون حقنده بر پارچه بر فکر من اولمق ایجاب ایدر. نافذ نظری فیلسوفلر بونک بوتون دلالتیه فعل و عمل بشری اولدییغنی سویلیورلر. فلان یا خود فلان ملکه نك خصوصی بر فعل و عملی دکلدر. غایه سنه متوجه اولمق ایچون بوتون قدر تلیخی برلشدیرن بوتون موجودیتدر. تام کندی کندیغیزی بولمق ایچون بوصورتله یا شامغه باشلا دیغمز حقیقتلر ادراک طرفندن مشاهده و تنظیم اولونارق بزم ایچون بر طاقم عقاید و موضوع اعتقاد حاله کچرلر.

شبهه یوق که مقدراتنک وقوعه کلمسی تأمینه چالیشمق ایچون مالک اولدیغی بوتون قوتلری بو صورتله جمع و ترتیب ایتک انسانک وظیفه سیدر. فقط بو عمومی فعل و عملده ذکاده دیگر ملکه لر قدر علاقه دارد. اونک رولی بالضروره، مفهومی ملری واسطه سیله دیگر ملکه لرک تأثیرینی قونترول ایتمکدن عبارت اوله جقدز. آرتق بوراده تطبیقات نظریاتدن مستقل کبی موضوع بحث اوله ماز.

عجبا بحث ایدیلن فعل و عمل عزم و اراده یه مخصوص اولان فعل و علمدر؟ فقط اراده برغایه ایستر. کندی کندیغینی بر غایه اولمق اوزره قبول ایدن و کندی اساسندن باشقه موضوعی

اولمیان براراده دن بحث اولوندیغی وقت مفکره یه قابل ادراک  
بردستور عرض ایدلمش اولدیغی ادعا ایدیه بیلیرمی ؟

بوماهرانه نظریه لر آراسنده آرادقلوی شی کندی کنیدیسه  
کافی کلن، کنیدیسنی ایضاح ایتک ویا محق کوسترمک ایچون  
تجربه واستعمال ایده بیله جگمز بوتون مفهوم لردن مستقل بولونان  
برفعل و عملدر، برفعل صرفدر، حد ذاتنده برفعل و عملدر .

حالبوکه بواستر ایسته مز غیر معین بر پراغماتیزمه عودت  
دکلده نهدر ؟ بر قاعده علویه اوله رق قبول اولونان شی حد  
ذاتنده پیش ملاحظه آلن ان فعل و عمل بشری ایسه انسانی  
بر پراغماتیزم مسلکی تأسیس ایدلمش اولور . اکر ذکاک هر دورلو  
تعیین وایجابی خارچنده تصور اولونان برفعل و عمل الهی، بشری  
فعل و عملک اعماقنی تشکیل ایده جک ایسه اوزمان الهی بر  
پراغماتیزم مسلکی تأسیس ایدلمش دیمکدر .

فعل و عمل ایچون فعل و عمل واسطه سیله فعل و عمل،  
صرف تطبیقات و عملیات ؛ احتمالکه بو برطاقم مفهوم لردن تولید  
ایدیور، فقط مفهوم لردن مستقل قالیور . بویه مجرد پراغماتیزم  
دین نامه کسب لیاقت ایده بیلیرمی ؟ نظریه دن تجرید ایدلمش  
تطبیقات و عملیاتده حیات دینه نک حقیقی اصل ولبنی ویکانه  
پرنسپنی آرامقله چیقماز بر یوله کیرلمش اولمایورمی ؟

برفعل و عملی دینی برحاله کتیرن شی اوکا مربوط بر اعتقاد  
دکیدر ؟ برتمثال و بر ظرف عد ایدیلن شی بر درجه یه قدر  
دینک بر قسم اصلیمی دکیدر ؟

## دردنجهی باب

### ویلیام جهیمس و تجربه دینه

۱ — دین حقنده ویلیام جهیمسک مسلکی — ویلیام جهیمسک نقطه نظری : دینک شخصی و باطنی بر حیات اولماسی — اصول : جذری تجربه جیلک — حسیات دینه نک یتیشدیکی روحی و عضوی زمین. صوفیه مسلکی . اصل تجربه دینه ؛ اعتقاد ابتدائی — تجربه دینه نک قیمتی . پراگماتیزم نقطه نظری . علمی نقطه استناد اولق اوزره تحتانی انا نظریه سی . مافوق اعتقادات .

۲ — دین ایله علمک مناسبتی حقنده ویلیام جهیمسک مسلکی — علم ایله دین طبیعتک خزینه لرینی آچن ایچون ایکی آناختاردر — ساحه شعورك پسیقولوژیسی حالات شعورك پسیقولوژیسی برینه اقامه ایدیلیور. — دین ایله علم ، مشخص ایله مجردک بر برلندن فرقلی اولماسی کبیدر .

۳ — مطالعات تنقیدیه — دینک طبیعت بشریه دخولی و علم قارشیدینده کی قوتلی وضعیتی — مشکلات : تجربه دینه ده اویشتیف بر قیمت وارمیدر؟ عمومی بر سویشکتیف جیلک بر چاره حل اولماز. — هر تجربه نک عنصر اساسیسی اولق اوزره ایمان — تمثالک وظیفه اصلیه سی — دینک اجتماعی جهتدن قیمتی .

علم الهیات منتسبلری ، عالمر یا خود فیلسوفلر کی تعریفلره ، محاکمه لره ، اثباتلره حریص اولان بر طاقم مفکره لر دینک ، علمک و اشتلافلرینک امکان منطقیسی تأسیس ایچون بر چوق مساعی صرف ایدرلرکن هر زمان بعض ذوات ظهور ایتمشدرکه



اونلرک نظر نده بو قدر اینجه تحریات پک زائد ایدی . چونکه  
 قیمت اعتباریه بوتون محاکمه تقدم ایدن بر پرئسپ یعنی تجربه  
 اوزرینه مؤسس بر قناعت ایله یاشایولردی . بونلر صوفیه دن  
 دنیلن روحلردر . عالملر ایچون قانونلرینی تحری ایتدکلری  
 وقعهلر ناصل وار، معلوم وهیچ واسطهیه محتاج اولمادن محقق  
 ایسه لر اونلرک نظر نده دینک موضوعاتی عینی ماهیتده در.  
 بو صوفیه اصولنک روحی طریقت اندیشه لرندن آزاده  
 فقط هرشیدن اول ذی حیات حقیقتدن ملهم اولغه خواهشکر  
 بعض معاصر مذهلر دهده کورولور . بو تمایلک اک کوزل تظاهری  
 عالم بر پسسیقولوژی متخصصی ، درین و نازک بر متفکر ،  
 جاذب بر محرر اولان ویلیام جیمس Willam James ک  
 ایضاح ایتدیکی طرزده تجربه دینه مسلکیدر . [۱]

The varieties of religious experience ; [۱]

The will to believe

دین حقنده ویلیام جه یمسک مسلکی

دینلرده اساسلی و تمیز اوصافی آکلامق ایچون هسانکی نقطه نظری ترجیح ایتلی ؟ ویلیام جه یمسه نظر آ دینلرک بری خارجی دیکری باطنی اولمق اوزره منظور اولدقلری ایکی صفحه دن اساسایی باطنی اولان صفحه در . تاریخ اعتباریه دینلرک شخصی بر حیات کی انکشاف ایتمه دن اول بر طاقم مؤسسات کی نمایان اولمش اولمالرینک اهمیتی یوقدر . اساساً مؤسسهلرک سببی دینی دهالرک ایجادلریدر . هر حالده شخصی دین جریان ادوار آراسنده ، مؤسساتی آرقه ده بر اقمشدر . آرتق مؤسسهلر آنجق مؤمنلرک وصوفیلرک روحلری طرفدن تأیید ایدیلرلرسه بردوام اولاجقلردر .

ویلیام جه یمسک حادثات دینییه منحصراً پسیقولوژی نقطه نظرندن تدقیق و تتبع ایتمی کندیسینک یالکز پسیقولوژی متخصصی اولماسندن دکل شخصی دینده دینک تمللارینی کوزمسندن ایلری کلیر .

استعمال ایتدیکی اصول اونک فکر نهجه اصل پسیقولوژییه موافق کلن وجذری عملیه جیلک empirisme radical تسمیه ایدیلن اصولدر . علی العاده ، بر مسلکی ارائه ایچون قوللانیلان بوکله مسلکی قبول ایتمینلرجه بیله بر اصولی توصیف و تمیز ایچون محافظه واستعمال ایدیله بیلیر . بر خیلی مدت پسیقولوژییه

ذره فرضیه سی قبول ایتدیریلهرک شعورک ویردیکی معلومات بسیط بر طاقم وقعه لر یاخود روحی ذره لر عد اولوندی و بونلر آراسنده قوانین حکمیه نك تضمن ایتدیکی ارتباطلره مشابه ارتباطلر تأسیس ایدیلدی . حالبوکه بویله عناصرک موجودیتی نه معلومدر نه معلوم اولابیلیر . بونلر مسلك فیکریله یاپیلمش بر طاقم ایجادلردر . پس یقولوژیده معلوم وموجود اولان شی دائما بر ساحه شعوردرکه متحول وفیصلسز بر کثرت وتنوعی احاطه ایدر . یالکز بو بر شکل حقیقیدر . حادثات دینییهی ایشته بو شکل آلتنده آکلامق لازمدر .

اول امرده او حادثات دینییه نك داخل اوله قلی روحی وعضوی هیئت مجموعه یی نظر ملاحظه آلمق، صوکره، یقیندن یقینه یورویره رک بعضاً بر لکده وقوعه کان بعضاً کله یی حادثه لردن وکندیلمینه یقین سائر جنس حادثه لردن آیرمق وبو صورتله اصل عنصر دینیک نه اولدیغنی تعینده قدر ایلریله مک اقتضایلر . بو وظیفه اکمال ایدلدکن صوکره باشقه بری ده ا میدان چیتاچقدردر . اوده تحلیل واسطه سیله بو صورتله میدان چیتاقریلان وقعه نك قیمتی تعین کیفیتدر .

# ۱ — تجربه دینییه نك طبیعت وماهیتی

دینی وقعه لر یالکز کندیلمینه مخصوص بر جنس کبی کوروندی وبر خیلی مدت بویله تلقی اولوندی . حالبوکه بویله

باشته شیلره هیچ بکیزه مین وقعه لر بر طاقم شبه لی وقعه لر در .  
چونکه سطحی بر تدقیق و مشاهده نتیجه سنده غیر قابل اقتحام  
بر فیصله حکم ایدیلن یرلرده وقوفک ترقیسی بزه عمومیتله  
بر تمادی موجود اولدیغنی فرق ایتدیر مشدر . حادثات دینه ده  
بو تمادی قانوننه بر استثنا تشکیل ایتزلر . حادثات دینه کیتدجه  
دها ای تعیین ایدیه بیلن بر صنف حادثاته ، شخصیتک تعدیلی  
حادثاته عائددر لر .

بو حادثه کندیلرنده بک زیاده شدله وقوعه کلن اشخاصک ،  
یعنی بعض عصبی کیمسه لرك یا خود صوفیه یه میال مزاج صاحب لرنک  
تدقیق و تتبعی شعور دینک انکشاف ابتدیی زمینی تشکیل  
ایدن اوصافی عمومیتله طبیعت بشریه عائد کبی کوسترمکده در .  
فرضا ضلالت حس حادثاتی بعض کیمسه لرده بک شایان  
دقت بر حال عرض ایدر . بو ضلالت حس حادثه لری او کیمسه لرك  
مخیله سنده حواس مزک بزه کوستردیکی مادی شیلره مشابه بر  
شینک نمایان اولماسنه منتهی اوله جق وجهله تمامیه انکشاف  
ایده جک یرده اوله بر مرحله ده توقف ایدر لر که انسان ، کوزینه  
معین بر خیال کور و نمه دن ، بر شینک حاضر و وار اولدیغنی  
حس ایدر . ایشه بو ، چپلاق حضور ایمانی تولید ایلر . بو ایمان ده  
بر طاقم افعال و حرکاته بادی اولور . قانتک اخلاقی آمر لری  
imératifs moraux کبی هیچ بر وجهله محسوس بر صورت  
ذهنیه و نظری بر وقوفه موضوع تشکیل ایتدکاری حالد

روحده عملی و مؤثر بر ایمان حصوله کثیر بر لر .

ایشته صوفیه دن بعضیلری تصوفده بوکا بکنزر بر طاقم  
حالات تجربه ایدر لر . وجود لاهوتی اولمق اوزره تصور ایتدکلری  
فقط ذهنلرنده هیچ بر صورتله تمثیل وارانئه ایده مدکلری بر شی  
اونلره بر شأنیت اولمق اوزره معلوم اولمشدر . بو شی اونلرک  
قلبلری و اراده لری اوزرنده اجرای تأثیر ایدر . اوشیئ هر دورلو  
خیال محسوسدن معرا بر شأنیت صرفه کبی تصور ایتدکلری  
ایچون کندیلرنده بو شأنیتک و بوتأثیرک حسی پک قوتله موجوددر .  
حواس طرفندن بیلدیرلمش بر شیئک غیابنده بو حضور  
و موجودیت حسی عقلجیلر طرفندن هیچ بر وقت مناسب  
بر وجهله ایضاح ایدلمه مش اولدیغنی ویلیام جهیمس سویلیور .  
بونی حس ایدن کیمسه یه اونک بر ذهاب و خولیادن عبارت  
اولدیغنی اثبات ایچون نه قدر اسباب سرد ایدیلیرسه ایدیلیر  
او یینه باقیدر . طبقی حواس ایله معلوم اولان شیئرک وجودینه  
اینانه یه بکنزر . حالبوکه مرضی حالاتک طبیعی حیات حادثاتندن  
قرقی ، کور و امیورکه ، بر درجه فرقندن عبارتدر . بناء علیه انسانک  
حواس معتاده سنده موجود اولان حسدن باشقه برده شأنیت  
حسنه مالک اولدیغنی قبول ایتک لازم کلیر .

شعور دینی یه کیمه نک باشقه بر یولی ده طبیعی بر نیکی نلک  
و بدبیلکدرکه بونک شایان دقت بر انکشافنه بعض عصی  
خسته لرده پک بارز بر صورتده تصادف ایدلمکده در .

انسانلر ایکی طاقه تفریق اولونابیلیر . بر قسمی مسعود اولق ایچون یالکیز بر کره دوغمه یه محتاجدرلر . بر قسمی ده بدبخت دوغمش اولدینی ایچون یکی بر تولده محتاجدرلر : once born بر کره دوغشق و twice born ایکنجی کره دوغشق وصفلری .

برنجیلر طبیعی واصلی صورتده نیکیبندرلر . بونلر دنیای خیرکار و خیری شردن استحصاله چالیشیر بر طاقم قدرتلر طرفندن اداره اولونور کبی کورورلر . بو نیکیبن ایمان شری مغلوب و سعادت تأمین و تولید ایلک ایچون غایت حیرت بخش درجه ده مؤثردر .

آنان دوغمه نیکیبنلره مقابل طبیعت بدبین مزاجلرده کوستریر . بونلر چارهمسی بولونمایان برسفالت حسنه زبوندرلر . اونلر ایچون هر حرکت ، هر وارلق بر افلاس ایله نتیجه لیر کیدر . آرزولر مزك غایه سنی بونلرک بیهوده لکینی کورمه دن دوشونه مزلر . مسرتلر مزك سببینی دوشونجه درحال بونک هیچلکینی فرق ایدرلر . فقط باشلیجه کندی فعل و حرکتلری ، کندی دوشونجه لری ، کندی کیزی اختیارلری اونلری ظالم برخسته لئق پنجه سنده بر اقییر . برطاقم اینجه ملاحظات وجدانییه قایلیرلر . اندیشه ، کندی کنیدیسنی مضطرب ایتک ابتلاسی ، بو کیزی علت هر یرده اونلری تعقیب ایدر . بوندن ناصل قورتولمالی؟ مبتلای حزن و غم اولان بر کیمسه حیاتک لطافتی



بر موهبه اولدیغنی و بوندن ذوقیاب اولق یالکیز بعض ممتاز  
ذواته منحصر قالدیغنی حس ایلر . شفایاب اولق قابل ایسه  
بو آنجق مافوق طبعی بر مداخله دن کله بیلیر .

بعض سیگر لرندن راحتسز کیمسه لر چیفته شخصیت تسمیه  
ایدیلن بر خصوصیت عرض ایدر لر . اونلرده ایکی بنلک واردر :  
بری بدبیندر ، دیکری نیکیبندر . بری عادی درجه ده در ،  
دیکری ای مواهبله مجهزدر . بو ایکی سجهیه یی توحید ایتمه  
اونلر غیر قادر در لر . سن پول کندیسنده بویه بر ایکیلک بولیور  
وشو مشهور سوز ایله اونی افاده ایدیوردی : « ایسته دیکم  
خیری یا پمایورم ؛ فقط ایسته دیکم شری یا پیورم . »

بعضاً فرد لرده بردن بره وقوعه کلن بر تبدل اعتقاد ،  
بردن بره قوجه بر خلق کتله سنی ضبط ایدن اعتقاد ، عصبی  
وروحی امراض آراسنه ادخال ایدیلیر . بو، عینی بر شعور  
ایچنده بر شخصیتک آز چوق ناکهانی بر صورتده دیکر بر  
شخصیت یرینه قاشم اولماسیدر .

ایسته بوصورتله ، تظاهرات دینه انسانده یابانجی وقضارا  
وقوعه کلش بر طاقم اوصاف دکلدیر . بونلر طبیعت بشریه نک  
کندیسندن چیقان بر طاقم حادثات مجموعه سنه داخلدر لر .

مع مافیه بوندن حادثات دینه نک کندیلرینه بکزه یین  
حالات مرضیه نک عینی عد ایدیه بیه جکلری معناسنی چیقار ماملیدر .

دهانك و صورت عمومیه ده هر تفوقك شرطی عضویتده موازنه نك  
بوزولماسیدر . بونلر بر طاقم غیر طبیعی تظاهرات ایله مترافق  
بولونورلر . بوتون فعالیتنی بر ملکه اوزرینه طوپلامق اونی  
دیكلرلرندن چككمك دیمكدر . بعض ساحه لرده بر تفوق همان دایما  
دیكلر ساحه لرده ضعف وعدم کفایت تضمن ایدر . بناء علیه  
دین شوق و هیجان ایله نه قدر چوق قاریشیرسه ضروری اوله رق  
بر موازنت بوزولماسی ، بر دلیلک حاله کیره جکدر .

حیاتمزه ایفا ایتدکلری وظیفه اعتباریله بر برلرندن صوك  
درجه فرقلی اولایلین حادثات ایچون — کوره بیلدیکمز  
درجه سنده — پك بر برینك عینی اولایلین بر طاقم شرائط  
عضویه ایله ده دین تعریف ایدیه مز . دین ، شعورك بلا واسطه  
حسیاتنه کوره حدذاتنده پیش ملاحظه یه آلتق اقتضا ایلر .

بو حس تصویر اولونا ماز . خارجدن باقیله حق اولورسه ،  
خارجدن کورولن بوتون شیر کی فلان ویا فلان مقولات  
ادرا که داخل اولور : خارجدن کورمك بر شیئه بکزمك  
دیمكدر . فقط انسان ایچون او یکانه بر شیردر . کندیسنه  
مخصوص بر حالی ، بر زنکینلکی ، بر غریب تمامیتی واردور .  
اوندن آنجق اونی حس ایدن بر کیمسه بحث ایده بیلیر .

دین فکرنی کله لرله قابل اولدیغی قدر تلقین ایده بیلیمك  
ایچون دنیه بیلیر که بو صمیمی و مکمل بر آهنگ ، بر صلح  
وسکون ، بر شطارت حسیدر . بزم خارجمزده و کندیمزده

هر شيك يولنده كيتديكنك حسيدير. بويالكنز مطاوع و عاقل  
برحس دكلدر. بزمكندن بويوك بر قدرته اشتراك ايدلديكنك  
حس اولونماسيدير. بو قدرته برلكده عشق ، اتحاد و صلح  
وسكون ايشنه چاليشمق آرزوسيدير. حاصل حياتك ، بر قوه  
خالقه ، بر تأمين آهنگ ، بر نشاط اولمق اوزره حياتك تهيج  
و غليانيدر .

بعضاً ، مسعود اولمق ايجون يالكنز بر كره دوغمالري كافي  
ديديكمز آدملرده اولديغي كچي ، بو حس اولندن روحك ايجنده  
واردر. او تقديرجه دين دائمي بر انتظام ، عشق ، قوت ،  
اعتماد و امنيت انطباعيدر . بو بوزولماسي غيرقابل ، ايجدن كله  
بر نيكيينلكدردر . بالعكس ، كندى كنديليله حال سكونده  
ياشايه بيلمك ايجون احيا ايدلمكه محتاج اولانلرده دين اشتهاى  
اندیشه ايله ، كنديسندن و موجوداتدن عدم ممنونيت ايله  
تظاهر ايدر. بونلرده ايكنجى تولد فعاليت شخصيه نك محراقى  
تبديل ايتمسي ايله نمايان اولور. بويله احيا ايديلن بر آدم كنديسنگ  
باشنه كلن شيلره قارشى خاير ! ديه جك يرده اوت ! دير .  
كندى كنديسنگ اوزرينه قاتلانوب قله جق يرده ديكر انسانلره  
دوغرو و محبتله ، فداكارلقه ، حقيقى بر اخوت حسيله كيدر.  
آرتق هر شئي باشقه بر ضيا آلتنده كورور ، اوزرنده اجراى  
تأثير ايدن عمللارك كافه سنه باشقه دورلو بر عكس العمل اظهار  
ايدر. شره غلبه چالهرق بو صورته خيري تسخير ايدنلرك

اوکلرنده دهها کنیش بر ساحت بولونماسی محتملدر. بونلر توللرندن اعتباراً دوغرو وایی یولده اولانلردن زیاده یوکسک بر تکمله واصل اولابیلرلر. ایکنجی دفعه دوغمش بر آدم ایچون، اوغراشان وسیع قیمتتی بیلن بر آدم ایچون هر فتح و تسخیر یکی بر فتح و تسخیرک مقدمه سیدر.

بو مطالعاتدن شو نتیجه حیقارکه دین اساساً شخصی بر ایشدر. حقیقته نه قدر دیندار فرد وارسه او قدرده دینی تجربه واردر. دین حیاته مربوطدر. هر کس ایسه کندی مزاجنه و دهاسنه کوره یاشار.

شعور دینیک بعض اوصافی بر طاقم حادثاتده یاخود بعض کیمسه لرده بالخاصه بارز صورتده نمایان اولمقدهدر.

تمام دینی بر عمل اولان دعا بزم بندکمزی و متناهی دنیا مزی خیلی تجاوز ایدن بر وجودک تأثیری سایه سنده کرک بزده کرک بزم خار جهزده بو عالمک یاپه بیلیمکدن عاجز اولدینی بر طاقم حادثاتک ساحه فعله چیقابیلر جکی قناعتی تضمن ایدر.

تبدیل ایمان کیفیتی بردن بره یاخود تدریجاً بزم و ارغمزی درین وقطعی صورتده. دیکشدرین مافوق طبیعی بر تأثیر حسیله مترافقدر.

صوفیه حالاتنده شخص کندیسنک الله ایله اتحادینی حس ایتدیکی کبی کندی فعالیت شخصیسی مرکزینک بو اتحادک نتیجهسی اولوق اوزره دیکشدیکی حسنهده مالکدر. صوفیه

حالاتی حس دینیک بر ضلالتی اولمق اوزره تلقی ایدیله من .  
 بونلر، یاشانان دینده یعنی دینده دها بویوک بروجود ایله قاریشمه  
 کیفیتدن متولد بر بویومه حسنک شکل قصواسیدر .

دعا یاخود صوفیه حالاتی کبی حادثه لرك تدقیق و تنبعی  
 دینک اول امرده بر حس اولمقله برابر بر طاقم ذکائی عنصر لرك،  
 اعتقاد لرك، فکر لرك ده دائماً از چوق اونک ایچنده محاط  
 بولوندیغی میدان قویمشدرد. دعا، هیجان دیندن غیر قابل تفریق  
 کبی کورونن ابتدائی اعتقاد یاخود ایمانی میدان بداهته چیقاریر .  
 دیندار آدم کندیسنی بر وجود علوی ایله مناسبته ظن ایدر .  
 اعتقادنجه بروجود علوی ایله دها صمیمی بر صورتده برلشه بیلیر؛  
 یالکیز باشنه بولامایه جفی بر ذوق، بر قوتی بو وجود علوی  
 اوکا ویریر و اونی کندی کندیسيله دها هم آهنگ حاله کتیریر .  
 ایشته ابتدائی تجربه دینه ده بولونان ذکائی عنصر بو اعتقاددن  
 عبارتدر. فقط موجوداتک نمونه لرینی تشکیل و بونلری ایضاحه  
 حریص اولان مخیله و ذکای بشر بونلرك ایچنه کیتدکجه دها  
 معین و دها ذکائی اعتقادلر و نظریه لر علاوه ایدر. بونلر یاواش  
 یاواش اصل دینی، الهیات و فلسفه حالنه قلب ایدرلر. بو بر معناجه  
 طبیعی بر تزه و انکشافدر. چونکه طبیعت بشریه نك تمایلندن  
 نشئت ایلر، مع ماقیه بو اعتبار ایله ده عارضی و تصادفیدر. چونکه  
 تجربه دینه نك بسیط بر انکشافندن تولد ایتمز . بو تجربه نك  
 مختلف مکاتبات ذکا ایله ترکیب و امتزاجندن دوغار.

## ۲ — تجربہ دینک قیمتی

ایسته صرف توصیفی نقطه نظر دن پیش ملاحظه آلمان دینی وقعه لر بونلردر. یالکیز بو تدقیقات ایله اکتفا ایدرک شعور دینک قیمتی نه اولدینی ، اعتقادلرینک عقل قارشیدینده نه صورتله محق کوستریله بیله چکی مسئله سنی کهنه لشمش بحال دیه بر طرف اتمک هیچده یاقیشیق آماز.

ویلیام جهیمس بو ایکنجی وظیفه یی براغماتیزم نقطه نظر دن ایفایه کیریشیر .

ویلیام جهیمسه کوره ایکی دورلو حکم واردر : وجوده یاخود منشائه تعلق ایدن حکملر ، معنوی یاخود قیمت حکملری . ایکنجی نوع حکملرک برنجیارله هیچ برایشی یوقدر . بر فکر یاخود بر حس نه دن کلیرسه کلسون اکر وقعه لر فیکرک حقیقتنی اثبات ایدیورسه ، حس مشمر و خیرکار ایسه بوفکر و بو حس قیمت کله سنک ارئه ایده بیله چکی مکملیتی تماماً حائر اولایلرلر . قیمتک تعینی ذاتاً ، بالذات وقعه نک تقدیری کبی صرف عملی empirique بر اصوله کوره وقوعه کلیدر . بر فکر ، بر اعتقاد ، بر حس تجربه کندیلرینی تأیید ایدرسه یعنی حادته احتوا ایتدکاری انتظاره تقابل ایلرسه حائر قیمتدرلر .

بوجهت بویله ایسه ، دینک قیمتی نه اولدینی صوران بر کیمسه ایچون موجودیتنک ، منشالرینک ، تولدینک شرائطی



هیچ حائز اهمیت دکلدر. دینک قیمتی حصوله کتیردیکی شیئه کوره اولمق لازم کلیر .

ایشته ویلیام جه یمس آغاچ حقنده انجیلک دیدیکی کبی صرف میوه سینه کوره حکم ویره جکدر . هیجان دیننک نتیجه لری نه اولدیغی، بو تأثیرلرک ای وشیان تمنی اولوب اولمادقلرینی ، دیندن باشقه بر واسطه ایله استحصال ایدیلوب ایدیه مهیه جکلرین آراشدره جقدر .

\*  
\* \*

حیات دینه نك نمره سی قدسیتدر . قدسیتك : صوفیلق ، رحم و شفقت ، قوه روح ، صفوت ، برهیزکارلق ، اطاعت ، فقر ، محویت و تواضع کبی تظاهراتی بعضاً مفرطانه و قیمتجه مشکوک اولابیلیرلر . مع مافیة شوراسی واردر که قدسیت اصل اساس دیندن ملهم اولدیغی یرلرده دنیاده کی قوه اخلاقیه ، ایلاک ، آهنگ و سعادت یکوئی آرئیر . شبهه یوق که بر متقی ریاضتکار هر زمان قوه روحیه سنی غایت ای بر صورتده استعمال ایتمز ، حیات بدنه مفرط بر اهمیت عطف ایلر . فقط عزم و اراده نك نه لره قادر اوله جغنی پك کوزل کوستیرر . قوت و قدرت وجوده کتیریر . انسانلر امك صرف ایتهدن پایدار اولابیله جکفی ظن ایتمک و قهرمانلق دوره سنك آرتق کچدیکنه ذاهب اولمق بر خطادر . انسانی طبیعت تشکیل ایتمه مشدر ، انسان کنندیسنی طبیعتیه جبراً قبول ایتدیرمش و اوکا حاکم اولمشدر . انسان آنحق

قوت و قدرت بشریه یی تزید ایتک صورتیله پایدار اولایلیر ، کسب عظمت ایده بیلیر . انسان آنحق کندیسینی خلق و ایجاد ایدرسه و دائمی صورتده تکرار یاراتیرسه واردر . اولیالر او تعقیب ایتدکلی عشق و صلح و سلام مفکوره لریله ایچنده یاشادقلی هیئت اجتماعیه پک فنا توافق ایتش اولایلیرلر . فقط بوندن نه نتیجه چیقارمالی ؟ انسانلرک مفکوره سنی بر اولیامی یوقسه ییزتچی بر آدم می تشخص ایتدیرر ؟ اگر اولیالر کندی زمانلرینه توافق ایتمورلرسه بودهامکمل بر هیئت اجتماعیه توافق ایتک ایچون شیمیدین صرف مساعی ایتملرنددر . او هیئت اجتماعیه یی شیمیدین موجود کی فرض ایتمکه اونک ساحه فعله چیقماسنه چالیشمش اولورلر .

دینک مؤثریتی یالکیز اخلاقی دکلدر . انجیل بزه عیسانک خسته لقلری تداوی ایتک ایچون کلدیکنی سویلیور و بدنک خسته لقلریله روحک خسته لقلرینی بر برندن آیرمایور . اونک سوزی کناهکارلره روحک صحتی ، کورلره باصره یی ، صاغیرلره سامعه یی ، اولورلره خیاتی اعاده ایدیور . چونکه قلبک صفوقی و خالقک قادر مطلق اولوشنه ایمان انسانک شرائط ماده سی اوزرنده شمولی اولچمک امکان خارچنده بر تأثیر اجرا ایدر .

Das Wunder ist des Glaubens liebstes Kind

( کوته ، فانوست : معجزه ایمانک سوکیلی چوجوغیدر ) .  
هپسی بو قدرله قالماز . ایمانک حصوله کتیردیکی تأثرات

آراسنده بعضیاری وارد در که اونلر ایچون ایمان یالکمز کافی بر شرط دکل ، الزم و ضروری بر شرطدر . نه فردلر ، نه هیأت اجتماعیهلر ، استحقاق منفعت ، فعالیت و ثبات و اقدام ایچون شیمدی به قدر ایمانه مساوی باشقه بر منبع بولامامشلدردر . انسان کندیسنی وسائط ماده ایله حرکت ایدر کبی ظن ایتدیکی یرلرده بیله بیله رک یا خود بیلمه یه رک بوکا بوکون تلقین دیدیکمز شیئی علاوه ایدر . واکثریا وسائط ماده دن زیاده بو تلقین اجرای تأثیر ایتکده در . بوتون اصول تداوینک قسماً تلقینه استناد ایتدیکی قبول ایدن دو قنور بیله خسته لرینی بوصورتله شفا یاب ایدر . حالبوکه کرک خسته ده کرک دو قنورده موضوع بحث اولان تلقین ، طبیعتک قوه شفا بخشاسنه وبالذات ایمانک مؤثرینه بر ایمانی یعنی اعتقاد دینی به مشابه بر اعتقادک وجودینی تضمن ایلر . دین فائده لیدر و بعض کره یرینه باشقه هیچ برشی اقامه سی قابل اولماز : آرتق اونی دوغرو عد ایتک ایچون دهانه لازم ؟ اکر تحلیلك صوك نتیجه سنده حقیقت ، وار اولان ، پایدار اولان و بر اثر تولید ایدن شیدن عبارت ایسه موجوداتک و قوای طبیعیه نک دوغرو اولوشی کبی دین ده دوغرو در .

\*

\*\*

مع مافیه معلوم دینلرده قابل تدقیق و مشاهده و قعه لره دوغرو دن دوغرویه مربوط اولمابان بر طاقم خصوصی اعتقادلر موجود بولونیور . بو اعتقادلرک قیمتی نه در ؟

بونلرك مشر وعيتنى اثبات ايچون ايكى طريقه تشبث ايدلمشدر:  
 بريسى صوفيه ، ديكرى فلسفه طريقيدر .

صوفيه كوره ، بالخاصه بعض كيمسه لرده عالم مادي يي حس  
 وادراك Perception كې اللهى واشياى الهيه يي ده بر حس وادراك  
 كيفيتى واردر . مع مافيه بويله كنديلرينه نمايان اولان شئي  
 تعريف و تصوير ايدمزلر . فقط بعض ممتاز دقيقه لرده اچلر نده كى  
 حسك بروقوف تشكيل ايتديكنه ، قلمبريله كوردكلرينه دائر  
 اولنلرده مقاوم تسوز بر انطباع حاصل اولور . بو غريب حدس  
 حادثه سنى ايضاح ايچون ، مفهوم لر من ، كله لر من غير كافى اولقله  
 برابر غيظه لك اولنلرى ، بو حادثه يي تجربه ايدن روح ده بو  
 مافوقى طبعى حالتلرك تكرر حيات بولماسنى ايجاب ايدمك  
 صورتده مزج و تركيب ايدمك چكى قابل ظن اولونور . احتمالكه  
 بو نقطه نظر دن موسيقى بزم شو قضائى و عنعنوى اسانمرك  
 قدرت تبليغه سنى تجاوز ايدن بر طاقم روحانى و بر درجه يه قدر  
 بلا واسطه افاده لره مالكدور .

شبهه يوق كه صوفيه حقيقتده حدس لر ينك حقيقتنى  
 و قلمبرنده احيا ايتدكلرى حادثه لك قيمتنى اثبات ايتمكدن عاجز  
 بولونيورلر . مع مافيه شوراسى ميدانده در كه صوفيه مسلكى  
 شعورك على العاده معلوماتنه حس فوقنده بر افاده علاوه ايتمكه  
 حس دينى يي تقويه ايدنيور ودها مؤثر بر حاله كتيريور . وعد  
 ايتديكى وقوفى ويره مه مكله برابر هيچ اولماز سه هيچان دينيك

قدرت و حقیقتی عقلیه مسلکک اعتراضاتنه قارشى ادامه  
 ایچون یکی سبیلر تأمین واحضار ایلر.  
 دیگر طرفدن بعض متفکرلر تلقینات دینه نك او بڑ قتیف  
 حقیقتی عقلی صورتده اثبات ایده بیلیمك ظننده درلر . بونلر  
 فیلسوفلر درر . ویلیام جهیمسه کوره اللهك وارلغنی اثبات ایتمه  
 و اوصافنی تعیین ایلمه مخصوص اولان بوتون فلسفه والهیات  
 محاکمه لری بیهوده درر . فی الحقیقه حقیقی محتویاتی حائز اولان  
 مفهوملر یالکیز عملی خط حر کتده تفاوتلرله میدان چیقانلر درر .  
 حالبوکه بوتون بوتصورات و مطالعات حیات اوزرنده بر تأثیر  
 یابه بیلیمکدن عاجز درلر .

بو عجبا حس دینی طبیعت اشیایه ربط ایتمك و او بڑ قتیف  
 معناسنی تعیین ایلیمك یولنده صرف ایدیه جك بوتون امکملر  
 بالضروره نتیجه سزمی قاله جق دیمکدر؟  
 حقیقتده ، نه قدر تحدید ایدیلیرسه ایدیلیمین ، حس دینیک  
 کندیسنده ده او بڑ قتیف برشمولی حائز اولمق ادعاسنده بولونان  
 بر ایمان مند مجدر : بزدن دها بویوک و دها اینی و بزم شعور  
 و وجدانمزله اشتراك ایده رك شخصیت مزك مر کزینه تبدیل  
 موقع ایتدیرن بر وجودك وارلغنه ایماندر .  
 بو ایمان ، مشروع دییه تلقی اولونه بیلیرمی ؟ یوقسه اوده  
 کیم بیلیر ناصل سو بڑ کتیف ، ذکا جهتنده حقنده اوفاجق بر فکر

ایدینمکدن بیله عاجز قاله جنمز بر شئیك تشبیهی بر افاده سندن می  
عبارتدز؟

ویلیام جهیمس ۱۸۸۱ تاریخنده وقوعه کلن وپك پارلاق بر  
استقباله نامزد اولان بر کشفك بو مسئلهٔ اصلیه یی یکی نورلر  
سرپدیکنی سویلیور. بو کشفده تحت الشعور دنیلن بر طاقم  
حالات روحیه نك میدان چیقما سیدر. میهرس Myers بونی  
تختانی انا moi subliminal تعمیر ی ایله افاده ایدیور.

ذاتاً اولجده لایبنیچ بزم روحزده شعورمرك فرق ایتدیکی  
حادثاتدن فضله بر چوق شیلر بولوندیغی فقط شعورك بونلری  
فرق ایده مدیکنی سویلردی. روحزده نامتناهی بر طاقم کوچوک  
حس وادراکلر واردی که تاثیرلری ظنمزده نسبتله پك بویو کدی.  
انسان بو غیر محسوس حس وادراکلر سایه سنده کائنات ایله  
مناسبته بولونوردی. او صورتده که کائناده هیچ بر شی  
اولمازدی که بزم ایچمزده اونك بر انعکاسی حصوله کلسون.  
بو کوچوک حس وادراکلر لایبنیچ نظرنده بزم حسیاتمرك اصل  
جوهری ایدیلر. وقوف نقطهٔ نظرندن حس، تفکرك پك دوننده  
اولقله برابر وجود نقطهٔ نظرندن، فردك کل ده کی حیاته و آهنگه  
اشتراکنی تأمین ایلردی. بو «کل» بزم صریح صورتده کی حس  
وادراکمزله آکلادیغمزدن نامتناهی درجه ده کنیش و واسعدر.  
میهرسك نظریه سی لایبنیچك بو فیکرلرینك تجربی بر  
صورتده میدان وضعیدر.



میه‌رسه کوره شخصیت بشریه عادتاً متحد‌المرکز اوج  
 دائرہ‌دن ترکیب ایدر : ۱ ، محراق یا خود مرکزی قسم ؛  
 ۲ ، بومرکزک اطرافنده شعورک هیچ‌دکلسه ظاهری صورتده  
 غائب اولدینی حدوده قدر امتداد ایدن قسم ؛ ۳ ، شعوره  
 استناد ایدن بندیکک ، آنانک ، اوتہ‌سندہ میہ‌رس باشقه برآنانک  
 موجودیتی بالتجربه اثبات ایتمش اولمق ظنندہ در . بربرلرندن  
 آنجق درجه اعتباریه فرقلی اولان ایکی اولکیلر بوانایه نسبتله  
 بر عد اولونورلر . ایشته بو ، عتبہ شعورک آلتندہ کائن بر آنا ،  
 تحت‌الشعور یا خود تحتانی آنا در . بو برنوع ایکنجی بر شعوردرکه  
 حیات عادیده اصل شعورده مجهول قالیر . بعض کیمسه‌لرده ،  
 بعض احوالده ، بوتحت‌الشعورک موجودیتی ومؤثریتی دوغروندن  
 دوغرویه و محقق صورتده نمایان اولور . میہ‌رس آز چوق  
 استثنائی برخیلی مشاهدات سایه‌سندہ بونی اثبات ایتمش اولدینی  
 فکرندہ در .

حال طبیعیده بولونان بر آدمده بیلہ بر چوق وقعہ‌لره تصادف  
 اولونورکه غیرقابل ایضاح کبی کوروندکلری حالده بو نظریه  
 سایه‌سندہ اونلری آکلامق پک قولای اولور . فرضاً انسان  
 کندیسندہ بقای جنسه خدمت ایتمین و بناءً علیه یالکیز بزم  
 اصطفا‌ی طبیعی قانونمزک تأثیری آلتندہ انکشاف ایتمش اولمماسی  
 ایجاب ایدن بر طاقم ملکاتک موجودیتی مشاهده ایدر . داهیلرک  
 وجوده کتیردکلری آثار بزه بزم دنیا‌مزدن باشقه بر دنیا‌دن

کله یکی شیلر کبی کورونور. عمومیتله، انسانک غایه کجانه  
دوغرو تمایلاتی شرائط حاضره سیله غیر متناسبدر.

اگر انسانک حواسنک دائره شمولنه داخل اولان دنیادن  
باشقه بر دنیا ایله، باشقه بر طاقم موجودات ایله — که بو اعتبارله  
اونلره روحانی نامی ویریه بیلیر — ذی شعور بنلکینی تجاوز  
ایدن بر قسم موجودتی سایه سنده مناسبته دار اولدینی قبول  
ایدیلیرسه شوبحت ایتدی کمز وقعله ریک قولای ایضاح ایدیله بیلیر.  
ایشته بو نظریه اک باشلی حادثات دینه حقنده پک شایان  
ممنونیت بر طاقم تفسیرات عرض ایلر.

فرضا هدایت ایریشمه کیفیتی تحتانی انا داخلنده کیزی  
بر صورتده تشکل ایتمش و طولانیتمش بر طاقم استعدادلرک آز  
چوق آنی اوله رق شعور طبیعی ساحه سینه ادخالیدر.

بونک کبی، صوفیه حالاتی ده بعض کیمسه لرده فوق شعور  
ایله تحت شعور دائره لرینک بر لرینه نفوذ ایتشی قابل اولماسنک  
بر نتیجه سیدر. تحتانی انا حقیقتده علی العاده انا ایچون غیر قابل  
نفوذ اولان بر دنیا ایله مناسبته بولوندینی جهته، علی العاده  
انا کندی قدرت تفهم وافاده سنی تجاوز ایدن بر طاقم شاییتلر  
قارشیسینده قانجه عادتاً محو اولمش کبی بر حاله کثیر یا خود  
کندیسنی زیارت ایدن مافوق طبیعی وجوده دائر شرائط  
طبیعیه سیله متناسب بر صورت ذهنیه ایدینه که چالیشیر.

کذلک دعاده علی العاده اناک تملی اولان تحتانی اناک

مناسب‌تدار اولمغه قابليتلى اولديغى قدر تدره قارشى برمر اجعتدر .  
 ايسته بوصورتله تحتانى انا مسلكى ، دىي وقعده بلا واسطه  
 مندج اولان ابتدائى بر اعتقاده او بترقيت بر تمل و علمى برقيمت  
 تأمين اتمكه قادر عد اولونيور . بو اعتقاد ايسه ديندار كيمسه نك  
 تأثيرنى حس ايتديكى بر قوه خارجيه نك موجود يقنه حكيم اتمكدن  
 عبارتدر . حالبوكه چيفت انا مسلكنه كوره ، على العاده انا نك  
 ايچنه نفوذ ايدن تحتانى انا نك ايجاباتى بو على العاده انا نك تاريخى  
 ايله ايضاح ايديله ميه چكى ايچون حس وادرا كلرينك قانون  
 عموميسنه تبعاً او بترقيت شكل آليرلر و انسانه خارجى بر قوتك  
 تحت حكمنده بولونديغى انطباعى ويررلر . ذاتاً تحتانى انا على العاده  
 انا ده موجود اولانلردن دها يو كسك ، دها قوتلى بر طاقم ملكاته  
 مالك اولديغى ايچون على العاده انا اوندن آلدیغى الهاملرى يالكلز  
 خارجى دكل كندندن يو كسك ده بولديغى بر وجودك مداخله سنه  
 عطف اتمكه آلدانمش اولماز .

بناءً عليه شعور دىي نجاته ، قدرته ، نشاطه منبع اولان  
 كنديسندن بويوك بر انا ايله مناسب‌تدار بولونديغى ادعا و تأمين  
 اتمكه حقيقه بر وقعه خبر و ير مش اولديغى و دىي تجربه نك  
 موضوعنك حقيقه وارلغى بو تجربه ايله معلوم اولمش بولونديغى  
 افاده ايتديكى سويله نه بيلير .

تحتانى انا مزك مناسب‌تدار بولونديغى اسرار آلود وارلقرك  
 طبيعت و ماهيته دائر اولان خصوصى اعتقادلرده ايش باشقه

مرکزده در . بونلر فلسفه و صوفیه مسلکی ایچون اولدینی کبی  
 تحتانی انا نظریه سی ایچون ده غیر قابل اثبات بر حالده قالیرلر .  
 بونلر مافوق اعتقاددرلر؛ مخیله طرفندن، فردلرک یا خود جمعیتلرک  
 اخلاقی و ذکائی مزاجلری طرفندن علاوه ایدلمس اعتقادلر در .  
 غیر قابل اثبات اولمقله برابر بوندن دولایی قیمتدن محروم  
 دکلدرلر . دینک اساساً شخصی بر ایش اولدینی کوزدن دون  
 طوتممالیدر . دین فردده شخصیتک مرکزینی تبدیل ایتک،  
 اونی خودکامانه و مادی هیجانلر وادیسندن روحانی هیجانلر  
 ساحه سنه کچیرمک لازمدر . بو حادثه هرشیدن اول ذی شعور  
 آنانک خارجنده حصوله کلش و اونده برتبدل ایقاع ایتمش بر  
 تأثیرک وجودینه لزوم کوستریورسه سبب ایله نتیجه آراسنه  
 ادراکک صوقوشدیردینی ایضاحات، افکار یا خود اعتقادات ده  
 ذی شعور آنانک قابلیت واستعدادلری، یوکسک آنانک الهاماتنه  
 معروض بولونمق قابلیت اوزرنده بر تأثیر یاپه بیلیمک اقتدارنده درلر .  
 انطباع دینینک شرائطی بالضروره زمانه، محیطه، بیلکیلره،  
 فردلره کوره دیکشیر . بناءً علیه هرکسک، حادثه دینه یی  
 کندییی ایچون اک مؤثر بر صورتده پیش ملاحظه یه آلماسی  
 یالکنز شایان تجویز دکل بلنکه شایان تمئیدر .

ویلیام جهیمسه ککنجه، کندیی مافوق اعتقادلرینه حادثه دینه ده  
 بلاواسطه مندرج بولونان اعتقاد اصلی یه ویردیکی قیمتک عیننی عطف  
 ایتمه مکله برابر بعض مهم نقطه لرده مثبت دینلرک حکملرینی قبول ایدر .

غير مرنئ عالمك يالكز فكري اولماديغني سويلر . او غير  
مرئئ عالم بزم علممز اوزرنده تأثيرات اجرا ايدر . بناءً عليه اونى  
دينلرك الله ديدكلى شيمه تقابل ايدن بر شأنت اولمق  
اوزره قبول ايتمك پك طبعيدر . كذلك ، الله ايله بزم ايشلرمزك  
برابر اولديغنه واللهمك تأثيريله ياشامقوله اك يوكسك مقدراتمزي  
ايضا ايتمش اولديغمزه اينامقده محقدرد .

صوكره ، افسانك طالغتك ديكر موجوداتك طالغنه مربوطى  
بديهي اولديغى ايجون روح ديندار ، موجوداته اعتمادى وامل  
ايدىنديكى صلح وسكون باطنىي استحصال ايتمك ايجون ،  
مناسبتدار بولونديغى عيني اللهك بوتون دنيايه استنادكاه تشكيل  
ايتديكهنه ، بوتون دنيايى اداره ايلديكهنه وبوصورتله يالكز بزم  
دكل بوتون كائناتك اللهى اولديغنه اينامغه محتاجدر .

ويليام جهيمس بر نقطهده ارباب علمك يانندن قاهره رق ساده  
وبسيط فكريلى آدملره التحاق ايتديكى صاقلاماز . اوده شودر :  
هر وقعه نهايت الامر خصوصيدر . عموميلشديرلمش اولانلر  
حقيقى موجوديتدن محروم بر طاقم اسقولاستيك تجريداتندن  
عبارتدرلر . بونك ايجون الله يالكز عمومى وغايت علوى بر  
لطف وعنايت عطف ايتمك كافى دكلدر . الله ، شعور دينتك  
ايستهديكى ، بيلديكى الله اولاييلمك ايجون بزم دعالرمزى  
اسعاف ايده بيلملى وفردى احتياجلرمزى كوزتمليدر . بناءً عليه  
ايمان ايتديكمز عملى الله جريان حادثاته دوغرودن دوغرويه

قاریش مق و معجزه دیدیکمز شیئی یاپه بیامک اقتدارینی حائزدر .  
 لایموتلق اعتقادینه کلنجه ، بونک غیر مشروع اولدیغنی اثبات  
 ایده جک هیچ برشی یوقدر . شمدیکی بدنمزلک حیات روحانیه  
 ایچون ساده جه بر شرط تصادفی اولمایوب اوکا تام تقابل ایده جک  
 بر سبب اولدیغنی اثبات ایدلمه مشدر و ایدیله مز . فقط بومسئله  
 حقیقتده ایکنجی درجه ده حائز اهمیتدر . ویلیام جه یمس دیر که :  
 بزجه غایت معزز اولان بر طاقم مفکوره لرك تعقیبی بزّه ابدیت  
 ایچون تأمین ایدلمش اولدیغنه امین بولونیورسه ق وظیفه مزی  
 ایضا ایتدکن صوکره اثر الهی یه اشترا که دوام کیفیتنی باشقه  
 اللره تودیع ایتمکه نه دن مهیا اولمایه لم ؟



دین ایله علمك مناسبتی حقنده ویلیام جه یمسك مسلكی  
ایشته دینك نظریه سی تجربه دینه دن حرکت ایدرك  
بویله انكشاف ایدرك. ویلیام جه یمس بو نظریه نك علم قارشیمسند  
موقعی نه اولدیغنی دوشونمكدن کری قالمامشدر.

دین ده علم کبی تجربی اولقدن صو کره نه دن بزم ایچون  
علم درجه سنده شایان قبول کورولمه یه جك ؟

بعض منقدلره کوره دینی بویله تجربی علمه بکزمك  
غیر قابلدر . چونکه دین تجربه یی علمك آ کلادیغنی معناده  
آ کلماز، علمه مغایر بر معناده آ کلار. علمك تلقی ایتدیکی  
شکلده تجربه ، حادثاتی شخصیتدن تجریددر. یعنی معلوم اولان  
حادثادن اونلری تدقیق و مشاهده ایدن شخصیته عائد شیلرك  
هپسینی حیقارمقدردر. علت غائیة ، اندیشه فائده و قیمت ، حاصلی  
شخصك بر حسنی افاده ایدن هرشی علمی وقعه نك خارجنده در.  
یاخود، بالذات بو حادثه لرده علمه بر موضوع تشکیل ایدرلرسه  
اونلری حد ذاتلرند پدش ملاحظیه آلمایه رق اوثرکتیف  
صورتده قابل تدقیق و مشاهده بر حال ویا عوض داخلنده  
پدش ملاحظیه آلمالرینه امکان بولونماسندن ایلری کلمشدر .  
دین ایسه بالعکس سوثرکتیف و فردی عنصرلرند آلمش  
وقعه لره استناد ایدرك. انسانی بر شخص صفتیله طانیر و بوتون  
دوقوندقلرینه بر شخصیت ویریر . قوانین طبیعیه نك عمومیتی

و وحدت ضروریه سی دین ایچون حائز اهمیت دکلدر. اونک نظرند بر فردک نجات و سلامتی بوتون نظام کائناته تقدم ایدره. یونک ایچوندرکه دینک نقطه نظری ایله علمک نقطه نظری آراسنده قطعی بر عدم توافق موجوددر. دینک نسبی بر صورتده پایدار اولماسی حقیقی تجربهک، غیر شخصی و علمی تجربهک قارشیمسند اورتدن قالمغه محکوم بر پس زنده لکدن عبارتدر. ویلیام جهیمسه نظراً بو اعتراضلر بر نتیجه چیقاریله حق حالده دکلدرلر. بر سلسلهء حادثک صرف سوئز کتیف کبی کورونمسی کیفیتک او حالاتی نه دن دولایی بر تجربه تشکیل ایتمکدن منع ایده بیلرجهکی آکلاشلماز. انسانلر کندیلرینی خسته یاخود شفایاب اولمش ظن، شفالیق مافوق طبیعی بر مداخله عطف ایتمکله ایستیرلرسه آلدانسونلر: اگر بو کیفیتده بر قانونه تبعاً توالی ایدن بر سلسلهء وقایع وارسه آلدانمهک نه اهمیتی اولور؟ حالبوکه بعض الیم و مضر حسسیاتک بعض اعتقادلر طرفندن ازاله ایدیلسی و بونلرک باشقه واسطه لرله غیر قابل تدای کورونمهری بو کون بر وقعه در. دین واسطه سیله تشفیه کیفیتی قواعد مغایر بر تشفیه اولدیغندن دولایی بر طاقم بیچاره لری دینک معاونتندن محروم می براقه جقسکز؟ موضوع ایمانک ایمان طرفندن وجوده کتیریه بیلیمسی کیفیتی بو کون یالکز اونی یاپان شخص ایچون بر تجربه دکل اصل معناسیله بر تجربه در.

ویلیام جهیمس دیورکه : « نیچون طبیعتی استعمال ایتمه نك  
 وحادثاتنك جریانی تعدیل ایلمه نك یالکمز برطرزی اولسون؟  
 او قدر جسم و متنوع اولان طبیعتك منابعدن ممکن اولدیغی  
 قدر چوق استفاده ایلمك ایسته نیلیورسه مختلف اصوللر  
 داتره سنده حرکت ایلمسی لازم کله چکی عقله وارد اولمازمی؟ »  
 « علم ، میخانیککی حرکت کبی طبیعتك بعض عناصرینه  
 صولت ایدر واوندره تابع و وابسته بولونان حادثاته بو واسطه  
 ایله ایریشه بیلیر. دین ده کذلک بزم دنیا من اوزرنده حائر تاثیر  
 اولان باشقه واسطه لرله هم بربرینه مشابه هم ده آیری جنسدن  
 بر طاقم حادثه لر وجوده کتیریر. علم بشریته تلغراف، تنویر  
 الکتریکی ، تشخیص ، برطاقم خسته لقلری تداوی چاره لرینی  
 ویردی . دین ده فردلره سکونت روح ، موازنه اخلاقیه ،  
 سعادت تأمین ایدر ؛ اوده بعض خسته لقلری علم قدر هم ده  
 بعض کیمسه لرده علمدن ده اای تداوی ایدر . علم ایله دین ،  
 کائناتك خزینه لرینی آچق ایچون قوللانیدیغمز عینی درجه ده  
 حقیقی ایکی آناختاردر. ریاضیاتك، عینی عدد وفضا وقعه لرینی  
 کاه هندسه تحلیلیه ایله کاه جبر ایله یاخود حساب نامتناهی ایله  
 تدقیق ایتدیکنی و بو مختلف اصوللرله عینی درجه ده مفید نتیجه لر  
 استحصال ایتدیکنی کوریورزه دینی اصول ایله علمی اصول ده  
 نیچون بویله اولماسون؟ نه دن بونلرک بری موجوداتك بر صفحه سنه  
 دیگرده اوته کی صفحه سنه نظر ایتسون؟ اگر بویله ایسه

هر ايكسى ده كنديسنه كوره قابل تحقيق واثبات اولان دين  
ايله علم الى الابد برلكده پايدار اولورلر. »

فقط ، دنليوركه ، بوتون بو ملاحظات صرف عمليدر .  
علم نقطه نظرى ايسه حقيقتده بر وقوف اولمايان ، طبيعتك  
تفحصاتمزه عرض ايتديكى مواد مياننده بولونان تطبيقات  
و عملياتدن نظريه يي ياخود هر ذكانك مشاهده ايد بيله چكي  
و حقيقتنى تسليم ايله بيله چكي بر صورتده موجوداتك عناصر  
و مناسباتك تعينى كيفيتنى آيرمقدن عبارتدر . بونك ايچوندر كه  
دينك مدافعلى طرفندن ايلرى يه سورولن تجربه لرى علم ايكى يه  
آيرير : بونلر ك برى سوئر كتيف و علمه بيكانه در . ديكرى  
اوبئر كتيف و علميدر ، فقط دينى وصفدن كاملا محرومدر .

ويليام جهيمسك تطبيقات ايله نظريه نك بويله قطعى صورتده  
تفريقى كيفيتنى باخاصله رد ايتديكى معلومدر . اونك پراغماتيزم  
مسلكى عقلچيلرك استناد ايتدكلرى اساسلى بيله صرف عملى  
بر طاقم محك تميزلره ارجاع ايدر .

دين ايله علمك مناسبته كلنجه ، ويليام جهيمس بويابده  
بر طاقم ملاحظات درميان ايدر كه بونلر بسيط پراغماتيزمك  
حدودى خارجه چيقار .

ويليام جهيمسه كوره بوتون وقوفلر من شعوردن چيقار .  
بو آرتق مكناسب بر حقيقتدر . لوقظن ايدردي كه پسيقولوژيده

بدیهی معلوملری تشکیل ایدن شیر احتساس ، خیال ، فکر ،  
حسیات کبی بر طاقم بسیط عناصر در . بونلر حرفلره یا خود  
ذره لره بکیزرلر . بونلر آیری وعلوی بر وارلغک بر صورت  
ذهنیه سنی وجوده کتیره بیلیمک ایچون آرالرنده خارجی مناسبتلر  
تأسیس ایتمک لازمدر . ایشته بوفکرک بر حقیقت اولمایوب  
پسیقولوژیده بدیهی معلوملری ویرن شیئک ساحه شعوردن  
یعنی بر زمان معینده بر شخص متفکرده موجود اولان حالت  
شعورک یگونندن عبارت اولدینی تحقیق ایتدیگی کون پسیقولوژیده  
وبناء علیه فلسفه علمدهده بر انقلاب وقوعه کلمشدر .

بو یکی معلوم بدیهینک وصف ممیزی : عناصر ذریه دن مرکب  
بر مجموعه کبی واضح صورتده تعریف و تحدید اولونه حق یرده  
صریح حدودلر چیز یله سی یا خود تعیین اولونماسی غیر قابل بر  
وسعت مالک اولماسیدر . فی الحقیقه حالت شعور هم بر محراق  
یا خود مرکزدن ، همده بونک اطرافنده بر شعور دائره سندن  
ترکب ایدر و بو دائره شعورک حدودی آز چوق متموج  
و غیر معین بولونور .

حالبوکه ایشته او کره نیورز که بودائره شعورده متصل  
ومتادی بر صورتده اوچنچی بر ساحهیه مربوطدر . شعور من  
بونی مظلم صورتده بیله بیلیمز . اونک ایچون کرک امتدادینی  
کرک دریندکینی اولچمکدن عاجرز . بناء علیه حقیقه معلوم  
وبدیهی اولان ، هر تصور و مطالعه نک اولدینی کبی هر تطبیقاتکده

ضروری نقطه عزیمتی تشکیل ایدن شی حالات شعور مركز خیالی بر یکونی دکل او نامحدود ساحه در. بوساحه ده واضح وقوف مرکزی — که حد ذاتنده غایت مشوشدر و معین مقدارده بر طاقم مفهومات عناصرینه ارجاعی غیر قابلدر — آنحق بر نقطه دن عبارت قالیر و مربوط اولدینی محیطلرله موجود مناسباتی طرفندن لاینقطع تعدیلاته اوغرار .

مفکره بشرک اجرای فعالیت ایتدییکی ابتدائی معلوملر بویله ایسه لر عجا دین ایله علم بونلری نه صورتلرله استعمال ایدیورلر؟

دین انسانده کی بنلکک ممکن اولدینی قدر واسع صورتده ساحه فعله ایصالیدر. دین ، سائر شخصلرله صمیمی اشتراکی سایه سنده نامتناهی صورتده بویومش شخص بشریدر. ادراکز طرفندن مادی وارلغمزك و وقوفمزك شرائطنه توافق ایده جك صورتده تحدید ، تنظیم و صنفله تفریق ایدلمه دن اول موضوع اولدینی شکلده وجودك ، بر درجه یه قدر فهم وادرا کندن عبارتدر .

بالعکس ، علم ایسه هر هانکی بر زمانده هر هانکی بر مفکره ایچون واضح و آیری بر موضوع وقوف تشکیل ایده بیله جك بوتون شیلرک بر اصطفا سی و تصنیفیدر. بو عناصرك یکونی او بڑقتیف دنیان عالمدر. وقوف علمی یه منشاء خدمتی کورن واضح صورتده ذی شعورانه حس وادرا کده اولدینی کبی



بوعنصر لری آیری صورتده پیش ملاحظه یه آلدیغمز تقدیرده  
اونلرک کندیمزده موجودیتنی کورمدیکمز برطاقم شیر اولدیغنی  
آکلارز و بناء علیه اونلری بزدن مستقل برطاقم وارقلرک برر  
تصویری کبی تلقی ایدهرز . بو خیاللری کسر چیقاریرز ،  
اوزرلرینه یافته لر یاپیشدیریرز ، علی العاده هانکی صیرا ایله  
معروض اولیورلرسه اوننی قید ایلرز ، عودت لرینی اولدن تخمین  
ایده بیلمه مزه یارایه حق صورتده دستورلر ترتیب ایدهرز .  
بو دستورلر ، تمنی ایده بیله جکمز بعض حالات شعوری تکرار  
استحصال و تأمین ایده بیلکم ایچون بزجه برر اصول تشکیل  
ایدرلر .

دین ایله علمک منشألری بویله ایسه ناصل اولورده علم ،  
دینک یرینی طوته بیلیر ؟ دینک نقطه حرکتی مشخص و مادی  
شیلردر . بوتون شمولیله وقعهدر . ایچنده تفکر ایله برابر  
حسیات و بلدکده حیات کائناته اشتراک حقنده مظم براحتساسده  
واردر . علمک نقطه حرکتی ایسه مجرد شیدر ، یعنی معلوم  
وقعه دن چیقارلمش و یالکیز باشنه پیش ملاحظه یه آلمش بر  
عنصردر . مشخص شی کندیسنگ الی آلتنده ایکن مجرد ایله  
اکتفا ایتک انساندن طلب اولنه ماز . بو اوکنده یمک دوران  
برآدمه یمک لیسته سی ایله اکتفا ایتمه یی توصیه یه بکزر . انسان  
علمدن استفاده ایدر فقط دین ایله یاشار . جزء کلک یرینی  
طوته ماز . تمثال ، حقیقی ازاله ایده مز .

علم، دینک یرینی طوته مادیغی کبی دینک استناد ایتدیکی  
 سوئر کتیف شأیتدن ده مستغنی اولاماز. استخراج ایدلدکلری  
 سوئر کتیف شیدن آیری بر حالده اوئر کتیف و غیر شخصی شئک  
 کندی کندیسنه کفایت ایده بیله جکنی تخیل ایتک صرف  
 استقولاستیک ره آلیزم یدر. سوئر کتیف ایله اوئر کتیف آراسنده،  
 علمک کندی ایشنه او یغون کلدیکی اچون تخیل ایتدیکی وجهله،  
 بر خط انفصال بولوندیغی فلسفی نقطه نظر دن محق کوستره جک  
 هیچ بر دلیل یوقدر. اتصال و تمادی طبیعتک غیر قابل احیا  
 بر قانونیدر. سوزده غیر شخصی دیدیکمز مفهوما ر مز، شأیت  
 ایله یعنی سوئر کتیف ایله بر تماس نتیجه سنده دائمی صورتده  
 تکرار احیا ایدلمک ایستر. یوقسه عاقل، ترقی علمه مغایر بر طاقم  
 عقیده لر حاله کچر لر، شخصی شیلر، هرشی یرلی یرینه بر کره  
 قونولورسه غیر شخصی شیلر قارشیسنده اورته دن قالقه جق ابتدائی  
 بر قارغشه لقدن عبارت دکلدر لر. بونلر، نامتناهی صورتده زنکیین  
 و دائما تجدد ایدن بر زمیندر که علم بیهوده بر کورده نک در که سنه  
 دوشمک ایسته مزسه دائمی صورتده بورادن فیض آلمغه مجبوردر.  
 علم ایله دین بر بر لر یله معارض کبی تلقی ایدیله جک اولور لر سه  
 دینک علمه مناسبتی ایشته بوشکلده نمایان اولور. فقط، دوغروسی  
 آرانیرسه، بوتضاد دین ایله علم حقنده در میان ایدیلن صنعی بر تعریفدن  
 نشئت ایدر. بر طرفدن علم یالکمز فیزیک علملردن عبارت عد  
 اولونیور. دیگر طرفدن ده دین کندیسنک تمثالی تشکیل ایدن

عقیده لرده مندج کورولیور. فقط، علم هرشیدن اول وقعه لرك، معلومك وقوفی ایسه بر فیزیک علم اولدیغی قدر برده پسیقولوژی علمی وارد و حکمی علمك اوصافی او پسیقولوژی علمنه تشمیل ایتکه هیچ بر سبب یوقدر. اکر دین اساس اعتباریه بر تجربه، حس ایدیلن و یاشانیلان برشی ایسه بونی تجربه نك بر شکل مخصوصده تفسیرندن عبارت اولمق ایسته یین بر علمه بروجه پیشین مخالف عد ایتدیره جك هیچ بر سبب موجود دکلدر. حالوکه کورولیور که عینی بر وقعه، فرضا ذی شعور اُنانك تحت الشعور بر انا حالنده تمادیس بر طرفدن پسیقولوژی علماسی طرفندن تسلیم و قبول اولونمقله برابر دیگر طرفندن ده تجربه دینه ده اساسلی اولان شیئی پك اعلا ایضاح ایده بیلور. بناءً علیه ذی شعور انا ایله تحت الشعور اُنانك مناسبتی، دین ایله علم آراسنده بر رابطه اتصال تشکیل ایدیور دیمکدر. هر حالده بو مناسبت نهایت الامر فعالیت علمیه ایله فعالیت دینه نك مشترک نقطه حرکت ایدر. فعالیت دینه، شعوری تحت الشعور واسطه سیله زنجینلشدیرمکه، فعالیت علمیه ایسه تحت الشعورك فورانلریغی شعورك قانونلریغی و شکللریغی ارجاع ایتکه چالیشیر.

ایشته علم بو صورتله پیش ملاحظیه آلیرسه الهیات منتسبلرینك الك اساسلی ادعاری و معتقدات دینه یی تأسیس ایچون قوللاندقاری عمومی اصول علم نظرنده ده معقول و محق کوسترلمش اولور.

الهیات منتسبی، انسانك كنديسندن بويوك وكنديسندن آیری بر وجود ايله مناسبتدار بولونماسنی ایستیر . حالبوکه شعور نظرنده تحت الشعور ذی شعورشیدن فرقلیدن . پسیقولوژی روح بشرك تحت الشعور ساحهده بعضیلری كندیسندن بويوك اولان برطاقم موجودات ايله مناسبتدار اولدیغنی بك اعلا قبول ایده بیلیر .

الهیات منتسبی تجربه دینه ايله معلوم وثابت اولمش کبی کورونن موجوداتك حقیقه وار اولدقلىنی تأمین ایدر . بو اعتقاد، یکنسق بر حس وادراكك عمومی و دائمی امکانك تأمیناتی اولمق اوزره دائمی بر عالم اشكال و قوانین فرض ایدن علمانك اعتقادینه مشاهدیر .

نهایت، اطرافلرنده الهیات مسلکلىرىنك تعین وتبلىرايتدكلى بويوك بر طاقم تلقیات دینهیه صیرا کلىر . بوتلقیلرده علمی نظریه لره منشأ اولان اساساتدن باشقه دورلو تشكىل ایتمزله . بونلر برطاقم فرضیه لردرکه وقعهلری طوپلايه بيله جك واونلرك مناسبتلرینی ذکا وخیله ایچون موافق بر صورتده اراهه ایده بيله جك صورتده تنظیم اولونمشلردر . علم كندیسنى بر طرز مخصوصده تقلید ایتدیكندن دولایى الهیاتی مؤاخذه ایده مز . یالكز ، الهیات منتسبنك بر قید احترازی درمیان ایتمی ایجاب ایلر . خیله اوزرینه مؤسس بوتمثالر ونظریه لر دینك اصل ولای دكلدرلر . بونلرك غایه سی دینی لسان بشریه ترجمه دن

عبارتدر . حالبوکه بدیهیدرکه علومده بولسانک کیت کیده  
زیاده لشن بر پارچه سیدر . بناءً علیه عقیده لری افاده ایدن  
دستور لر علمک باشلیجه نتایجی ایله دائمی صورته هم آهنگ  
بر حاله قونولمق اقتضا ایدر . ناصل که علملرده ، او بویوک  
فرضیه لرنده تجربه بشریه نک هیئت عمومیه سیله وبو تجربه نک  
ذی حیات شاهی اولان عقل ایله برلکده تکامل ایدر لر .

خلاصه ، ویلیم جهیمسه کوره تجربه دینه تجربه علمیه قدر  
حقیقی ومفیددر . حتی تجربه دینه تجربه علمیه دن ده بلا واسطه ،  
دها واسع ، دها مشخص ، دها دریندر . فضله اوله رق تجربه  
علمیه بیله بر تجربه دینه اولاییله جکنی تضمن وقبول ایتیمکده در .  
هم آرتق پسیقولوژیده تحت الشعور نظریه سی سایه سنده علمده ده  
کندیسنه بر نقطه استناده مالکدر .

دین ، علم کبی عینی صورته انکشاف ایدر وعلم ایله هم  
آهنگ بولونور . بناءً علیه ماضینک بر دو کونتوسی ( پس زنده )  
اولدیغنی ، فطرت بشریه نک اصل ولبنده هیچ موقعی بولونمادیغنی  
فرض ایتیمکه بر سبب معقول یوقدر .

مطالعات تنقیدیه

بومسلک شورادن بورادن آلمش، بر لرینه اویه حق صورتد  
یونتولش مالزمه لردن بر پلانه کوره خارجدن برلشدیرلمش  
منطقی بر بنا دکلدرد. دها زیاده، حیات دینه نک کندیشی کبی،  
اومر کب ومغلق حالیه امکان مساعد اولدیغی قدر درک وتفهم  
ایدلمش، محبتکارانه ونافذ. بر تفکر وملاحظه ایله تنویر اولونمش  
برشیئه بکنزیور. ویلیام جهیمسک اثر لرینه خاص اولان وصف  
بوندن ایلری کلیر. قاره، بر محرره تصادف، ایده جکینی ظن  
ایدرکن قارشیسنده انسان کورور.

بومسلک نه قدر زنکین و ذی حرکت اولسه ده بر نقطه  
مرکزیه سی، عادتا بر محراقی واردر که بورادن بوتون هیئت  
مجموعه اوزرینه بر آیدینلق انتشار ایدر. بومرکز، پسیقولوژینک  
تملی اولق اوزره ساحه شعور نظریه سیدر. بونظریه بی دینه  
قطیق ایتمک وبوصورتله دینی حادثه لری انسانک حیات طبیعیه سی  
ایچنه صوقق: ایشته ویلیام جهیمسک درعهده ایتدیگی وظیفه.  
بونقطه نظر دن، دینک اساس اعتباریله بر تجربه، یعنی حس  
ایدیلن ویاشانیلان برشی اولدیغنی بر حقیقت دینه وضع ایدر.  
دین انسانک کندی کندیشیله، معلوم اولان انسانک غایه کمال  
اولان انسان ایله ایچندن کله بر صورتده یاخود تکرار تأسیس  
واعاده صورتیله ائتلافنک حسیدر. عینی زمانده، انسانک



کنندیسندن بویوک بر وجود ایله مناسبته دار اولماسی حسیدر .  
 بو ائتلاف و توافقی حصوله کتیرن وقوت و قدرتک توکنمنز  
 برمنبعی اولمق اوزره تظام ایدن شی ایشه او وجوددر . بو  
 چیفته حس، دیندار روحده حیات ذی شعورک محراقی، مرکزی  
 اولور .

**فضله اوله رق، بوندن دولایی، دین اساساً حقیقی و شخصی**  
 برشیدر. حد ذاتنده بر دین، تک و غیر قابل تحول بر دین بوش  
 بر اسقولاستیک جوهر مجریددر. دنیاده یالکیز دیندار روحلر،  
 دیندار حیاتلر وارددر. نه قدر فرد و ارسه او قدرده دین وارددر.  
 ویلیام جهیمسک، کتابنه تجربه دینیته نک تنوعی - Les variétés  
 de l'expérience religieuse دیمه سی بوش یره دکلدرد.

**بوفکر لر غایت نظر اهمیتله تلقی ایدلمک شایاندر .**  
 بر کره بوفکر لر کوره دینک اصل و لبندن عقاید، آیین،  
 عنعنات کبی بالخاصه فکری یا خود ماده عملی، او بر قتیف  
 اولدقلری ایچون علی حاله فرددن فردده انتقال ایده بیلن شیر  
 قطعاً آیرمالیدر . بومطالعاته کوره اصل برنجی درجهده حائر  
 اهمیت اولان شی شخص ایله یکو وجود اولان و اوندن آیریلامایان  
 عنصر هیجان و اراده در .

**بوفکر لره نظراً ک ای دینی نمونه صوفیه مسلککنده بولونور .**  
 فقط بو او وجدلردن، خیالتلر کورمه دن تجرید ایدلمش بر صوفیه  
 مسلکیدر . چونکه او کبی شیر قسم اصلی بی تشکیل ایتزلر .

صوفیه مسلکی پرئسپینه، حیات باطنیه نك شدت و وسعتنه ارجاع ایدلملیدر. بوفکرلره کوره انسانلر ایچون حیات دینه نمونه لری سن پول، سنت او کوستن، لوتر، پاسقال کبی بویوک موجدلر وخالقلردر. بونلرده دین هر شیدن اول حیات ایدی، بر تجربه شخصییه ایدی، قدرت بشریه نك و عظمت بشریه نك ترایدی ایدی. بویله بر دین، عناصری تصنیف و تعداد اولونه بیله جك، تکاملی تدقیق و مشاهده و تعریف ایدیه بیله جك، مقدراتی اولدن کسیدریله بیله جك حاضر برشی دکلدر. یاشایان، لاینقطع خلق و تکرار تکرار خلق اولونان برو جوددر که آنجق کندیسنی تمثیل ایدن کیمسه لرده فعالیت و اراده سوزسه وار اولمقدن خالی قالیر.

بویله بر دین صرف تماشا ایچنده بوغولوب قالمش مطاوعتکار بر صوفیه مسلکی دکلدر. فعالیتک بر غلیانیدر. کیتدجکه دها یوکسک غایه لر تعقیب ایدر و اونلری ساحه فعله ایصال ایچون الزم اولان شکللری بنمسر. عینی زمانده انسانلره حاکم اولمق و اونلره مطرد اعتقادلر قبول ایتدیرمک ایچون بهانه تشکیل ایتمز. بالعکس انسانلره دیکر لرینک دینلرنده او کندیلرینه خاص و شخصی شیئه حرمت و محبت ایتمک وظیفه سنی تحمیل ایلر. چونکه یکانه موجود و مؤثر اولان شی شخصی اولاندر. شخصلرک بر برلرندن فرقلی اولمالری ایسه ضروریدر.

ویلیام جهیمسده دین، بزم ایچون مافوق طبعی اولان برشی

ایله مناسبیدن عبارت اولوق وصف اصلینسی محافظه ایتیمکه برابر طبیعت بشریه نك ایچنه آچیقدن آچیغه ادخال اولونمشدر. صوفیه تجربه سنده ایمانك حدس حالنه منقلب اولدیغنی کوستره رك بونی طبیعی تجربه دینه یه ربط ایتدیکی کبی تجربه دینه ده ده بلا واسطه هر حالت شعورده ، علی العاده غیر محسوس کچدیکی حالده موجود اولان عناصرك عمومی پسقولوجی قوانینه تبعاً انکشافنی کوره رك تجربه دینه یی تجربه عادیه ایچنه ادخال ایلر. بناء علیه دین انسانك حیات طبیعی سندن برقسمدر. عینی زمانده بو حیاتك بقاسنه ، تمامیتنه وترقیسنه مساعد اولدیغنی ایچون دینك بقاسنی تأمین خصوصنده عقل بیله سوق طبیعی وعغنه ایله اتفاق ایدر.

ویلیام جهیمسك مسلكنك دینه علم قارشیسنده تخصیص ایتدیکی موقعده بوندن آز صاغلام دکلدر. دین شخصیتتمزك مرکزینی تشکیل ایدن حسك انقلاباتنده بولوندیغنی، علم ایسه ذهنده تمثیل ایدیلن حادثه لرله وبونلرك جریان طبیعی لرینی تدقیق و اشارت ایله مشغول اولدیغنی ایچون آرالرنده هیچ برمنازعه قابل تصور دکلدر. دیگر طرفدن ، دین ایله علم بربرلرینه مربوطدرلر. ایکسینك ده غایه لری بردر: انسانك سعادت و قدرتی. اصوللری بردر: تجربه ، استقراء و فرضیه ؛ ساحه لری بردر: شعور بشری. دین بونك تمامی ، علم برقسیمیدر.

بو مسلك نه قدر ذی حیات و قیمتدار اولورسه اولسون  
عجبا كرك ارباب علمك كرك دیندارلرك اعتراضلرندن آزاده  
قالمشیدر؟

ارباب علم طرفندن كله جك اعتراض اولدن تخمین اولونه -  
بیلیردی. بونلر ویلیام جه یمسك اورتیه قویدینی طرز و قوفك  
تجربه دینلن شیئه توافق و تقابل ایتدیکنی سویلرلر.  
علمی تجربه نك نتیجه سی بر حکم و تصدیقه واریر. علمی  
تجربه ده بکا یالکنز برشی ظاهر و نمایان اولماز، بر شیک وار  
اولدینی میدانن چیقار. واردر دیمك طبیعی صورته ذکا و حواس  
ایله متصف هر هانکی بر کیمسه او حادثه یی بکا نمایان اولدینی  
شرائط ایچنده تدقیق ایدنجه اونی اوده حس و ادراك ایدر  
دیمکدر.

حالبو که ویلیام جه یمسك اکثریا بر طاقم اشخاصك افاده لرندن  
استفاده ایدر ك نقل ایتدیکی تصویرات بزه آنجق سو برکتیف  
بر طاقم انطباعاتی خبر ویررلر. آزچوق غیرطبیعی اولان فلان  
شخصك مافوق طبیعی موجودات ایله بر مناسبتده بولوندیغنی  
یاخود او شخصك غیرطبیعی یاخود او برکتیف بر حضور و وجود  
حسنه قایلدیغنی او کره نیرز. بو حسك احوال و شرائطنه،  
انقلاباتنه واقف اولورز. بو حکایه لر ضلالت حسلرك، تشوшат  
روحیه نك سو برکتیف تصویراتی میاننه کیریوره بکزرلر.

ويليام جهيمس ده ابتدا بونلره باشقه بر معنا عطف ايدر کي  
 کورونمز. فقط ياواش ياواش تملك وتصرف حسنك وبالخاصه  
 بويوك صوفيهك هيجانلرينك يوكسك شگللريني تدقيق وتببع  
 ايتدجکه حسك، انساندن آري و روحاني بر وجودك حقيقي  
 و او بڑقريف وارلغني و بونكله شعورينك مناسبته کيرديکني  
 کندي باشنه اثباته کفايت ايتديکني عادتاً قبول ايتمکه باشلاره.  
 واقعا ويليام جهيمس بو اسرار انکيز موجوداتک طبيعت  
 وماهيتلرينه و بزم دنيا مزله اولان مناسبتلرينه دائر و يريلن  
 اوزون و صريح تفصيلاتي مخيله وادراکک برر مالعبعه سي عد  
 وشدتله رد ايدر. فقط على العاده هيجانلره تشارک ايتديريلن  
 بو عنصر ذکائی ايچندن نهايت برشي چيقارير، طوتارکه اوده  
 يوکسک بر مداخلهك موجوديتيدر. بومداخله ايسه بزه حس  
 ايله بيلديرلمشيدر. مابعدالطبيعي بر پسيقولوجي عالمي اولان  
 مهن دوپيران ده امتيازلي بر حسك، جهد وغيرت حسنك  
 بزم اراده مزله متساند اوله رق خارجي بر قوتک تأثيريني احتوا  
 ايتديکني و بو تأثيري بزه اعلام ايلديکني ادعا ايدردی. فقط  
 بيران بوفکريني تأسيس واثباته موفق اولامامشدي. ويليام  
 جهيمسك ده: « کنديمده اللهك تأثيريني حس ايدويورم »  
 قضيه سنك « اللهك تأثيري اوزرمده حکم سوريور » ديمهك  
 عيني اولديغني ناصل اثبات ايدميهلجهکي جای سؤالدر.  
 بعض محررلر کي بو مسلكي صرف فکرجي بر معضاده

تفسير ايدەرك باشدن باشە، صرف سوېژ كىتىف بر نقطه نظر دن  
پيش ملاحظه آلمش حسياتلردن، هيچانلردن واعتقادلردن  
باشقه بر شى موضوع بحث اولماديغنى مى ادعا ايتلى ؟ چونكه،  
نهایت الامر، بى قورتاران شى بزم اعتقاد مزدن آرى بر الله  
دكل، بزم الله اولان اعتقاد مزدر .

ويليام جه يمسك جذرى بر نقطه نظر تجربى اختيار ايتدىكى  
آشكاردر. بزدن خار جده موجود اولان اشيا ده مخيله ملعبه لرندن  
وادراكك صنعى انشا آتندن باشقه بر شى كورمز. ضلالت حسى  
ايله حس وادراكك آراستنده يالكىز بر درجه فرقنك وجودى  
قبول ايتدىكى شبهه سزدر. بوندن دولاييدركه آنجق مرضى  
بر ضلالت حس بولونديغى آشكار اولان وقعەلرك تدقيقى ايله  
تحليللرينه باشلار .

فقط بو عمومى سوېژ كىتىفجىلك طريقته مراجعت ايله  
مشكلات بر طرف ايدلمش اولماز. ولو كه سوېژ كىتىف اولسون  
بر تجربه، كله نك يالكىز عملى معناسيله دكل فلسفى معناسيله  
تجربه تعبيرينه كسب استحقاق ايدە بيلمك ايچون بعض هيچانلر  
حس ايدن بر شخص ايله بو هيچانلرك وجودى غير شخصى  
صورته مشاهده ايدن بر شخص واقفى هيچ اولمازسه فكراً  
تفريق ايدە بيلمك اقتضا ايدر. بويله اولمازسه يالكىز بروجود،  
بر شأيت موضوع بحث اولمش اولور، وقوف دكل. بر آجاج  
هيچ بر زمان بر تجربه دكلدر .



حالبو که حادثه دینه ده انسانک حالی شولازم اولان ایکیله  
هیچ ده صالح دکل کی کورو نور. انسان، نامتناهی ایله مناسبتدار  
اولدینی حسنه کنسیدینی، تمامیه ویره رک آرتق حقیقی ایله خیالی نی  
بر برندن تفریق ایده من. بویه شرائط ایچنده هیجانلری بیله  
عجبا حقیقت میدر؟ یوقسه شدید و بدیهی حاللرینه رغماً مفروض،  
جعلی، او بڑ قتیف اوله رق باقیلنجه غیر صمیمی هیجانلر میدر؟  
بر صوفیه حالی بر تجربه عدایدله مدیکی کی بر حالت شعور اولوب  
اولمادینی بیله مجهولدر. چونکه اوصوفیه استغراقی تام شعورک  
ازالهنه میال وساعیدر.

ایشته بونقطه ده مباحثه نك اساسنی تشکیل ایدن مسئله میدانه  
چیقار. بر شخص ایله شخصک خارجنده بر شیک وجودینه یعنی بر  
ایکیله احتیاج کوسترن تجربه دن باشقه بر تجربه موجود دکلیدر؟  
یکدیگرندن آیری بر شعور ایله علمک تجربه سی اولان بر تجربه،  
حیات و شأنت ایله جدا بر اولان وایلك و حقیقی بر تجربه تشکیل  
ایدن تجربه نه نسبتله مشتق و صنعی بر شی دکلیدر؟ ویلیام جهیمسک  
پسیقولوژیسنده اولدینی کی حالات شعور یرینه ساحه شعور  
اقامه سندن تولد ایدر کورونن مسلك ایشه بودر. بو مسلكه  
کوره ایلك حقیقت معلومه بر نامتناهی تمادی انطباعاتدر، تجربه  
ذی حیاتدر، بزم واضح حس وادرا کلامن بونک آنجق شکلی  
بوزولمش بر پارچه سیدر، بعض عملی غایه لری تعقیب ایچون بزم  
ایشمزه یارامغه تخصیص ایدلمشدر.

بو نقطه ده فکیر لر تخالف ایتمکده در. تحتانی آناده بعضیلری شعورك بو یو دیکنی، زنکیناشدیکنی کورمک ایسته دکلری حالده بعضیلری بونی شعورك فقیرلشمه سی، دارالماسی، آنجق بر ایز، بر طور طو حالنده قالماسی عد ایدر لر. بو فیکرده بولونانلر دقتله باقیله جق اولورسه کویا یوکسک عد ایدیلن بو شعورده اولجه عادی و محسوس شعورده موجود بولونماش اولان هیچ بر شیک موجود اولمادیغنی تأمین ایدر لر. صوفیه نك مافوق طبیعی الهاماتی بر طاقم تخطر لر در. صرف مفکره نك ایجاد لری بر طاقم اونو تلمش حالات شعور در که عادی پسیقولوژی قانونلری موجب نه میخانیککی صورتده باشقه حالات شعورله برلشمش لر در. بوندن شعورك طانیه مایه جنی روحی بر عضویت تولد ایتمش در. بو مجهول ده، علمه مقابل اولمق اوزره قارشیدینه چیقاریلان اوته کی کویا اسرار لر کیدر : تدقیق و مشاهد نك و تحلیک ترقیسی اونو ده معلوم و طبیعی ساحه سنه ادخال ایدر.

بو صورتله رد و جرح غایت بدیهی کوزو کسه ده شوراسنه دقت ایتک ایجاب ایلر که بو نقطه نظر، حالات شعور پسیقولوژیسی دنیان پسیقولوژینک قبول و تسلیم ایدلمش اولماسنی ایجاب ایلر. حالبوکه ویلیام جیمس بونی جعلی و غیر قابل قبول عد ایلر. بناءً علیه بو طرزده رد و جرحه قالدیشمق اصل اثباتی لازم مسئله یی محقق و ثابت ایتش کبی تلقی ایتک اولور. شبهه سز که علم، حادثاتک بر چوغنی کندیسنه تمثیل ایتدیر ییور.

فقط بونی محدود مفکره لږک یادیځی کبی اسکی چرچوه لری  
محافظه ایتک صورتیله دکل بونلری کنیشله تهرک، یوشاته رق،  
ایجابنده د کیشدیره رک یاپور. حقیقتده علمک چرچوه لرندن  
هیچ بری حتی ریاضیات و منطق چرچوه لری کبی بوتون دیکر لری  
طوتانلر بیله غیر قابل تحول دکلدرلر. قلاسیک پسیقولوژی  
تیلرینه قابل ارجاع اولامایه حق حادثاتک موجودیتی اثبات  
ایدلیکی کون پسیقولوژی ده بوکبی احوالده فزیکک یاخود  
کیمیائک یادیځی کبی یابه حق، باشقه پرنسیپ لر آرایه جقدر.

بیلکیلر مزک بوکونکی حالنده ایجاد و اختراع، مزج  
و ترکیب، فکر، تعریف ایدیلر جک اشیاء، آرانه حق و ساحه  
فعله حیقاریله حق غایه کبی ذهنه کله جک بوتون شیلرک هپ  
اسکیدن کورولن شیلر اولدیځی ناصل اولورده اثبات ایدیلر بیلر؟  
اولجه کورولش اولان ده بوصورتله ده اولجه کورولش دکلیدی؟  
برده کورمک نه دیمک اولدیځی، باصره مزک ساحه شمولى نرده  
توقف ایتدیکنی تماماً بیلورمی یز؟

ایوم المزده بولونان حواس خمسهنک تجربه سندن باشقه  
یاخود ده واسع بر تجربه امکانی بوکون پک آز قابل اعتراض  
کبی کورونور. فقط بسیط برحسک دکل بر تجربه نک موضوع  
بحث اولدیځی ادعا اولونه بیلیمک ایچون انسانک تصور ایتدیکی  
مفهومده او برقتیف دنیان حاله تقابل ایدیه جک برشی بولونماسی  
لازمدر. اللهه اینامق اللهک بزم کنیدیسنه اولان اعتقاد مزدن

خارج و مستقل اوله رق بر طرز مخصوصده وار اولدیغنه اینانق  
 دیمکدر . حالبوکه تجربه نك سو بڑ کتیف هیج بر خصوصیتی ،  
 حق بر دها فضله لق ، بر ماورا ، بر افراط حسی بیله کندی  
 باشنه بو تجربه نك او بڑ قتیفلکنی ، حقیقیلکنی اثبات و تأمین  
 ایده من . ویلیام جه یمس ده بونی قبول ایدیور کبیدر . چونکه  
 شعور دیننك بلا واسطه بیلدیردیکی حقایق تحلیلی ایدر کن  
 بونلرده بر علامت ، بر شهادت دکل روحك بر وجود ابدی  
 ایله مناسبتنك بلا واسطه معلوم اولمش بر شأینتی کشف ایتمه  
 چالیشیر .

سو بڑ کتیفدن او بڑ قتیفه بو کجیشی نه معناده آ کلامالی ؟  
 تحت الشعور نظریه سی بیله بونی محق کو سترمه کفایت  
 ایتمز . چونکه تحت الشعورده آنحق شعوره کیرمک یعنی سو بڑ کتیف  
 بر شکل آلق صورتیله در که شعور ایچون حقیقی عد اولنه بیلور .  
 اصل حادثه بوراده بر ایمان حرکتیدر که شعور بونکه  
 بعض هیجانلر حس ایده رک بو هیجانلرک حقیقی اولدیغنه  
 و کنديسنه اللهدن کلدکلرینه حکم ایدر . تجربه دینه کندی  
 کنیدیلکندن موجود دکلدر و اولاماز . شخصدن آری ،  
 او بڑ قتیف دکلدر . فقط انسان اوکا ادخال ایتدیکی بر اعتقاد  
 سایه سنده او بڑ قتیف بر شمول ویریور .

ایمان ایله بویله قاریشمش اولان تجربه دینه بوندن دولایی  
 بر تجربه اولمقدن چیقارمی ؟ ویلیام جه یمسک فکر نجه چیقمازم

چونکه اونك فكر نجه ، محسوس تجربه نك و علمي تجربه نك  
صفت كاشفسي اولان او بڑ قتيقلك فكر نده بيله غير قابل ازاله  
بر قسم اعتقاد مخفيدر. هر دورلو سو بڑ كتيّف عنصر دن مستقل  
مؤثر بر صنف موجوديت نهايت بر اعتقاد دن عبارتدر. اعتقاد  
يا خود ايمان هر بيله كينك اعماق نده موجوددر.

ويليام جه يمك تجربه دينه سنك كله نك علمي معناسيله بر  
تجربه اولديغنه اعتراض ايتدكاري كي بونك ديني وصفنه نه درجه يه  
قدر لايق اولديغي ده جاي سوال كورولدي .

ويليام جه يمك ديوركه : انسان : « امداد ! » ديه  
هايتير نجه بر سسك : « جسور اول ! ايمانك قور توملشدر ! »  
جوابي ويرديكني ايشيتديكي زمان سر دينيك ظهوره كلديكني  
تسليم ايدر. انسانك بنلكي بالطبع منقسمدر و متزلزلدر. اونده  
آهنك تكرر تأسيس ايدرسه ، كندي كنديسنه بولامايه جني  
بر قوت اوكا منضم اولورسه كنديسندن دها بويوك بري اوكا  
يارديم ايديور ديمكدر .

فقط هوفدينغك بحق ديديك كي ، بو حادثات بر تجربه نك  
ديني عد ايدلسي ايچون كافي دكل كي كورونور . انسانك  
كنديسنه داخل اولديغي كورديك آهنك وقوتك قيمتي تقدير  
كيفيتي ده انضمام ايتليدر. بو آهنك ايله قوت صرف مادي شيلره  
مشابه كي تصور وتلق ايديله جك اولورسه اونلرده اللهمك بر

مداخله سی کوريله مز. فقط انسان حادثه روحیه بی الله ایله انسان آراسنده ، غایه کمال ایله حقیقی آراسنده یا خود ، هوفدینغک صریح مسلکینه کوره ، قیمتارله شأنت آراسنده بر اشتلاف تأسسی صورتنده تفسیر ایدرسه او زمان بو آهنگک وقوتک نمایان اولوشنی قیمتارک اساسی اولمق صفیله الله عطف ایلر وتجربه بوصورتله دینی بر وصف ارائه ایدر .

فی الحقیقه دینی تجربه نک وصف میزی حسه .فهو مک واعتمادکده مربوط اولماسیدر . بر هیجان ، دینی اولابیلیمک ایچون اساس وغایه سی دینی بر صورتده ادراک ایدیلن اللهده بولونیور دییه تلقی اولونمق لازمدر .

دیمک اولیورکه تجربه دینییه هم تجربه همده دینی تجربه اوله رق وصف میزی ویرنشی تجربه دینییه نک ایچنده مکنوز ایماندر .

ایمانک بوراده اهمیت غایت زیاده در . چونکه ویلیام جهیمسه کورده ایمان یالکز هیجانه رفاقت ایتیمکه قالماز ؛ هیجانک اوزرنده حقیقی بر نفوزه مالکدر .وبعض احوالده او هیجانی کندی باشنه تولید ایده بیایر . احتمالکه الهی حامل اولان ایمان دینی ، مجرد بر فکر دکلدر . بو ، خسته لقدن شفایاب ایدر ، تسلیم بخش اولور ، موضوعی خلق ایدر . پاسقال فریادلر ایچنده الهی آرارکن کندیسنه شو ندانک کلدیکنی ایشیدیر : « متسلی اول ، بنی بولمامش اولسه ایدک آرمازدک ! »



فقط، اگر حقیقت بویله ایسه تجربه دینه ویلیام جه یسک تحلیل لاتندن مستبان اولویور کی کورونن اومفهوملردن، عقیده لردن، آیدنلردن، عنعنه لردن، مؤسسه لردن تمامیه آیری پرنسیپ دکلدرد. چونکه بوشرائط خارجیه بر درجه یه قدر ایمانک عناصریدر، بونلر ایمانک وجودینی تضمن ایتدکلری کی ایمان اوزرنده عکس تأثیرلرینی ده کوسترلر و محتویاتی تعیین ایدرلر. معلوم بر فردک تجربه دینه سنده، تحلیل ایدیله جک اولورسه، دائماً ایمانه، مألوف اولدینی دستورلره و اعماللره مربوط بر سور و فکرلرک و حسلرک داخل بولوندینی کوروله جکدر. ایمان دینی حقنده ده بونک قسماً فعل و عملک اعتقاده ترجمه سندن عبارت اولدیغنی سویله مک لازم کلیر.

بناءً علیه دینک بوتون ذکائی، خارجی و عنعنوی عناصری زائل اولونجه آرتق تجربه دینه نک پایدار اولوب اولامایه جنی هوفدینغ ایله برابر بحق جای سؤال کوریله بیلیر.

بو عناصرده فردلرک شعور دینیسی ایله حائز اولدقلری مناسبتلردن پیدا ایتدکلری قیمتدن باشقه بر قیمت یوقیدر؟ شخصی دین یالکنر باشنه دینک تکمیل اساسندن عبارت میدر؟ شبهه یوق که دینک نه بویوک بر وظیفه اجتماعیه ایفا ایتمش اولدیغنی تاریخ بزه نه قدر کوسترسه بو، دینک منشاء و اساس اعتباریله بر حادثه اجتماعیه اولدیغنی اثباته کفایت ایتمز. اولابیلیر که

دین پر شوق و غلیان فردلرک روحلرنده دوغمشدرده تقلید و سرایت واسطه سیه انتشار ایدهرک یاواش یاواش عقیده و مؤسسات شکنی آلمشدر . ناصل که بر هیئت اجتماعیه نک بقاسنی و قوتی تأمینیه صالح اعتقادلرده بویه اولمشدر . فقط دینلرک اجتماعی طرفلری بر سبب اولمایوبده بر نتیجه اولسه بیه بوندن ، صرف شخصی دینک بوکونده اک یوکسک و زنده شکل دینی اولماسی لازم کله چکی نتیجه سی چیقمازه .

کندیسی ایچون تکمیل دینییه وصولی آرایان فرد منزویانه بر قدسیت ایچنه قاپانامایه جفنی حس ایدره . هیچ کیمسه یالکیز باشنه کندی نجات و سلامتی تأمین ایده مز . چونکه شخصیت بشریه آنحق انسانلرک آکلاشمق ، برلشمک و برلرینک حیاتلریله یاشامق ایچون صرف ایتدکاری غیرت ایچنده افکشاف ایدره ، وجود بولور و پایدار اولور . بونک ایچوندکه افعال و اعمال ، اعتقادات ، تمثاللر ، مؤسسسلرکی مشترک شیلر حتی شخصی شکلنده بیه دینک اصلی بر قسمیدرلر .

فقط بر قیمت دینییه یالکیز فردی شخص حائز دکدر . بر هیئت اجتماعیه ده عدالت ، آهنگ ، انسانیت کی کندی خواص خصوصیه سنی یا یغمه قابلیتلی بر نوع شخصدر . بو خواص حیات فردیه چرچوه سنک خارجه طاشارلر . وقتیه هیئات اجتماعیه نک مادی و معنوی مقدراتی اللرنده بولوندرانلر دینلر ایدی . بوکون حکومت سیاسییه یی اللرنده بولوندرامایورلر سه

ماتلره غايه کمالريني ارائيه وبوغايه لري ساحه فعله چيقارمغه  
چالشمق اچون لازم اولان ايمان، عشق، شوق، فکر اخوت  
وفداکاري، غليان وثبات کي شيلري اونلرده انکشاف  
ايتديرمه قالقه مازلرمي؟

بويله بر وظيفه صرف شخصي دينک حدودي خارجه  
چيقار. چونکه برهيئت اجتماعيه نك اعضاسي تزدنده مفکوره سنک  
ساحه فعله ايصالنه و وظيفه سنک ايفاسنه ساعی اولان عنعنه لره،  
اعتقادلره، فکره قارشى مش-ترك بر حرمت وعبادته احتياج  
کوستير.

دينک روحى حس ايسه اعتقادلر و مؤسسeler اونک  
بدنيدرلر. بو دنياده آنجق بدنلرله برلشمش روخلر اچون  
حيات وارددر.

## نتیجه

غیرقابل اجتناب بر مواجهه — اصل نزاع ، فکر علمی ایله فکر دینی آراستده در...

۱ — فکر علمی ایله فکر دینیک مناسبتلری — اولاً ، فکر علمی — وقعه لر ، قانونلر ، نظریه لر ناصلاً تأسیس ایدر — تکاملچیلک — تجربی عقیده پرستلک — ثانیاً ، فکر دینی — فکر علمی ایله قابل تألیف میدر؟ — علم ایله عقلک تفریق — علم و انسان : انسان ایله علم آراستده تمادی و اتصال — حیاتک مصدره لری : بونلر دینک اساسلرینه توافق ایدرلر .

۲ — دین — اخلاق و دین : دینک اخلاقه علاوه ایتدیگی شی — مثبت بر اساس روحی اولق اوزره دینک زندکیمی و قابلیتی — ذکائی و اوبرقتیف عنصرک قیمتی . حیات بشریه ده مهم فکرلرک وظیفه سی — عقاید — آیینلر — مساعده کارلرک عشقه تحولی .

دین ایله علمک مناسباتی مسئله سی تاریخی اعتباریله پیش ملاحظه الیرسه الک زیاده حیرت بخش مسائلدن بریدر . یوز کره پایلان و تجدید ایدیلن ائتلافه ، الک بویوک مفکره لرک مسئله یی منطقی بر صورتده حل ایتمک ایچون صرف ایتدکلری غیرتله رغماً دین ایله علم دائماً بربرلرینه قارشى حال حربده یاشامشلر ، یالکیز بربرلرینه غلبه ایچون دکل بربرلرینی تمامیه احما وازاله ایچون اوغراشمقدن خالی قالمامشلر کیدر .

مع مافیه بو ایکی اساس ده بو کون حالا بردوامدر . الهیات ، علمی تحت انقیادینه آلدیغنی بیهوده یه ادعا ایدوب دوردی .

فقط علم، الهیاتك بویوندوروغنی سیدکوب آتدی. اوتاریخندن  
صوکره ایش برعکس اوئش کی کورونه بیلیردی. علم، دفعات  
ایله، دینلرک آرتق نهایتی کلدیکی اعلان ایتدی. فقط دینلر  
حالا دورییورلر. مجادله نك شدتی کندیلرینك قوه حیاتیه لرینه  
آیری بر دلیدر.

دین ایله علمك مناسباتی حقنده کی افکار حاضره نی خلاصه  
وافاده ایدن مسلکله پیش تأمله آلنه حق اولورسه بونلرک ایکی  
صنفه آیرلدیغی کورولور. صنفك بریسی طبیعتی دیگری ده  
روحیتی دنیله بیله جك تمایلاتی احتوا ایدرلر.

برنجی قسمه نمونه صفتیله او کوست قونتك پوزیقویزمنی یاخود  
دین انسانیتی؛ هربرت سپنسرک تکامل جیلکی و ناقابل ادراک  
نظریه سنی؛ هه قلك دینك علمه منتهی اولان وحدت وجود -  
جیلغنی؛ حادثات دینی بی فعالیت روحیه و یا اجتماعیه نك طبیعی  
تظاهراتنه ارجاع ایدن پسیقوئلور جیلکی و جمعیت جیلکی ادخال  
ایتدك.

ایکینجی قسمه ادخال ایدیله بیله جك اولانلرده شونلردر :  
ریچلک ایمان ایله اعتقادلرک تفریقنه منتهی اولان جذری ایکی جیلکی؛  
علمك حدودلری مسلکی؛ علمی و دینی مشترک بر اساسه ربط  
ایده جك صورتده فلسفه فعل و عمل؛ ویلیام جیمسك بسط  
وایضاح ایتدیکی وجهله تجربه دینی نظریه سی.

بو بابده کی افکار و مطالعاتی تمامیه کوسترمك ایچون بو

جدوله دها برچوق علاوله لر یا بمق اقتضا ایدر. شوع عصر دیده مبارزه نك طرفیندن نه قدر شدت، ثبات و اقدام ایله دوام ایستدیکنی کو سترمه کو متال لر کافیدر.

بو مبارزه نك نتیجه سی نه اوله جغنی یا لکز منطق نامنه شیمیدین تعیین ایتک پک جرئتکارانه بر حرکت اولور. چونکه هرا یکی دعوانک طرفدارلری چوقدن بری او قدر منطقی هجوملرده بولوندقنری حالد بر برلرینی اقناعه موفق اولامامشلردر. بوراده موضوع بحث اولان ایکی مبارز ایکی مفهوم دکل ایکی وجود در که هر بری، وارلق حقنده سپینوزانک تعریفی وجهله، کندی وارلغنده پایدار قالمغه سعی ایدیور. ایکی ذی حیات شی آراسنده مظفریت قضایای منطقیه یی صیرایه دیزمکی الک ای بیلن طرفه دکل، قوه حیاتییه سی الک زیاده اولان طرفه توجه ایدر. مبارزه بوراده الک صحیح و قطعی شکلی آلتنده وقوف ایله بوکا آزچوق غیر متجانس اولمق اوزره کورون برشی آراسنده در. بو ایکی حدک بر بریله غیر قابل مقایسه اولمالری کیفیتی پک ضروری و منطقی در. تاریخک تدقیقندن چیقاریلان یا حود چیقاریلیور ظن اولونان تجربی تمکامل منحنیسنی همان چیز یوروب مسئله نك شوع صورته نهایت بوله جغنه بروجه پیشین حکم ایتک وایشی بیتیرمک پک ساده بر اصول اولور. فقط برشیئک اسکی اولماسی اونک آرتق ختامه تقرب ایتسی ایچون هر زمان کافی دکلدر. فیکر لرک، حس لرک، معنوی شیلرک حیاتی بهمه حال فرد لرک حیاتی کی اولماز. حتی



بونلر بر کره اولد کدن صو کره ، هله آرادن اونو توله جق قدر  
 زمان کچر سه ، تکرار تولد ایده بیلر لر . ایشته انقلابر بویله  
 وقوعه کلیر ، هم نه قدر اسکی اساسلری جانلاندیره جق اولور لر سه  
 او قدر جرئتکارانه اولور لر . روسو دنیایی یکیشدیر مک ایسته دیکی  
 زمان عادتلرک اک اسکیسی اولمق اوزره طبیعتیه مراجعت ایتدی .  
 تاریخ بزه معین بر استقامتده وقوعه کلیر کبی کورونن تکامللر  
 کوستریور سه بر طاقم منظوم حرکات ده ارئه ایدر که بونده بر  
 دوره نك انکشافی مخالف بر دوریه دوغرو یورومه دیمکدر .  
 انسانی شیلرک روشی غایت کرفت اولدینی ایچون معلوم بر تکاملی  
 اله آله رق بونی تعیین ایدن اسباب میخانیکه ابتدائییه قدر  
 حقیقیلا ماز . حالبو که اوسبیلر معلوم اولمادقجه استقبالی ایچون حقیقه  
 علمی بر تخمین یاسیله ماز .

دین ایله علم اکر حقیقه ذی حیات شیلره تشبیه ایدیله -  
 بیلور سه ، بونلرک قوه حیاتیه لرینی ، احتوا ایتدکلری قوت  
 خزینه لرینی ، تکرار اویانمه امکانلرینی ناصل اولچملی ؟ بو کون  
 بیله بعض علوم طبیعیه منتسبلری کوریورز که بعض دفعه انواع  
 طبیعیه نك عرض ایتدکلری آنی تحول حالاتی اوزمانه قدر مخفی  
 قالدقلری حالده مناسب شرائط بولور بولماز بردن بره میدان  
 حیقان واجرای تأثیر ایدن بر طاقم اوصاف ایله ایضاح ایدیور لر .  
 دینلرک استقبالیلری حقنده قابل تحقیق اولمقدن زیاده قولای  
 اولان بر طاقم تخمینلر درمیان ایتمکدن ایسه کرک علمک کرک

دينك بوكونىكى حاللارنى پيش ملاحظه يه آلمق وبونا كوره ،  
 مناسبترلينك طرزى حقنده آرسطونك دستورنجه هم ممكن هم  
 موافق كوزون بر شكلده بر فكر ايدىنك دها اي اولور .  
 كورولور كه بوكون قارشى قارشى به بوغوشان ايكي قوت  
 بر مسلك و مذهب اولمالرى اعتباريله دين ايله علم دكل ، دها  
 زياده فكر دينى ايله فكر علميدر . بر عالم ايچون عقايد دينيه  
 ايچنده نتايج علميه ايله قابل تاليف اولمايه حق برشى بولونماسنك  
 هيچ اهميتى يوقدر . چونكه دين ولو كه علم ايله قابل تاليف  
 اولسون ، بر طاقم احكامى عقيده شكلنده ، بر ايمان موضوع  
 اولق اوزره اورته يه سورر . بو احكام ذكايى وشعورى باغلار .  
 انسانك بزم طبيعى وقوفزك ايريشه ميه جكي بر ترتيب اشيا ايله  
 بر مناسبتنى افاده ايدر . ايسته بوندن دولاييدر كه ارباب علم او  
 احكامك كنديلرني دكلسه بيله مؤمنك اونلرى طرزقبولنى رد  
 ايدرلر . ديكر طرفدن مؤمنلرده بوتون اعتقادلرينك ، حسلرينك ،  
 عبادتلرينك علم طرفندن ايضاح و حق اثبات ايدلديكنى  
 كورسه لرده علم ايله بر دورلو باريشه مازلر . چونكه بو حادثه لر  
 بويله ايضاح ايديلنجه بوتون او دينى اوصافلرني غائب ايدرلر .  
 بناء عليه بوكون دينك عقايدى ايله علمك نتايجى آراسنده  
 بر آهنگ آرامغه قالمق بو يوك بريس كورمك اولماز . برچوق  
 ارباب علمه كوره ، علم تضمن ايتديكى طرز تفكر ، طرز حس ،  
 طرز تصديق و اراده دن دولايى دينى اساسا ، بوجه پيشين هان

رد و برطرف ایتمک ایستر . بونلرک ادعاسنجه دیندار آدملر  
ملکاتلرینی اوصورتله قوللانیرلرکه حرث بشرک ترقیسیله هیچ  
قابل تألیف دکلدرد . فکر علمی ساده جه فکر دیندن باشقه  
برشی دکلدرد، بلکه اونک رد و انکاریدرد . فکر دینی به قارشی  
عقلک عصبانی ، عکس العملی نتیجه سنده دوغمشدر . فکر  
علمینک ظفیری و فکر دینینک زوالی عینی بر شیدن عبارتدر .  
بناءً علیه بزم ایچون قارشیلایشیرنسی ایجاب ایدن شی  
دین ایله علمدن زیاده فکر دینی ایله فکر علمیدرد .

اول امرده شوراسنی سویله مک اقتضا ایدرکه ، کچن عصرده  
پک مودا اولان او پک راحت قطعی بولمه اصولی شرائط  
حاضرده نظراً بو کون غیرقابل تصوردر . مبارزه یالکیز ایکی  
مسلمک آراسنده اولمایوبده ایکی فکر آراسنده اوله جق اولورسه  
برشخص اولمق یعنی بر ومعقول برشعور اولمق ایستین بر آدم  
ایچون ذکالری تسخیر ایتمک مقصدیله منازعه ایدن دین و علم  
اساسلرینی بربرلریله مواجهه و مقایسه ایتهدن ایچلرندن برینی  
قبول ایتمک غیر ممکندر . بر فرد ایچون غیرقابل تصور اولان  
بو کیفیت اولویتله جمعیت بشریه ایچونده غیر قابلدر . چونکه  
اوده بر نوع شعوردر و اونک ویره جکی حکم فردککی قدر  
شرائط واحوال عارضیه به تابع دکلدرد . بناءً علیه علم ایله دینک  
مناسبتلری مسئله سی هر زمانکندن زیاده اساسلی و غیر قابل  
اجتناب وازاله در .

فکر علمی ایله فکر دینی آراسنده کی مناسبات

اولجه ابتدای امرده دینی یا خود علمی پیش ملاحظه الیق  
اهمیتسز بر مسئله کی عد اولونا بیلیردی. حالبوکه بو کون اویله  
دکلدر. علم بو کون، پک مستعمل بر تعبیر ایله، آرتق استحصال  
حریت ایتشدرد. علم و قتیلہ آنجق مابعد الطبیعی بعض پرنسپلرک  
ویردیکی بر طاقم قطعیتلره مالک ایدی. بو اساسلر واسطه سیله  
حادثات طبیعی تنظیمه چالیردی. حالبوکه صوکره، تجربه ده  
کندیسنه خاص و کندی نفسنده مکنوز بر پرنسپ بولدی.  
علی العاده فعالیت ذکا ئیه دن باشقه بر معاونه حاجت اولمادن علم  
بو کون هم آثارینک مالز مه سی اولان وقعه لر ی، هم بو وقعه لر ی  
تنظیم ایچون لازم اولان قانونلری تجربه دن استحصال واستخراج  
ایدیور. بوندن علمک کرک منشأ نده کرک مؤخر آ انکشافنده  
کندی کندیسنه کفایت ایتدیکی نتیجه سی عملی بر صورتده  
حقیقور. فکر علمینک ایلک وصف اساسیمی آرتق تحریات  
ایچون تجربه دن باشقه بر نقطه حرکت قبول ایتمه مک، تجربه دن  
باشقه بر منبع وقوف طانیما قدر. بناء علیه عالم ایچون علم ایلک  
و مطلق برشی کیدر ونه اولور سه اولسون باشقه بر شیئه توافق  
ایتمه یی علمدن طلب ایتک بیهوده در. علم آنجق وقعه لر له توافق  
ایتمکه عهد ایتشدرد. سوبله نه جک سوزلرک علم طرفندن مسموع  
اولماسی ایسته نیور سه علمک نقطه نظری قبول ایتک همه حال لازمدر.

ذاتاً بوکون هجوم موقعنده بولونان علمدر . شعور بشر  
 آرتق شبهه یوق که علمه منقاد اولمشدر . علمک قطعیتی مقاومتسوز  
 بر بداهت ایله کنديسنی قبول ایتدیر مکده در . بوکون فکر  
 علمی ایله فکر دینی آراسنده کی مناسبت شوشکلده نمایان اولیور:  
 بعض ارباب علمده فکر دینیک رد وانکاری صورتنده نمایان  
 اولان فکر علمی فی الحقیقه دین فیکرینی سلب ایدرمی یوقسه  
 بعض ظواهره رغماً اوکا امکان وجود بر اقایمی؟  
 شوالده ، فکر علمی اساس اعتباریله نه در؟ انکشافندن  
 بشریتده نه کی نتایج تولد ایدیور؟

## ۱ — فکر علمی

ده قارتک والخاصه قانتک مطالعاتنه کوره فکر علمی نی  
 علمک شرائط منطقیه سی ومفکره بشرک طبیعت وماهیتی غیر قابل  
 تحول بر صورتده تعیین ایدیور کی کورونمکده ایدی . ده قارت ،  
 هرشیئی ، دوغرودن دوغروییه یاخود بالواسطه بر طاقم عناصر  
 ریاضیه یه تنزیل وارجاع ایده بیلیمکده مساعده بر نقطه نظر دن  
 کورمک یولنده بر قصد مخصوص تعقیب ایدردی . قانت  
 حادثاتک آارلنده ، فضا وزمان ایچنده ضروری بر رابطه  
 اولدیغنه بوجه پیشین حکم ایدیوردی . بواساسلرله مجهز اولان  
 مفکره یکی برشوق ایله طبیعتک قوانینی کشفه دوغرو آتدی .  
 استحصال ایتدیکی موفقیته باقهرق آرتق حقیقتک ابدی ومطلق

شکلی الله ایتمش اولدیغنه حکم ایتدی. فقط علمک نه صورتله وجوده کلدیکی، انکشافی و قطعیتی نه کبی شرائطه تابع اولدیغی یقیندن تدقیق و تتبع ایدیلنجه بوفکری دیکشدرمه مجبوریت حس ایدیلدی.

بوکون شوراسی کوزلجه اثبات ایدلمشدرکه کرک فکر علمی کرک اساسات علم، حاضر یاپلمش، معلوم برشی دکلدر. علم وجود بولدجه و ترقی ایتدکجه فکر علمی ده تشکل ایدر. بر طرفدن ذکا علمی یاپار. علمی موجوداتدن استخراج ایتک بر ترکیب کیمیوی ایچندن اونک بر عنصرینی چیقارمق صورتنده وقوعه کلز. دیگر طرفدن اثر اونک صانعی اوزرنده بر عکس تأثیر اجرا ایلر. مقولات ادراک دیدیکمز شی مفکره نك حادثاتی کنندیسنه تمثیل ایتدیرمک ایچون چالیشیرکن اکتساب ایتدیکی اعتیاداتک هیئت مجموعه سیدر. مفکره بونلری کنندی غایه سینه توفیق ایدر و کنندیسی ده اونلرک طبیعت و ماهیتلرینه اویار. ائتلاف بر مساعده متقابله اساسی اوزرینه وجود بولور. فکر علمی حادثاتک کیدوب ایچنه دیزلدکلری، صیرالاندقلری بر محفظه دکلدر. ذی حیات و اویناق بر ذکادر، انکشاف ایدر، اعضای بدن ایله حائر مشابعت اولمقدن خالی دکلدر. کنندیسندن طلب ایدیلن ایشی یاقمق صورتیه، تمرین ایله کنندی کنندیسنی تعیین ایدر.

فکر علمی بی آرتق یورو مکده اولدیغی استقامته چویرمش



کبی کورون شی رونه سانس دورنده ظهور ایتش اولان ایکی  
فکر در : بر طرفدن دوام و بر برینه انضمام قابلیتنه مالک ،  
محقق بیلکیمله دسترس اولمق آرزوسی ؛ دیگر طرفندن ده  
طبیعت اوزرینه بر تأثیر یاپه بیلیمک املی . علم تجربیه بی یکانه بر  
اساس لایتزلزل اولمق اوزره تلقی سایه سنده آرتق بو ایکی غایه  
واصل اولابیله چکنه قانعدر .

فکر علمی دیمک هر بیلکینک منبعی ، قاعده سی ، اولچوسی  
وقونترولی اولمق اوزره وقعه بی قبول ایتمکدر . علمک وقعه  
تسمیه ایتدیکی شی ساده جه بر حقیقت معلومه دکلدر . مشاهده  
ایدنن یا خود قابل مشاهده بر حقیقتدر . بر وقعه بی تعیین ایتک  
ایسته ن بر عالم وقعه نک خارچنده اخذ موقع ایدر ، اونی تدقیق  
و مشاهده ایدر . ذاتاً یالکیز بیلیمک آرزوسیه حرکت ایدن  
هر مفکره ده ده بویه یاپار . ایسته بو صورته عالم اووقعه بی تفریق  
و تمیز ایتمک ، قید ایتمک ، معلوم تمثالرله افاده ایتمک و قابلسه  
اولچمک چالیشیر . بو عملیه لک هپسندنه مفکره نک اساسلی بر  
حصه سی وارددر . فقط بو حصه وقعه بی سائر مفکره لر ایچونده  
قابل قبول و ادراک بر حاله کتیره بیله چک صورتده معامله ایتمک  
انحصار ایلر . ابتداءً معلوم اولان شی بر انطباعدن و بر فردی  
حسندن عبارت اولدیغی حالده فکر علمینک بونک یرینه اقامه  
ایتدیکی اثر صنعت معین و هر کس ایچون موجود بر شیدر ،  
غیر شخصی بنای علم ایچون قابل استعمال بر طاشدر .

ایشته فکر فلسفینک، حد ذاتنده وارلنی یاخود جوهر دائمی اشیا پانیق یولنده کی قدیم املی برچوق تردد دوره لرینی کچیرد کدن صو کره اشیا به بو صورتله اویمش و علمی صورتده تعریف آلتنه آلمشدر.

مع مافیة مفکره تجربه حقننده تفکراته دالنجہ تجربه نك یالکز وقعه لر میدانہ قویمقدن باشقه برشی یاپوب پایه مایه جغنی، تجربه نك اداره سی آلتنده وقعه لرک حدودی کچیلہ رک قانون دنیلن شیده وصول قابل اولوب اولامایه جغنی دوشونور. وقیلہ قانونلر ذکا طرفندن طبیعتہ امر و وضع ایدلمش شیلر کی تصور اولونوردی. شیمدی ایسه قانونلری اشیا دن استنباط واستخوج ایتک موضوع بحثدر. قانونلر اشیا نك ایچنده حاضر، یاپلمش بر حالده بولونمازلر. قانونلری بولمق ایچون همان قولایجه حق اشیا نك ایچندن اونلری استخراج کافیدر ظن اولونما ملی. علمی وقعه ناعمل مفکره نك و بیلدکینک بر برلری اوزرنده عمل وعکس العمللریله تشکل ایدیورسه احتمالکه وقعه لرده قانون اولاییله جک صورتده او صورتله بر معاملیه تابع طوتولاییلر لر.

تصادف ایدلمه مسی دائرة امکانده ایدی کی کورون بر حال، بو املک قابل تحقق اولدیغنی میدانہ قویدی. اگر طبیعتک بوتون حادثاتی بر برلری اوزرنده عینی صورتده تأثیر وعکس تأثیر حصوله کتیرسه لر دی اولیه مشوش و متحول بر هیئت مجموعه تشکیل ایده جکلردی که بونلرک ایچندن تجربی صورتده قانونلری

بولوب چيقارمق شـبـه سز ابدیاً غير قابل اولاجقدى . فقط تجربه من آلتنه دوشن شيلرده اويله بعض هيئات مجموعه وارتباطلر واردركه يك مشوش اولمقله برابر نسي بردوام و ثباته مالكدركلر و كائناتك سائر اقسامندن محسوس بر صورتده مستقيدركلر . ايشته بو حال سايه سنده تجربى استقرا قابل اولمشدر . مفكره بو استقرا ايله هيئت مجموعه اشيا ايچندن ايكي حادثه يي تجريد ايدرك ارالرنده بر تساند تعين ايده بيلور .

ايشته وقتيله مابعد الطبعي اولان علت فكرى معلوم شيلره توافقي ايدرك بويله علمى صورتده تعين ايتمشدر .

هپسى بو قدرله قالماز . مفكره اوچنچى بر فكرك ، وحدت فكرينك تاثيرى آلتنده قاهره بوندن تجربى بر علمه قابل تطبيق بر طاسلاق ، بر پلان چيقاريلوب چيقاريله مائه جغنى آرامشدر . قوانين حكيميه نك بلا واسطه بيلكيسى پارچه پارچه ايرلمشدر . بر قانون بر برلرینه مربوط فقط ديكر لرندن تجريد ايديلمش بر چيفت حادثاتدر . مشابته و تمثيل طريقيله مفكره يقيندن يقينه يورويهرك قانونلرى بر برينك ايچنه ادخال ايدره ، بونلرى خصوصى و عمومى ديه آيرير . بو صورتله ، تفريق كيفيتندن صوكره برده جمع و توحيد معامله سى ياپار و بوتون قانونلرى يكانه بر قانونه ارجاع كيفيتنى بر غايه كمال اولمق اوزره تصور ايده بيلير . ايشته مابعد الطبعيه علماسنك وحدتى بو صورتله حادثاتك بر تنظيم علميسى شكلنه كيرمشدر .

انسان، طبیعتی تمثالر، حتی بعضاً بر طاقم وسائط صنعیه  
ایله بویله ساده لشدیرر. فقط بوتون بواختراعاتک نقطه حرکتی  
اولان اصل علمی وقعه ده ابتدائی وقعه نك خیالی بر او بڑ قیف  
معادلی، سوکره دن یالمش بر تمثالی دکلیدر؟

فکر علمی امللرینی جرئتکارانه صورتده آرتیر مقدن نه نتیجه لر  
چیقه بیله جکینی درك ایدر. غایه سی دائماً بر در: حادثاتک شرائط  
ظهوری حقنده ده ای بشرده ممکن اولدینی قدر صادق وقابل  
استعمال واستفاده بر صورت ذهنیه خلق ایتک. فقط مادی  
وخصوصی حادثه لر دن اوزا قلا شوب ده یالکیز بسید نتایجی قابل  
تحقیق اولان عمومی حادثه لری پیش ملاحظه آلمق یا خود تخیل  
ایتک ایسترسه ویردیکی ایضا حاتک بلکه کافی فقط بوندن دولایی  
بهمه حال اوله اولمالری لازم کلمه دیکینی کورور. و بو بویوک  
تلقیات و تصوراته آنجق تجربی فرضیه لر قیمتی عطف ایلر.

کیتدکجه توسیع و تعمیق ایدیلن تجربه یالکیز جوهر،  
علیت و وحدت مفهومات فلسفیه سنی تمثال ایتدیر مکله قالما مشدر.  
مابعد الطبیعه ایله عقیدوی علمک الی الابد بر طرف ایتدکلرینه  
ذاهب اولدقلری بر مفهومی ده اساسی متفکر لر دن آلمشدر.  
بوده جذری بر تحول، قسمی یا خود عمومی بر تکامل مفهومیدر.  
یونان حکمت شناسلری بو مهم اساسک قیمتی تعیین ایچون  
مناقشه ایدوب دورور لردی. حالبوکه بو کونکی علم کرک اشایی  
بیلمه مزك، قید، تصور، وتصنیف ایتمه مزك واسطه لر نده کرک

طبیعتك كندیسنده صورت قطعیه ده دواملی و قطعی برشی  
کورمز. صرف تجربی بر علم، تعریفی اقتضای اوله رق، یالکمز  
تقریبی، موقت و قابل تعدیل اولمقله قالماز. ینه علمك نتایجنه  
کوره، انسانلرك کشف ایتدکلری الك قطعی قانونلرك بیله مطلق  
صورتده ثبات و دوامی تأمین ایده جك هیچ برشی یوقدر.  
طبیعت احتمالکله تا اعماقنه وارنجیه قدر تکامل ایدیور.

موجودات ایله متساند فکر علمی ده آرتق تکامله تابعدر.  
بو معناه بر نسبییت فکریدر. هر دورلو ایضاحاتی معلوم  
اولان حادثاتك مقدارینه و کندیسنك اوآنده بولوندیغی احتمالکله  
موقت حاله کوره بالضروره نسبی اولمق اوزره تلقی ایدر. مع مافیله  
بو نسبیلك اونك قیمته خلل ویرمز و اصولنك ایلك ماده سی  
اولان انضمام وقوف و معلومات کیفیتنه بر مانعه تشکیل ایتمز.  
چونکه تکامل جذری اولسه بیله کیفی بر صورتده وقوعه کلن  
علماً آکلاشلماز برشی دییه تصور اولونماز. موجوداتك الك  
درین، الك بعید اساسلری دکیشسه بیله بوتحولده بلاواسطه  
قابل تدقیق و مشاهده اولان قانونلره، تجربی قانونلره مشابه  
بر طاقم قانونلره تبعیت ایتك مجبوریتنده در.

بو کونکی فکر علمی نك بر وصف ممیزی ده ها واردر.  
شبهه یوق که فکر علمی، فیکرجی بر مابعد الطبیعه نك قصد  
ایده جکی معنا ایله عقیدوی دکلدز. فقط ایچنده بر چوق طبیعی  
قوتلر بریکمش جانلی برشی کبی موجوددر و وارلغی محافظیه

ساعیدر. کندی کنیدیسی، محاکمه نك و حکمك قعدۀ قصواسی  
اولمق اوزره کورور. بناءً علیه مابعد الطبعیه عائد هر دورلو  
عقیده پرستلکی رد ایتمکه برابر کندی لهنه اولمق اوزره تجربه  
اوزرینه مؤسس نسبی بر عقیده پرستلک تأسیس ایله. نامتناهی  
برقوة انکشافیه سی اولدیغنه، نامتناهی صورتده آرتقمده بولونان  
برقیمتی اولدیغنه اینانیر. بناءً علیه هر هانکی بر مسئله موضوع  
بحث اولورسه اولسون، دوباره مون کبی بیله میورم! نتیجه سنه  
وارمقدن اجتناب ایدر. بو کون بیلمدیکمز بر شیئی الی الابد  
بیله مهیه جکمز کیسه ادعا ایده مز. بو کون بیلمدیکمز شی  
بزم ایچون الی الابد بیلمه مهیه جک بر حالده قالسه بیله حد ذاتنده  
وقوف علمیمزك شرائط عمومیه سی دائره سنده قابل ادراک  
اولدیغی بیلیمك ده بر نقطه نظر دن قطعی بر نتیجه دکلیدر ؟  
علمك تاریخی اثبات ایدیور که بیلدیکمز ایله بیلمدیکمز  
آراسنده بر تمادی و اتصال موجود اولدیغی ادعا ایتمکه حقمز  
واردر.

بونک ایچون آرتق علمی صورتده غیر قابل ایضاح تعبیرینک  
بر معناسی قالمامشدر. اسرار آلود بر قوت، معجزه نما بر وقعه،  
بویله بر وقعه نك وجودی قبول اولونسه ده، طانیدیغمز قانونلر  
اعانه سیله ایضاحه موفق اولامادیغمز بر حادثه دن باشقه بر شی  
دکلدر. اگر بوعدم امکان ثابت اولورسه علم او وقعه یی ایضاح  
ایچون باشقه قانونلر آرار.



علمك او كرتديكى قانونلار بر طاقم مطلق حكملار دكلدر .  
 بونلر مجربك طبيعته ايراد ايتديكى برر سؤالدر . اكر طبيعت  
 بو قانونلره اويمازسه مجرب اونلرى ديكشديرمكه حاضردر .  
 بويله اولمقله برابر فېكر علمى بوتون بوسؤاللارك تضمن ايتدكلرى  
 مصدره لره قارشى عملى بر اعتماد مطلق بسلر ، كه بو اعتمادده  
 بالذات فېكر علمينك مشروعتيندن وعموميتندن باشقه برشى دكلدر .  
 ايسته فېكر علمى بو ايسه ، عجباً شعور بشرده فېكر دينى به  
 بر بر اقيزى ؟

## ۲ — فېكر دينى

مسئله يي حل ايتمك پك ساده بر يولى واردى . اوده  
 عقل بشرك بوتون اصلى قسمى يالكيز فېكر علميدن عبارت  
 اولديغى ، فېكر علمينك شيمدى به قدر ادوار مختلفه ده نمايان  
 اولديغى بوتون فېكرلرك و تمايللارك آرتق علم اساسلرنده محقق  
 و مشروع افاده لرني بولدقلىرني اعلان ايتمكدن عبادتدى .  
 بو صورتله ، علم خارجنده قالان هرشى عقل خارجنده ده  
 قالمش اولوردى . دين ايسه بالضروره علمدن باشقه برشى اولديغى  
 ايچون علمك حقيقته قابليتلى بر طاقم اوبزقتيف تمثاللر حاله  
 قلب ايتك وظيفه سيله مكلف اولديغى تجربه نك خام مالزمه سى  
 آراسنه بروجه پيشين آتلمش اولوردى .  
 فېكر علمى موجودات حقنده كندى نقطه نظرندن باشقه

دورلو بر نقطه نظرک مشروعتنی قبول ایدہ بیلیمک ایچہ-ون  
 کندیسنی عقلک ایچہ-اباتنہ تمامیلہ کافی کلیور کی عد ایتہ مسی  
 ودها عمومی بر عقلک حقوقنی تسلیم ایتسی لازمدر. شبهہ یوق کہ  
 فیکر علمی بو عمومی عقلک اک معین شکلیدر، فقط بوتون عقل  
 اوندن عبارت دکلدر. فیکر علمینک انسانلرک من القدیم صرف  
 کندی نوعلرینہ خاص بر امتیاز کی عد ایتدکاری عقل یرینہ  
 آرتق قائم اولمش اولدینی محققمیدر؟

عقل علمی تہذیب علمی ایلہ تشکیل وتعیین ایدلمش بر  
 عقلدر. حالبو کہ تام معناسیلہ عقل روح بشرک موجودات ایلہ  
 مناسباتنک ہیئت مجموعہ سی طرفندن روح بشرده موجودات  
 حقندہ وجود بولان بر نقطه نظردر. علملرک و حیاتک  
 مواجہہ سندہ مفکرہ دہای بشردن فیشقیران بوتون آیدینلق  
 ومثمر دوشونجہ لری طوپلایہ رق وقاریشدی رارق کندیسنہ  
 برطرز حکم پیدا وتشکیل ایلر کہ عقل ایشہ بودر.

ایشہ بو معناجہ منحصرأ علمی بر نقطه نظر دکل دہا  
 عمومی اوللق اوزرہ عقل بشر نقطه نظرنی اختیار ایدہ رک  
 مسئلہ دہا اولندن، پشیندن حل ایدلمہ دن فیکر علمی ایلہ  
 فیکر دینی آراسندہ کی مناسبات تحری اولنہ بیلیر.

علم عملیاتدہ کندی کندیسنہ کافی کلیورسہ، تجربہ دہہ بر  
 اساس اولین وقطعی بولیورسہ یالکیز علمی دکل فقط بشری  
 عقلک نظرندہ علمک مطلق اولہ رق تلقی ایدلمسی لازم کلدیکی

نتیجه سی می چیمق لازم کلیر؟ حد ذاتنده بر کل کبی کورون  
 بر شئك حقیقته دها بویوك بر كلک بر قسمی اولاییله جکی  
 يك احتمال داخلنده در. بوتون ترقیلر حقیقته آنجق منسوب  
 اولدینی کل سایه سنده پایدار اولان بر جزئی یالکیز باشنه وار  
 ایش کبی انکشاف ایتدیرمک صورتیله وجوده کیشدر. علم  
 کندی دستورلری داخلنه آلدینی شیلردن باشقه بر وجود،  
 باشقه بر شأیت طانیماقده حقلیدر. فقط بوندن عقلک علم  
 طرفدن طاندینی شکلده کی وجود ایله حد ذاتنده اولدینی طرز دکی  
 وجود آراسنده بر فرق کوزتمه سی نتیجه سی می چیمق  
 ایجاب ایدر؟

علم موجوداتک یرینه بر طاقم تمثالر اقامه ایتمکدن عبارتدر.  
 بو تمثالر موجوداتی اولیله بر منظره آلتنده اراشه ایدر لر که بو  
 بوتون انسانلر ایچون قابل استفاده، قابل ادراک ونسبتله صریح  
 بر طاقم مناسبتلرله ترجمه وافاده الیریشیلیدر. علم، وجودک  
 بری صرف و ساده بر شأیت دیکری او بثر قتیف دنیلن  
 آیری، واضح بر صورت ذهنیه اولمق اوزره ایکی یه انقسامندن  
 نشئت ایدر. علم حقیقی وارقلری اک خفیف قسملرینه وارنجیه  
 قدر تعقیب ایچون غایت مصر اولمقله برابر موجوداتی دانما  
 تماشا ایدن و او بثر قتیف بر حاله صوقان بر کوز اولمقدن خالی  
 قالماز. بر تضاده دوشمکمزین، شأیتله کنیدیسی یکو وجود  
 عد ایده مز. بیلکینک شرائطی اولان عمومیلک، ضروریلک،

او بڑ قتیفلاک ، مقولاتدن برر شیدر لر . مقولاتی وجود ایله بر  
عد ایتک اونلرک دیکشمه یین اوصاف قطعیت و صحتنه او بروجه پیشین  
حکم ایدن مابعد الطبیعی اصوللرک عطف ایتدیکی مطلق قیمتی  
ویرمک اوغور . حقیقی علمده مقولات تفکرده قابل تحولد لر .  
چونکه آیری و بروجه پیشین غیر قابل ادراک بر حقیقی وارلق کبی  
وقعه لره اویمق مجبوریتنده در لر .

علمک کندیسسی ، بو غیر قابل ازاله اولان ایکیلکه شهاد  
ایدر . چونکه شأنیته ایکی پرنسیپلری اولان موجودات ایله  
مفکره ، علم ایچون حل ایدمه مه جکی معطیات در لر . بونلری  
کندی نقطه نظرندن او بڑ قتیف بر صورتده پیش ملاحظه  
آلدینی زمان یالکز اونلری کندیسسه تمثیل ایتدیره بیلدیکنی  
ظن ایتمکله قالماس ، تک بر شأنیته ارجاع وتنزیل ایدمه بیلیرمده  
ظن ایلر . فقط بو ایشی ، آنجق شرائطی تدارک واحضار  
ایدیلیرسه یابه بیلیر . شرطلرده شونلردر : اولاً ، بر طاقم موجودات  
واشیایا اولمالی . چونکه علم بونلری کندی کندیلککندن  
بولاماز . ثانیاً ، بو موجودات واشیادن آیری بر مفکره اولمالی .  
بو مفکره او موجودات واشیایی او بڑ قتیف صورتده پیش ملاحظه  
آله جق و کندیسسه نجه قابل ادراک بر حاله کیره جک صورتده  
دیکشیدیره جکدر . اشیا و مفکره ، حد ذاتنده بر برلرینه انجذابلری  
ویا تعارضلری نه اولورسه اولسون ، ایکیسسی بردن علم ایچون  
اویله بر وارلقدرکه علم اوندن آیریدر . علم کندیسسی فلسفی

صورتده تحلیل ایدرسه بونی بیلمه مزلك ایده مز. چونکه دائمی صورتده اونلردن آلدیغی عناصردن ترکیب ایدر .

عجبا بو عناصر، علمی فکرک مطالباتنه تمامی تمامنه توافق ایده جک صورتده قابل تحویل واعمالیدر؟

اشیا و موجوداتی تمثیل و ارائه ایدن علمی معلوماتده مفشألرندن دولایی اویله بر وصف واردرکه علمه تمامیله تمثیل ایدیله مز . چونکه علم موجوداتی بوکا مخالف بر نقطه نظرندن پیش ملاحظیه آلیر . بو وصفده غیر متجانس بر تمادیدر ، بر اولان برتنوع و کثرتدر، بو، بر « شی » اولابیلیمک ایچون اول امرده حواس و ادراك طرفندن کیفی بر عدم تمادی وعددی بر کثرت صورتنده ترجمه ایدیمک اقتضا ایلر . علم کندییی ایچون خام مادهیی ارائه ایدن بو غیر متجانس کثرت وتنوعدن حرکت ایدر و بونی بر متجانس تمادی حالنه کتیرمکه چالیشیر . بونی ، کیفیتلری کیتیرله افاده ایتیمک صورتیه یاپار . حالبوکه افاده ، افاده ایدیلن شی ایلر بر مناسبت محافظه ایتیمک مجبوریتنده در. یوقسه قابل استفاده اولماز. کندییی باشلرینه پیش ملاحظیه آلنان دستورلرده عدم تمادینک وعدم تجانسک بوتون ایزلری زائل اولسه بیله بودستورلری تطبیق ایتیمک لازم کلدیکی زمان شأنیت ایلر اولان مناسبتلرینی تخطر ایتیمکدن و بو مناسبتنه مراجعت ایتیمکدن صرف نظر اولونه ماز .

عکسی مسئلهیی تدقیقه کیریشیمک یعنی معلوم تنوع و تخلفلری

وحدته ارجاع ایتمه که چالیشمایوبده وحدتدن حرکت ایدهرک  
تنوع وتخللفری بوندن چیقارمغه چالیشمق خصوصنه کلنجه،  
بو بلکه تاریخی ویا مابعدالطبیعی بر مسئله اولابیلیر، فقط علم  
بویوله آنجق ظاهرأ سلوک ایدر. حقیقتمده بو، علمی بر طرز  
دکلدر. صرف تجربی بر علم تمثیل ایدر، تنقیض ایدر، توحید  
ایدر، فقط انکشاف ایتدیرمز، تنوع وتخللف ایتدیرمز. بونک  
ایچوندرکه علمک تنزیلات و ارجاعاتنده پایدار قالان تنوع  
وتخللف اثری حدذاتنده غیرقابل احما وازاله در .

بونک کبی، موضوع علم اولان صرف علمی ذکانک اوستندهده  
عمومی صورتده ذکا موجوددر. علم، ذکایی ساده بر آلت ،  
مطاواعتکار بر حاضر لایحی حالنه ارجاع ایچون بیهوده یره  
چالیشیر دورورر. ذکا کندی حسابنه چالیشیر، طبیعتمده انتظام،  
سادگی، آهنگ کبی اوصاف بولونوب بولونمادیغنی آراشدیرر .  
بونلر حادثاتک حد ذاتنده کی خواصلرینی افاده دن زیاده ذکایی  
منمون ایتمه قابلیتلی وصفلدرر . علمک تحریاتنه حاکم اولان  
بو مفهوملر حقیقتمده صرف فیکری مفهوملر دکلدر . هپسی  
بردن بر طاقم حسلدرر. بدیی یاخود اخلاقی احتیاجلدرر .  
او صورتده که حسده ارباب علمده کی جانی وفعال وارغیله  
فکر علمی به مربوطدر.

بوندن آکلاشیلیر که علم موجوداتی ومفکره بشری کندی  
طرزنجه ید تسخیرینه کچیرمکه برابر اونلری تمامیه اله آله مازم



موجوداتك وارلنى علمك تمثيل ايتدردىكى وارلقدن بالضروره  
دها بويوكدر . مفكره بشرده علمك قوللاندىنى ملكات  
ذكائيه دن دها فضله ملكات واردر . او حالده نه دن انسان  
علمك آنجق تفرعات صورتيله قوللاندىنى ياخود آز چوق  
بوش براقدىنى ملكاتنى كندى حسابنه انكشاف ايتدirmek  
حقنه مالك اولماسون ؟

علم ايله وجود آراسنده ، او بركتيف ايله سوبو بركتيف  
آراسنده ، مجرد ذكا ايله حس آراسنده صريح بر حدود  
چيزمه نك عدم امكانى ، بوايكى پرنسپى غير قابل تفریق و تمیز  
برصورتده احتوا ایدن بر متوسط منطقه نك ضرورى دوامى ،  
— وجودى بوش وعمومى مناسبتره ارجاع ایدن — علمى  
دنیا ايله — كندى موجوديته بر وارلق و بر قيمت عطف ایدن —  
جانلى و متفكر فرد آراسنده بر اتصال تأسيس ايدر . ماهيتلى  
حقنده عقیده لر تأسيس ایده بيلمك ايچون يرلرینه اقامه ايتديكمز  
مفهوملر آراسندن ، اوزاقدن باقىله جق اولورسه علمك وصف  
ميزى اولان مجرد قابليت ادراك ايله حس بشر بر برلرینه معارض  
ومخالف لى كورونورلر . فقط حقيقتده بويله بر آريلق يوقدر .  
علم فردى وارلقلر ك هيچ يرطو تمامسى ايجاب ایدن بر منظومه  
دساتير اولمقله برابر آنجق انطباعلر ينى و فردى فكرلر ينى نهايتسز  
بر ترقى ايچنده اعمال و ترتيب ایدن فردى مفكره لرده

وجود بولور، انكشاف ايدر، پايدار اولور. حقيقتده موجود اولان شی علم دکلدر. چونکه علم کلهسی آنجق برغایه بی افاده ایدن بر تجربه دن عبارتدر، مطلق برشیدر، بناءً علیه یالکیز بر فیکردر. حقيقتده موجود اولان شی سعی علمیدر، بوده دائمی صورته حال تشکل وتکونده در. حقیقی علم ارباب علمدن قابل تفریق دکلدر. متحول وسویر کتیف حیات دائما علمک غیرقابل ازاله بر بارچهسی قاله جقدر.

علمده فرد موجوداتی غیر شخصی بر نقطه نظر دن تنظیم وتریب ایتکه چالیشیر. کندی اثری اولان علم اونی موجوداتی فردک نقطه نظر دن تنظیم وتریب ایتکدن ناصل منع ایده بیلیر؟ واقعا بو طرز تنظیم علمک ویردیکی معناجه او بر قتیف بر قیمتی حائر اولماز. فقط حسی ممنون وتطمین ایدرسه موجوداتی بر برلرینه ارجاع ایتک احتیاجندن دهها آز حقیقی اولمایان بر طاقم بشری احتیاجلره توافق وتقابل ایتش اولور.

فرد نقطه نظر دن یا پلش تنظیم وتریب کیفیتنده مختلف درجه لر قابل تصوردر. اک آشاغی درجه هر شیئی، کندیسنی دنیانک مرکزی اوله رق تلقی ایدن یکانه بر بئلکه نسبتله پیش ملاحظه یه آلمقدر. حالبوکه بوصوک درجه فرد جیلک فوقنده دهها بر طاقم تنظیم وتریب امکاملری وارددر. بونلرده موجودات یالکیز بر فرد دکل، بر چوقلرینه، بر کومه نک، بر هیئتک، بر ملتک، انسانیتک ترکیب ایتدیکی فردلرک هیئت

مجموعه سنه تعلق ایتدیریلیر. سو بڑ کتیف ترتیب و تنظیم بو صورتله علمک عمومیلکنی کندیسنه کوره تقلید ایده بیلیر. علم، تجرید و تنزیل و ارجاع طریقله خصوصیدن عمومی نی حیقاریر. سو بڑ کتیف شیلر ساحه سنده فردلرک استلافیه، تنوع و تخلفلرندن بر نوع وحدت حصوله کتیرن آهنگ واسطه سیله عمومی به مشابه برشی استحصال اولونه بیلیر.

ایشته دین بو جنس بر ترتیب و تنظیم کیفیتنی اراده ایدر. فرده بر قیمت عطف ایلر و اونی حد ذاتنده بر غایه اوله رق پیش ملاحظیه آلیر. فقط اوکا مقدراتی ایضا ایچون دیگر فردلری ده حد ذاتلرنده بر غایه اوله رق قبول ایتمکدن، بناء علیه باشقه لری ایچون باشقه لری داخنده یاشامقدن باشقه بر واسطه طایماز. بو، تک بر شخصک شخصیتی دکلدر. هربری بر غایه اوله رق قبول ایدلمش وعینی زمانده مشترک بر حیات ایله زنده بوتون شخصلرک شخصیتیدر. ایشته بو شخصیت مرکزی بر فکر وجوده کتیریر. هرشی هپ اوکا تعلق ایتدیریلیر.

بویله هم سو بڑ کتیف هم مشخص بر ترتیب و تنظیمک وجودینه فکر علمینک مانع اولمایه جغنی تسلیم ایتمک پک دوغرو عد اولونه بیلیر. بونلر، لایرویه رک دیدیکی وجهله، فرقلی شیلردر، نا قابل تألیف شیلر دکلدر. مع مافیه بو قدرله قناعت ایدیه من. بو تلقینک قابل اولماسی، تضاده دوشولمه دن قابل قبول بولونماسی اونی قبول ایتمه من ایچون کافی دکلدر. بونی دوغرو

عد ایتک ایچون مثبت بر سبب اولق ایجاب ایدر. دین لهنده  
بویله بر سبب کوستریله بیلیرمی؟

\*  
\* \*

انسانه یالکیز علمی وقوفک دکل کندی حیاتنک ده  
شرائطنی پیش ملاحظیه آلمغه مساعده ایتک ایجاب ایدر.  
حالبوکه تدقیق و مشاهده ایتدیکمز، تصور ایلدیکمز و جهله  
حیات بشر ایچون ضروری بر تمّل وارسه اوده فردیتک  
شأنیتنه و قیمتنه اعتقاددن عبارتدر.

افعال و اعمالک هربری، سوزلرمک یاخود دوشونجه لرمک  
اک کوچوکی موجودیت فردیه مه، بونک محافظه سینه، دنیا  
داخلنده کی وظیفه سینه بر قیمت، بر شأنیت عطف  
ایتدیکی افاده ایدر. بو حکمک نه کی او بر قییم بر قییم  
حائز اولدیغنی هیچ بیلیم. بونی بکا اثبات ایتمه لرینه هیچ  
احتیاجم یوقدر. تصادفاً بوبابده دوشونه جک اولورسه م بوفکرک  
شبهه سز سوق طبعیمک، اعتیاداتک، شخصی وارثی افکار  
باطله مک بر افاده سی اولدیغنی کوریرم. قبل التدقیق ویرلمش  
حکملره استناد ایدن بویاکلش مطالعه لره توفیقاً کندیجه کندی  
موجودیتده پایدار اولق تمایلی عطف ایلرم، کنیدی بعض  
شیلره قادر عد ایده رم، فکرلرمی جدی، خصوصی، قیمتلی،  
فائده لی بولورم، بونلری نشره و قبول ایتدیرمکه چالیشیرم.  
بونلرک هیچ بری بر پارچه حق علمی بر تدقیق قارشیدسینده

پایدار اوله بيله جك شيلر دكلدر. فقط بو خوليار اولمازسه  
ياشايه مام، هر حالده بر انسان صفتيله ياشايه مام. بويالانلر سايه سنده  
بعض سفالتلري تخفيفه، هم جنسلر مدن بعضيلريني حياته قاتلانمغه  
ياخود حياتي سومكه اقناع ايدهرم، حياتي سومكه كنديمي ده  
قانديريرم و بوني موافق صورتده استعمال چاره سني آرارم.

حيات اجتماعيه ايچون ده حيات فرديه ده اولديني كيدر.  
حيات اجتماعيه ده علم نقطه نظرندن دكرسز بر طاقم فكرلره  
استناد ايدر. عايله، جمعيت بشريه، وطن، انسانيت دنيلن شيلرك  
وار اولمغه و پايدار بولونمغه ميال برر فرد اولدقلىنه و بونلرك  
ادامه سي و انكشافى ايچون چاليشمق قابل واي اولديغنه اينانيلير.  
علمه نه قدر مربوط اولورسه ق اولم صنعتك ده مشروعتيني  
و علويتني تقدير ايدهرز. فقط صنعت موجوداته علمك مشاهده  
ايتديكي اوصافه ضد بر طاقم اوصاف اعاره ايدر. صنعت،  
شانيت ايچندن راست كله برشيئي فرضا بر آغاجي، بر قازاني،  
بر شكل بشري يي، سمائي ياخود دكيزي كسر آلير، و بو وجود  
خيالي يه صنعتكارك دهاسندن دوشمش مافوق طبيعي بر روح  
نفخ ايدر. بو سايه ده اوغير ثابت شكل احتمالي يي زمانك ونسيانك  
نچه سندن قورتارير. حالبوكه قوانين طبيعت اوكا آنجق آني  
وظاهري بر موجوديتدن باشقه برشي بخش ايتيوردي.

اخلاق بر شيئك ديكر شيدن اي اولديغني ادعا ايدر.  
بزده سفلى و علوى فعاليتلر بولنديغني، بونلردن، ايسترسك

سفلی ایسترسهك علوی اولانلری تمرین ایدیه بیله جگمزی سویلر  
عقل نامنی ویردیکی برملکهك تلقیناته اینامه مزی بزه توصیه  
ایلر. بو ملکهك نه اولدینی ایی تعریف ایدیه مدیکی کبی صرف  
علمی بر طاقم ملکهکاته ده ارجاعی غیر قابلدر. عقلک نصیحتلرینی  
تعقیب یاخود امرلرینه اطاعت ایله یهرك طبیعی فردیتیزی مرتبه  
کماله ایرمش بر شخصیت حالنه قلب ایدیه بیله جگمزی بزه تأمین  
ایلر. اکر یکانه حاکم علم دن عبارت اوله جق ایسه بوتون  
بو جمله لرك قیمتی عجبا نه در؟

علمک کندیزی بیله، مکتب طلبه سنک بلله دیکی مسئله لرده  
دکل ده بر عالمک روحنده یاشادینی شکلده پیش ملاحظه  
آلنه جق اولورسه فعالیت علمیه یه قابل ارجاع اولامایه جق بر  
فعالته دلالت ایدر. نه دن علم ایله مشغول اولمالی؟ نه دن کیتدجه  
مشکله شن بو قدر سعیه قاتلانمالی؟ حیاتک بر خیر اولدینی  
برشایت اولدینی فرض اولونسده یاشامق ایچون علم ضروریمیدر؟  
علمک بزه تهیه و تأمین ایدیه جکی حیاتک دها خوش، دها  
ساکن، رفاهه و سعی اقله قارشى فطرى صورته موجود  
اولان میلزمه دها اویغون اوله جنی محققیمیدر؟ بو دها زیاده  
دها یوکسک، دها نجیب، دها مشکل مبارزه لر، یکی احتیاسلر  
واملرله دولو، بالخاصه علمه یعنی صرف حقیقت بیلکیلرینی  
هیچ بر فکر منفعت کوزتمکسزین آزامغه عاشق بر حیات  
اوله جق دکلیدر؟ تحریات علمیه ده و بالخاصه کشفیاتده حس



ایدین شانی و علوی ذوق ظاهراً غیر قابل حل کبی بر طاقم  
اسرارہ نفوذ ایدن و بو مظفرانہ سعیندن بر صنعتکار طرزندہ  
متلذذ اولان بر مفکرہ نک موفقیتندن باشقہ نہ در؟ حر بر قرار  
ایله ، فکر علمی یه غلبہ چالہ رق بدیعی و اخلاقی بر مفکورہ یه  
اعتقاد ایدن بر مفکرہ دن باشقہ علمک قیمتی کیم تقدیر ایدہ بیلیر؟  
ایشته ، حیاتک هانکی تظاهری پیش ملاحظہ آلنیرسه  
آلفسون ، صرف سوق طبیعی یه مستند و کندی کندیسنی بیلمہ یں  
بر حیات دکل ذکی و ذی شعور حیات بشر موضوع بحث اولونجه  
علمہ حاکم اولان مصدرہ لردن باشقہ بر طاقم مصدرہ لری ده  
تضمن ایتدیکی کورولور . بر صورت عمومیه ده ، علمک مصدرہ سی  
شوقضیه در : هرشی ، بوتون حادثات یکانہ بر حادثہ نک تکررندن  
عبارت ایمش کبی جریان ایدر . حیاتک مصدرہ سی ایسه شو  
صورتله خلاصہ اولونه بیلیر : طبیعتک حصولہ کتیردیکی یا خود  
کتیرہ بیلہ جکی — علم نقطہ نظرندن هپ بر برینہ مساوی —  
نامتناهی ترتیلر آراسنده بعضیلری خصوصی بر قیمتی حائر  
ایمش ، وار و پایدار اولغہ صالح بر تمایل اکتساب ایدہ بیلیر  
ایمش کبی حرکت ایتک .

بو مصدرہ نک استعمالنک لزوم کوسترہ جکی عملیات ذهنیه یی  
تعیین ایتک قابل کیدر .

اول امرده ، ایمان لازمدر . فقط کور کورینہ بر ایمان دکل .

موضوع بحث اولان ایمانه عقل، سوق طبیعی، حس حیات، امثال، عنقه رهبرلك ایدرلر. فقط بونلرک هیچ برنده: «بو واردر» حکمنی ویرمکه مساعد بر سبب علمی موجود دکلدر. موضوع بحث اولان شی ذکائی اشیانک محصله میخانیکیه. سندن فرقلی بر استقامتده سوق ایتک مسئله سی اولدینی ایچون بوراده علمک کافی کلمسی امکان خارجنده در. پاسقالک نظر دقتنی جلب ایدن سنت اوگوستنک سوزی یک دوغرودر: غیر محقق شی ایچون چالیشیلیر. دوشون بر آدم ایچون حیات بر بحث و ادعادر. باشقه دورلو اولماسنی ذهن آماز.

بو برنجی شرطدن بر ایکنجیسی انبعاث ایدر. فی الحقیقه، ایمان، موجود اولان شیءک بهمه حال مطاوعتکارانه بر قبولندن عبارت دکلدر. بالعکس هنوز موجود اولمایان، موجود اوله جق کبی کورونمین، حتی بو ایمان اولمادن موجودیتی غیر قابل بولونان برشیئی بیله موضوع اتخاذ ایده بیلیر. بونک ایچوندر که ایمان، عمومیتله انسانده وبالخاصه یوکسک انسانلرده آز چوق یکی بر موضوع تفکر، خصوصی ویکی بر صورت ذهنیه ذکائییه تولید ایدر و بوکا نظرینی دیکر. بر انسان کبی حرکت ایتک ایسته یین کیمسه کندیسنه برغایه تعیین ایدر. ایمانک جرئتکارلغنه وقوتنه کوره بوغایه آز چوق یوکسک، حقیقتدن آز چوق آیری بر مفکوره در. ایمان ابتدا موضوعنی اوزاقلرده، بولوتلر ایچنده، مهم صورتده کورور. فقط اونی ذکانک واراده نک احتیاجنه

موافق صورتده تعیین ایچون صرف غیرت ایلر . فی الحقیقه  
اونی ساحه فعله ایصال ایچون چالیشدجه تدریجاً تعیین ده ایدر .  
ایمان مبدع ایله کندیسنه تعیین ایتدیکی موضوعدن فعل و عمل  
ایچون اوچنچی بر شرط دها چیقار : عشق . فی الحقیقه اراده ،  
اوفکری موضوع ، هم ایمانک هم ذکانک مشترک تأثیری آلتنده  
دها کوزل دها پارلاق رنکالرله ترسم ایتدجکه اوکا دها زیاده  
مفتون اولور .

ایمان ، بر مفکوره نک صورت ذهنیه سی ، شوق و غلیان : ایشه  
افعال و اعمال بشریه نک اوچ شرطی . فقط بونلر تام فکردینینک  
اوچ آن انکشافی دکیدرلر ؟ بو اوچ تعبیر ، تأثیر دینی آلتنده  
اراده نک ، ذکانک و حسک آلدینی شکلی غایت صداقتله افاده  
ایتمورلرمی ؟

دیمک که حیات بشر بر طرفدن مفکوره املار یله طبیعی  
صورتده دینه اشتراک ایدر . دیگر طرفدن ، طبیعتله اولان مناسبتی  
جهتندن ، علمه اشتراک ایتدیکی آشکاردر . چونکه غایه لرینه  
واصل اولمق چاره لرینی علمدن ایستر . ایشه بو صورتله حیاتی  
دین ایله علمک رابطه التصاقی عد ایتمک پک دوغرو کورونور .

فقط حیات بشر حسی علمه انضمام ایدنجه آرتق بوکا برده  
اصل دینی علاوهیه حاجت قالمه دن بشرک خط حرکتی  
سوق وادارهیه کفایت ایتزمی ؟ شبهه یوق که علم کنندی باشنه

يا لکز فعل و عمل واسطه لری تدارک ايدر ، غايه لر حقنده صامت  
قالير . فقط بو غايه لری عقلک طلب ايتديکی کبی تعين ايتک  
ايچون طبيعتک سينه سنده سوق طبيعي وشعور اجتماعي کبی ايکی  
رهرمز واردر که بونلر بر طاقم علوی سلطه نامه بزه کندیلرینی  
قبول ايتدير مک ايسته يه جک رهبرلردن ده اميندر لر .

سوق طبيعي بر وقعه در ، صريح و مثبت بر معطادر . منشأ لری  
نه اولور سه اولسون نوعک تمايلنی ومنفعتنی اراؤه وتمثيل ايدر .  
هر کیم که عقلک امری وجهله طبيعتله متفقاً يورومک ايستر سه  
ايلک وظيفه سی شبهه يوق که سوق طبيعي بی تعقيب ايتمکدر .

بر فرد بر نوع طبيعي يه منسوب اولدينی کبی هر آدم ده بر  
هيئت اجتماعيه نک اعضا سيدر . بوده بر وقعه در . چونکه انسان  
آنحی بوهيئت اجتماعيه يه اشتراکی دولاييسيله انساندر ، معقول  
وحر بر مخلوقدر . بناء عليه انسان بوهيئت اجتماعيه نک شرائط  
موجوديته اويقم مجبور يتنده در . هر هيئت اجتماعيه ايچون  
هر دورده شرائط موجوديت بر نوع شعور اجتماعي تشکيل  
ايدن بر طاقم غنغه لرك ، قانونلرك ، فکر لرك ، حسلرك هيئت  
مجموعه سی ايله افاده اولوندينی جهته ، بر شيئه يارامق و او بر قتيّف ،  
صحيح بر معناده کندی کنديسنه صاحب اولمق ايسته ين بر  
فرد ايچون ايچنده ياشادينی هيئت اجتماعيه نک او امرينه اطاعت  
ايتک ، او هيئت اجتماعيه نک فعال ومطيع بر عضوی اولمق  
ايکنجی بر وظيفه در .

حياتی تنظيم ايتمك ايجون انسانه دهانه لازمدر ؟ غايه لر  
مسئله سی حقنده پك چوق مناقشه ايدیلیور. ای یاپلش بر مفسکره  
ایچون غايه لر غایت واضعدر ، چونکه معلومدر. آرانه جق شی  
بالخاصه واسطه لر در. علم ایسه بو واسطه لر ی تدارك واحضاره  
مه یادر.

فی الحقیقه ، بو معقول بر مسلکدر. ایجه تعقیب وتطبیق  
اولونورسه غایت یوکسك نتیجه لره واصل اولور . مه آندرك  
دیدیکی کی : « انسان حقیقهٔ انسان اولدینی زمان نه سویی  
شیدر ! »

فقط بو مسلکك عقل بشری تطمینه کافی کله جکی ادعا  
اولنه بیلیرمی ؟ عقل بشر یالکیز معقول اولان شیئی دکل قابل  
اولدینی یرلرده دهانه ای شیلری طلب ایدر وبونی ساحهٔ امکانه  
صوقنی بزدن ایستر .

کندیمزده بولدیمز سوق طبیعینک ، کچیلمه سی غیر قابل  
بر حد مکملیت تشکیل ایتدیکنه امین می یز ؟ سوق طبیعی  
ابتدائی ، غیر متحول ، دوغرو دن دوغرویه طبیعت ابدیه دن  
یاخود حکمت الهیه دن منبعث ظن اولوندینی مدتجه بویله تلقی  
اولونا بیلیردی. فقط منشائی وصورت تولدی نه اولورسه اولسون  
بوتون سوق طبیعی مکنتسب ، احتمالی ، قابل تعدیل برشی عد  
ایدلمکده در. انسان ايجون سوق طبیعی بر وقعه در . هم درین  
ونسبتله ثابت اولدینی قابل انکار دکدر . فقط نتیجه دهه بوده

سائر وقعه لره مشابه بر وقعه دره . تکامل جیلک قارشیسند آرتق  
قدسیتنی محافظه ایتش بر وقعه یوقدر . ذاتاً انسان علمدن  
او کر نمشد که طبیعتک فوقه چیقمق ایچون طبیعتدن استفاده  
ایدیله بیلیر ، طبیعته اطاعت ایدیلهرک طبیعته حکم اولونه بیلیر .  
او حالده انسان سوق طبیعیسندن استفاده ایده جک یرده نه دن  
اوکا منقاد وتابع اوله جق ؟ فقط او زمان ، بو سوق طبیعی  
کندیسی ایچون بویله بر واسطه مرتبه سنه اینجه بو واسطه  
سایه سنده واصل اولمق ایسته یه جکی غایه نه اوله جقدر ؟

شعور اجتماعی ده بر تکاملک محصولیدر . قوانین اخلاقیه  
آرتق ابدی دکلدرلر . بونلر آرتق بر وحی الهی دکلدرلر .  
قوانین اخلاقیه مملکتلرینک وزمانلرینک قانونلرینه وعادتلرینه  
قارشی مجددلرک یاپدقلری ایشلردن پایدار قالان قسملری افاده  
ایدرلر . سلطه لرینی محافظه ایچون بوکون بیک زحمت  
چکرلر . چوق اسکی ایسه لر او زمانه نسبتله ایچنده بر چوق  
شی دکیشمش اولان بر هیئت اجتماعیه اویه بیله جکلری قبول  
اولونماز . اسکی شیلرک یالکز بر حقی قالمشدر . اوده اورته دن  
قالقمق ویکی شیلره میدانی بوش بر اقمقدر . یکی ایسه لر زمانک  
تجربه سنه کوکس کرمه مش ، منشائی هر کسجه معلوم ،  
تصادفلردن ، حسابلردن ، یالانلردن ، قایلوب سوروکنمه لریدن ،  
کچیجی حاللردن یاپلمش بر مؤسسسه نک نه حکمی ، نه قوتی اولور  
دیرلر . زمانمزک فکرلری وقانونلری نه قدر شایان حرمت



اولورلر سه اولسونلر ، كچمش زمانلرك قانونلرينك وفكرلرينك  
اسلامزده ياپه ماديغي برشيئي بزده نچون ياپسونلر ده شعورمزي  
زنجر اطاعت آلتنه صوقسونلر ؟ عصري مفكره ايچون بر  
مانيوهله خدمتنى كورن ترقى ، استقبالك حال اوزرنده كي حقتدن  
باشقه بر شيميدر ؟ « دها » ، بر فردك زمانه مربوط اولديغي  
بر طاقم افكار هيئت مجموعهي آراسندن اكرثيا معاصرينك  
قابليت تفهمني تجاوز ايدن بر طاقم يكي فكرلر كورمك دكليدر ؟  
شبهه يوق كه هر انسان معقول نوعك سوق طبيعيسنه  
اويديني كي محيطنك وزماننك قانونلرينه ، عادتلرينه ، فكرلرينه ،  
حسليته ده حرمت ايدر . فقط بو ايكي سبب حركتك هيچ  
بريني ده قصواي قواعد ظن ايدوب ده اونلرك اوته سنده برشي  
تصور ايد بيلمك حقتدن كنديسي منع ايله مز . بالعكس اصل  
ولبي دها اي بي نامتناهي صورتده آرامقندن عبارت اولان عقلنده  
سوق طبيعي بي وشعور اجتماعي بي يوكسك غايه لر تحريمي ايچون  
بر واسطه اوله رق قوللانمق آرزوسني بولور .

واقعا انسان كنديسنه حياتدن باشقه بر غايه تعين اتمه دن  
ياشايه بيلير . فقط بوني ايسته مز . ياپديني ايله ، ياپيلان ايله اكتفا  
ايد بيلير . فقط تفكر ايد جك اولور سه بو اوكا آرتق كافي  
كلز . كندى كنديسنك حدوديني كچمكه ، آرامغه ، ايسته مكه ،  
وار اولمغه اونى زورلايان هيچ برشي يوقدر . او بر ماجرايه  
آتيلور ، بر تصادف آرقه سنده قوشيور ، خوشلانديغي بر مبارزه يه

کیریشیور . چونکه افلاطونك سوزی الآز، دوغرولغنی محافظه  
ایتمشدیر : مبارزه کوزلدیر و امید بویو کدر .

کتم اولنه مازکه طبیعتك حدودینی کچمکه چالیشمق کندی  
کندیسنی حر ظن ایتمک و حر اوله رق حرکت ایتمک ایسته مکدر .  
حریت ایسه راست کله حرکت ایتمکدن عبارت اولمایوب  
بالعکس عقلك ایجاباتنه کوره حرکت ایتمکدن عبارت اولدیغی  
ایچون کندی کندیسنی حر فرض ایتمک عقلده میخانیککی  
صورته قابل تعین قوانین حکمیه دن غیری بر طاقم اسباب  
اعمال و افعال بولونه بیله جکینه اینامق دیمکدر . افلاطونك بحث  
ایتدیکی شو مبارزه یه کیریشمکه بزی سوق ایدن شیئك مجهول  
بر شیئه یاخود قهرمانلغه قارشی حس ایدیلن بدیی بر نوع  
مراق و تجسس اولمایوبده عقل اولدیغی دوغرومیدر؛ و بو،  
عقل ایسه نتیجه سی ناقابل ادراک کبی کورون بر یوله بزی  
عجبا نه کبی ترکیبات افکار ایله سوق ایتمکه موفق اولیور؛

عمل شونلره لزوم کوستیر : اولاء ایمان؛ ثانیاء، بوایمانه  
بر موضوع ؛ ثالثاً، او موضوعه قارشی بر عشق و اونی ساحه  
فعله ایصال ایچون آرزو . بوبابده برپارچه واضح بر فکر پیدا  
ایتمکه چالیشیرسه ق بو اوچ عنصرك اعملاقنده نه کوریرز ؟  
اول امرده ، هرذی شعور حرکتك بالضروره احاطه و احتوا  
ایتدیکی بو ایمانك ناصل وضوح و صراحت کسب ایتدیکنی ،  
ناصل محق و معقول کوروندیکنی دوشونه جك اولورسه ق

بونك بيلهرك بيلمه يهرك وظيفه فكري وحسي اوزرينه استناد ايتديكنى مشاهده ايلرز. كورولندن وبيلينندن باشقه بر شئيه اينامق يعنى او شئى عاطلانه دكل عن مپروانه تصديق وتأييد ايتمك عقل ايچون بر قوت صرفى ايجاب ايدر. بو سعى ايچون بر سبب ايستر. عقل بو سببى وظيفه فكرنده بونور.

وظيفه بر ايماندر. ماده بديهى بر طاقم اسباب دولاييسيله بر شئك اجراسى ضرورى ياخود شايان آرزو ايسه اونك وظيفه عد ايديله ميه چكى آشكاردرد. وظيفه تام، اعلا بر ايماندر. سائر اعتقادلرك كافه سنى بر طاقم اسباب معقوله ومحسوسه ايله تأييد قابلدرد: فائده، سائر انسانلرك تشكيل ايتدكلرى امثال، صاحب صلاحيت سلطه نك تأميناتى، عادت، مودا، عنغه، ايشته بو قيلمندرد. فقط وظيفه صرف كندى كنديسنك اوستنده طولانمشدر. ياپيله جق شى ايچون بو فكر فائده استناد ايدن هيچ بر سبب كوسترمز.

كنديسنى جلب واغفال ايتمك ايچون سرد ايديلن بر چوق محاكاهه رغماً عقل اونلره مغلوب اولماز، بو اسرار انكيز قانونه قارشى كندنده بر انجذاب دويار. نه وظيفه يى او مافوق حس وصفندن تجريد قابل اولور نه ده حيات بشردن چيقارمق. انسان بر حر كتمده بولمهدن اول بر فعل وعملنى ايجاب ايتمى لازم كلن اسبابى تا اعماقه قدر تدقيق ايدنجه ار كچ وظيفه مسئله سنه تصادف ايدر وبو حر كتى او وظيفه حسنه تقابل

ایتمدکجه مطمئن اولاماز . بر سسلطه ، هر نه اولورسه  
اولسون ، کندیسنی قبول ایتدیره یلمک ایچون اوزرنده ،  
حاکم عمومی اولان ، قانون وظیفه نك قاناد آچش اولماسی  
لازمدر . حیات بشره حکم ایدن ایمان ، نتیجه ده وظیفه یه اولان  
ایماندن باشقه برشی دکلدرد .

بو ایمان ساده جه مجرد بر مفهومدن عبارت دکلدرد ؛  
جانلی ومشمر بر قدرتدر . وظیفه نك تأثیری آلتنده ذکا برشیلر  
دوشونور وتولید ایدر . شعورك کوزلری اوکنه برطاقم شکلر  
عکس ایتدیررکه بونلر حد ذاتنده ناقابل تعریف اولان وظیفه  
فکرنی قابل تبلیغ و پرخیال بر لسان ایله افاده ایدرلر . ذکانک  
طایمقدن باشقه بر غایه تعقیب ایتدیکی یرلرده ، تشکیل ایتدیکی  
شکلر موجودات خارجیه نك حکمی آلتنده انسانک حواسی  
اوزرنده اجرا ایدیلن تأثیراتک صورت ذهنیه سیدرلر . بوشکلرک  
موجوداتک کندیلرندن بالواسطه نشئت ایتدکلمی فرض  
اولنه بیلیر . فقط الزم و ضروری دکلده محتمل ومناسب بر عملی  
فکر ، بر فعل وعملک صورت ذهنیه سی موضوع بحث اولدینی  
زمان ، موضوع ، معطا شأنیتک ساده جه بر رسم وخیالندن  
عبارت قاله ماز ، بر درجه یه قدر بر اثر ایجاد واختراع اولور .  
مفکره شبهه یوق که عالم خارجی ایله علمک کندیسنه عرض  
ایتدیکی منابعی استعمال ایلر . ایچنده یاشادینی محیطک لسانی  
قوللانیر . مع مافیله یابدینی عملیه بر حادثیه ضروری صورته

انضمام ایدن دیگر بر حادثه دن یا خود معلوم حادثه لرك میخانیکی  
 بر محصله سندن عبارت دکلدر، حقیقی ومؤثر بر فعل و عملدر.  
 برشی ایجاد و اختراع ایدن بر صنعتکاری پیش ملاحظه آلام:  
 صنعتکار، ابتدا مبهم و اوزاق بر فکر کردن حرکت ایدر. بوفکر  
 صنعتکارک اونی یا قلامق و ساحة فعله ایصال ایتک ایچون  
 کوستردیکی غیرت سایه سنده یا واش یا واش یا قلاشیر، ترسم ایدر.  
 كذلك، محرر بر طرفدن شکلی فکرک افاده سنه منقاد قیلمغه  
 اوغراشدینی صیراده دیگر طرفدن بوشکل واسطه سیله فیکری  
 آرار. ایمان ایله جان بولان ادراک مفکوره حقنده ابتدا مبهم  
 بر صورت ذهنیه مالکدر. صوکره مالک اولدینی منسابع  
 و وسائط ایچندن او مفهوم افادهیه وانکشاف ایتدیرمکه اک  
 صالح کوزوکنلری او مفهومه توافق ایتدیردکجه اونی یا واش  
 یا واش دها واضح برحاله کتیریر.

وظیفه فکرینک افاده سی یا خود تملی اولمق اوزره ذکانت  
 وضع ایتدیکی غایه تصور ایده بیلجکمز شیلرک بالضروره اک  
 یوکسکی، اک مکملیدر. وظیفه فکرینک او غریب اوصافی  
 ایضاح ایده بیلیمک ایچون بویله اولمق لازمدر. اعماق شعوردن  
 ظهور ایدن بو غایه شعورک حدودینی نامتناهی صورته تجاوز  
 ایدر. ساحة شعورده اونک ظهوری عادتاً بر تجلی، بر وحی  
 شکلی آلیر. بو وصف اوندن هیچ بر زمان زائل اولاماز.  
 چونکه انسان بو غایه یی دها ای آکلامق ایچون غیرت صرف

ایتدجکه او دائماً دها بویوک ، دها یو کسک اولور. حقیقت ایله  
مفکوره آراسنده کی نسبتسزک تفکر وملاحظه نک ، اراده نک  
ترقیسیله آزاله حق یرده بالعکس کیتدجکه آرتار.

حیاتک او چنجی شرطی انسانک کندیسنه تعیین ایتدیکی  
غایه کماله قارشی بسله دیکی عشقدر. حالبوکه ایمان ومفکوره کبی  
عشقک ده ، تعمیق ایدیه جک اولورسه ، اصل طبیعتک حدودلری  
خارجنه دالیدیگی کورولور. عشق ، آیری شخصصار آراسنده  
بر وحدت وجوددر که هر دورلو تحلیلله میدان اوقور. واقعا ،  
بر شکل عشق وارددر که بونده فرد آنجق کندی کنیدیسی  
پیش ملاحظیه آلیر و یالکیز کندی تلذذینی کوز اوکنده  
طوتانو. بو عشق برسوق طبیعتک شعورندن باشقه برشی دکلدر.  
فقط ذکا طرفندن ترتیب وتنظیم ایدیلنجه ، خودکاملق اولان  
بو عشقندن انسان انسانیته دوغرو یوکسلدجکه کیتدجکه دها  
واضح بر صورته باشقه بر عشق فرق وتمیز ایتشددر. بوکا  
فداکارلق عشقی نامی ویريله بیلیر. بو عشق سایه سنده انسان  
یالکیز کندی کنیدیسی ایچون دکل باشقه لری ایچون وباشقه لرینک  
ایچنده یاشامق ایستدر. ویقتور هوغو: « سرسم! ظن ایدیورسک که  
سن بن دکلسک! » دیدیکی زمان ایشه بو عشق حس ایدیوردی.  
عشق ایکی وجودی بر وجود یاپار و هر برینه ده کندی  
شخصیتلرینی براقیر. فضله اوله رق ، هرایکی سنده ده کندی  
شخصیتلرینی آرتیرر واونی بوتون قوت وقدرتیه ساحه فعله



ایصال ایدر. عشق، برتشارك منافع کبی خارجی بر رابطه دکلدر. بر شخصیتک دیگر بر شخصیت طرفندن مص وبلغ ایدلمسی ده دکلدر. بر وجودک دیگر وجوده اشتراکی و بر وجود مشترک خلق ایدرهک بوجاعتی تشکیل ایدن فردلرک وارلقلرینی صوک حد کماله ایصالدر.

اگر بویله ایسه مکمل و غایه کمال اولان بر وجوده قارشی انسانک حس ایتدیکی عشق او غایه کمال ایله بر اتحاد حسی دیمکدر. اونک وجودینه، مکملیتنه ده صمیمی بر صورته اشتراک آرزوسیدر. بزی کندیسنه جلب ایتسی اعتباریله او مکملیتک کندیسندن عبارتدر. فداکارلق عشقی یا خود کندی کندیسنی، — کوتهک تعبیری وجهله ابدی برقادین اولان — غایه کماله ویرمک حسی ایچمزه اینن و بزی یوکسکلره دوغرو چکن بر قدرت لاهوتیه در.

Das Ewig-Weibliche  
Zieht uns hinan [۱]

ایشته بوصوتله، ایمانک کیزلی زنبورکنی آرایان بر کیمسه ایچون بو زنبورک وظیفه فکر و حسنده، مقدس بر شی کبی، نمایان اولور. ایمانک غایه سی اولان ترقی فکرینی تعمیق ایدن بر کیمسه ایچون بو فکر، نامتناهی و غایه کمال اولان بر وجود تلقیسی تضمن ایلر. بو غایه کماله قارشی اولان عشق اساساً [۱] بو ابدی نسویت بزی یوقاریلره چکر.

اونكه بر قرابتك ، اونك وارلغنه بر اش-تراك باشلانغچنك  
حسيدر .

بو ايسه حيات بشريه نك كو كنده دين تسميه اولنان شينك  
بر كوك صفتيله موجود اولماسندن باشقه نه در ؟

حياتك اساس خالقنه دوشرو چيقمق مجبوري دكلدر .  
يالكزجه سوق طبيعي ايله ياخود كوره نكله ياخود تقليد ايله  
ياشانه بيلير . احتمالكه مجرد ذكا ايله ، علم ايله ده ياشامق قابلدرد .  
دين انسانه صرف ايچدن كله ياخود حتى ذكائي بر حياتدن دها  
زنكين بر حيات عرض ايدر . بو ، سوق طبيعي ايله ذكانك  
بر نوع توحيد و تركيبي ياخود دها زياده صميمي و روحى بر  
اتحاديدر كه هرايكيسى ده بر برينه قاريشميشدر و بوندن دولاني  
تبديل شكل ايتمش و جوشغون بر حاله كمشدر . آرى آرى  
اجراى تاثير ايتدكلرى زمان حائز اولما دقلرى بر تماميته ، بر قدرت  
خالقه يه مالك اولمشا دردر .

## دین

حیات بشریه ده دینه ویریلن بو موقعه بر چوق کیمسه نك  
اعتراض ایده جککری شبهه سزدر. دییه جککدر که دونه کلنجه یه  
قدر دینك ترقی بشریته چالیشه بیلیمسی قابلدی، چونکه اخلاق  
آزچوق دینه معلقدی. فقط دین ایله اخلاق آراسنده کی بو  
تساند اولسه ده اولابیلیر، اولماسه ده اولابیلیردی، موقت بر  
شیدی. تاریخ اعتباریله، دین ایله اخلاق بر برندن آیری اوله رق  
دوغمشلر وانکشاف ایتمشلردر. اخلاقك ترقیاتیدر که دینی  
اخلاقه اویمغه و اخلاقی بنمسه مکه مجبور ایتشد. ابتداء بویله  
بر برلندن مستقل اولدقلری کبی شیمدی ده اخلاق ایله دین  
بر برلندن آیریلمیورلر. آرتق نائل آزادکی اولان وسائر علملره  
مشابهت کسب ایدن اخلاق، بشریتك سوق و اداره سنه کافیدر  
ویالکز باشنه کافیدر.

اخلاق ایله دینك مناسباتی مسئله سی بونوع نظریه لرده  
احتمالکه پك قولایلقله کسدریلوب آتیلمشدر. حالبوکه اخلاقك  
روحی منشألرینی تعیین پك مشکلد. سو قراط پك درین صورتده  
دیندار بر روح ایدی. بزم ایچون تاریخك باشلادینی بر زمانده  
ایکی شکل ذی حیاتك بر برلندن مستقل کورونمسه سی منشألرینك  
آیری اولماسنی ایجاب ایتمز. یوقسه طبیعتجیلرک تحو لیلیکی trans-  
formisme بی معنا برشی اولوردی. حیاتمزی اداره کیفیتنده بزی

علاقه دارايدن شی منشاء تجربينك عينيتی یا خودتخانی کیفیتي اولمقدن زیاده عقل بشر تکمل ایتدکجه اونده فکر لر آراسنده تأسس ایدن مناسبتدر. اکر دین بو کون عشقی امر ایدیورسه ماضیده کین و غرض امر ایتمش اولماسنك نه اهمیتی واردر؟ اکر اخلاق وجدانده بر نقطه استناد آرایه رق نهایت مفکره نك دیننه واصل اولمش و اونی قبول ایتمشه ایلک زمانلرده الهیات علماسنك دینلری علیهنده بولونماسنك نه اهمیتی اولور؟ دینك احکامی ايله دیکرینك اوامری آراسنده اکثریا بر لسان فرقندن باشقه بر شی موجود دکلدرد.

مع مافیه دین، اخلاق ايله توافق ایتدیکی قسملرده بيله بر چوق اوصاف ايله اوندن آریلیر.

اولا، كرك اخلاقده كرك دینده اصل احكامك قسم اعظمی بر برینك عینی ایسه لرده تمله ککنجه بونده بر فرق نمایان اولور. بر چوق کیمسه بو فرقی قابل اهمال عد ایدر لر. فقط اخلاقی بر ادیب ایچون ایککنجی درجه ده عد ایديله بيله جك اولان بو تممل مسئله سی دین نقطه نظرندن غایت اهمیتلیدر. چونکه دین هرشیدن اول تطبیقاتدر، حیاتدر، ساحه فعله ایصالدر. تملمده ساحه فعله ایصالك پرئسیپیدر. دینك انسانه اك اول تدارك وتأمین ایتك ایسته دیکی شی یالکزر وظیفه سنی طانیق ایچون دکل بونی حقیقه اجرا ایتك ایچون لازم اولان وسائطدر. دین، صرف فکر لر ك نه قدر بدیهی اولورسه اولسونلر اراده

بشرى تحريكه كافى كليه جگنى ووجودى حصوله كثرين شيك ينه  
وجود اولديغى تقدير ايدر ووار اولمقده، يو كسلمكده فضيلت  
بشرية يه يارديم ايچون او كا مكمليت الهيه نك مظاهرتى تقدیم ايلر.  
ثانياً، تكاملنك وجوده كترديكى شكلده، دين فردك يالكىز  
كندى سميه سنك ياخود عائله سنك ياخود ملتك اعضاسيله دكل  
كائناتك پدرى صفتيله الله ايله يعنى بوتون واراولان واولا بيلن شيلرله  
برلكده الله ايله اشتراكيدر. دين آرتق تماميله جهان شمولجيدر.  
بوتون موجوداتك قطعياً مساواتى واخوتى او كره تير. فردك  
افعال واعماله سبب و محرك اولمق اوزره كنديسى نه قدر حقير  
اولسه ده اللهك دور حكومتك يعنى عدالت و ايلك دوره سنك  
حلوانه مؤثر صورتده چاليشه بيله جكى امنيتنى كوستير.

نهایت، دين، انسانك اوزرنده باطنى و جوهرى برتائير اجرا  
ايتك املنده در. دين يالكىز حرركات خارجيه ي، اعتياداتى، اخلاق  
وعاداتى تحت تاثيرده بولوندير مقايسته مز. وجودك كنديسى،  
حسلرينك، دوشونجه لرينك، آرزولرينك، اراده لرينك اك  
درين منبعنده تحت حكمنده بولوندير مقايسته تر. اخلاقيون  
انسانلرك ايسته دكلرى كې دكل اللرن دن كلدېكى كې سودكاري  
سويلرلر. ايسته دين ده عشقى امر ايدر وسومك قوتى ويرر.  
عقل بو فكرلرك بر طاقم افراطلردن و سفسطه لردن  
[پارادوكسلردن] باشقه برشى اولمالرينى تسليمده تردد ايدر.  
حالبو كه شايدن دقتدر كه دين پارادوكسه بكنر حاللرينه رغماً،

دها دوغروسی بونلردن دولایی، هر زمان انسانیتی تحریک ایدن قوتلرک اک مهملرندن بری اولمشدر. دین انسانلری برلشدیردی و آیردی ؛ ایمراطورلقلر یاپدی و ییقدی ؛ صوک درجه آزغین محاربه لره میدان ویردی ، مادی قدرت و عظمته ، غیر قابل اقتحام بر مانعه گئی، مفکرهینی قارشى قویدی . فردک ایچنده ملتر آراسنده کی محاربه لر قدر فجیع مبارزه لر او یان دیردی . طبیعتیه میدان او قودی و او نی منقاد ایتدی. انسانی سفالت ایچنده مسعود ایتدی ، مسعودیت ایچنده سفیل یاپدی . بو ، ایمانک بیلکیدن دها قوتلی ، اللهک بزمله برابر اولماسی قناعتک هر دورلو معاونت بشریه دن دها مؤثر اولماسندن ، عشقک بوتون محاکمندن قوتلی بولونماسندن نشئت ایتیورده باشقه نه دن ایلری کلیور ؟

\*  
\*\*

بشریت دینی بر طرف ایدهرک هر جهتیه دوغرو س-سوق ایتدیکی تجربه لر سایه سنده کن دیسنه باشقه بر رهبر آرامق اوزره میدر ؟ بو قابلدر . چونکه بو دنیاده اک ابتدائی شکلرک بیله هیچ کوچولمه دن کن دیلرینی محافظه ایدمه بیلدکلری ادعا اولونه مازسه ناصل اولورده یو کسک شکلرک و قیمتلرک علی حاله پایدار قالا بیلملری تأمین ایدیله بیلیر ؟ بر طاقم قیمتلرک یالکیز تحوللرینه دکل حتی ضایع اولمالرینه مانع اوله بیله جک هیچ برشی یو قدر. دین ده بو قیمتلر آراسنه داخل اولابیلیر . فقط



اك حر واك منور مفكره لرده بيله دينك پايدار قالماسى احتمالى ده واردر . چونكه شيمدى به قدر دينك قوه حياتيه سى واحوال و شرائط جديده به توافق قابليتى هر دورلو تخيلاك فوقه چيقمشدر . عالم مغنوياتده بر شكل موجوديتك صورت قطعيه ده زوال بولديغى هيچ بر زمان بيلنه مز . چونكه على العاده انقلابات بشريه اولمش شيلرى ديريلتمكدن عبارتدر .

مع مافيه ، دينلرك حياتى ، بر موجود ذى حياتك پايدار اولمق ايسترسه كندى شرائط موجوديته توافق و تطابق ايتمى لازم كله چكى يولنده كي . قانون عمومى به تبعيتدن آزاده دكلدر . قوه حياتيه ايله اويصاللق بر بر ليله متناسبدر لر . ژاپون ياده كي بوديلك هندستانده كي بوديلك دكلدر . قرون وسطاده كي خريستيانلق آرسطونك فلسفه سنه و ايمپراطورلق حقنده كي روما فكرينه توافق و تطابق ايتمشدر . اغلب احتماله كوره استقبالده ده ماضيده كي كجى اولاجقدر . دين شدتلى بر ايمانى حامل اولمقله برابر جمعيات بشريه نك فكلرلى ، حسلى ، مؤسسلى و حياتى ايله تماسده ، تاثير وعكس تاثير مناسباتنده بولنور سه استقبالده ده پايدار اوله جقدر .

شيمديكى جمعيات بشريه ده صرف نظر ايديلمه سى غير قابل اولان بومعطيات نه لردر ؟

اول امرده علم واردر . نتايج عموميه سى وبالخاصه فكر و روحى آرتق عقل بشريه حاكمدر .

کذلك فيلسوفلرک اخلاقده پرنسپلرلرنده ، اثباتلرنده ، نظریه لرنده بربرلرندن فرقلی اولمقله برابر مفکره لرده هنوز ناقص صورتده معین فقط ذی حیات ، مؤثر وجهه دن غیرقابل هجوم بر اخلاق واردر . بو اخلاق محاکمه مستند مسلک لردن زیاده عنعنه لردن ، عادت لردن ، دینی اعتقاد لردن ، یو کسک آدم لک تشکیل ایتدکلری مثال لردن ، ویردکلری درس لردن ، حیات ، مؤسسات طرفندن وجوده کتیرلمش اعتیاد اتدن ، شرائط ماده ، ذکائییه ومعنویه نک تاثیر اتندن یاپلمشدر . انسانیتک تجربه سنی تمثیل وارائه ایدر .

نهایت ، بعض مملکت لرده حیات اجتماعییه نک شکلی ده اوچنجی بر شرط تشکیل ایدر که دینلر بونی ده حسابیه قائمغه مجبوردرلر . وقتیله دینلر اساساً ملی ایدیلر . فقط بو کون بر دین ، انسانیتی تفریق ایدن فرقلرک نه قدر اوسقنه چیقارسه بزه اوقدر یو کسک کورونیور . بو عمومیت فکرینک هر ملیته خاص اولان عنعنه لک ، حسلرک ، روحک ، حیاتک ادامه سی مجبوری ایلر برلکده وجودی شیمدیکی شعورلری اک چوق تعذیب ایدن مسئله لردن بریدر . دیگر طرفدن عصری ملت لرده تعمیم ایدن ده موقراسی اصول اداره سی بعضاً دینک اساسنه معارض ومخالف کی نمایان اولیور .

دینک بو شرائطه توافق وتطابق ایتسنه هیچ بر مانع یوقدر کی کورونور .

وقتيله بر طاقم آينلر ، عقیده لر ، مؤسسسه لرله بك محمول  
اولان دين يا تكمامل نتيجه سنده ، يا كچديكي محيطلرك تاثيريله  
بو مادی ظرف ايچندن كنديسنك اصل ولبني تشكيل ايدن  
روحي كيتدكجه صيروب قورتارمشدر . بالخاصه ، بشريتك  
كورديكي بويوك ايجادات دينيه نك صوكنجيسي اولان  
خرستيانلقده ، عيسانك بالذات تلقين وتدریس ايتديكي شكلده  
نه عقايد واردر نه آيين . عيسا انسانك اللهه روحده و حقيقتده  
پرستش ايتمسنی طلب ايدر . بو روحانی شكل خرسستيانلغك  
اكتساب ايتديكي شكللرك كافه سنده حاكم اولمشدر . بوكون بيله ،  
اونی كاه سياسي شكللرك ، كاه متلرك ايچنه حبس ايتك يولنده كي  
تشبثلردن صوكرده اك منور ملترده روحك ومفكره نك  
حقيقتنك وتجاوزدن مصونيتنك ناقابل امحا بر تصديق مقامنده  
بردوام اولمقده در .

اكر دين كندی ماهيت خصوصيه سنه توفيقاً دنيا ايچنده  
انتشار ايدرده صرف روحانی بر فعاليت كبي اجراي تاثير ايلر ،  
انسانلرله موجوداتی خارجدن دكل اقناع ، مثال ، عشق ، دعا ،  
تشارك ارواح واسطه لريله داخلدن ، باطندن دكشدير مكه  
چاليشير ، جبر وتضييق ويا سياسيات طريقلرینه صابمازسه علمك ،  
اخلاقك ياخود مؤسساتك ترقياتندن قورقمادن پايدار اولابيلير .  
دين غير قابل تحمول وصصامت بر متنك ياخود صرف معنوی  
وروحانی اولمايان بر سلطه نك بويوندوروغندن آزاد

قالوبده کندی کندیسنی بولورسه غایت زنده و او یصال بر  
 شکل آلیر. وارا اولان هر شیله ائتلاف ایده بیلیر. نره یه کیتسه اوراده  
 کندی اوندی ایش کی اولور. چونکه وار اولان هر شیله  
 اللهه باقان بر صفحه تفریق و تمیز ایدر. عصری فکر لر  
 و مؤسسسه لرله ضد کی کورونمش اولان شیلر دینک فلان ویا  
 فلان شکل خارجیسیدر، فلان ویا فلان عقیده در. بونلر ایسه  
 اسکی جمعیات بشریه نك علمندن، حیاتندن بقیه قالمش آثار در.  
 یوقسه بویوک دینلرک ایچنده جولان ایدن اصل فکر دینی  
 دکلدرد. چونکه بوفکر دینی وظیفه یه ایماندن، بوتون یوکسک  
 و خیرکار فعالیتک کیزلی زنبركلری اولان تحریء خیر ایله  
 عمومی عشقندن باشقه برشی دکلدرد.

فقط کندیسنی کوستره جک بر شکل مرئی اولمادن بوفکر  
 دینی بر دین عد اولنه بیلیرمی؟ بر شأیت دیمک اولورمی؟  
 بوراده برفرق کوزتمک اقتضا ایدر. اکر روحی پرنسیپ،  
 تجربه ایله معلوم اولان حادثات دینه نك ترکیب ایتدیکی بوتون  
 مادی وقابل تعریف عناصرک صرف او بثر قتیف بر اصوله توفیقاً  
 بر طرف ایدلمسی صورتیله استحصال و تعیین ایدلمش کی تلقی  
 اولونورسه بو پرنسیپک ایچنده بر شأیت بولونمایه جنی  
 و بونک یالکمز خیالی بر طور طوبی افاده ایدن بر کله دن باشقه  
 برشی اولمایه جنی آشکار در. بر انسانی بر حادثهء خارجیه کی  
 تلقی ایدوبده اوندی سائر موجودات ایله مشترک اولان بوتون

عناصری کنديسندن رفع ايدە جك اولورسەم وانسانی قالان  
 شيدك ايچندە آرامغه قالقارسەم بر انسانك شخصيتى نه ديمك  
 اولور؟ ايشته بوندن دولاييدر كه قانتك آمر قطعيسى impératif  
 catégorique فيلسوفك فكرينه نفوذ ايدە مدكلرندن دولايى  
 اونك مسلكنى تماميله اوبز قتيّف وعقيده وى برشكده آكلايان  
 منقدر نظرندە بوش بر تجريددن باشقه برشى دكلدر . ماده  
 ايچندە روحى آرامق اونی بولامايه جق بر موقعه دوشمكلدر .  
 فقط ، حقيقتده ، وظيفه فكري فعال وقوى بر فكلردر كه  
 اونی هانكي شيئه مزيج وادخال ايدرسەك اوكا غايت بويوك  
 بر سلطه بخش ايدر . فعاليت بشريه يي تحريك ايدن بوتون  
 قوتلر ، بويوك تاريخي حر كترك بوتون اسباب اوليني آنجق  
 تمثالي ايضاحات ايله حقندە بر فكر اعطاسي قابل اولان ،  
 دستورلر ايچنه حبسي ممكن اولمايان غير قابل وزن شيلردر .  
 چوق كره كلمه لرك قوت و قدرتي كمال حيرتله كوزه  
 چارمشدرد . في الحقيقه ، انسانلره واضح و منطقي بر مسلك  
 تدريسيله كنديلرندە توليد ايديله ميه جك ائتلاف و حمله اونلره  
 حریت، وطن ، ايمپراطورلق ، عدالت ، الله بويله ايسيتور !  
 الله بزملة برابر در ! كي بر كلمه آتمقله در حال توليد و ايجاد  
 اولونه بيلور . عجباً خلق عالمردن دها ذكي ده بو كلمه لرك آلتندە  
 واضح فكلر لمي بوليور؟ بو كلمه لرك توليد ايتديكي مفهوملر عجباً  
 هر مفكره ده بر برينك عيتميدر؟ يوقسه بو كلمه لري برر اشارت

و علامت دیمه می قبول ایده جکیز؟ او اشارت لری کورنجه روحلرده  
 مبهم و سباح بر حسیات، افکار، تمایلات، احتراصات کتله سی  
 او یانیور، بر نوع سرایت طریق ابله فرددن فرده کچورمی؟  
 بوصورتله حقیقی بر قوت خلق اولونیور که خلق سور و کله یوب  
 کوتوریور، بو قوت واضح و معین بر مفهوم دکل بر تمایل،  
 بر خواهش مشترک، بر روحدر.

ایشته بویله تماماً شکلی بر طاقم اساسات وارد که عینی  
 زمانده غایت مثبت و مؤثر درلر. قانتک، وظیفه مفهومی بو نوع  
 بر پرنسیپ کبی پیش ملاحظه آلمش اولماسی پک اعلآ کلاشیلیر.  
 فقط قانتک وظیفه مفهومه او قدر بویوک بر قیمت عطف  
 اتمه سی اونی تجربی بر او بر قتیف لکک فوقنده عد ایتسندن  
 ایلری کلیوردی. بر جسمک سقوطی ناصل بر وقعه ایسه  
 وظیفه نکه ده طبق بویله بر وقعه اولماسنه راضی اولمازدی.  
 بونده عقلک بر ایجابی، حریت صرفه و خالصه نکه بر آرزوسنی  
 کوروردی.

بونک کبی، تأثیراتی او قدر مهم اولان فقط حد ذاتنده  
 نه اولایغی آکلاشیله مادینگی کبی تعریفده ایدیه مین فیکردیفینک  
 تاریخک بویوک محرک لری کبی، حسیات کبی، حیات کبی هم شکلی هم  
 مثبت بر پرنسیپ اولماسنی قبوله مانع اوله جق هیچ برشی یوقدر.



فقط عجباً دین منحصرأ حیات و فکر دن می عبارتدر ؟  
 مفهومی ملرله، مادی افاده لرله هیچ اظهار ایده مز می و ایتمه ملیعی ؟  
 دینی خصوصاً ندیده روحك متن ایله مناسبتی حقیقتده نه دن  
 عبارتدر ؟

هر شئیك فوقنده روحیتجیلک پر نسیپنی انکشاف ایتدیرمکه  
 چالیشمش اولان بر فیلسوف، فیخته دیورکه : Die Formel  
 ist die grösste Woltat für den Menschen دستور انسان  
 ایچون اك بویوك بر نعمتدر . چونکه روح و بدن تر کب  
 ایدن انسانیده روح بر مادهیه کیرمه دن کسب حقیقت کسب  
 ایده مز. بونك کبی، مه فیستوفه له سده ضیانك اجسامی استحقار  
 ایتمه حتی اولمادیغنی سویلر :

... da es, so viel es strebt,  
 Verhaftet and den Körpern klebt  
 Von Körpern staömt's, die Körper macht es schön,  
 Ein Körper hemmt's auf seinem Gagne  
 (گوته، فائوست: چونکه او قدر آرزوسنه رغماً، اجسامه  
 زنجیر بند قالیر. اجسامدن فیشقیریر، اجسامی کوزلشدیریر ؛  
 فقط بر جسم اونك یورویشتی دوردیریر)

دیندن او بڑقتیف عنصرلری تماماً قالدیره جق اولورسه کز،  
 اوله بر حاله اینرکه فردك خولیا لرله قاریشیر و آرتق دین دییه  
 توصیف اولنه ماز .

حقیقتده ، بر حیاتی دکیشدیرن الهامده ، انسانلری کندی

کندیلرینک فوقنه چیق-اران حسده ، بر ملتک روحی تسمیه  
ایدیلن شیده ، تأثیراتی تاریخی دولیران فکر دینیده ذکایه  
بیکانه وسویر کتیف عناصردن باشقه برشی بولونماسی غیرقابل  
قبولدر . روحک بربرلرندن قطعی بولملرله آیرلمش بر طاقم  
ملکاتدن ترکب ایتدیکی ادعاسنه آنجق پک اسکی بعض  
پسیقولوژی کتابلرنده تصادف ایده بیلیرز . حقیقی روح بردر .  
تظاهر اتنک هر برنده تمامیه ، ذکاسی و مخیله سی ، اراده سی  
و فعالیت روحیه سی برابر اولدیغی حالده موجوددر .

بناءً علیه ، تمالسز بر دین فکریله افاده ایدیلن فکردینی نک  
بر یره طولانمه سی کیفیتی بر حد ، بر منتها دکل بر صفحه در :  
یکی بر حمله نک شرطیدر .

عمومیتله مفکره بر شکلدن آنجق باشقه بر شکل آرامق  
ایچون آیریلیر . آرتق کندیسنه کفایت ایتمین شکلی ترک ایله  
کندیسنک ترقی داخلیسنه و بولوندیغی حالک شرائطنه نظراً  
کندیسنی دها صادقانه تمثیل واران ایده بیلرله جک باشقه بر شکل  
اکتساب ایدر . قانت عقل عملینک کندیسنی اسیر موقعنده  
طوتان قوانین تجربیه دن ابتدا بوصورتله خلاص بولدیغی  
کوستریر . صوکره ، ایکنجی درجه ده ، آرزوسنک بلاواسطه  
افاده سنی بر وظیفه مفهومی اولق اوزره قبول ایدر . نهایت  
اوچنجه درجه ده ، حیات بشری کاملاً بومفهومک ساحه فعله  
ایصالندن عبارت بر حاله کتیرمک چاره لرینی آزار .

دینی پرنسپ، ماضیده کنیسی افاده ایتمش اولان شکلرله قاریشماز. یوقسه بیک دورلو ضد اوصافی حائز اولوردی و قابل تفکر اولمقدن خالی قالیردی. اساس دینی کیتدجکه مفکره نك قوه ايجادیه سنك ، علویتك ، حقیقتك بر تأیدی اولمق اوزره نمایان اولمشدور.

اونك مرکزی آرتق شعوردر. خارجی و مادی ایکن باطنی بر حیات حالنه کچمشدور. بو حیات باطنی روحك، كرك بر فردك روحك كرك فردی روحلر آراسندن یاراتمغه قادر اولدیغی کیتدجکه دهها واسع مشترک روحلرک فعالیتیدر. بالخاصه صوفیه نك تأثیرینه مدیون اولدیغمز بوتکامل آرتق مکتسبدر. فقط صوفیه مسلکی ده مطاوع و فعال اولمق اوزره ایکی یه آریلیر. برنجیسی دنیادن چکیلیمک واللهی تماشا ایتمکله اکتفا ایلر. ایکنجیسی سینۀ الوهیتده سور، ایستر ونشر شعاع ایلر. حالبوکه خارجهده ساحۀ فعله حیقمق ایچون دوشونمک و بر فعل و عملده بولونمق لازمدر. بونك ایچوندرکه من القدیم دینك حسیاته علاوه ایتدیکی ایکی عنصر ، یعنی اعتقادات ایله اعمال فی الحقیقه حسیاتدن غیر قابل تفریقدرلر.

ذکاتک حادثاتی حس و ادراک و اخذ قبول ایتسی ایچون برر واسطه اولان تفکر قالبری یاخود مقولات نردن نشئت ایدیور ؟ بونلرک ، مفکره ایله حادثاتک مشترک تأثیرلرینك

محصوللری اولدینی سویلندیکی زمان وقعیه حقنده ایضاحات  
ویرلمش اولمایوب تشبیه طریقیله فکر ویرلمش اولدینی آشکاردره  
کذلک یالکز وقعیهله تقدم ایتمهکله قالمایه رق اونلر ایچون الده  
ایدلمسی غیرقابل بر طاقم نمونه لری کندیلرینه عرض ایله اونلره  
حاکم اولان، اونلری تعدیل ایدن، خلق وایجاد ایله ین دهانک  
نخترعانی ده معلوم حادثاتک میخانیک محصله لرندن باشقه برشیدره  
بونک ایچوندرکه مفکره بشره برر وحی، علوی برشأیت ایله  
بر مناسبتک تأثیراتی کی نمایان اولورلر .

شیللر هر بهارده طبیعتی و قلبلری تحویل ایدن او اسرار  
آلود باکرک زردن کلدیکنی صورار .

Sie war nicht in dem Tal geboren  
man wusste nicht woher sie kam

( وادیده تولد ایتمش دکلدی . نردن کلدیکی بیلنمیوردی )  
بونک کی ، الهام دینی ده اوله بر طاقم تصورات و تلقیات  
ایله افاده اولونورکه بونلر بزم ایچون تجربه نک خارجنده قالیرلر .  
چونکه وارلغک و حیاتک اصل منبعنه تعلق ایدرلر و برر وحی  
صورتنده منظور اولورلر . ذی شعور انا اونلری بویله کورور .  
آنحجق بووجهله مافوق طبیعی بر منشاءه عطف واسناد ایدلمک  
صورتیه بونلر ذی شعور بنلکمزده اجرای تأثیر ایده بیلیرلر ،  
وار اولابیلیرلر .

بو تصورات و تلقیات ، برشی حقنده کی هر صورت ذهنیه کی بر

دستورك يعنى برخيالک ايجنده تثبيت ايدمک، تعريف و تعيين اولو تمق  
ايسترلر. بوخيال برتمالدين باشقه برشي اولاماز. في الحقيقه فکر  
ديننک خيلي صرف مساعي ايتديکي شيلردن بري کنديسي شو معلوم  
اولدقلى حالده اشيا و موجوداته و بوموجوداتک علمنه ربط ايدن  
تساندي قيره رق اونلرک حدوديني تجاوز ايدن موجودات، يالکمز  
طبيعت طرفندن ساحه فعله ايصالي غيرقابل اولان موجودات  
ايله تغدي ايتمک کيفيتي اولمشدر. اشيا و موجوداتي حس و ادراک  
ايجون کنديلرينه تطبيق ايتديکمز اولجه متشکل مقولات  
و مفهومات بونلرک غيرقابل احسا برر تمالدين باشقه برشي  
اولامازلرسه، بالذات و قوف علمي ده بالضروره تمالي برحاله  
قاليرسه غيرقابل تمثيل و ارائه اولان برشيئي تمثيل و ارائه ايتمک  
ايشته ين دينک بو قانون ذکادن خارجه قالايلمسنه امکان  
وارميدر؟ حتی ديني تمناجليغک بر درجه يه قدر ايکنجی درجه ده  
بر تمناجليق اولماسی ايجاب ايدر. چونکه علمک و يردیکی  
حکملرله توافق ايدن افاداتنده بيلکيمزي زنکينلشديرمه  
قابليت خصوصتده دينک علم ايله رقابت ايدم بيلمسی غيرقابلدر.  
دينک غايه سی علمک غايه سندن بوتون بوتون باشقه در. بزم  
ايجون هيچ بر وجهله حادثاتک ايضاحاتي دکدر، آرتق بويله  
اولمقدن چيقمشدر. دين اشيا و موجوداتک طبيعت و ماهيته،  
اوبرقتيف منشاءنه عائد کشفیات علميه دن متأثر اولاماز. دينک  
نظرنده حادثاتک قيمتي معنای اخلاقيلرينه، تلقين ايتدکلری

حسیاته ، افاده و تولید ایتدکری حیات باطنیه به باغلیدر .  
 حالبوکه اولردن بووصفی هیچ بر ایضاحات علمیه نزع ایده مزه .  
 دینک او بثرقتیف عناصری اولان اعتقادلرک ، عنعنه لرك ،  
 عقیده لرك بوتون ذکائی محتویاتدن بوشالتیلهرق صرف عملی  
 بر قیمته قصر ایدلمه لری لازم کله جکنه ذاهب اولما مالیدر .  
 تطبیقات و اعمال ایله بیلدکینک بویله جذری صورتده تفریقی  
 بر نوع بحث و ادعادرکه قانت بوکا تشبث ایتشمسه ده ادعایی  
 قازانه مامشدر . هر دورلو مفهوم نظریدن تجرید ایدیلن تطبیقاتده  
 نه دینی حتی نه ده انسانی هیچ بر قیمت قالماز . شعور بویله بر  
 تفریق اجراسنی قبول ایتمز . فقط شعورده ایکی طرز وقوف  
 واردر . صریح وقوف ، قاریشیق وقوف ، یاخود بالخاصه تمثالی  
 وقوف . بر صنعتکارک ، بر شاعرک ، بر مخترعک ، حتی بر عالمک  
 تحریاتنه حاکم اولان فکر قاریشیق ومبهم بر فکردر . احتمالکه  
 هیچ بر زمان فرقلی و صریح فکرلره ایرمایه جقدر . مع مافیه  
 اوینه مثبت ، فعال ، مؤثر بر فکردر . انسانک اراده سی ،  
 ذکاسی بالخاصه بویله فکرلر طرفندن تحریک اولونور . ریاضیون ،  
 ذهنلرنده بر وحی کبی عرض وجود ایدن بر حدس  
 خبیله وی به تحلیللریله واصل اولمق ایسترلر . بونی مفهوملره  
 مستند اثباتلر حالنه قلب ایتک ایچون اوغراشدقجه او  
 حدس صراحت کسب ایدر ، تعین ایلر . مفکره حقیقی  
 استخراج ایتمز . اوئی بالضروره مبهم وقاریشیق بر حالده وضع



و فرض ایدر. صوکره، فرضیه لرینی تجربه ایلر و بوسعی سایه سنده اونلری فرقنی، عیان برحاله کتیریر. انسان ایچون «دوغرو» دیمک، وقعه طرفندن محسوس صورتده حقیقی کوسترلمش، تصریح ایدلمش بر فرضیه دیمکدر.

موضوعی وار اولان شی دکل وار اولماسی لازم کلن شیدن عبارت بولونان وقوف دینی، علمی بیلکیلر کبی تعین ایده مز. فقط قیمت عملیه سندن مستقل اوله رق، علمک و حیاتک تجربه سنک وجوده کتیردیکی شکلده کی عقلی نمون ایده بیله جک بر تمثالی معنا عرض ایده بیلورسه حقیقی و مشروع بر محتویات فکریه یه مالک اولدینی بحق ادعا ایدیله بیلیر.

ایشته هر حقیقی دینک لاینفک عنصری اولان عقایدک تملی بودر.

دینلرک عقاید اصلیه سی ایکیدر: ۱ — ذی حیات، اکمل، قادر مطلق بر اللهک وجودی؛ ۲ — بواللهک انسان ایله ینه ذی حیات و مشخص بر مناسبتی.

الله فکرینک ایوم عقل بشر طرفندن ترک و بر طرف ایدلیدیکنی سویله مک حقیقت حاله پک توافق ایتمز. عقل، خارجی و مادی بر اللهدن، طبیعی موجوداتک بر بویوتوله سندن، بر تکرارندن عبارت اولان بر اللهدن کیتدکجه اوزاqlاشمشدرد. فقط شعور دینینک الله نامی آلتنده پرستش ایتدیکی شیئه بر یره

طوپلان دقلری ، تعریف و تعمیق ایدل دکلری زمان تمامیه توافق  
ایدن مفهوملره بالعکس کیتدکجه مربوط اولمقده در .

طبیعت مرئیة عمومیتله انحلال و تفسیخدن ، داغیلمه دن ،  
بوزولمه دن ، آشاغیلامقدن ، محو و خرابیدن باشقه برشی دکلدر .  
حالبوکه بزعمومی بر بقاء بر طوپلانمه ، برائتلاف و آهنگ تخیل  
ایده رزه بر فردک انکشافی ، جریان طبیعی احواله نظراً سائر  
بعضیلرینک ازیلمسنی ایجاب ایدر . نیجه نك مافوق بشری ای  
اسیرلر ایستر . بزم دنیا مزده شر خیرک بر شرطیدر ، بر طرف  
ایدلمسی غیر قابل کبی کورون بر شرطدر . بو دنیایی کیم خلق  
ایتدی ؟ خیرمی ، شرمی ؟ الله می . شیطان می ؟ اییلک ، عشق ،  
مکملیت اولان الله بر طاقم اولیالر ، حقیر و متواضع آدملر ،  
عادیلر ، فداکار کیمسلر وجوده کتیر بر . فقط شیطان دنیایه  
آچلنی ، اضطرابی ، کین و غرضی ، حسدی ، حرصی ، یالانی ،  
جنایتی ، حربی قویمشدر و بوضورتله انسانک فعالیتنی او یاندیرمش ،  
ترقیاتنه سبب اولمشدر . علم ، صناعت ، تشکلات اجتماعیه ، عدالت ،  
صنایع نفیسه ، دینلر ، شعر ، تربیه بوتون بو خوارق بومعناجه  
انسانک کنیدیسنه هجوم ایدن فناقلری اونو تمق یا خود مغلوب  
ایتمک ایچون ایجاد ایتدیکی واسطه لردن باشقه برشی دکلدر .  
شری قالدیرکز ، خیر سینئه هیچی یه دوشر . هراقلیت : حرب  
کائناتک والده سی و ملیکه سیدر دییور .

حالبوکه عقل بشر ایشته بو قانون طبیعتنه قارشى اعتراض

ایدر. شر ایله دکل خیر ایله خیر یایمق ایستر. بر قسم انسانلر ایچون تحریت، رفاهیت، فضیلت اولان شیئک دیکرلری ایچون سقالت، اسارت، اخلاقسزلق اولماسنی ایستر. وار اولان، حد ذاتنده کندنده مثبت و ذی حیات برشی بولونان هر موجوده بر شکل کمالی، بر قیمت، بر حق وجود وانکشاف عطف ایلر. آرتق وار اولمایان ماضیه، احتمالکه وار اولمایه حق استقباله ده بر وجود بخش ایدر. علم، صنایع نفیسه، دین، حیات خصوصیه فضائی، حیات عمومیه فضائی، صنعت، حیات ملیه، حیات اجتماعیه، طبیعت ایله، غایه کمال ایله انسانیت ایله اشتراک کبی فعالیتک بوتون شکللرینی حر اوله رق ادامه ایتمک و کندی انکشافلرینه حاکم بولوندیرمق املنی تعقیب ایلر.

بوندن باشقه عقل، هیچ رابطه سز و مناسبت سز کورون بر چوق عناصر آراسنه بر اتلاف، بر آهنگ و تساند ادخال ایتمکی دوشونور. هر شیئک کله نک مفکوره وی معناسیله بوتون قابلیتک مساعد اولدیغی بر شکل آلماسنی، مساعد اوله جفی صوگ درجه مکملیه و ارماسنی، وعینی زمانده هیئت مجموعه موجودات ایله بر اولماسنی و بو اشتراکدن یاشاماسنی ایستر.

بویله برغایه نک تأمین قابلیدر؟

بونک طبیعتک پلانی خارجه چیقدیغی تسلیم ایتمک ایجاب ایدر. طبیعتده کی عطالت، موجوداتک حد ذاتلرنده حائز اولدقلری قیمته قارشى لا قیددر. حتی طبیعت ایچون موجودات بولنوب

بوتنادینی بیله مجهولدر. بو بزم ادرا کمزك منطقنی ده تجاوز ایدر. چونکه ادرا کمز اشیا و موجوداتی بر طاقم مفهوملره ارجاع و تنزیل ایله بونلری بر برینک عینی عدا ایتمکدن یا خود بر برلریله غیر قابل تألیف بولمقدن باشقه برشی یاماز. الهیات علمنک او عقیده پرستانه مسلک لریله یالکمز ابدیت، غیر قابلیت تحول، ستاتیک کیفیت و وحدت مقولاتنه مراجعت ایدیلمسه ایدی اوزمان بواشی هیچ عقل آمازدی.

فقط علمک کوزلریله ذکل ایسه ده عقلک کوزلریله کورولن طبیعت احتمالکله هیچ ده غیر قابل تحول بسیط بر مقانیزمه دن عبارت دکلدرد. طبیعتک بو ذی حیات شأنی ایچنده بر طاقم وجودلر بولنمایوب ده یالکمز بر وجود بولندینی قطعاً محققمیدر؟ اگر حیات کندیسنه خاص اولان شکله پدش ملاحظه آلینیر و بر شأنی اولق اوزره قبول اولونورسه بزه بر طاقم جواهر ایله بر طاقم خواصک بالنسبه دوامی و آهنکدار بر اتحادی طاسلاغنی کوستررکه کندی باشلرینه قالسه لر میخانیک قوتلر بونی هیچ بر زمان تشکیل ایده مزلردی.

حیاته قیاساً، اوילה بر وجود تصور ایده بیلیرز که اونده مثبت اولان، وارلغک و مکملیتک بر شکلی اولابیلن هرشی برلشمش و پایدار اولمقده بولونمش اولسون. بوهم بر، هم متعدد بر وجود اولاجقدر. فقط مادی بر کل کبی یان یانه قونولمش عناصردن مرکب بر وجود دکل. بر شعورک، بر شخصک

متمادی و متصل ، متحرک نا متناهی یکی کبی بر شی . تجربه نك  
حدودینی تجاوز ایدن بوفکر ، میخانیکی صورتده مفکره به ضروری  
کور و نیمورسه ، عقل بشره موافقدر . هم اقوامك عنعناتی هم  
متفكر لرك ملاحظاتی بوكا شاهددر . بوفكر ك ارئه ایتدیكى  
وجود دینلرك الله دیدیكى شیدر .

دینلرك ایکنجی عقیده اصلیه سی اللهك انسان ایله ذی حیات  
بر اشتراکیدر . خرسقیانلق دینی بو اشتراکی شو صورتله تعریف  
ایدر : « هیچ کیمسه الهی کورمه مشدر . اکر بز بر بر منی  
سوه جك اولورساق الله بزم ایچمزدده بوله جقدر . » تعیریدیکرله ،  
الله عشقدر ، عشقده اشتراکدر ، باشقه سنك ایچنده یاشاق  
قدرتیدر . سومك الهی تقلید ایتکدر ، بدرجه به قدر الله  
اولمقدر ، اللهك ایچنده والله واسطه سیله یاشامقدر .

خرستیانلغك قلبنده بولونان بوفكر لرك عقلك خواهش  
و تمایلنه پك موافق اولدیغی آشکاردر . وار اولمغه لایق اولان  
بوتون شیلرك ، سینه سنده ائتلاف ایده جکلری ، اریوب برلشه .  
جکلری ، و آهنگدار صورتده پایدار اوله جکلری وجود بالطبع  
هم ذکلك ترکیب ایتدیکی شیلرده تقلیده چالیشدیغی بر نمونه  
هم ده ائی ایچون اوغراشان اراده نك لاینقطع اکتساب قوت  
ایده بیله جکی بر قوه معنویه منبعی اولق اوزره تصور ایدلمشدر .  
الله اینامق ، شو عالم فضا و زمانك بزه غیر قابل تألیف کبی کوستردیکی  
بوتون مکملیتلرك اتحاد ابدیسنه اینامق ، عینی زمانده بوعدم

ائتلافك آنجق ظاهرى اولديغنه و برقوت موجود اولوب بو  
سايه ده خيرك ينه خير ايجون شرط و واسطه اولاييله جكنه  
اينامقدر .

كالك و وارلغك اتحادي اولان الله، عشق الله، پدر الله،  
خالق الله عقلك خواهش و تمايلنه تقابل ايدن برطاقم فكر لر در .  
مع مافيه بونلر واضح و عيان فكر لر دكلدر . بويله اولاييلمه لرى ،  
قابل تصور اولاماز . بونلر مغلق و مبهم ، تمثالى مع مافيه پك  
حقيقى و ذى قدرت فكر لر در .

بو مفهوم لرى كيتدجه دهها مشخص و بوضو رتله هر كس ايجون  
كيتدجه دهها قابل ادراك و اراده يي سوجه كيتدجه دهها قابليتلى  
برحاله كيتير مك ايجون ذكالك مراجعت ايتديكى افاده لر ده  
بالضروره تمثالى اولمق لازم كلير . بو انكشافات عقل ذى حياتده  
علممزك و حياتمزك شرائط اساسيه سى ايله ائتلاف ايده جك  
صورته ده تصور و تلقى ايديلنجه مشروع اولور لر . حقيقتك صرف  
بر تخريسندن عبارت اولمق صفتيله علم و ياشامق ايجون بر سبب  
آرايان حياتده بو وجوده معلق دكليدر لر ؟ چونكه يالكز اونده  
وارلق برقيمت، كمال بر شأيت اكتساب ايدر .

دينك عناصر اساسيه سى اولمق اوزره حسدن و عقايددن  
باشقه آينلر، كرك داخلى كرك خارجى اعمالده واردر .  
اعمالى دينك صرف تصادفى، عارض بر عنصرى كې پيش



ملاحظه آلمق غیر قابلدر. وجود صرف اولان، کندیسـنک استعدادلری اوزرنده حکمسز قالان تأثیری بر تشعشعدن، بر تصاعددن عبارت بولنان اوجوهر روح بشرک نره سـنده در؟ بو، بر طاقم محسوس خیاللردن استخراج ایدلمش بر تشبیهدر. اعمال بو صورتله انانده سـاده بر نتیجهدن عبارت اولمق شویله دورسون، بر طاقم ممتاز، پسقو لوژی متخصصلری حسیاتک، باطنی استعدادلرک، وجود دینلن شیئکده بر نتیجهدن، خارجی و محرک بر فعالیتک روحی بر ترجمه سندن عبارت اولدیغنی سویلرلر. هر حالده، معطای بر حسک قطعياً دوغرودن دوغرویه ایچمزدن کلمه می یوقسه افعال و حرکاتمزک وارلغمز اوزرنده کی تأثیراتنده آز چوق تابع می اولدیغنی کسیدیرمک بزجه غیر قابلدر. بو تأثیر کندی باشنه بر قوه خلق و ایجاد مالک دکلسه بیله هر حالده غایت دریندر. بونک ایچوندرکه اعمال، آیینلر من القدیم دینلرک بر پارچه سی کی تلقی اولونمشدر. دینلر نه قدر روحیتجی اولورلر سه اولسونلر قوانین طبیعته مغایر بر حرکته بولونمش اولمادن وجودی فعلدن آیرامازلر. دینلر موجود اولدقجه عناصر اساسیه اولمق اوزره بر طاقم اعمالی، آیینلری، فعال و خارجی تظاهرلری ده احتوا ایده جکلر در.

اعمال بر سلطه و اطاعته لزوم کوستیرر. بو پرنسپلرک دیندن، کذلک علی العموم حیاتدن ناصل رفع وازاله ایدیله . بیله چکی جای سئوالدر. فقط دینی سلطه مفکره دن، یالکیز

مفکره دن عبارت اولدیغی آشکاردره. باشقه سلطه لرك هپسی بر  
عضودر که مفکره نك سلطه سی او واسطه ایله تظاهر ایدر .  
منحصراً معنوی اولان دینی سلطه یی آنجق حر شعورلر  
آکلایه بیلیر و اوکا بویله شعورلر اطاعت ایده بیلیر.

دینی آیینلر برغایه دکلدر، بر واسطه در. بوتلر دینی غایه لرك  
ساحه فعله ایصالنی تسهیل ایده بیله جك بر ماهیتده اولمالیدرلر.  
بودینی غایه لر ایسه : قلبك صفوتی ، خودکاملقدن فراغت ایله  
برابر اولیه بر جماعت تشکیلدر که بونك هر اعضاسی هیئت مجموعه  
ایچون ، هیئت مجموعه ده هر اعضا ایچون یاشار . حواریوندن  
ژانك دیدیکی کی بو جماعتده هر کس — اللهمک ایچنده اب ایله  
ابنك بر اولماسی کی — بر درلر .

ایشته بوصورتله دین جمعیات بشریه نك ملك صیانتکاری  
صفت قدیمه سنی محافظه ایده جکدر . دین بوتون شعورلرك  
بناءً علیه بوتون انسانلرك اتحادینی ایستر . بونلرك آراسنده  
رابطه مادیه نك اساسی ، استنادکاهی اولق اوزره بر رابطه  
عشق تأسیس ایتکه چالیشیر . دین بو اعتبار ایله آیینلری  
غایت اعتناکارانه محافظه ایده جکدر . چونکه اوقدر عصرلردن  
وقوملردن انتقال اتمش اولان بو آیینلر عائله بشریه نك دائمیتك  
وبویوکلکنك امثالسر بر تمثالیدرلر . دین دائماً دها درین ،  
دها عمومی ، دها روحانی بردوشونجه نفع ایده رك بونلری محافظه  
ایله یه جکدر . مشترک بر اثره بر لکده چالیشه رق بر فعل وحر کتده

بولنمق، حس ايتمك، اهتزاز ايتمك، عقله كوره اتحادك سريدر.  
ارسطو مشترك شيلر بر رابطه در ديري .

دینی، اعتقادات و اعمال ایله نهایتلندی ر مک دین حقیقه ناقص،  
هم ده مجرد بر فکر پیدا ایتک اولور. دین حسدن حرکت ایتدیکی  
کبی حسه منجر اولور . چونکه عقاید ایله آیینک غایه سی هم  
حسی افاده ایتک هم حسی تولید و ایجاد ایتکدر . حسک  
انکشافی او یله بر دائره یه بکزر که منشأندن ینیه اورایه عودت  
ایتک اوزره اوزاقلاشیر. پسقو لوزی متخصصلرینک و اخلاقینک  
صوفیه مسلکینده احتمالکه دینک اعماقنی تشکیل ایدن اساسلی  
بر عنصره اشارت ایتمه لری سبب سزدکلدر. هر شدتلی حیات دینییه  
متصوفانه در. صوفیه حالی او یله بر منبع حیاتدر که اسقولا سیتک  
ایله و شکل پرستلک ایله تهملکه یه دوشن دینلر اوراده کنه جله شیرلر.  
فقط مجرد و عقیم بر صوفیه مسلکی، برده مثبت و ولود بر  
صوفیه مسلکی واردر. برنجیسی عقایدک و اعمالک استبدادندن  
کویا آزاده قالمش اولان یالنکز حس ایله یاشامغه چالیشیر. حس،  
ذکادن و فعالیتدن آیرلمقه یوکسلمز، ضعیفلار، بوزولور. حالبوکه  
بالعکس تفکر و فعل و عمل ایله سوق و اداره ایدیلیر و متمر بر  
حاله کتیریلیرسه حس حقیقه اندساط و تزه ر ایده بیایر و خاصه  
خالقه سنی کو ستره بیلیر . ایشته او زمان فعال بر تصوفدر که  
غایت امثال سز بر قوتدر ، بشریتک دینی ، اخلاقی ، سیاسی ،

اجتماعی بوتون بویوک حرکاتنک اعماقنده بوکا تصادف اولونور.  
اعتقادات و اعمال طرفدن بوضورتله بر استقامته توجیه  
و تعیین ایدیلن حس دینی صرف طبیعی و فلسفی اولان فضیلتله  
مقایسه ایدیلنجه ، مساعده کارلنک عشقه تحولی دییه تعریف  
اولنه بیلیر .

فیلسوفلرله سیاسیون انسانلره بر برلرینی نظر مساعده ایله  
کورمه لرینی توصیه و امر ایتنک ایچون بر طاقم اسباب بولمشاردر .  
هم جنس لرم ایچون رد ایده جکم بر حریتی بن کندم ایچون نه حقله  
طلب ایده رم؟ فقط بویله بر محاکمه حقیقی اولمقدن زیاده شکلیدر .  
باشقه لرینک حریتی تمسکنه معادل قیمتده اولدینی اثبات ایدلمشیدر؟  
اگر حریت تعبیر یله صرف ایسته مک و یا ایسته مک قوتی قصد  
اولونورسه بلکه بو سؤاله اوت جوابی ویر یله بیلیر . فقط بویله  
بر حریت صرف بر تجریددن عبارتدر . هر حقیقی حریت اونی  
تعیین و ایجاب ایدن فکر لرله ، بیلکیلرله ، تمایل لرله ، عادت لرله  
برلشمشدر . بو حریت ، بر طاقم یوکسک اساسلره کوره حرکت  
ایدن سائر حریتدن جدا اییدر . او حالده ناصل اولورده بوتون  
حریتلر مساوی حقوقه مالک اولابیلیرلر؟ خطاده صواب کی ،  
فضیحت ده فضیلت کی ، جهل ده علم کی عینی حقوقه می مالکدر؟  
بو کون بوتون بیلکیلر مز ، کرک معنوی کرک مادی بیلکیلر مز  
هپ قطعیت علمیه یی حائر اولمق ادعاسنده دکلیدرلر ؟ اکر  
صواب خطایی نظر مساعده ایله کوره جکسه بو آنجق بر زمان

موقت ایچون ، خطایه کسب معلومات ایله مک وکنسیدیسنی  
تصحیح ایتمک اوزره ویریلن مهلت ظرفنده اولایلیر.

خلاصه ، مساعده کارلق اساسی نایمحل بر مفهومدره.  
استخفافکارانه بر لطفکارلغک افاده سیدر، بخش ایدیلیور کبی  
کورونن شینک ذهناً رد وانکاریدر . هرشیده مثبت علمک  
نقطه نظرندن باشقه برنقطه نظر قبول ایدلنرسه مساعده کارلغک  
ناصل محق وقابل تجویز کوستریله جکینه عقل ایرمز.

دین ایسه علم نقطه نظرینک یاننده حس وایمان ایچونده  
بر نقطه نظر بولونماسنی طلب ایتمکدن عبارتدر. دین نظرنده  
صرف بر فردیت اولمق اعتباریله حریتلرک قیمتی ادعای مناسبت  
ایتدکلری عامی بیلکیلرک مقصداری ایله اولچولمز. فردیت ،  
کرک جاهلک کرک عالمک، کرک مجرمک کرک ناموسلی آدمک  
فردیتی کنسیدیسنه خاص بر قیمتی حاضدر. ایچنده شخصیتک،  
حریت خطا وسقوطک، تنوع و آهنگک حکمران اولدینی بر  
دنیا ، دیندار بر آدم نظرنده تک وغیر متحول بر دستورک  
میخانیککی تطبیقاتندن باشقه برشی اولمایان بر دنیا به نسبتله ده  
ای، ده کوزل، مکملیت الهیه ده شهبدر. منتهای ایچون  
نامنهاینی تقلید ایتمهک یکانه طرزی نامنهاینی صورتده تخالف  
عرض ایتمکدن عبارتدر .

بونک ایچوندرکه دیندار آدم باشقه آدملرده تصادف ایتدیکی  
شمیلر ایچنده اونلرک کنسیدیسنه بکزه دیکی نقطه لری دکل

کندیسندن آیرلدقلری نقطه‌لری بالخاصه تقدیر ایدر. اوفرقلری ساده‌جه نظر مساعده ایله کورمکه قالماز. اوفرقلر اونک نظرنده آهنگ عمومینک پارچه لریدر، باشقه آدم‌لرک وجود لریدر. و بوندن دولای کنیدی شخصیتک انکشافک شرائطیدرلر.

یاقوب بومه Jacob Boehme دیورکه: «اورمانلر منده کی قوشلره باقکیز. هپسی الهی کندیسنه کوره، هر لحن و طرزده ثنا ایدیور. بوتخلفدن الهک قیزه رق متضاد سسلری صوصیدریغنی کوریور میز؟ وجود نامتناهی ایچون هر شکل وجود معززدر.»

دین باشقه‌لرینی سومکی واونلری اونلر ایچون سومکی بزه امر ایدر. فلسفه‌دن ده-ا جرئتکارانه داورانه رق عشقی بر وظیفه، اک بویوک بر وظیفه یاپار. چونکه انسانلر بر برلرینی اللهده سومکی یعنی وجودک و عشقک مشترک منبعنه قدر چیمه‌نی امر ایلر. هر کس قاردش اولونجه سهویشمک پک طبیعیدر.

\*

\* \*

آرالرنده کی مناسباته رغماً دین ایله علم بر برلرندن آیریدر و آیری قالمغه مجبوردر. موجودات آراسنده بر انتظام عقلی تأسیسی ایچون یا تمثیل طریقله یا خود رفع و ازاله طریقله فرق و اختلافی واحده ارجاعدن باشقه بر طرز اولماسه ایدی دینلرک استقبال و مقدراتی مشکوک کوریه بیلیردی. فقط تضادلرک تولید ایتدیکی نزاعلرک حیاتده، علم وجدل و مناقشه‌ده اولدیغندن



باشقه دورلو بر طاقم چاره حلالری ده اولابیلیر . هرایکیسی ده  
 قوه حیاتیه و ولودیت ایله متصف ایکی قدرت بر بریله مبارزه  
 ایتدیکی زمان بو نزاعلری اونلرک انکشافنه ، بویومه لرینه  
 خدمت ایلر . هرایکیسنک ده ، قیمتی وغیر قابل ازاله اولمالری  
 کیتدکجه دهها زیاده میدان بداهته حیقیدیغندن بو مبارزات  
 آراسندن اونلری بر برینه تقریب ایتک واتحادلرندن آیری  
 آیری اولدقلری زمانکته نسبتله دهها زنکین ، دهها آهنکدار  
 بر وجود تشکیل ایتک ایچون عقل صرف مساعی ایدر دورور .  
 ایشته دین ایله علم حقنده بویله در . مبارزه هرایکیسنه ده  
 قوت بخش اولیور . اکر عقل احراز تفوق ایدرسه اونک  
 عینی زمانده هم دهها کنیش ، هم دهها قوی هم دهها اویصال  
 بر حاله کلش اولان آیری آیری اساسلرندن کیتدکجه دهها  
 کنیش ، زنکین ، درین ، حر ، کوزل وقابل ادراک بر شکل  
 حیات ظهور ایده جکدر . فقط بر برلرندن آیری شیر اولان  
 بو ایکی قوت صلح وسکونه ، استلافه ، آهنکه دوغرو یورومکدن  
 باشقه برشی یاپامازلر وبو غاییه واصل اولامازلر . چونکه  
 شرائط حیاتیه بشر بویله در .

## فهرس

### مدخل — دین و علم

قدیم یونانستاندن معاصر دورہ یہ قدر

- ۱ — قدیم یونانستانده دین و فلسفه . . . . . ۵
- ۲ — قرون وسطا — خرسدیانلق ؛ اسقولاستیکار ؛ صوفیه . ۱۴
- ۳ — رونه سانسدن صوکره علم و دین — رونه سانس — ازمنه  
جدیده : راسیونالیزم ؛ رومانٹیزم. — علم ایله دین قطعی بر بوله
- ۲۰ — ایله بر برلندن آیرلاندرد . . . . .

### برنجی قسم — طبیعتپرستلک مسلمانکی

- ۵۰ — برنجی باب — اوکوست قوت و دین بشریت
- ۵۰ — آرتق غیر قابل اجتناب یر مواجهه . . . . .
- ۱ — علم و دین حقنده اوکوست قونتک مسلمانکی — علم فکرینک  
تعمیمی و علومک تشکیلاتی : علم و فلسفه — فلسفه و دین : دین بشریت . ۵۵
- ۲ — اوکوست قونتک مسلمانکنک تفسیری — سوسیولوژی  
و دین : دین سوسیولوژی به نه علاوه ایتدی — قونتک مسلمانکنده  
فلسفه ایله دینک مناسبت منطقیه سی : دین فلسفه یی تکذیب ایدرمی . ۸
- ۳ — اوکوست قونت مسلمانکنک قیمتی — دینک علمه ، علمک  
دینه ایقاع مشکلاقی — بشریت فکری مبهم بر مفهومدر —  
انسانک ، کنددی فوقنه چیمغه میلی ؛ بو، دیندر — پوزیتیویزمک  
داخلی تضادلری . . . . . ۹

### ایکینجی باب — هربرت سپنسر و ناقابل ادراک

- ۱ — علم ، دین و مناسبتلری حقنده هربرت سپنسرک مسلمانکی —  
ناقابل ادراک ، علم و دین — تکاملجیلک ، تکامل دینی . . . ۱۱۱
- ۲ — هربرت سپنسر مسلمانکنک تفسیری — سپنسر رهبراولان  
اسباب — تکامل دینی نظریه سی ایله ناقابل ادراک نظریه سنک  
مناسبتی — منفی ناقابل ادراک و مثبت ناقابل ادراک — هربرت

سپنسر و پاسقال ..... ۱۲۴

۳ — هربرت سپنسر مسلكنك قيمتى — هربرت سپنسر ك ناقابل ادراكى دينرك بر طور طوسى دكلمدر؟ سپنسر كوره حسياتك قيمتى — مسلكك فعلى بر على ده واردر — مسلكك ضعيف نقطه سى : صرف او بر قتيق بر نقطه نظر دن تلق ايدلش اولان ناقابل ادراك. هربرت سپنسر بوكا يا پك فضله يا پك آز بر قيمت

عطف ايدر ..... ۱۴۳

۱۵۷ / اوچنجى باب — هه قل و مونيزم

۱ — دينك علم ايله اولان مناسباتنه دائر هه قلاك مسلكى — دين ايله علمك نزاعى. — دينرك حكمت وجودينى تشكيل ايدن معمارك هم علمى هم عقلى چاره حلى اولق اوزره تكاملجى مونيزم — احتياج دينى. موجود دينلرده قابل استفاده اولان اقسامندن

بر دين اولق اوزره تكاملجى مونيزمه تدريجاً استقال ..... ۱۵۹

۲ — هه قل مسلكنك قيمتى — اولا بر علمى فلسفه فكبرى : هه قل علمدن فلسفه به ناصل كچر — ثانياً، فلسفه علميه دينلرى رد ايدر ويرينه قائم اولور : هه قل بر فلسفه اولان مونيزمندن

بر دين اولان مونيزمه ناصل كچر ..... ۱۸۱

۳ — زمانزده علمى فلسفه و اخلاق — فلسفه علميه : بومفهومك معقدلىكى يا خود مبهملىكى — تساند اخلاقى : بوتعبيرك مشوشلىكى

— انسان ايله اشيا نك مناسباتنه عائد ايكيلكك دوامى ..... ۲۰۰

۲۱۶ دردنجى باب — پسيقولوزيچيلك و جمعيتچيلك

طبيعت و حادثات طبيعيه : دينك غايه لرى يرينه اقامه ايديلن حادثات دينيه نك تدقيق و ملاحظه سى ..... ۲۱۶

۱ — حادثات دينيه نك پسيقولوزى نقطه نظر دن ايضاحى — حادثات دينيه نك سو بر كتيق و او بر قتيق اوله رق تدقيق و ملاحظه سى — حسن دينيك تكامل تاريخيسى — حيات روحيه نك قوانين

عموميه سى واسطه سى ايله حادثات دينيه نك ايضاحى ..... ۲۲۰

۲ — حادثات دینیه نك سوسیولوژی نقطه نظرندن ایضاحی —

سوسیولوژی نقطه نظر نك فوایدی — حادثه دینیه نك اصل ولای:

عقیده لر و آیینلر — سوسیولوژی نقطه نظرندن ایضاحاتك عدم

۲۳۴ کفایه سی ؛ دینك بر وظیفه اجتماعی اولماسی . . . . .

۳ — سوسیولوژیچیلکك وجه تجلیكك تنقیدی — بومسلکك یاقی

ایسته دیکی شیلر . — ویردکاری ایضاحات حقیقه علمی میدر؟ —

انسانلرده کی بئلك ایله جمعیات بشریه میخانیککی اسبابه قابل تشبیه میدر

— سوسیولوژیچیلکك مجبوریته دینیه حسنی ایضاحه غیر قادردر —

سوسیولوژیچیلکك حقیقی دكل فقط مفکورده کی هیئت اجتماعییه

۲۴۹ مراجعتی . . . . .

۲۷۱ ایکنجی قسم — روحیچیلکک تمایلی

برنجی باب — ریچل و جذری ایکیلکک مسلکی

دینك ، علمی نظر اعتبار آلمقده کی مجبوریتهك تسلیم ایدلمه سی .

۱ — ریچل مسلکی — ریچل : حس دینی و تاریخ دینی —

ویلهم هرمان : ایمانك تملی ایله محتویاتی آراسنده کی فرق —

۲۷۲ اوگوست ساباتییه : ایمان ایله اعتقاد آراسنده کی فرق . . . . .

۲ — ریچل مسلکكك قیمتی — دینیه خاص اولان عنصرک

انکشاف — شکرچیلکک علمنده کی مسلکك محذوری: محتویاتسز

بر سوسیوکتیفچیلکک . — عالم خارجی ایله حاضر مناسبت اولمایان

۲۸۳ بر عالم باطنیه وصول خولیاسی . . . . .

۲۹۴ ایکنجی باب — علمك حدودلری و دین

علمك عقیدوی بر نقطه نظرندن تله دینی و تلقی تنقیدی . . . . .

۱ — علمك حدودی اوزرینه ، وئسس بر ستایش دین —

تجربه نك وقوف علمییه اساس یکانه اولماسی — نتیجه لر: نظریاتده

و عملیاتده حدودلر — قوانین علمییه یالکز تحریات اصوللریدر .

— علمی وقوفلرک وقع لرله مناسبتكك حدودلری و معنای —

بوصورتله آکلاشیلان علمك انکشاف اینچون دینیه برافندی امکان

- ۲۹۷ — دینی دستورلرک نسی و عینی غایه به متوجه اوصافی . . . .
- ۲ — بر مسلک مشکلاتی — علمک افلاسی تعبیریه تولد ایدن مناقشه — هانکی علم کندیسنه حدود قبول ایدر. — بر مسلکده
- ۳۲۰ دینک مشکل موقعی . . . . .
- ۳ — علمک دینه متوجه کبی نظر ملاحظه به آلماسی — دینی مذهبیرک اماسلرینک بالذات علم طرفندن وجوده کقیریله سی ؛ بونقطة نظری محافظه ده کی مشکلات — علمک حدودلرینک ماهیتی ؛ بونر یالکیز منفی دکلدر. علمک موضوعنک شرطی اولق اوزره
- ۳۲۵ علم فوقنده برشی معناسنی تضمن ایدرلر . . . . .
- ۴ — بزدوام قالان مشکلات — علمک ودینک مختاریتلری مشکلاته اوغرایور — صرف تنقیدی بر اصولک عدم کفایه سی .
- ۳۴۵
- ۳۴۹ اوجنجی باب — فلسفه فعل وعمل
- ۱ — پراغماتیزم — مفهوم علمینک فرقی بر آمر اولماسی ؛
- ۳۵۰ پراغماتیزم نقطه نظرندن حقیقت فکری . . . . .
- ۲ — بر فعل وعمل بشری فلسفه سی فکری — علمک فعالیت بشرینک محصول انجای اولماسی — دینک روح بشرک الکرین بر آرزوسنک ساحه فعله چیقماسندن عبارت اولماسی — عقایدک صرف عمی بر طاقم حقایق اولماسی — دین ایله علمک فعل وعملک منبعیله وساطتی آراسنده کی فرقه تقابل ایتمه لری . . . .
- ۳۵۵
- ۳ — بعض مطالعات تنقیدکارانه — صرف فعالیت مفهومنده مندرج مشکلات — کرک علم کرک دین ایچون تمامیه فکری بر
- ۳۷۹ اساس بولم لرومی . . . . .
- ۳۸۶ دردنجی باب — ویلیام جهیمس و تجربه دینه
- ۱ — دین حقنده ویلیام جهیمسک مسلکی — ویلیام جهیمسک نقطه نظری: دینک شخصی وباطنی برحیات اولماسی — اصول: جذری بر تجربه جیلک — حسیات دینهک یتیشدیک روحی وعضوی زمین . صوفیه مسلکی . اصل تجربه دینه ؛ اعتقاد ابتدائی — تجربه دینهک قیمتی . پراغماتیزم نقطه نظری .

- علمی نقطه استناد اولی اوزره تختانی آنا نظریه سی. مافوق اعتقالات. ۴۸۸
- ۲ — دین ایله علمك مناسبتی حقنده ویلیام جهیمسك مسلكی —  
علم ایله دین طبیعتك خزینه لرینی آچی اچون ایکی آناختاردر. —  
ساحه شعورك پسیقولوژیسی حالات شعورك پسیقولوژیسی یرینه  
اقامه ایدیلور. — دین ایله علم. مشخص ایله مجردك بربرلردن  
فرقلی اولماسی کیدر. .... ۴۹۱
- ۳ — مطالعات تنقیدیه — دینك طبیعت بشریه دخولی و علم  
قارشیسنده کی قوتلی وضعیتی. — مشکلات: تجربه دینه ده او برقتیف  
برقیمت وارمیدر؟ عمومی سویزکتیفجیلک برچاره حل اولاماز —  
تجربه نك عنصر اساسیسی اولی اوزره ایمان — تمثالرك وظیفه  
اصلیه سی — دینرك اجتماعی جهندن قیمتی. .... ۴۹۲

### نتیجه ۴۳۸

- غیرقابل اجتناب بر مواجهه — اصل نزاع فکر علمی ایله فکر  
دینی آراسنده در. ....
- ۱ — فکر علمی ایله فکر دینینك مناسبتلری — اولاً ، فکر  
علمی — وقعه لر ، قانونلر ، نظریه لر ناصل تأسس ایدر. —  
تکاملجیلک — تجربی عقیده پرستلک — ثانیاً ، فکر دینی —  
فکر علمی ایله قابل تألیفمیدر؟ — علم ایله عقلك تفریقی — علم  
و انسان : انسان ایله علم آراسنده تمامی واتصال — حیاتك  
مصدره لر : بونلر دینك اساسلری ایله توافق ایدرلر. .... ۴۴۴
- ۲ — دین — اخلاق و دین : دینك اخلاقه علاوه ایتدیگی شی —  
مثبت اساس روحی اولی اوزره دینك زندکیمی وقابلیتی —  
ذکائی و او برقتیف عنصرك قیمتی. حیات بشریه ده مهم فکرلرك  
وظیفه سی — عقاید — آیدنلر — مساعده کارلنك عشقه تحویلی. .... ۴۷۹





